

標點校勘本

# 高麗史

孫曉主編

西南師範大學出版社  
人民出版

一  
世家「一」

ISBN 978-7-5621-6595-8



定價：780.00元（全10冊）



標點校勘本

# 高麗史

一

世家「一」

孫曉 主編



西南師範大學出版社  
人天出版

## 圖書在版編目（CIP）數據

高麗史 /（朝）鄭麟趾等著；孫曉主編．—重慶：  
西南師範大學出版社；北京：人民出版社，2013.12

（域外漢籍珍本文庫）

ISBN 978-7-5621-6595-8

I. ①高… II. ①鄭… ②孫… III. ①高麗（918～  
1392）—史料 IV. ①K312.33

中國版本圖書館 CIP 數據核字（2014）第 001374 號

---

國家出版基金資助項目·域外漢籍珍本文庫

高麗史 標點校勘本

〔朝鮮〕鄭麟趾等著 孫曉 主編

---

責任編輯：郭曉娜

版式設計：郭清霞

封面設計：趙 晶

出版發行：西南師範大學出版社

地址 重慶市北碚區天生路 2 號 郵政編碼 400715

<http://www.xscbs.com>

人 民 大 學 出 版 社

地址 北京市朝陽門內大街 166 號 郵政編碼 100706

<http://www.peoplepress.net>

經 銷：全國新華書店

印 刷：香河華林印務有限公司

開 本：710mm×1000mm 1/16

印 張：266

版 次：2014 年 11 月第 1 版

印 次：2014 年 11 月第 1 次

書 號：ISBN 978-7-5621-6595-8

---

定 價：780.00 元（全 10 冊）

主 編：孫 曉

副主編：楊寶玉 趙 凱 翟金明

校勘者：王 林 王仁霞 左全琴 安子毓 江 靜

杜艷茹 沈冬梅 姜 智 紀雪娟 胡振宇

孫 曉 徐林平 寇 騫 楊寶玉 翟金明

趙 凱 劉 英 劉中玉 劉艷強 閻 征

(按姓氏筆劃排列)



## 出版說明

《高麗史》是朝鮮李朝官修的紀傳體史書，記載王氏高麗三十四代國王四百七十五年的歷史，共 139 卷，其中目錄 2 卷、世家 46 卷、志 39 卷、表 2 卷、列傳 50 卷。由於高麗時期的文獻大多散佚失傳，《高麗史》的記載就成為研究高麗王朝歷史最主要的資料，價值十分重要。

《高麗史》的編撰經過半個多世紀，許多學人都參與過編撰工作，如高麗末期和李朝初期的士大夫鄭道傳、鄭總等。該書最終定稿於李朝文宗元年（1451），撰修者有鄭麟趾、金銚、李先齊、鄭昌孫、辛碩祖、崔恒、盧叔同、李石亨、申叔舟等三十二人，總纂為鄭麟趾。

《高麗史》傳世本主要有明景泰二年（1451）朝鮮乙亥字銅活字本、韓國奎章閣藏光海君覆刻乙亥字本、日本築波大學藏江戶時期影鈔本、日本明治四十三年（1910）圖書刊行會鉛活字本、1958 年朝鮮科學院古典研究出版委員會排印本。其中，明景泰二年朝鮮乙亥銅活字本刊行較早，並收入中國的《四庫全書存目叢書》，然此本字跡多有汙損，反不及光海君覆刻本清晰。其餘諸本，均為此本之景鈔及排印。此次整理，以光海君本

為底本。

《高麗史》編出以後，又有金宗瑞的《高麗史節要》、俞柴的《麗史提綱》及洪汝河的《彙纂麗史》等書問世。此次整理，利用《高麗史節要》、《東國通鑑》及《東文選》中有關詔敕、教書、冊、表箋、奏議、墓誌等資料進行參校。

李朝在修史過程中，繼承中國史書的正統觀念，如《高麗史》世家與中國史書中的本紀相同，但因高麗和李朝奉中國正朔，故“按《史記》，天子曰紀，諸侯曰世家，今撰《高麗史》”，“避本紀為世家，所以示名分之重”。但是，為了“以存事實”，凡高麗原來“稱宗、稱陛下、太后、太子、節日、制詔之類，雖涉僭逾”，該書仍以“當時所稱書之”。

另外，《高麗史》還繼承了以史為鑑的精神及史書編纂的經驗。該書一般仿照中國紀傳體史書的體例。世家部分為高麗三十四代國王的傳記，即太祖、惠宗、定宗、光宗、景宗、成宗、穆宗、顯宗、德宗、靖宗、文宗、順宗、宣宗、獻宗、肅宗、睿宗、仁宗、毅宗、明宗、神宗、熙宗、康宗、高宗、元宗、忠烈王、忠宣王、忠肅王、忠惠王、忠穆王、忠定王、恭愍王、禔王、昌王、恭讓王。但其中的禔王（名王禔）及其子昌王（名王昌），由於被認為是權臣辛旽的子孫，故改為辛禔、辛昌，“降偽辛於列傳，所次嚴僭竊之誅。”故《高麗史》世家無禔、昌二王，而是將其置於辛禔附辛昌列傳（卷133-137）。此次整理，仍按原書各卷順

序，並未對此進行調整。

《高麗史》的志書與中國典籍頗有聯繫。首先，其設置依《元史》，共十二志，即天文志、曆志、五行志、地理志、禮志、樂志、輿服志、選舉志、百官志、食貨志、兵志、刑志，內容“條分類聚，使覽者易考”。其次，編纂志書所用史料，有些可補正中國史籍，如《曆一》中關於“宣明曆”的記載，及《樂志》中宋詞佚文的保存等即是。再次，《高麗史》與中國史籍可以在文字和史實方面，進行互校。

在《高麗史》年表中，高麗年號與中國年號並用，上有干支紀年，中有中國歷朝年號（上國），下為高麗歷朝國王年代（高麗），大事內容分別記入年號及年代之下。自“後梁末帝貞明四年（918）、契丹太祖神冊三年、（高麗）太祖天授元年”起，至“大明洪武二十五年（1392）、恭讓王四年”止。這種安排方式，一方面從時間上表明了中國歷代王朝與高麗的關係，另一方面也是對世家內容部分更簡明的敘述方式。

關於以《高麗史》校中國史籍，如《元史》授時曆、《金史·交聘表》中關於高麗史實，可為例證。關於以中國史籍校《高麗史》，則有以《唐書》、《宋史》對《高麗史·曆一》及《樂一》中有關文字的校正等。

除了在文獻上可與中國史籍相比較之外，《高麗史》對於中國史實的一些記載，同樣也可以有補史和證史的作用。如朱彝尊《曝書亭序跋》卷十便有一些例子，其《跋高麗史書後》云：“觀其體例，有條不紊，王氏一



代之文獻，有足徵者。卷中《樂志》歌辭，率本宋裕陵（宋徽宗）所賜大晟府樂譜。若《輿服志》載蒙古俗剃頂至額，方其形，留髮其中，謂之開剃。忠烈王四年（1278）二月，令境內皆服上國衣冠、開剃。十九年（1293）九月，百官始著笠朝謁。此《元史》所不載。至若戊申（1368）君遁走沙漠之後君臣事蹟，不得而詳。高麗間猶通使，稱為北元。北元主奔應昌，以洪武三年庚戌四月殂落，國人追謚曰惠宗，即順帝也。其子嗣立，以餘兵走和林。十年丁巳，遣使至高麗，行宣光年號，國人不允。後二年，又遣僉院甫非告紀年天元。辛禍遣永寧君王彬往賀，相傳立十一年而殂，北元謚為昭宗者也。凡此明之載籍皆隱而不書，藉其史略存事蹟，後之論世紀年者，所當述也。”

此次整理，側重於文字、標點、分段、校勘等幾個方面。

文字方面，本著統一規範的原則，一般將原書中異體字、舊體字統改為規範字體，如一字有多個異體字，亦一併統一。如“辭”、“辭”統一為“辭”，“勅”、“勅”統一為“敕”等。一些因音形相近而訛的字，如“諫”與“諫”，“淫”與“淫”，“達”與“達”，“段”與“段”，“諂”與“諂”等，亦作統一修改。原書中因版刻造成的文字偏旁部首錯誤及異形字，也一併徑改，如“狄”與“狄”。《高麗史》對於一些音形相似、字意相關的字詞的使用，存在前後不一的情況，我們依據文意及相關資料，予以統一。如“齊”與

“齋”，“圓丘”與“園丘”等。原書中對於“大”、“太”二字混用，在文中把“大”應作“太”字的相應詞語徑改為“太”，不另注明。而對於其中官名、地名、人名用字，則沿用原書文字。

校勘記使用的原則為：文字引起誤解，則改正後出校勘記說明。一般因文字形近、音似而誤的，則不出校勘記，只加增刪符號，以方括弧表示增字，以圓括號表示刪字。另外，對於原書中出現各種文字及史實錯誤，也根據相關資料進行修改。一，人名前後不一，如金天佑（卷35、124）與金天祐（卷35、36）、姜拯（卷11）與康拯（卷11-14、97），則參考上下文及相關資料，進行統一。二，文字脫漏，如卷136“旌其間”，並不言何人因何事，據《高麗史節要》，方知此前有“以光州人盧俊恭廬墓服喪三年”脫文，故酌補。三，據文意明顯為錯誤，如卷99《庾應圭傳》“數至僵什”，“什”當作“仆”，遂改。四，《高麗史》中引用中國典籍，以經書、正史、別集為主，如引《易》、《書》、《詩》、《論語》、《漢書》、《京房易傳》，及《樂志》中所引宋代詞曲，或為直接引用，或為間接引用，或不見於今本，如有異文、誤字等情況，則以校勘記說明。

原書段落時有不妥，一是文字分段不合理，二是標題與內容之間區別不清。此次整理，採取世家依年、月分段，傳依事件分段，志依典章制度分段的做法。原書中以空格句讀者，亦作為分段依據。

原書標題設置偶有不妥當，如標題設置不完整，前

後不一致等，這些都不便於讀者閱讀。因此，我們除了固定三級標題之外，還採用字體加黑、前空一行等方式，對原書內容進行區別，如禮、樂部分即是。以此保持全書的規範統一，清晰明了。

《高麗史》中還有一類文體，特別不容易理解。這些文獻詞語奇特、句法乖戾，既不能用古漢語書面語來點校，也與元代漢語口語不同。這些文字不遵循漢語原有的語法規律與用語習慣，從蒙古語原文機械地翻譯過來，而且還用於詔書等公文，如卷23、44、135、136中收錄的元代蒙古公文體。對此，我們參考了亦鄰真先生《元代硬譯公牘文體》一文，並請高榮盛先生對此類文字進行了審讀。

除了以上問題之外，由於高麗與中國王朝的關係並不穩固，再加上中國王朝的更迭，以及當時的信息傳播等原因，《高麗史》中的一些記載，存在混亂與疏漏。如高麗建國以後，即從中國五代後梁開始，一直使用中國各王朝的年號，高麗國王在登基時，須經過中國皇帝冊封。故而，在一些問題上有反映，且保留了一些原來的習慣名稱，如稱詔書等。另外，對於高麗末期的歷史，由於涉及李朝較多，其記載也有一些問題。書中將禡王和昌王定為辛旽的子孫，而後人多對此持懷疑態度。如《韓國歷代小史》認為，“廢王名禡，恭湣王之子”。小史作者還說：“按世之譏高麗史者有二說：一曰太蕪，一曰不實。然是史自恭湣王以後，出於鄭麟趾，而誠有蕪病也……不實者，辛氏一案之謂也。”正因為



鄭麟趾自身的傾向，造成了在對高麗末這段歷史的處理過程中，存在歪曲和醜化，並且極力對李朝太祖李成桂進行誇張，甚至神化。這也是歷代王朝修前代史的通病，這就需要歷史研究者對此加以研究和鑑別。

《高麗史》志書部分係記載高麗王朝的典章制度，各志中分成若干條目，分別敘述。志書部分十分重要，整理起來也具有相當大的難度。為此，我們請相關專家對稿件進行審讀，分別是陳久金先生（天文），李忠林先生（曆），閻征先生（五行），梁滿倉先生（禮、樂、輿服、選舉），李花子先生（地理），在此向諸位先生表示感謝。

由於書中涉及大量高麗時期官職、人物、地名等，這是我們整理工作中的難點與重點，我們參考了《高麗史》網頁（<http://db.history.go.kr/KOREA/>），這對於我們訂正點校過程中出現的一些錯誤，頗有幫助，在此亦表示感謝。

這部《高麗史》的標點校勘，歷時三年，反復校改四遍，每一次都能發現一些新的問題。古人說“校書如掃塵，一面掃，一面生”（宋沈括《夢溪筆談·雜誌二》），在這三年裏，我們有切身的體悟。參與這項工作的同仁，最初大多對高麗史比較陌生，工作的過程也是學習的過程。儘管我們已盡全力，然受自身能力與時間的限制，標點校勘本《高麗史》還會存在不少疏誤，所以，我們懇切期望讀者專家不吝賜教，以待來日再版予以修訂。

## 凡 例

一、本書以奎章閣藏光海君覆刻乙亥字本爲底本，參以明景泰二年（1451）朝鮮乙亥銅活字本、日本明治四十三年（1910）圖書刊行會鉛活字本及江戶影鈔本。

二、版式採用繁體橫排。原則上以底本爲標準進行校改，但底本以擡頭、空格及小號字表尊卑之格式，皆不予保留。

三、正文大字用書宋小四號，小字用書宋小五號。原書雙行小字皆改爲單行。

四、底本若有衍、漏、訛字，在校本相應位置填補或改正，衍字、訛字用“（）”標明，補字、正字用“〔〕”標明，需解釋說明處，出校勘記。原有缺字若未能校補，則代之以“□”，不出校記。

五、原書中的明顯錯誤，如需說明校勘理由，則以簡潔文字出校勘記。

六、本書除人名、地名、書名和個別職官名稱之外，原則上不使用異體字。底本中的缺筆字、避諱字、怪字、俗字，在校本中一般改爲正字。

七、通假字一般不改爲本字。可能影響閱讀的個別不常見通假字，出校記說明其本字。

八、本書使用句號、逗號、頓號、問號、感嘆號、

引號（包括雙引號與單引號）、分號、書名號，不使用破折號、省略號、連字符等符號。

九、爲便於閱讀，儘量點斷爲短句，并根據內容適當分段。分段原則如下：世家依年、月等時間分段，傳依事件分段，志依典章制度內容分段。原書中以空格句讀者，亦作爲分段依據。



# 目 錄

## 第一冊

高麗世系 .....	1
纂修高麗史凡例 .....	9
進高麗史箋 .....	11
高麗史一 世家卷第一 .....	13
太祖一 .....	13
高麗史二 世家卷第二 .....	33
太祖二 .....	33
惠宗 .....	46
定宗 .....	49
光宗 .....	51
景宗 .....	55
高麗史三 世家卷第三 .....	59
成宗 .....	59

穆宗 .....	80
高麗史四 世家卷第四 .....	87
顯宗一 .....	87
高麗史五 世家卷第五 .....	121
顯宗二 .....	121
德宗 .....	137
高麗史六 世家卷第六 .....	149
靖宗 .....	149
高麗史七 世家卷第七 .....	179
文宗一 .....	179
高麗史八 世家卷第八 .....	211
文宗二 .....	211
高麗史九 世家卷第九 .....	241
文宗三 .....	241
順宗 .....	268
高麗史十 世家卷第十 .....	271
宣宗 .....	271
獻宗 .....	296
高麗史十一 世家卷第十一 .....	303
肅宗一 .....	303
高麗史十二 世家卷第十二 .....	335
肅宗二 .....	335

睿宗一 .....	346
高麗史十三 世家卷第十三 .....	367
睿宗二 .....	367
高麗史十四 世家卷第十四 .....	397
睿宗三 .....	397

## 第二冊

高麗史十五 世家卷第十五 .....	433
仁宗一 .....	433
高麗史十六 世家卷第十六 .....	467
仁宗二 .....	467
高麗史十七 世家卷第十七 .....	505
仁宗三 .....	505
毅宗一 .....	521
高麗史十八 世家卷第十八 .....	543
毅宗二 .....	543
高麗史十九 世家卷第十九 .....	581
毅宗三 .....	581
明宗一 .....	589
高麗史二十 世家卷第二十 .....	613
明宗二 .....	613

高麗史二十一 世家卷第二十一 .....	647
神宗 .....	647
熙宗 .....	661
康宗 .....	668
高麗史二十二 世家卷第二十二 .....	673
高宗一 .....	673
高麗史二十三 世家卷第二十三 .....	707
高宗二 .....	707
高麗史二十四 世家卷第二十四 .....	741
高宗三 .....	741
高麗史二十五 世家卷第二十五 .....	781
元宗一 .....	781
高麗史二十六 世家卷第二十六 .....	807
元宗二 .....	807
高麗史二十七 世家卷第二十七 .....	837
元宗三 .....	837

### 第三冊

高麗史二十八 世家卷第二十八 .....	873
忠烈王一 .....	873
高麗史二十九 世家卷第二十九 .....	911

忠烈王二 .....	911
高麗史三十 世家卷第三十 .....	951
忠烈王三 .....	951
高麗史三十一 世家卷第三十一 .....	987
忠烈王四 .....	987
高麗史三十二 世家卷第三十二 .....	1017
忠烈王五 .....	1017
高麗史三十三 世家卷第三十三 .....	1045
忠宣王一 .....	1045
高麗史三十四 世家卷第三十四 .....	1075
忠宣王二 .....	1075
忠肅王一 .....	1082
高麗史三十五 世家卷第三十五 .....	1101
忠肅王二 .....	1101
高麗史三十六 世家卷第三十六 .....	1131
忠惠王 .....	1131
高麗史三十七 世家卷第三十七 .....	1157
忠穆王 .....	1157
忠定王 .....	1170
高麗史三十八 世家卷第三十八 .....	1179
恭愍王一 .....	1179
高麗史三十九 世家卷第三十九 .....	1203

恭愍王二 .....	1203
高麗史四十 世家卷第四十 .....	1237
恭愍王三 .....	1237
高麗史四十一 世家卷第四十一 .....	1267
恭愍王四 .....	1267
高麗史四十二 世家卷第四十二 .....	1291
恭愍王五 .....	1291
高麗史四十三 世家卷第四十三 .....	1309
恭愍王六 .....	1309
高麗史四十四 世家卷第四十四 .....	1327
恭愍王七 .....	1327

## 第四冊

高麗史四十五 世家卷第四十五 .....	1351
恭讓王一 .....	1351
高麗史四十六 世家卷第四十六 .....	1379
恭讓王二 .....	1379
高麗史四十七 志卷第一 .....	1411
天文一 .....	1411
日薄食暈珥及日變 .....	1411
高麗史四十八 志卷第二 .....	1457

天文二 .....	1457
月五星凌犯及星變 .....	1457
高麗史四十九 志卷第三 .....	1497
天文三 .....	1497
月五星凌犯及星變 .....	1497
高麗史五十 志卷第四 .....	1529
曆一 .....	1529
宣明曆上 .....	1530
宣明步氣朔術第一 .....	1530
宣明步發斂術第二 .....	1532
宣明步日躔術第三 .....	1535
宣明步月離術第四 .....	1542
宣明步晷漏術第五 .....	1555
步交會術第六 .....	1562
高麗史五十一 志卷第五 .....	1573
曆二 .....	1573
授時曆經上 .....	1573
步氣朔第一 .....	1573
步發斂第二 .....	1576
步日躔第三 .....	1578
步月離第四 .....	1590
步中星第五 .....	1598

步交會第六 .....	1612
高麗史五十二 志卷第六 .....	1619
曆三 .....	1619
授時曆經下 .....	1619
步五星第七 .....	1619
高麗史五十三 志卷第七 .....	1679
五行一 .....	1679
高麗史五十四 志卷第八 .....	1725
五行二 .....	1725
高麗史五十五 志卷第九 .....	1759
五行三 .....	1759

## 第五冊

高麗史五十六 志卷第十 .....	1781
地理一 .....	1781
高麗史五十七 志卷第十一 .....	1805
地理二 .....	1805
高麗史五十八 志卷第十二 .....	1843
地理三 .....	1843
高麗史五十九 志卷第十三 .....	1871
禮一 .....	1871



吉禮大祀 .....	1872
園丘 .....	1872
方澤 .....	1891
社稷 .....	1892
高麗史六十 志卷第十四 .....	1901
禮二 .....	1901
吉禮大祀 .....	1901
太廟 .....	1901
禘祫功臣配享於庭 .....	1926
高麗史六十一 志卷第十五 .....	1929
禮三 .....	1929
太廟 .....	1929
別廟 .....	1948
景靈殿 .....	1953
諸陵 .....	1954
高麗史六十二 志卷第十六 .....	1967
禮四 .....	1967
吉禮中祀 .....	1967
籍田 .....	1967
先蠶 .....	1982
文宣王廟 .....	1987
高麗史六十三 志卷第十七 .....	2001

禮五 .....	2001
吉禮小祀 .....	2001
風師雨師雷神靈星 .....	2001
馬祖 .....	2005
先牧馬社馬步 .....	2007
司寒 .....	2009
諸州縣文宣王廟 .....	2011
大夫庶人祭禮 .....	2015
雜祀 .....	2016
高麗史六十四 志卷第十八 .....	2021
禮六 .....	2021
凶禮 .....	2021
國恤 .....	2021
陳慰儀 .....	2029
祔太廟儀 .....	2029
上國使祭奠贈賻弔慰儀 .....	2031
先王諱辰真殿酌獻儀 .....	2032
上國喪 .....	2033
隣國喪 .....	2035
諸臣喪 .....	2035
五服制度 .....	2037
百官忌暇 .....	2042

重刑奏對儀 .....	2043
軍禮 .....	2044
遣將出征儀 .....	2044
師還儀 .....	2045
救日月食儀 .....	2048
季冬大儺儀 .....	2049
高麗史六十五 志卷第十九 .....	2053
禮七 .....	2053
賓禮 .....	2053
迎北朝詔使儀 .....	2053
迎北朝起復告敕使儀 .....	2054
迎大明詔使儀 .....	2055
迎大明賜勞使儀 .....	2057
迎大明無詔敕使儀 .....	2058
嘉禮 .....	2062
冊太后儀 .....	2062
冊王妃儀 .....	2066
元子誕生賀儀 .....	2074
高麗史六十六 志卷第二十 .....	2077
禮八 .....	2077
嘉禮 .....	2077
冊王太子儀 .....	2077

王太子稱名立府儀 .....	2087
王太子加元服儀 .....	2089
王太子納妃儀 .....	2097
高麗史六十七 志卷第二十一 .....	2103
禮九 .....	2103
嘉禮 .....	2103
冊王子王姬儀 .....	2103
公主下嫁儀 .....	2110
進大明表箋儀 .....	2113
元正冬至上國聖壽節望闕賀儀 .....	2115
元正冬至節日朝賀儀 .....	2116
元會儀 .....	2118
王太子元正冬至受群官賀儀 .....	2120
王太子節日受官官賀並會儀 .....	2121
人日賀儀 .....	2124
立春賀儀 .....	2125
新雪賀儀 .....	2125
宥旨賀儀 .....	2125
一月三朝儀 .....	2126
親祀園丘後齋官受賀儀 .....	2129
高麗史六十八 志卷第二十二 .....	2131
禮十 .....	2131

嘉禮 .....	2131
大觀殿宴群臣儀 .....	2131
老人賜設儀 .....	2136
宣麻儀 .....	2140
東堂監試放榜儀 .....	2141
儀鳳門宣赦書儀 .....	2142
親祀園丘後肆赦儀 .....	2146
朝野通行禮儀 .....	2147
宰樞謁諸王儀 .....	2148
兩府宰樞合坐儀 .....	2149
六官諸曹官相謁儀 .....	2149
諸都監各色官相會儀 .....	2150
參上參外人吏掌固謁宰樞及人吏掌固謁參上參外儀 ...	2150
文武員將人吏起居儀 .....	2151
監獄日臺省內侍坐起儀 .....	2151
按察使別銜及外官迎行幸儀 .....	2151
外官迎本國詔書儀 .....	2151
外官問聖儀 .....	2152
新及第進士榮親儀 .....	2152
外官出官儀 .....	2153
三品使臣按察使相會儀 .....	2153
按廉諸別銜相會儀 .....	2154

兵馬使及軍官拜坐儀 .....	2154
北界營主副使及幕下員相會儀 .....	2155
兩界兵馬使廳行禮儀 .....	2156
外方城上錄事謁宰臣及外官迎宰臣儀 .....	2156
諸道計點使中護評理尹使相會儀 .....	2157
平壤府尹迎觀察使儀 .....	2157
牧都護知州員同坐儀 .....	2158
外官迎兵馬使及兵馬使外官迎銜命宰樞儀 .....	2158
外官遙謝改銜儀 .....	2158
西京官寮加職遙謝儀 .....	2159
防禦員將謁按廉及參上官儀 .....	2159
高麗史六十九 志卷第二十三 .....	2161
禮十一 .....	2161
嘉禮雜儀 .....	2161
上元燃燈會儀 .....	2161
仲冬八關會儀 .....	2169

## 第六冊

高麗史七十 志卷第二十四 .....	2187
樂一 .....	2187
雅樂 .....	2187

親祠登歌軒架 .....	2187
有司攝事登歌軒架 .....	2189
登歌樂器 .....	2190
軒架樂器 .....	2192
登歌軒架樂迭奏節度 .....	2194
軒架樂獨奏節度 .....	2196
太廟樂章 .....	2199
宋新賜樂器 .....	2206
用鼓吹樂節度 .....	2208
高麗史七十一 志卷第二十五 .....	2211
樂二 .....	2211
唐樂 .....	2211
樂器 .....	2211
獻仙桃 .....	2211
壽延長 .....	2214
五羊仙 .....	2215
拋毬樂 .....	2217
蓮花臺 .....	2220
惜奴嬌 .....	2221
萬年歡 .....	2223
憶吹簫 .....	2223
洛陽春 .....	2224

月華清 .....	2224
轉花枝 .....	2224
感皇恩 .....	2225
醉太平 .....	2225
夏雪峰 .....	2226
醉蓬萊 .....	2226
黃河清 .....	2226
還宮樂 .....	2227
清平樂 .....	2227
荔子丹 .....	2227
水龍吟 .....	2228
傾杯樂 .....	2228
太平年 .....	2228
金殿樂 .....	2229
行香子 .....	2229
安平樂 .....	2229
愛月夜眠遲 .....	2230
惜花春早起 .....	2230
帝臺春 .....	2230
千秋歲 .....	2231
風中柳 .....	2231
漢宮春 .....	2231



花心動 .....	2232
雨淋鈴 .....	2233
行香子 .....	2233
雨中花 .....	2233
迎春樂 .....	2234
浪淘沙 .....	2234
御街行 .....	2234
西江月 .....	2235
遊月宮 .....	2235
少年遊 .....	2235
桂枝香 .....	2236
慶金枝 .....	2236
百寶粧 .....	2236
滿朝歡 .....	2237
天下樂 .....	2237
感恩多 .....	2237
臨江仙 .....	2238
解佩 .....	2238
俗樂 .....	2239
樂器 .....	2239
舞鼓 .....	2239
動動 .....	2240

無尋 .....	2240
西京 .....	2241
大同江 .....	2241
五冠山 .....	2241
楊州 .....	2241
月精花 .....	2242
長湍 .....	2242
定山 .....	2242
伐谷鳥 .....	2242
元興 .....	2242
金剛城 .....	2243
長生浦 .....	2243
叢石亭 .....	2243
居士戀 .....	2243
處容 .....	2244
沙里花 .....	2244
長巖 .....	2244
濟危寶 .....	2245
安東紫青 .....	2245
松山 .....	2245
禮成江 .....	2245
冬柏木 .....	2246

寒松亭 .....	2246
鄭瓜亭 .....	2246
風入松 .....	2247
夜深詞 .....	2247
翰林別曲 .....	2248
三藏 .....	2249
蛇龍 .....	2249
紫霞洞 .....	2250
三國俗樂 .....	2251
新羅 .....	2251
百濟 .....	2252
高勾麗 .....	2253
用俗樂節度 .....	2254
高麗史七十二 志卷第二十六 .....	2257
輿服 .....	2257
冠服 .....	2258
王冠服 .....	2258
祭服 .....	2259
視朝之服 .....	2260
王妃冠服 .....	2261
王世子冠服 .....	2261
百官祭服 .....	2261

朝服 .....	2264
公服 .....	2264
長吏公服 .....	2265
冠服通制 .....	2265
輿輅 .....	2268
王輿輅 .....	2268
王世子輿輅 .....	2269
命婦車 .....	2269
印章 .....	2270
王印章 .....	2270
王世子印章 .....	2270
諸衙門印 .....	2271
符驗 .....	2271
儀衛 .....	2271
朝會儀仗 .....	2271
法駕衛仗 .....	2273
燃燈衛仗 .....	2278
八關衛仗 .....	2280
西南京巡幸衛仗 .....	2283
奉迎衛仗 .....	2285
宣赦儀仗 .....	2288
鹵簿 .....	2289

法駕鹵簿 .....	2289
燃燈鹵簿 .....	2292
八關鹵簿 .....	2294
巡幸奉迎鹵簿 .....	2294
宣赦鹵簿 .....	2296
小駕鹵簿 .....	2297
王太子鹵簿 .....	2297
百官儀從 .....	2299
外官衙從 .....	2301
高麗史七十三 志卷第二十七 .....	2303
選舉一 .....	2303
科目一 .....	2304
高麗史七十四 志卷第二十八 .....	2339
選舉二 .....	2339
科目二 .....	2339
學校 .....	2357
高麗史七十五 志卷第二十九 .....	2367
選舉三 .....	2367
銓注 .....	2367
高麗史七十六 志卷第三十 .....	2403
百官一 .....	2403
高麗史七十七 志卷第三十一 .....	2435

百官二 .....	2435
內職 .....	2448
宗室諸君 .....	2248
異姓諸君 .....	2449
東宮官 .....	2449
諸妃主府 .....	2451
諸王子府 .....	2451
諸司都監各色 .....	2452
西班 .....	2461
外職 .....	2463
勳 .....	2470
爵 .....	2470
文散階 .....	2471
武散階 .....	2473
高麗史七十八 志卷第三十二 .....	2475
食貨一 .....	2475
田制 .....	2476
經理 .....	2476
田柴科 .....	2479
功蔭田柴 .....	2486
公廩田柴 .....	2487
祿科田 .....	2489

踏驗損實 .....	2504
租稅 .....	2505
貢賦 .....	2509
高麗史七十九 志卷第三十三 .....	2513
食貨二 .....	2513
戶口 .....	2513
農桑 .....	2515
貨幣 .....	2519
市估 .....	2523
鹽法 .....	2525
科斂 .....	2527
借貸 .....	2533
漕運 .....	2536
高麗史八十 志卷第三十四 .....	2539
食貨三 .....	2539
祿俸 .....	2539
妃主祿 .....	2540
宗室祿 .....	2540
文武班祿 .....	2540
權務官祿 .....	2544
東官官祿 .....	2546
致仕官祿 .....	2547

西京官祿 .....	2547
外官祿 .....	2548
州鎮將相將校祿 .....	2551
雜別賜 .....	2551
諸衙門工匠別賜 .....	2552
常平義倉 .....	2557
賑恤 .....	2559
恩免之制 .....	2559
災免之制 .....	2564
鰥寡孤獨賑貸之制 .....	2567
水旱疫癘賑貸之制 .....	2569
納粟補官之制 .....	2574

## 第七冊

高麗史八十一 志卷第三十五 .....	2577
兵一 .....	2577
兵制 .....	2578
二軍 .....	2578
六衛 .....	2578
諸府 .....	2578
別號諸班 .....	2578



五軍 .....	2579
高麗史八十二 志卷第三十六 .....	2601
兵二 .....	2601
宿衛 .....	2601
鎮戍 .....	2603
站驛 .....	2607
馬政 .....	2617
城堡 .....	2619
屯田 .....	2625
兵糧附 .....	2626
高麗史八十三 志卷第三十七 .....	2631
兵三 .....	2631
看守軍 .....	2631
圍宿軍 .....	2633
檢點軍 .....	2636
州縣軍 .....	2637
北界 .....	2637
東界 .....	2644
交州道 .....	2647
楊廣道 .....	2648
慶尚道 .....	2649
全羅道 .....	2650

西海道	2651
京畿	2651
船軍	2652
工役軍	2653
高麗史八十四 志卷第三十八	2655
刑法一	2655
名例	2656
答刑五	2656
杖刑五	2656
徒刑五	2656
流刑三	2657
死刑二	2657
刑杖式	2657
辜限	2657
禁刑	2658
公式	2658
相避	2658
官吏給暇	2659
避馬式	2661
公牒相通式	2663
職制	2666
奸非	2681

戶婚 .....	2682
大惡 .....	2685
殺傷 .....	2687
高麗史八十五 志卷第三十九 .....	2689
刑法二 .....	2689
禁令 .....	2689
盜賊 .....	2706
捕盜附 .....	2707
軍律 .....	2707
恤刑 .....	2708
訴訟 .....	2713
奴婢 .....	2716
高麗史八十六 表卷第一 .....	2723
年表一 .....	2723
高麗史八十七 表卷第二 .....	2743
年表二 .....	2743
高麗史八十八 列傳卷第一 .....	2763
后妃一 .....	2763
神惠王后柳氏 .....	2763
莊和王后吳氏 .....	2764
神明王太后劉氏 .....	2765
神靜王太后皇甫氏 .....	2765

神成王太后金氏 .....	2766
貞德王后柳氏 .....	2766
獻穆大夫人平氏 .....	2767
貞穆夫人王氏 .....	2767
東陽院夫人庾氏 .....	2767
肅穆夫人 .....	2767
天安府院夫人林氏 .....	2767
興福院夫人洪氏 .....	2767
後大良院夫人李氏 .....	2767
大溟州院夫人王氏 .....	2767
廣州院夫人王氏 .....	2767
小廣州院夫人王氏 .....	2768
東山院夫人朴氏 .....	2768
禮和夫人王氏 .....	2768
大西院夫人金氏 .....	2768
小西院夫人金氏 .....	2768
西殿院夫人 .....	2768
信州院夫人康氏 .....	2768
月華院夫人 .....	2768
小黃州院夫人 .....	2768
聖茂夫人朴氏 .....	2768
義城府院夫人洪氏 .....	2769

月鏡院夫人朴氏 .....	2769
夢良院夫人朴氏 .....	2769
海良院夫人 .....	2769
義和王后林氏 .....	2769
後廣州院夫人王氏 .....	2769
清州院夫人金氏 .....	2769
官人哀伊主 .....	2769
文恭王后朴氏 .....	2770
文成王后朴氏 .....	2770
清州南院夫人金氏 .....	2770
大穆王后皇甫氏 .....	2770
慶和宮夫人林氏 .....	2770
獻肅王后金氏 .....	2771
獻懿王后劉氏 .....	2771
獻哀王太后皇甫氏 .....	2771
獻貞王后皇甫氏 .....	2771
大明宮夫人柳氏 .....	2772
文德王后劉氏 .....	2772
文和王后金氏 .....	2772
延昌宮夫人崔氏 .....	2773
宣正王后劉氏 .....	2773
官人金氏 .....	2773

元貞王后金氏 .....	2773
元和王后崔氏 .....	2773
元城太后金氏 .....	2774
元惠太后金氏 .....	2774
元容王后柳氏 .....	2774
元穆王后徐氏 .....	2775
元平王后金氏 .....	2775
元順淑妃金氏 .....	2775
元質貴妃王氏 .....	2775
貴妃庾氏 .....	2775
官人韓氏 .....	2776
官人李氏 .....	2776
官人朴氏 .....	2776
敬成王后金氏 .....	2776
敬穆賢妃王氏 .....	2776
孝思王后金氏 .....	2776
李氏 .....	2776
劉氏 .....	2776
容信王后韓氏 .....	2776
容懿王后韓氏 .....	2777
容穆王后李氏 .....	2777
容節德妃金氏 .....	2777

延昌宮主盧氏 .....	2777
仁平王后金氏 .....	2777
仁睿順德太后李氏 .....	2777
仁敬賢妃李氏 .....	2778
仁節賢妃李氏 .....	2779
仁穆德妃金氏 .....	2779
貞懿王后王氏 .....	2779
宣禧王后金氏 .....	2779
長慶宮主李氏 .....	2779
貞信賢妃李氏 .....	2779
思肅太后李氏 .....	2779
元信宮主李氏 .....	2780
明懿太后柳氏 .....	2780
敬和王后李氏 .....	2782
文敬太后李氏 .....	2782
文貞王后王氏 .....	2784
淑妃崔氏 .....	2784
廢妃李氏 .....	2784
廢妃李氏 .....	2784
恭睿太后任氏 .....	2784
宣平王后金氏 .....	2787
莊敬王后金氏 .....	2787

莊宣王后崔氏 .....	2787
光靖太后金氏 .....	2787
宣靖太后金氏 .....	2788
成平王后任氏 .....	2788
思平王后李氏 .....	2790
元德太后柳氏 .....	2790
安惠太后柳氏 .....	2790
順敬太后金氏 .....	2791
慶昌宮主柳氏 .....	2791
高麗史八十九 列傳卷第二 .....	2793
后妃二 .....	2793
齊國大長公主 .....	2793
貞信府主王氏 .....	2800
淑昌院妃金氏 .....	2801
薊國大長公主 .....	2801
懿妃 .....	2803
靜妃王氏 .....	2804
順和院妃洪氏 .....	2804
妃趙氏 .....	2804
順妃許氏 .....	2804
濮國長公主 .....	2804
曹國長公主 .....	2805



慶華公主 .....	2805
明德太后洪氏 .....	2805
壽妃權氏 .....	2809
德寧公主 .....	2809
禧妃尹氏 .....	2810
和妃洪氏 .....	2810
銀川翁主林氏 .....	2811
魯國大長公主 .....	2811
惠妃李氏 .....	2814
益妃韓氏 .....	2814
定妃安氏 .....	2814
慎妃廉氏 .....	2816
順妃盧氏 .....	2816
高麗史九十 列傳卷第三 .....	2817
宗室一 .....	2817
太子泰 .....	2817
文元大王貞 .....	2818
戴宗旭 .....	2818
安宗郁 .....	2818
王位君 .....	2819
仁愛君 .....	2819
元莊太子 .....	2819

助伊君 .....	2819
壽命太子 .....	2819
孝穆太子義 .....	2819
孝隱太子琳禎 .....	2819
元寧太子 .....	2820
孝成太子琳珠 .....	2820
孝祗太子 .....	2820
太子稷 .....	2820
廣州院君 .....	2820
孝悌太子 .....	2820
孝明太子 .....	2820
法登君 .....	2820
資利君 .....	2820
義城府院大君 .....	2821
興化宮君 .....	2821
太子濟 .....	2821
慶春院君 .....	2821
孝和太子 .....	2821
平壤公基 .....	2821
樂浪侯瑛 .....	2822
承化伯禎 .....	2822
承化侯溫 .....	2822

永寧公綽 .....	2823
寧仁侯稹 .....	2824
淮安公佖 .....	2824
齊安公淑 .....	2824
順正大君璿 .....	2825
順寧君聃 .....	2825
咸寧伯璞 .....	2826
太師忠 .....	2826
哀殤君昉 .....	2826
樂浪侯璫 .....	2827
開城侯暄 .....	2827
大覺國師煦 .....	2827
常安公琇 .....	2828
道生僧統窺 .....	2829
金官侯烝 .....	2829
卞韓侯悋 .....	2830
樂浪侯忱 .....	2830
聰惠首座璟 .....	2830
朝鮮侯燾 .....	2830
扶餘侯蓀 .....	2831
辰韓侯愉 .....	2832
漢山侯昀 .....	2832

上黨侯泌 .....	2832
圓明國師澄儼 .....	2833
帶方公備 .....	2833
大原公倬 .....	2834
齊安公僭 .....	2835
通義侯僑 .....	2836
大寧侯暲 .....	2837
元敬國師冲曦 .....	2838
孝靈太子祈 .....	2839
小君善思 .....	2839
高麗史九十一 列傳卷第四 .....	2841
宗室二 .....	2841
襄陽公恕 .....	2841
司空瑋 .....	2841
定原府院君鈞 .....	2841
鶴城府院君珣 .....	2842
永興君環 .....	2843
瑞興侯璵 .....	2843
昌原公社 .....	2843
始寧侯禕 .....	2844
慶原公祚 .....	2845
大禪師鏡智 .....	2845

冲明國師覺膺 .....	2845
安慶公湄 .....	2845
始陽侯珪 .....	2845
順安公琮 .....	2846
江陽公滋 .....	2847
丹陽府院大君珣 .....	2847
瀋王暉 .....	2848
瀋王篤朵不花 .....	2850
延德府院大君埏 .....	2850
小君湑 .....	2851
世子鑑 .....	2851
德興君塔思帖木兒 .....	2851
龍山元子 .....	2852
釋器 .....	2852
世子奭 .....	2854
公主 .....	2855
太祖九女 .....	2855
惠宗三女 .....	2856
定宗一女 .....	2856
光宗三女 .....	2856
成宗二女 .....	2856
顯宗八女 .....	2857

德宗二女 .....	2857
靖宗一女 .....	2857
文宗七女 .....	2858
宣宗三女 .....	2858
肅宗四女 .....	2858
睿宗二女 .....	2859
仁宗四女 .....	2859
毅宗三女 .....	2860
明宗二女 .....	2860
神宗二女 .....	2860
熙宗五女 .....	2861
康宗一女 .....	2861
高宗一女 .....	2861
元宗二女 .....	2861
忠烈王二女 .....	2862
忠惠王一女 .....	2862
恭讓王三女 .....	2862
高麗史九十二 列傳卷第五 .....	2863
洪儒 .....	2863
裴玄慶 .....	2864
申崇謙 .....	2864
卜智謙 .....	2865

庾黔弼 .....	2865
崔凝 .....	2868
崔彥搆 .....	2870
王儒 .....	2870
字之 .....	2871
朴述熙 .....	2871
崔知夢 .....	2872
王式廉 .....	2873
朴守卿 .....	2874
王順式 .....	2875
李恩言 .....	2875
堅金 .....	2876
尹瑄 .....	2877
興達 .....	2877
善弼 .....	2877
泰評 .....	2877
龔直 .....	2878
朴英規 .....	2879
高麗史九十三 列傳卷第六 .....	2881
徐弼 .....	2881
崔承老 .....	2882
齊顏 .....	2896

雙冀·····	2896
崔亮·····	2897
韓彦恭·····	2898
柳邦憲·····	2899
金審言·····	2899
崔沆·····	2902
蔡忠順·····	2903
高麗史九十四 列傳卷第七·····	2907
徐熙·····	2907
訥·····	2911
恭·····	2912
劉璫·····	2912
姜邯贊·····	2913
崔士威·····	2915
皇甫俞義·····	2916
張延祐·····	2917
楊規·····	2918
智蔡文·····	2921
祿延·····	2926
河拱辰·····	2926
金殷傅·····	2928
周佇·····	2929



姜民瞻 .....	2929
郭元 .....	2930
王可道 .....	2931
金猛 .....	2933
柳韶 .....	2933
尹徵古 .....	2934
韋壽餘 .....	2935
田拱之 .....	2935
李周憲 .....	2935
李周佐 .....	2936
安紹光 .....	2936
趙之遴 .....	2937
高麗史九十五 列傳卷第八 .....	2939
崔冲 .....	2939
惟善 .....	2943
思齊 .....	2944
淪 .....	2944
允儀 .....	2944
李子淵 .....	2945
資諒 .....	2946
資仁 .....	2947
奕蕤 .....	2947

資玄 .....	2948
資德 .....	2948
預 .....	2948
公壽 .....	2949
之氏 .....	2949
顥 .....	2950
光緒 .....	2951
朴寅亮 .....	2951
景仁 .....	2952
景伯 .....	2952
景山 .....	2952
黃周亮 .....	2952
柳伸 .....	2953
王寵之 .....	2954
魏繼廷 .....	2955
邵台輔 .....	2957
王國髦 .....	2958
高義和 .....	2958
文正 .....	2958
鄭文 .....	2959
金元鼎 .....	2960
孫冠 .....	2961

崔思諒 .....	2962
金先錫 .....	2962
任懿 .....	2963
元厚 .....	2964
克忠 .....	2964
克正 .....	2964
溥 .....	2965
濡 .....	2965
翊 .....	2965
沆 .....	2966
金漢忠 .....	2966

## 第八冊

高麗史九十六 列傳卷第九 .....	2967
崔思諫 .....	2967
金仁存 .....	2969
尹瓘 .....	2974
彥頤 .....	2984
鱗瞻 .....	2988
世儒 .....	2992
商季 .....	2992

吳延寵 .....	2993
高麗史九十七 列傳卷第十 .....	2997
金富侁 .....	2997
富儀 .....	2998
高令臣 .....	3000
金黃元 .....	3001
李軌 .....	3002
郭尚 .....	3002
輿 .....	3003
劉載 .....	3004
胡宗旦 .....	3004
慎安之 .....	3004
金景庸 .....	3005
仁揆 .....	3006
崔弘嗣 .....	3006
韓安仁 .....	3007
李永 .....	3009
韓冲 .....	3010
林概 .....	3011
庚祿崇 .....	3011
金峻 .....	3011
柳仁著 .....	3012

康拯·····	3012
許慶·····	3013
文冠·····	3013
鄭沆·····	3014
敘·····	3015
金克儉·····	3015
金若溫·····	3016
高麗史九十八 列傳卷第十一·····	3017
金富軾·····	3017
敦中·····	3029
君綏·····	3031
鄭襲明·····	3031
高兆基·····	3032
金正純·····	3033
鄭克永·····	3034
朴挺蕤·····	3036
崔思全·····	3036
金珣·····	3038
崔滋盛·····	3039
金縝·····	3040
林完·····	3040
崔奇遇·····	3043

金守雌	3045
崔濡	3045
李璫	3046
瑋	3046
許載	3047
高麗史九十九 列傳卷第十二	3049
梁元俊	3049
崔惟清	3049
讜	3051
璘	3051
詵	3052
宗峻	3053
昱	3053
文本	3054
坪	3055
雍	3055
李公升	3056
申淑	3058
韓文俊	3059
文克謙	3060
柳公權	3063
澤	3063

趙永仁	3064
王世慶	3064
李純佑	3065
林民庇	3066
崔陟卿	3067
咸有一	3068
廉信若	3070
李知命	3071
庾應圭	3072
資諒	3075
玄德秀	3075
崔均	3078
甫淳	3079
允愷	3080
金巨公	3080
韓惟漢	3080
高麗史一百 列傳卷第十三	3081
杜景升	3081
于學儒	3085
盧永淳	3085
趙位寵	3086
房瑞鸞	3088

朴齊儉	3089
奇卓誠	3090
洪仲方	3091
慶大升	3092
陳俊	3095
崔世輔	3096
朴純弼	3097
李英摺	3097
白任至	3098
李俊昌	3099
崔忠烈	3100
鄭世裕	3100
叔瞻	3101
晏	3101
鄭國儉	3102
李維城	3103
鄭邦佑	3103
丁彦真	3103
高麗史一百一 列傳卷第十四	3107
閔令謨	3107
湜	3108
宋訥	3109



金光中	3110
蒂	3111
安劉勃	3111
崔汝諧	3111
崔遇清	3112
王珪	3113
車若松	3114
奇洪壽	3114
鄭克溫	3115
柳光植	3116
權敬中	3116
金台瑞	3122
若先	3122
敕	3123
文漢卿	3123
權世侯	3124
白敦明	3124
盧仁綏	3125
金義元	3125
高麗史一百二 列傳卷第十五	3127
琴儀	3127
李奎報	3128

益培	3130
俞升旦	3130
金仁鏡	3131
承茂	3133
李公老	3133
李仁老	3134
吳世才	3134
趙通	3134
林椿	3135
趙文拔	3135
李淳牧	3136
李需	3136
金敞	3136
宋國瞻	3137
崔滋	3138
河千旦	3139
蔡松年	3139
楨	3139
孫扑	3140
權守平	3141
李純孝	3142
張純亮	3142

宋彥琦 .....	3142
金守剛 .....	3143
金之岱 .....	3143
李藏用 .....	3144
高麗史一百三 列傳卷第十六 .....	3149
趙冲 .....	3149
拊 .....	3153
金就礪 .....	3153
文衍 .....	3162
賁 .....	3162
李勣 .....	3163
蔡靖 .....	3164
朴犀 .....	3164
宋文曹 .....	3166
金慶孫 .....	3166
琿 .....	3168
崔椿命 .....	3169
金希碑 .....	3170
李子晟 .....	3173
金允侯 .....	3175
金應德 .....	3176
高麗史一百四 列傳卷第十七 .....	3177

金方慶 .....	3177
九容 .....	3193
齊顏 .....	3194
忻 .....	3195
恂 .....	3197
永晄 .....	3197
永煦 .....	3197
士衡 .....	3198
朴球 .....	3200
韓希愈 .....	3200
羅裕 .....	3203
益禧 .....	3204
元冲甲 .....	3205
金周鼎 .....	3206
深 .....	3208
宗衍 .....	3210
石堅 .....	3213
高麗史一百五 列傳卷第十八 .....	3215
柳璥 .....	3215
陞 .....	3220
墩 .....	3220
曼殊 .....	3220

許珙	3221
儆	3223
冠	3224
錦	3224
富	3225
猷	3225
洪子藩	3226
承緒	3229
永通	3230
鄭可臣	3231
安珣	3234
于器	3236
牧	3236
薛公儉	3237
俞千遇	3237
趙仁規	3240
瑞	3242
璉	3243
德裕	3243
璘	3244
延壽	3244
瑋	3245

高麗史一百六 列傳卷第十九 .....	3247
白文節 .....	3247
頤正 .....	3248
朴恒 .....	3248
郭預 .....	3250
朱悅 .....	3251
李湊 .....	3253
行儉 .....	3253
張鎰 .....	3254
金圻 .....	3255
李承休 .....	3257
衍宗 .....	3259
金暉 .....	3260
開物 .....	3261
鄭璫 .....	3262
顥 .....	3263
誦 .....	3263
公權 .....	3264
趙簡 .....	3265
沈諤 .....	3266
秋適 .....	3267
李仁挺 .....	3268

蔡禍 .....	3268
金有成 .....	3268
郭麟 .....	3269
尹諧 .....	3269
澤 .....	3270
李穎 .....	3272
嚴守安 .....	3273
安戩 .....	3274
崔守璜 .....	3275
朴綸 .....	3276
洪奎 .....	3276
戎 .....	3278
高麗史一百七 列傳卷第二十 .....	3279
韓康 .....	3279
渥 .....	3280
脩 .....	3280
方信 .....	3281
元傳 .....	3282
忠 .....	3282
顥 .....	3283
善之 .....	3283
松壽 .....	3284

金連	3285
金富允	3286
鄭仁卿	3286
權坦	3287
溥	3288
準	3289
廉	3290
鏞	3290
適	3291
和	3291
近	3292
閔漬	3297
祥正	3300
高麗史一百八 列傳卷第二十一	3303
閔宗儒	3303
頤	3304
思平	3305
棼	3305
霽	3305
金之淑	3306
仁沆	3307
鄭僖	3307



李混	3308
崔誠之	3309
文度	3311
蔡洪哲	3311
金怡	3312
李仁琪	3315
洪彬	3315
曹益清	3317
裴廷芝	3318
孫守卿	3318
高麗史一百九 列傳卷第二十二	3321
朴全之	3321
吳訥	3322
李瑱	3323
尹莘傑	3324
朴孝修	3325
許有全	3325
朴忠佐	3325
尹宣佐	3326
李兆年	3327
承慶	3330
李穀	3330

禹倬	3335
安軸	3336
宗源	3337
輔	3339
崔瀼	3340
張沆	3341
李晟	3342
趙廉	3343
王伯	3343
李伯謙	3344
申君平	3344
高麗史一百十 列傳卷第二十三	3347
崔有滄	3347
金台鉉	3348
光載	3351
金倫	3352
敬直	3354
希祖	3355
承矩	3355
王煦	3356
重貴	3358
韓宗愈	3359

李齊賢 .....	3361
達尊 .....	3374
寶林 .....	3374
李凌幹 .....	3375

## 第九冊

高麗史一百十一 列傳卷第二十四 .....	3377
廉悌臣 .....	3377
李岳 .....	3380
岡 .....	3381
洪彥博 .....	3382
師禹 .....	3383
柳淵 .....	3384
柳濯 .....	3384
慶復興 .....	3387
金續命 .....	3393
李子松 .....	3396
趙噉 .....	3397
仁沃 .....	3400
崔宰 .....	3401
宋天逢 .....	3402

洪仲宣 .....	3404
金濤 .....	3405
林樸 .....	3406
文益漸 .....	3408
高麗史一百十二 列傳卷第二十五 .....	3411
李公遂 .....	3411
柳淑 .....	3414
實 .....	3417
李仁復 .....	3418
白文寶 .....	3420
田祿生 .....	3421
李存吾 .....	3423
李達衷 .....	3425
楔遜 .....	3427
長壽 .....	3427
韓復 .....	3430
李茂方 .....	3430
鄭習仁 .....	3432
河允源 .....	3433
朴尚衷 .....	3433
朴宜中 .....	3436
趙云伋 .....	3439

高麗史一百十三 列傳卷第二十六 .....	3443
安祐 .....	3443
金得培 .....	3443
李芳實 .....	3444
鄭世雲 .....	3451
安遇慶 .....	3454
崔瑩 .....	3457
鄭地 .....	3478
尹可觀 .....	3482
金長壽 .....	3483
高麗史一百十四 列傳卷第二十七 .....	3485
尹桓 .....	3485
李成瑞 .....	3486
李壽山 .....	3487
恬 .....	3488
李承老 .....	3489
云牧 .....	3490
黃裳 .....	3490
池龍壽 .....	3491
羅世 .....	3494
金先致 .....	3495
全以道 .....	3496

具榮儉 .....	3497
吳仁澤 .....	3498
金普 .....	3499
邊光秀 .....	3500
李善 .....	3501
鄭之祥 .....	3501
任君輔 .....	3502
羅興儒 .....	3503
睦仁吉 .....	3504
金庾 .....	3506
楊伯淵 .....	3507
池湧奇 .....	3509
河乙沚 .....	3511
禹仁烈 .....	3512
文達漢 .....	3514
金湊 .....	3515
崔雲海 .....	3516
高麗史一百十五 列傳卷第二十八 .....	3519
李穡 .....	3519
禹玄寶 .....	3536
李崇仁 .....	3543
高麗史一百十六 列傳卷第二十九 .....	3553

沈德符 .....	3553
李琳 .....	3558
王康 .....	3564
朴葳 .....	3565
李豆蘭 .....	3567
南閭 .....	3568
高麗史一百十七 列傳卷第三十 .....	3573
鄭夢周 .....	3573
金震陽 .....	3585
姜淮伯 .....	3589
李詹 .....	3591
成石璘 .....	3602
高麗史一百十八 列傳卷第三十一 .....	3605
趙浚 .....	3605
高麗史一百十九 列傳卷第三十二 .....	3627
鄭道傳 .....	3627
高麗史一百二十 列傳卷第三十三 .....	3647
尹紹宗 .....	3647
會宗 .....	3658
吳思忠 .....	3661
金子粹 .....	3665
高麗史一百二十一 列傳卷第三十四 .....	3677

良吏·····	3677
庾碩·····	3677
王諧·····	3679
金之錫·····	3680
崔碩·····	3680
鄭云敬·····	3680
忠義·····	3683
洪灌·····	3683
高甫俊·····	3684
鄭顗·····	3684
文大·····	3685
曹孝立·····	3686
鄭文鑑·····	3686
孝友·····	3686
文忠·····	3687
釋珠·····	3687
崔婁伯·····	3687
尉貂·····	3688
徐稜·····	3688
金遷·····	3689
黃守·····	3690
鄭愈·····	3691



曹希參 .....	3691
鄭臣祐女 .....	3692
孫宥 .....	3692
權居義 .....	3692
廬俊恭 .....	3692
辛斯藏女 .....	3693
尹龜生 .....	3693
潘腆 .....	3694
君萬 .....	3694
烈女 .....	3694
胡壽妻俞氏 .....	3694
玄文奕妻 .....	3695
洪義妻 .....	3695
安天儉妻 .....	3695
江華三女 .....	3696
鄭滿妻崔氏 .....	3696
李東郊妻裴氏 .....	3696
康好文妻文氏 .....	3697
金彥卿妻金氏 .....	3697
景德宜妻安氏 .....	3698
李得仁妻李氏 .....	3698
權金妻 .....	3698

高麗史一百二十二 列傳卷第三十五 .....	3699
方技 .....	3699
金謂碑 .....	3699
李寧 .....	3701
李商老 .....	3702
伍允孚 .....	3702
薛景成 .....	3704
宦者 .....	3705
鄭誠 .....	3706
白善淵 .....	3708
崔世延 .....	3709
李淑 .....	3711
任伯顏禿古思 .....	3712
方臣祐 .....	3712
李大順 .....	3714
禹山節 .....	3714
高龍普 .....	3715
金玄 .....	3716
安都赤 .....	3716
申小鳳 .....	3717
李得芬 .....	3717
金師幸 .....	3718

酷吏·····	3718
宋吉儒·····	3719
沈于慶·····	3719
列傳卷第三十六 高麗史一百二十三·····	3721
嬖幸一·····	3721
庾行簡·····	3721
榮儀·····	3722
金存中·····	3723
鄭世臣·····	3724
白勝賢·····	3724
康允紹·····	3725
廉承益·····	3726
李汾禧·····	2728
楮·····	2730
權宜·····	3732
蔡謨·····	3733
李德孫·····	3733
林貞杞·····	3734
朱印遠·····	3736
李英柱·····	3737
李之氏·····	3738
高宗秀·····	3739

金儒 .....	3739
印侯 .....	3740
承旦 .....	3744
張舜龍 .....	3744
車信 .....	3745
盧英 .....	3745
曹允通 .....	3745
高麗史一百二十四 列傳卷第三十七 .....	3747
嬖幸二 .....	3747
尹秀 .....	3747
尹吉甫 .....	3748
李貞 .....	3749
金文庇 .....	3750
李珣 .....	3750
元卿 .....	3750
朴義 .....	3751
朴景亮 .....	3752
全英甫 .....	3752
康允忠 .....	3753
裴佺 .....	3756
閔渙 .....	3757
尹碩 .....	3758

孫琦 .....	3759
鄭方吉 .....	3760
林仲沆 .....	3761
姜融 .....	3761
申青 .....	3761
朴青 .....	3763
王三錫 .....	3763
梁載 .....	3764
曹莘卿 .....	3764
崔老星 .....	3764
尹賢 .....	3764
安珪 .....	3765
崔安道 .....	3765
李宜風 .....	3767
金之鏡 .....	3767
李仁吉 .....	3767
盧英瑞 .....	3768
朴良衍 .....	3768
宋明理 .....	3769
金興慶 .....	3769
潘福海 .....	3772
申元弼 .....	3773

## 第十冊

高麗史一百二十五 列傳卷第三十八 .....	3775
姦臣一 .....	3775
文公仁 .....	3775
朴昇中 .....	3776
崔弘宰 .....	3778
崔袞偁 .....	3778
朴暄 .....	3779
宋玠 .....	3779
王惟紹 .....	3781
宋邦英 .....	3784
吳潛 .....	3786
石冑 .....	3789
金元祥 .....	3790
柳清臣 .....	3791
權漢功 .....	3794
蔡河中 .....	3796
辛裔 .....	3798
田淑蒙 .....	3799
李春富 .....	3799

金元命 .....	3801
金鉉 .....	3802
池齋 .....	3803
高麗史一百二十六 列傳卷第三十九 .....	3809
姦臣二 .....	3809
李仁任 .....	3809
林堅味 .....	3821
廉興邦 .....	3826
曹敏修 .....	3827
邊安烈 .....	3829
王安德 .....	3836
高麗史一百二十七 列傳卷第四十 .....	3841
叛逆一 .....	3841
桓宣吉 .....	3841
伊昕巖 .....	3842
王規 .....	3843
金致陽 .....	3844
康兆 .....	3844
李資義 .....	3847
李資謙 .....	3848
拓俊京 .....	3857
妙清 .....	3858

高麗史一百二十八 列傳卷第四十一 .....	3865
叛逆二 .....	3865
鄭仲夫 .....	3865
李光挺 .....	3871
宋有仁 .....	3873
李義方 .....	3875
李義旼 .....	3877
鄭方義 .....	3882
曹元正 .....	3883
石隣 .....	3884
高麗史一百二十九 列傳卷第四十二 .....	3885
叛逆三 .....	3885
崔忠獻 .....	3885
崔怡 .....	3902
崔沆 .....	3913
崔瑄 .....	3918
高麗史一百三十 列傳卷第四十三 .....	3923
叛逆四 .....	3923
韓恂 .....	3923
多智 .....	3923
洪福源 .....	3925
李峴 .....	3928



趙叔昌 .....	3929
趙暉 .....	3929
金俊 .....	3931
林衍 .....	3936
林惟茂 .....	3939
趙彝 .....	3941
金裕 .....	3941
李樞 .....	3942
韓洪甫 .....	3943
于琬 .....	3944
崔坦 .....	3945
裴仲孫 .....	3948
高麗史一百三十一 列傳卷第四十四 .....	3951
叛逆五 .....	3951
曹頤 .....	3951
趙日新 .....	3953
金鏞 .....	3957
奇輶 .....	3960
盧頊 .....	3965
權謙 .....	3966
崔濡 .....	3966
洪倫 .....	3970

金文鉉 .....	3972
金義 .....	3973
高麗史一百三十二 列傳卷第四十五 .....	3975
叛逆六 .....	3975
辛盹 .....	3975
高麗史一百三十三 列傳卷第四十六 .....	3989
辛禍一 .....	3989
高麗史一百三十四 列傳卷第四十七 .....	4023
辛禍二 .....	4023
高麗史一百三十五 列傳卷第四十八 .....	4055
辛禍三 .....	4055
高麗史一百三十六 列傳卷第四十九 .....	4095
辛禍四 .....	4095
高麗史一百三十七 列傳卷第五十 .....	4119
辛禍五 .....	4119
辛昌 .....	4133

## 高麗世系

高麗之先，史闕未詳。《太祖實錄》：即位二年，追王三代祖考，冊上始祖尊諡曰元德大王，妣爲貞和王后，懿祖爲景康大王，妣爲元昌王后，世祖爲威武大王，妣爲威肅王后。

金寬毅《編年通錄》云：有名虎景者，自號聖骨將軍，自白頭山遊歷，至扶蘇山左谷，娶妻家焉。富而無子，善射，以獵爲事。一日，與同里九人捕鷹平那山。會日暮，就宿巖竇，有虎當竇口大吼，十人相謂曰：“虎欲啗我輩，試投冠，攬者當之。”遂皆投之，虎攬虎景冠。虎景出，欲與虎鬥，虎忽不見，而竇崩，九人皆不得出。虎景還告平那郡來葬九人，先祀山神，其神見曰：“予以寡婦主此山，幸遇聖骨將軍，欲與爲夫婦，共理神政，請封爲此山大王。”言訖，與虎景俱隱不見。郡人因封虎景爲大王，立祠祭之。以九人同亡，改山名曰九龍。虎景不忘舊妻，夜常如夢來合，生子曰康忠。

康忠體貌端嚴，多才藝，娶西江永安村富人女名具置義，居五冠山摩訶岬。時新羅監干八元善風水，到扶蘇郡，郡在扶蘇山北，見山形勝而童，告康忠曰：“若移郡山南，植松使不露巖石，則統合三韓者出矣。”於是康忠與郡人徙居山南，栽松遍嶽，因改名松

嶽郡，遂爲郡上沙粲，且以摩訶岬第爲永業之地，往來焉。家累千金，生二子，季曰損乎述，改名寶育。

寶育性慈惠，出家入智異山修道，還居平那山北岬，又徙摩訶岬。嘗夢登鵠嶺，向南便旋，溺溢三韓山川，變成銀海。明日，以語其兄伊帝建，伊帝建曰：“汝必生支天之柱。”以其女德周妻之。遂爲居士，仍於摩訶岬構木菴。有新羅術士見之，曰：“居此，必大唐天子來作壻矣。”後生二女，季曰辰義，美而多才智。年甫笄，其姊夢登五冠山頂而旋，流溢天下。覺與辰義說，辰義曰：“請以綾裙買之。”姊許之，辰義令更說夢，攬而懷之者三。既而身動，若有得，心頗自負。唐肅宗皇帝潛邸時，欲遍遊山川。以明皇天寶十二載癸巳春，涉海到涇江西浦。方潮退，江渚泥淖。從官取舟中錢布之，乃登岸，後名其浦爲錢浦。閔漬《編年綱目》引碧巖等《禪錄》云：宣宗年十三，當穆宗朝，戲登御床作揖群臣勢，穆宗子武宗心忌之。及武宗即位，宣宗遇害於宮中，絕而後蘇，潛出遠遁，周遊天下，備嘗險阻。鹽官安禪師默識龍顏，待遇特厚，留鹽官最久。又宣宗嘗爲光王，光即楊州屬郡。鹽官，杭州屬縣。皆接東海，爲商船往來之地。方當懼禍，猶恐藏之不深，故以遊覽山水爲名，隨商船渡海。時《唐史》未撰，於唐室之事，無由得詳。但聞肅宗宣皇帝時，有祿山之亂，未聞宣宗遭亂出奔之事，誤以宣宗皇帝爲肅宗宣皇帝云。又世傳忠宣王在元，有翰林學士從王遊者，謂王曰：“嘗聞王之先出於唐肅宗，何所據耶？肅宗自幼未嘗出閭。祿山之亂，即位靈武，何時東遊，致有子乎？”王大慚，不能對。閔漬從旁對曰：“此我國史誤書耳，非肅宗，

乃宣宗也。”學士曰：“若宣宗久勞于外，庶或然也。”

遂至松嶽郡，登鵠嶺，南望曰：“此地必成都邑。”從者曰：“此八真仙住處也。”抵摩訶岬養子洞，寄宿寶育第。見兩女，悅之，請縫衣綻。寶育認是中華貴人，心謂果符術士言，即令長女應命，纔踰闕，鼻衄而出，代以辰義，遂薦枕。留期月，閱漬《編年》或云一年。覺有娠。臨別云：“我是大唐貴姓。”與弓矢，曰：“生男則與之。”果生男，曰作帝建，後追尊寶育為國祖元德大王，其女辰義為貞和王后。

作帝建幼而聰睿神勇，年五六，問母曰：“我父誰？”曰：“唐父。”蓋未知其名故耳。及長，才兼六藝，書射尤絕妙。年十六，母與以父所遺弓矢。作帝建大悅，射之，百發百中，世謂神弓。於是欲覲父，寄商船，行至海中，雲霧晦暝，舟不行三日，舟中人卜曰：“宜去高麗人。”閱漬《編年》或云：新羅金良貞奉使入唐，因寄其船。良貞夢白頭翁曰：“留高麗人可得順風。”作帝建執弓矢自投海，下有巖石，立其上，霧開風利，船去如飛。俄有一老翁拜曰：“我是西海龍王，每日晡，有老狐作熾盛光如來像從空而下，羅列日月星辰於雲霧間，吹螺擊鼓奏樂而來，坐此巖讀《臃腫經》，則我頭痛甚。聞郎君善射，願除吾害。”作帝建許諾。閱漬《編年》或云：作帝建於巖邊見有一徑，從其徑行一里許，又有一巖，巖上復有一殿，門戶洞開，中有金字寫經處，就視之，筆點猶濕。四顧無人，作帝建就其坐，操筆寫經，有女忽來前立，作帝建謂是觀音現身，驚起下坐，方將拜禮，忽不見。還就坐寫經，良久，其女復見，而言：“我是龍女，累

載寫經，今猶未就。幸郎君善寫，又能善射，欲留君助吾功德，又欲除吾家難。其難則待七日可知。”及期，聞空中樂聲，果有從西北來者，作帝建疑是真佛，不敢射。翁復來，曰：“正是老狐，願勿復疑。”作帝建撫弓撚箭，候而射之，應弦而墜，果老狐也。翁大喜，迎入宮，謝曰：“賴郎君，吾患已除，欲報大德。將西入唐，覲天子父乎？富有七寶，東還奉母乎？”曰：“吾所欲者，王東土也。”翁曰：“王東土，待君之子孫，三建必矣，其他惟命。”作帝建聞其言，知時命未至，猶豫未及答，坐後有一老嫗戲曰：“何不娶其女而去？”作帝建乃悟，請之。翁以長女翥旻義妻之。作帝建齋七寶將還，龍女曰：“父有楊杖與豚，勝七寶，盍請之。”作帝建請還七寶，願得楊杖與豚。翁曰：“此二物，吾之神通，然君有請，敢不從？”乃加與豚。於是乘漆船，載七寶與豚泛海，倏到岸，即昌陵窟前江岸也。白州正朝劉相晞等聞曰：“作帝建娶西海龍女來，實大慶也。”率開、貞、鹽、白四州，江華、喬桐、河陰三縣人，爲築永安城，營宮室。

龍女初來，即往開州東北山麓以銀盂掘地取水用之，今開城大井是也。居一年，豚不入牢。乃語豚曰：“若此地不可居，吾將隨汝所之。”詰朝，豚至松嶽南麓而卧，遂營新第，即康忠舊居也。往來永安城而居者三十餘年。

龍女嘗於松嶽新第寢室窗外鑿井，從井中往還西海龍宮，即廣明寺東上房北井也。常與作帝建約曰：

“吾返龍宮時，慎勿見，否則不復來。”一日，作帝建密伺之。龍女與少女入井，俱化爲黃龍，興五色雲。異之，不敢言。龍女還，怒曰：“夫婦之道，守信爲貴。今既背約，我不能居此。”遂與少女復化龍入井，不復還。作帝建晚居俗離山長岬寺，常讀釋典而卒。後追尊爲懿祖景康大王，龍女爲元昌王后。

元昌生四男，長曰龍建，後改隆，字文明，是爲世祖。貌魁偉，美鬚髯，器度宏大，有併吞三韓之志。嘗夢見一美人，約爲室家。後自松嶽往永安城，道遇一女惟肖，遂與爲婚，不知所從來，故世號夢夫人。或云以其爲三韓之母，遂姓韓氏。是爲威肅王后。世祖居松嶽舊第有年，又欲創新第於其南，即延慶宮奉元殿基也。

時桐裏山祖師道誡入唐，得一行地理法而還，登白頭山至鵠嶺，見世祖新構第，曰：“種稌之地，何種麻耶？”言訖而去，夫人聞而以告，世祖倒屣追之。及見，如舊識。遂與登鵠嶺，究山水之脉，上觀天文，下察時數，曰：“此地脉自壬方白頭山水母木幹來落，馬頭明堂，君又水命，宜從水之大數作字，六六爲三十六區，則符應天地之大數，明年必生聖子，宜名曰王建。”因作實封，題其外云：“謹奉書百拜，獻書于未來統合三韓之主大原君子足下。”時唐僖宗乾符三年四月也。世祖從其言，築室以居。是月，威肅有娠，生太祖。閔漬《編年》：太祖年十七，道誡復至，請見，曰：“足下應百六之運，生於天府名墟，三季蒼生待君弘濟。”因

告以出師置陣、地利天時之法，望秩山川、感通保佑之理。乾寧四年五月，世祖薨于金城郡，葬永安城江邊石窟，號曰昌陵，以威肅王后合葬。《實錄》：顯宗十八年，加上世祖諡曰元烈，后曰惠思。高宗四十年，加世祖曰敏惠，后曰仁平。

李齊賢曰：金寬毅云聖骨將軍虎景生阿干康忠，康忠生居士寶育，是爲國祖元德大王，寶育生女配唐貴姓而生懿祖，懿祖生世祖，世祖生太祖。如其所言，唐貴姓者，於懿祖爲皇考，而寶育皇考之舅也，而稱爲國祖，何也？又言太祖追尊三代祖考及其后妃，考爲世祖威武大王，母爲威肅王后；祖爲懿祖景康大王，祖母爲元昌王后；曾祖母爲貞和王后，曾祖母之父寶育爲國祖元德大王云，略曾祖而書曾祖母之父，謂之三代祖考，何也？按《王氏宗族記》云：國祖，太祖之曾祖也；貞和，國祖之妃也。《聖源錄》云：寶育聖人者，元德大王之外祖也。以此觀之，元德大王是唐貴姓者之子，而於懿祖爲考也。貞和王后是寶育之外孫婦，而於懿祖爲妣也。其以寶育爲國祖元德王者，誤矣。

又曰：金寬毅云，懿祖得唐父所留弓矢，涉海而遠覲，然則其志深切矣。龍王問其所欲，即求東歸，恐懿祖不如是也。《聖源錄》云：旰康大王即懿祖之妻龍女者，平州人豆恩玷角干之女子也。則與寬毅所記者異矣。

又曰：金寬毅云道詵見世祖松嶽南第曰：種稭之田而種麻也。“稭”之與“王”，方言相類，故太祖因姓王氏。父在而子改其姓，天下豈有是理乎？嗚呼！



其謂我太祖爲之乎？且太祖逮世祖仕弓裔，裔之多疑忌，太祖無故獨以王爲姓，豈非取禍之道乎？謹按《王氏宗族記》：國祖姓王氏，然則非至太祖始姓王也。種稭之說，不亦誣哉。又云懿祖、世祖諱下字與太祖諱並同，金寬毅以開國之前，俗尚淳朴，意其或然，故書之王代曆。懿祖通六藝，書與射妙絕一時，世祖少蘊器局，有雄據三韓之志，豈不知祖考之名爲不可犯，而自以爲名，且以名其子乎？況太祖創業垂統，動法先王，寧有不得已而恬於非禮之名乎？竊謂新羅之時，其君稱麻立干，其臣稱阿干、大阿干，至於鄉里之民例以“干”連其名而呼之，蓋相尊之辭也。阿干或作阿粲、閼餐，以干、粲、餐三字其聲相近也。懿祖、世祖諱下字亦與干、粲、餐之聲爲相近，乃所謂相尊之辭連其名而呼之者之轉也，非其名也。太祖適以此字爲名，好事者遂附會而爲之說，曰“三世一名，必王三韓”，蓋不足信也。

論曰：載稽舊籍，同知樞密兵部尚書金永夫、徵仕郎檢校軍器監金寬毅，皆毅宗朝臣也。寬毅作《編年通錄》，永夫採而進之，其劄子亦曰：“寬毅訪集諸家私蓄文書。”其後閔漬撰《編年綱目》，亦因寬毅之說。獨李齊賢援據《宗族記》、《聖源錄》斥其傳訛之謬。齊賢一代名儒，豈無所見而輕有議於時君世系乎？其云肅宗、宣宗者，以《唐書》考之，則肅宗自幼未嘗出閤，果如元學士之言矣。宣宗雖封光王，唐史無藩王就封之制，而其遭亂避禍之說，亦是禪錄雜記，

二說皆無所據，不足信也。況龍女之事，何其荒怪若是之甚邪？《太祖實錄》乃政堂文學修國史黃周亮所撰也，周亮仕太祖孫顯宗之朝，太祖時事，耳目所及，其於追贈，據實書之。以貞和爲國祖之配，以爲三代，而略無一語及於世傳之說。寬毅乃毅宗時微官，且去太祖二百六十餘年，豈可舍當時《實錄》而信後代無稽雜出之書邪？竊觀《北史》拓拔氏以爲軒轅之後，而神元皇帝天女所生，則其荒誕甚矣。且言慕容氏爲慕二儀之德，繼三光之容。宇文氏爲出自炎帝，得皇帝玉璽，而其俗謂天子曰宇文，故因以爲氏。先儒議之曰：其臣子從而爲之辭，以緣飾耳。嗚呼！自古論人君世系者，類多怪異，而其間或有附會之說，則後之人不能不致疑焉。今以《實錄》所載追贈三代爲正，而寬毅等說亦世傳之久，故並附云。

## 纂修高麗史凡例

一、世家。按《史記》：天子曰紀，諸侯曰世家。今纂《高麗史》，王紀為世家，以正名分。其書法準兩《漢書》及《元史》，事實與言辭皆書之。

凡稱宗、稱陛下、太后、太子、節日、制詔之類，雖涉僭踰，今從當時所稱，書之以存其實。

如園丘、<sup>〔1〕</sup>籍田、燃燈、八關等常事，書初見以著其例，若親行則必書。《高麗世系》出於雜記，率皆荒誕，今以黃周亮所撰《實錄》追贈三代為正，附以雜記所傳，別作《世系》。

一、志。按歷代史志，代各不同。至於唐《志》以事實組織成篇，難於攷覈。今纂《高麗史》志，準《元史》條分類聚，使覽者易攷焉。

高麗制度條格，史多闕略，今取《古今詳定禮式目編修錄》及諸家雜錄，作諸志。

一、表。按歷代史表，詳略有異。今纂高麗史表，準金富軾《三國史》只作年表。

一、列傳。首以后妃，次宗室，次諸臣，終之以叛逆。其有事功卓異者，雖父子別傳，餘各以類附。

辛禑父子以逆屯之（藁）〔孽〕，竊位十六年，今

〔1〕 原作圓丘，下文亦有作園丘。今統一作園丘，不另注。

準《漢書·王莽傳》降為列傳，以嚴討賊之義。

一、歷代史紀、傳、表、志之末，皆有論贊。今纂《高麗史》準《元史》不作論贊。惟世家舊有李齊賢等贊，今仍之。

一、凡詔教及諸臣書疏所載，條件可分者，各以類摘取，分入諸志，餘則書世家及傳。

一、諸儒文集及雜錄，事蹟可攷者，亦採增入。且如制詔表冊之類，節其繁文以書。

## 進高麗史箋

正憲大夫、工曹判書、集賢殿大提學、知經筵春秋館事兼成均大司成臣鄭麟趾等誠惶誠恐，稽首稽首上言：竊聞“新柯視舊柯以爲則，後車鑑前車而是懲。”蓋已往之興亡，實將來之勸戒。茲紬編簡，敢瀆冕旒。惟王氏之肇興，自泰封以崛起。降羅滅濟，合三韓而爲一家；舍遼事唐，尊中國而保東土。爰革煩苛之政，式恢宏遠之規。光廟臨軒策士，而儒風稍興；成宗建祧立社，而治具悉備。宣讓失御，運祚幾傾。顯濟中興之功，宗祏再定；文闡太平之治，民物咸熙。迨後嗣之昏迷，有權臣之顛恣。擁兵而窺神器，一啓於仁廟之時；犯順而倒太阿，馴致於毅宗之日。由是巨姦迭煽，而置君如碁奕；強敵交侵，而刈民若草菅。順孝定大亂於危疑，僅保祖宗之業；忠烈昵群嬖於遊宴，卒構父子之嫌。且自忠肅以來，至于恭愍之世，變故屢作，衰微益深。根本更蹙於僞朝，歷數竟歸於真主。我太祖康獻大王勇智天錫，德業日新。布聖武而亨屯艱，克綏黎庶；握貞符而乘乾御，肇造邦家。顧麗社雖已丘墟，其史策不可蕪沒。命史氏而秉筆，做《通鑑》之編年。及太宗之繼承，委輔臣以讎校。作者非一，書竟未成。

世宗莊憲大王遙追先猷，載宣文化。謂修史要須

該備，復開局，再令編摩，尚紀次之非精，且脫漏者亦夥。況編年有異於紀傳表志，而敘事未悉其本末始終。更命庸愚，俾任纂述。

凡例皆法於遷《史》，大義悉稟於聖裁。避本紀爲世家，所以示名分之重；降僞辛於列傳，所以嚴僭竊之誅。忠佞邪正之彙分，制度文爲之類聚。統紀不紊，年代可稽。事跡務盡其詳明，闕謬期就於補正。嗟玉署鉛槧之未訖，而鼎湖弓劍之忽遺。臣麟趾等誠惶誠恐，稽首稽首，恭惟主上殿下，誕紹宏圖，增光洪烈。惟精惟一，聖學極於高明；丕顯丕承，至孝彰于繼述。念前史之未就，令微臣以責成。臣麟趾等俱以謏才，叨承隆寄，採稗官之雜錄，發秘府之故藏。祇竭三載之勞，勒成一代之史。稽遺跡於前代，僅能存筆削之公；揭明鑑於後人，期不沒善惡之實。所撰《高麗史》，世家四十六卷，志三十九卷，表二卷，傳五十卷，目錄二卷，通計一百三十九卷。謹具草成帙隨箋以聞，無任激切屏營之至。臣麟趾等誠惶誠恐，稽首稽首，謹言。

景泰二年八月二十五日，正憲大夫、工曹判書、集賢殿大提學、知經筵春秋館事兼成均大司成臣鄭麟趾等上箋。

# 高麗史一

## 世家卷第一

### 太祖一

太祖應運元明光大定睿德章孝威穆神聖大王，姓王氏，諱建，字若天，松嶽郡人。世祖長子，母曰威肅王后韓氏。唐乾符四年丁酉正月丙戌，生於松嶽南第，神光紫氣，耀室充庭，竟日盤旋，狀若蛟龍。幼而聰明睿智，龍顏日角，方頤廣額，氣度雄深，語音洪大，有濟世之量。

時新羅政衰，群賊競起。甄萱叛據南州，稱後百濟。弓裔據高勾麗之地，都鐵圓，國號泰封。

世祖時爲松嶽郡沙粲，乾寧三年丙辰，以郡歸于裔，裔大喜，以爲金城太守。世祖說之曰：“大王若欲王朝鮮、肅慎、卞韓之地，莫如先城松嶽。以吾長子爲其主。”裔從之，使太祖築勃禦塹城，仍爲城主。時太祖年二十。

光化元年戊午，裔移都松嶽。太祖來見，授精騎大監。

三年庚申，裔命太祖伐廣、忠、青三州及唐城、槐壤等郡縣，皆平之，以功授阿瓘。

天復三年癸亥三月，率舟師自西海抵光州界，攻錦城郡，拔之。擊取十餘郡縣，仍改錦城爲羅州，分軍戍之而還。是歲，良州帥金忍訓告急，裔令太祖往救。及還，裔問邊事，太祖陳安邊拓境之策，左右皆屬目，裔亦奇之，進階爲閼瓘。

天祐二年乙丑，裔還都鐵圓。

三年丙寅，裔命太祖率精騎將軍黔式等，領兵三千攻尚州沙火鎮，與甄萱累戰，克之。裔以土地益廣，士馬漸強，意欲併吞新羅，呼爲滅都，自新羅來附者並皆誅殺。

梁開平三年己巳，太祖見裔日以驕虐，復有志於閩外。適裔以羅州爲憂，遂令太祖往鎮之，進階爲韓瓘海軍大將軍。太祖推誠撫士，威惠並行，士卒畏愛，咸思奮勇，敵境讐服。以舟師次于光州鹽海縣，獲萱遣入吳越船而還。裔喜甚，優加褒獎。又使太祖修戰艦于貞州，以閼瓘宗希、金言等副之，領兵二千五百往擊光州珍島郡，拔之。進次皐夷島，城中人望見軍容嚴整，不戰而降。及至羅州浦口，萱親率兵列戰艦，自木浦至德真浦，首尾相銜，水陸縱橫，兵勢甚盛。諸將患之，太祖曰：“勿憂也，師克在和不在衆。”乃進軍急擊，敵船稍却，乘風縱火，燒溺者大半，斬獲



五百餘級，萱以小舸遁歸。初，羅州管內諸郡與我阻隔，賊兵遮絕，莫相應援，頗懷虞疑。至是，挫萱銳卒，衆心悉定。於是三韓之地，裔有大半。太祖復修戰艦，備糧餉，欲留戍羅州。金言等自以功多無賞，頗解體。太祖曰：“慎勿怠，唯戮力無貳心庶可獲福。今主上恣虐，多殺不辜，讒諛得志，互相浸潤。是以在內者人不自保，莫如外事征伐，殫力勤王，以得全身之爲愈也。”諸將然之，遂至光州西南界潘南縣浦口縱謀賊境。時有壓海縣賊帥能昌起海島，善水戰，號曰“水獺”，嘯聚亡命，遂與葛草島小賊相結。候太祖至，欲邀害之。太祖謂諸將曰：“能昌已知我至，必與島賊謀變。賊徒雖小，若併力合勢，遏前絕後，勝負未可知也。使善水者十餘人，擐甲持矛，乘輕舫夜至葛草渡口，擒往來計事者以沮其謀可也。”諸將皆從之，果獲一小舸，乃能昌也。執送于裔，裔大喜，乃唾昌面曰：“海賊皆推汝爲雄，今爲俘虜，豈非我神算乎！”乃示衆斬之。

乾化三年癸酉，以太祖屢著邊功，累階爲波珍粲，兼侍中，以召之。水軍之務盡委副將金言等，而征討之事必令稟太祖行之。於是太祖位冠百僚，然非素志，且畏讒，不樂居位。每出入公門，平章國計，惟抑情謹慎，務得衆心。好賢嫉惡，每見人被讒，輒悉解救。有青州人阿志泰，本諂<sup>〔1〕</sup>詐，見裔喜讒，乃譖同州人

〔1〕 原作諂，與諂形近而訛，以下統改。

笠全、辛方、寬舒等。有司推之數年未決，太祖立別真僞。志泰伏辜，衆情稱快。由是轅門將校、宗室勳賢、智計儒雅之輩，莫不風靡景從。太祖懼禍及，復求閫外。

四年甲戌，裔又謂水軍帥賤，不足以威敵，乃解太祖侍中，使復領水軍，就貞州浦口理戰艦七十餘艘，載兵士二千人，往至羅州。百濟與海上草竊知太祖復至，皆懾伏莫敢動。太祖還告舟楫之利，應變之宜。裔喜謂左右曰：“我諸將中誰可比擬乎？”時裔誣構叛罪，日殺百數。將相遇害者，十有八九。常自云：“我得彌勒觀心法，能知婦人陰私，若有干我觀心者，便行峻法。”遂鍛造三尺鐵杵，有欲殺者，輒熱之以撞其陰，烟出口鼻死。由是士女股慄，怨憤日甚。

一日急召太祖入內，裔方檢點誅殺人籍沒金銀寶器床帳之具，怒目熟視太祖曰：“卿昨夜聚衆謀叛，何耶？”太祖顏色自若，輒然而笑曰：“烏有是哉。”裔曰：“卿莫給我，我能觀心，所以知也。我將入定以觀了說其事。”乃合眼負手仰天良久，時掌奏崔凝在側，佯墜筆，下庭取之，因趨過太祖，微語曰：“不服則危。”太祖乃悟，曰：“臣實謀叛，罪當死。”裔大笑曰：“卿可謂直也。”即以金銀粧鞍轡賜之，曰：“卿勿復誑我。”遂以步將康瑄詰、黑湘、金材瑗等副太祖，增治舟舸百餘艘，大船十數，各方十六步，上起樓櫓，可以馳馬。領軍三千餘人，載糧餉往羅州。是歲，南方饑饉，草竊蜂起。戍卒皆食半菽，太祖盡心

救恤，賴以全活。

初，太祖年三十，夢見九層金塔立海中，自登其上。貞明四年三月，唐商客王昌瑾忽於市中見一人狀貌瓌偉，鬚髮皓白，頭戴古冠，被居士服，左手持三隻椀，右手擎一面古鏡，方一尺許，謂昌瑾曰：“能買我鏡乎？”昌瑾以二斗米買之。鏡主將米沿路散與乞兒而去，疾如旋風。昌瑾懸其鏡於市壁，日光斜映，隱隱有細字可讀。其文曰：“三水中，四維下，上帝降子於辰馬。先操雞，後搏鴨，此謂運滿一三甲。暗登天，明理地，遇子年中興大事。混蹤跡，沌名姓，混沌誰知真與聖。振法雷，揮神電，於巳年中二龍見，一則藏身青木中，一則現形黑金東。智者見，愚者盲，興雲注雨與人征。或見盛，或視衰，盛衰爲滅惡塵滓。此一龍，子三四，遞代相承六甲子。此四維，定滅丑，越海來降須待酉。此文若見於明王，國泰人安帝永昌。吾之。”記凡一百四十七字。

昌瑾初不知有文，及見之，謂非常，獻于裔。裔令昌瑾物色求其人，彌月竟不能得。唯東州勃颯寺熾盛光如來像前有填星古像如其狀，左右亦持椀鏡。昌瑾喜，具以狀白。裔歎異之，令文人宋含弘、白卓、許原等解之。含弘等曰：“三水中，四維下，上宰降子於辰馬”者，辰韓馬韓也。“巳年中，二龍見，一則藏身青木中，一則現形黑金東”者，青木，松也，謂松嶽郡人，以龍爲名者之子孫，可以爲君主也。王侍中有王侯之相，豈謂是歟？黑金，鐵也，今所都鐵圓

之謂也。今主初盛於此，殆終滅於此乎？“先操雞後搏鴨”者，王侍中御國之後，先得雞林，後收鴨綠之意也。”三人相謂曰：“王猜忌嗜殺，若告以實，王侍中必遇害，吾輩亦且不免矣。”乃詭辭告之。

至六月乙卯，騎將洪儒、裴玄慶、申崇謙、卜智謙等密謀，夜詣太祖第，共言推戴之意，太祖固拒不許。夫人柳氏手提甲領被太祖，諸將扶擁而出，令人馳且呼曰：“王公已舉義旗矣！”於是，奔走來赴者不可勝記。先至宮門，鼓譟以待者亦萬餘人。裔聞之驚駭曰：“王公得之，吾事已矣！”乃不知所圖，以微服出自北門亡去。內人清宮以迎，裔遁于巖谷，信宿，飢甚，偷截麥穗而食，尋爲斧壤民所害。

（戊寅）元年夏六月丙辰，即位于布政殿，國號高麗，改元天授。

丁巳，詔曰：“前主當四郡土崩之時，剷除寇賊，漸拓封疆，未及兼併海內，俄以酷暴御衆，以姦回爲至道，以威侮爲要術。徭煩賦重，人耗土虛，而猶宮室宏壯，不遵制度。勞役不止，怨讟遂興。於是竊號稱尊，殺妻戮子，天地不容，神人共怨。荒墜厥緒，可不戒乎！朕資群公推戴之心，登九五統臨之極，移風易俗，咸與惟新。宜遵改轍之規，深鑑伐柯之則。君臣諧魚水之歡，河海協晏清之慶。內外群庶，宜悉朕懷。”群臣拜謝曰：“臣等值前主之世，毒害良善，

淫<sup>〔1〕</sup>虐無辜，老稚嗷嗷，莫不含冤。幸今得保首領，遭遇聖明，敢不竭力以圖報效。”

戊午，王謂韓粲聰逸曰：“前主信讒好殺，以卿貫鄉青州土地沃饒，人多豪傑，恐其爲變，將欲殲之，乃召軍人尹全、愛堅等八十餘人，俱以非辜，械繫在途。卿其亟往，放還田里。”

庚申，馬軍將軍桓宣吉謀逆，伏誅。

辛酉，詔曰：“設官分職，任能之道斯存；利俗安民，選賢之務是急。誠無官曠，何有政荒。朕叨膺景命，顯馭丕圖。顧臨蒞以難安，念庸虛之可懼。唯慮知人不明，審官多失，俾起遺賢之歎，深乖得士之宜。寢興載懷，職此而已。內外庶僚，並稱其職，則匪獨今時之致理，足貽後代之可稱。宜其登庸列辟，歷試群公。勉務精選，咸使僉諧。自中及外，具悉朕懷。”遂以韓粲金行濤爲廣評侍中，韓粲黔剛爲內奉令，韓粲林明弼爲徇軍部令，波珍粲林曦爲兵部令，蘇判陳原爲倉部令，韓粲閻萇爲義刑臺令，韓粲歸評爲都航司令，韓粲孫迥爲物藏省令，蘇判秦勁爲內泉部令，波珍粲秦靖爲珍閣省令，是皆稟性端方，處事平允，咸從創業之始，俱罄佐命之勳者也。閼粲林積璵爲廣評侍郎，前守徇軍部卿能駿、倉部卿權寔並爲內奉卿，閼粲金堙、英俊並爲兵部卿，閼粲崔汶、堅術並爲倉部卿，一吉粲朴仁遠、金言規並爲白書省卿，林湘煖

〔1〕 原作淫，淫之訛字，以下統改。

爲都航司卿，姚仁暉、香南並爲物藏卿，能惠、曦弼並爲內軍卿，是皆夙達<sup>〔1〕</sup>事務、清謹可稱、奉公無怠、敏於決斷、允愜衆心者也。前廣評郎中康允珩爲內奉監，前徇軍部郎中韓粲申一、林寔並爲廣評郎中，前廣評史國鉉爲員外郎，前廣評史倪言爲內奉理決，內奉史曲矜會爲評察，前內奉史劉吉權爲徇軍郎中，其餘司省各置郎史，用備員數，一無所缺。蓋開國之初，妙簡賢材，以諧庶務也。

壬戌，以韓粲朴質榮爲侍中。以蘇判宗偁少爲僧，務行姦詐；內軍將軍狄鉄幼爲髡鉗，巧言取容，皆得幸弓裔，好行浸潤，多陷良善。誅之。

癸亥，隱士朴儒來見，賜冠帶。

乙丑詔曰：“爲國當務節儉，民富倉實，雖有水旱饑饉，不能爲患。所有內莊及東宮食邑積穀歲久，必多朽損，其以內奉郎中能梵爲審穀使。”

以內奉員外郎尹珩爲內奉郎中，內奉史李矜會爲內奉員外。

戊辰，以白書省孔目直晟爲白書郎中，徇軍郎中閔剛爲內軍將軍。

詔曰：“朕聞乘機革制，正謬是詳，導俗訓民，號令必慎。前主以新羅階官郡邑之號悉皆鄙野，改爲新制，行之累年，民不習知，以至惑亂。今悉從新羅之制，其名義易知者，可從新制。”

---

〔1〕 原作達，達之訛字，以下統改。

己巳，馬軍大將軍伊听巖謀叛，棄市。

秋七月壬申，以廣評郎能寔爲徇軍郎中。

癸巳，廣評侍郎苟弼病免，以兵部卿列評代之。

丙申，青州領軍將軍堅金來見。

以前兵部卿職預爲泰評侍郎。

八月己酉，諭群臣曰：“朕慮諸道寇賊聞朕初即位，或構邊患，分遣單使重幣卑辭以示惠和之意。”歸附者果衆，獨甄萱不肯交聘。

庚戌，朔方鵠巖城帥尹瑄來歸。

辛亥，詔曰：“前主視民如草芥，而惟欲之從，乃信讖緯，遽棄松嶽，還居斧壤，營立宮室。百姓困於土功，三時失於農業。加以饑饉薦臻，疾疫仍起，室家棄背，道殣相望。一匹細布直米五升，至使齊民賣身鬻子爲人奴婢。朕甚悶焉。其令所在具錄以聞。”於是得一千餘口，以內庫布帛贖還之。又詔曰：“人臣運佐時之奇略，樹蓋世之高勳者，錫之以分茅胙土，褒之以峻秩崇班，是百代之常典，千古之宏規也。朕出自側微，才識庸下，誠資群望，克踐洪基。當其廢暴主之時，竭忠臣之節者，宜行賞賚，以獎勳勞。其以洪儒、裴玄慶、申崇謙、卜智謙爲第一等，給金銀器、錦繡綺被褥、綾羅布帛有差。堅權、能寔、權慎、廉湘、金樂、連珠、麻煖爲第二等，給金銀器、錦繡綺被褥、綾帛有差。其第三等二千餘人，各給綾帛穀米有差。朕與公等欲救生民，未能終守臣節，以此爲功，豈無慚德，然而有功不賞，無以勸將來，故有今日之

賞，公等明知朕意。”

甄萱遣一吉粲閔郃來賀即位，命廣評侍郎韓申一等迎于甘彌縣。郃至，厚禮遣之。

甲寅，以兵部卿萱寔爲內奉卿。

癸亥，以熊運等十餘州縣叛附百濟，命前侍中金行濤爲東南道招討使，知牙州諸軍事。

丙寅，以倉部郎中柳問律爲廣評郎中。

九月乙酉，徇軍吏林春吉等謀叛，伏誅。

庚寅，以徇軍郎中玄律爲兵部郎中。

癸巳，以前侍中具鎮爲羅州道大行臺侍中，鎮辭以久勞前主不肯行，王不悅，謂劉權說曰：“昔予歷試險阻，而未嘗告勞者，實懼嚴威也。今鎮固辭不行，可乎？”權說對曰：“賞以勸善，罰以懲惡。宜加嚴刑，以戒群下。”王然之，鎮懼，謝罪遂行。

甲午，尚州賊帥阿字蓋遣使來附，王命備儀迎之。習儀於毬庭，文武官俱就班，廣評郎中柳問律與直省官朱瑄劾爭列。王曰：“讓爲禮宗，敬乃德本。今接賓以禮，將觀厥成，而問律、瑄劾爭列，豈敬慎者乎，宜並徙邊以彰其罪。”以徇軍郎中景訓代問律爲廣評郎中。

乙未，以前內奉監金篆榮、能惠並爲內軍卿。

丙申，諭群臣曰：“平壤古都荒廢雖久，基址尚存，而荆棘滋茂，蕃人遊獵於其間，因而侵掠邊邑，爲害大矣。宜徙民實之，以固藩屏，爲百世之利。”遂爲大都護，遣堂弟式廉、廣評侍郎列評守之。

丁酉，以珍閣省卿柳陟良當革命之際，群僚倉卒



散走，獨不離本省，所典倉庫無所亡失，特授廣評侍郎。

冬十月庚申，以守義刑臺卿能律爲廣評侍郎，廣評侍郎職預爲內侍書記。

辛酉，青州帥波珍粲陳瑄與其弟宣長謀叛，伏誅。

十一月，始設八關會，御儀鳳樓觀之，歲以爲常。

（己卯）二年春正月，定都于松嶽之陽，創宮闕，置三省六尚書，官九寺，立市廛，辨坊里，分五部，置六衛。

三月，創法王、王輪等十寺于都內，兩京塔廟肖像之廢缺者，並令修葺。

辛巳，追謚三代。以曾祖考爲始祖元德大王，妃爲貞和王后；祖考爲懿祖景康大王，妃爲元昌王后；考爲世祖威武大王，妃爲威肅王后。

秋八月癸卯，以青州首鼠順逆，訛言屢興，親幸慰撫，遂命城之。

九月癸未，吳越國文士酋彥規來投。

冬十月，城平壤。

（庚辰）三年春正月，新羅始遣使來聘。

康州將軍閔雄遣其子一康爲質，拜一康阿粲，以卿行訓之妹妻之，遣郎中春讓於康州，慰諭歸附。

秋九月辛丑，甄萱遣阿粲功達獻孔雀扇、智異山竹箭。

冬十月，甄萱侵新羅，取大良、仇史二郡，至于進禮郡。新羅遣阿粲金律來求援，王遣兵救之。萱聞

之引退，始與我有隙。是歲，巡幸北界。

（辛巳）四年春二月甲子，黑水酋長高子羅率百七十人來投。

壬申，達姑狄百七十一人，侵新羅道，由登州將軍堅權邀擊，大敗之，匹馬無還者。命賜有功者，穀人五十石。新羅王聞之，喜，遣使來謝。

夏四月乙酉，黑水阿於間率二百人來投。

秋九月己亥，遣郎中撰行往巡邊郡，存撫百姓。

冬十月丁卯，創大興寺于五冠山，迎置僧利言，師事之。

壬申，幸西京。

十二月辛酉，冊子武爲正胤。正胤即太子。

百濟人宮昌、明權等來投，賜田宅。

（壬午）五年春二月，契丹來遺橐駝、馬及氈。

夏四月，創日月寺于宮城西北。

六月丁巳，下枝縣將軍元奉來投。

秋七月戊戌，溟州將軍順式遣子降附。

冬十一月辛巳，真寶城主洪術遣使請降，遣元尹王儒、卿含弼等慰諭之。

是歲，徙大丞質榮、行波等父兄子弟及諸郡縣良家子弟以實西京。

幸西京，新置官府員吏始築在城。

親定牙善城民居。

（癸未）六年春三月甲申，以下枝縣將軍元奉爲元尹。

辛丑，命旨城將軍城達與其弟伊達、端林來附。

夏六月癸未，福府卿尹質使梁還，獻五百羅漢畫像，命置于海州嵩山寺。

癸巳，吳越國文士朴巖來投。

秋八月壬申，碧珍郡將軍良文遣其甥圭奐來降，拜圭奐元尹。

冬十一月戊申，真寶城主洪術遣其子王立獻鎧三十，拜王立元尹。

（甲申）七年秋七月，甄萱遣子須彌康、良劍等來攻曹物郡，命將軍哀宣、王忠救之。哀宣戰死，郡人固守，須彌康等失利而歸。

八月，甄萱遣使來獻絕影島驄馬一匹。

九月，新羅王昇英薨，其弟魏膺立，來告喪。王舉哀設齋追福，遣使弔之。

是歲，創外帝釋院、九耀堂、神衆院。

（乙酉）八年春三月，幸西京。

秋九月丙申，渤海將軍申德等五百人來投。

庚子，渤海禮部卿大和鈞、均老司政大元鈞、工部卿大福謩、左右衛將軍大審理等率民一百戶來附。渤海本粟末靺鞨也，唐武后時高勾麗人大祚榮走保遼東，睿宗封爲渤海郡王，因自稱渤海國，併有扶餘、肅慎等十餘國。有文字、禮樂、官府制度，五京、十五府、六十二州，地方五千餘里，衆數十萬。隣于我境，而與契丹世讎。至是，契丹主謂左右曰：“世讎未雪，豈宜安處。”乃大舉攻渤海大諲譔，圍忽汗城，大

諲譔戰敗乞降，遂滅渤海。於是其國人來奔者相繼。

甲寅，買曹城將軍能玄遣使乞降。

冬十月己巳，高鬱府將軍能文率士卒來投，以其城近新羅王都，勞慰遣還，唯留麾下侍郎孟近、大監明才、相述、弓式等。

遣征西大將軍庾黔弼攻百濟。

乙亥，王自將及甄萱戰于曹物郡。黔弼引兵來會，萱懼，乞和，以外甥真虎爲質，王亦以堂弟元尹王信交質。以萱十年之長，稱爲尚父。新羅王聞之，遣使曰：“萱反復多詐，不可和親。”王然之。

十一月己丑，耽羅貢方物。

十二月戊子，渤海左首衛小將冒豆干、檢校開國男朴漁等率民一千戶來附。

（丙戌）九年夏四月庚辰，甄萱質子真虎病死，遣侍郎弋萱送其喪。甄萱謂我殺之，殺王信，進軍熊津。王命諸城堅壁不出。新羅王遣使曰：“甄萱違盟舉兵，天必不祐。若大王奮一鼓之威，萱必自敗。”王謂使者曰：“吾非畏萱，俟惡盈而自僵耳。”萱聞讖云：“絕影名馬至百濟亡。”至是悔之，使人請還其馬，王笑而許之。

冬十二月癸未，幸西京，親行齋祭，巡歷州鎮。

是歲，遣張彬如唐。

（丁亥）十年春正月乙卯，親伐百濟龍州，降之。時甄萱違盟屢舉兵侵邊，王含忍久之，萱益稔惡，頗欲強吞，故王伐之。新羅王出兵助之。

乙丑，甄萱送王信之喪，遣信弟育迎之。

三月甲寅，渤海工部卿吳興等五十人、僧載雄等六十人來投。

辛酉，王入運州，敗其城主兢俊於城下。甲子，攻下近品城。

夏四月壬戌，遣海軍將軍英昌、能式等率舟師往擊康州，下轉伊山、老浦、平西山、突山等四鄉，虜人物而還。

乙丑，王攻熊州不克。

秋七月戊午，遣元甫在忠、金樂等攻破大良城，虜將軍鄒許祖等三十餘人。

八月丙戌，王徇康州，高思葛伊城城主興達歸款，於是百濟諸城守皆降附。

九月，甄萱攻燒近品城，進襲新羅高鬱府，逼至郊畿。新羅王遣連式告急，王謂侍中公萱、大相孫幸、正朝聯珠等曰：“新羅與我同好已久，今有急，不可不救。”遣公萱等以兵一萬赴之。未至，萱猝入新羅都城。時羅王與妃嬪宗戚出遊鮑石亭置酒娛樂，忽聞兵至，倉卒不知所爲。王與夫人走匿城南離宮，從臣、伶官、宮女皆被陷沒。萱縱兵大掠，入處王宮，令左右索王，置軍中，逼令自盡，強辱王妃，縱其下亂其嬪妾。立王表弟金傅爲王，虜王弟孝廉、宰臣英景等，盡取子女、百工、兵仗、珍寶以歸。王聞之大怒，遣使弔祭，親帥精騎五千邀萱於公山桐藪大戰，不利。萱兵圍王甚急，大將申崇謙、金樂力戰死之，諸軍破北，王僅以身免。萱乘勝取大木郡，燒盡田野、積聚。

冬十月，甄萱遣將侵碧珍郡，芟大、小木二郡禾稼。

十一月，燒碧珍郡稻穀。正朝索湘戰死之。

十二月，甄萱寄書于王曰：“昨者新羅國相金雄廉等將召足下入京，有同鼃應鼃聲，是欲鸚披隼翼，必使生靈塗炭，社稷丘墟。是用先著祖鞭，獨揮韓鉞，誓百僚如皎日，諭六部以義風。不意姦臣遁逃，邦君薨變，遂奉景明王之表弟、憲康王之外孫，勸即尊位，再造危邦。喪君有君，於是乎在。足下不詳忠告，徒聽流言，百計窺覷，多方侵擾，尚不能見僕馬首，拔僕牛毛。冬初都頭索湘束手於星山陣下，月內左相金樂曝骸於美利寺前，殺獲居多，追擒不少，強羸若此，勝負可知。所期者掛弓於平壤之樓，飲馬於溟江之水。然以前月七日吳越國使班尚書至，傳王詔旨：‘知卿與高麗久通歡好，共契隣盟，比因質子之兩亡，遂失和親之舊好，互侵疆境，不戢干戈。今專發使臣赴京本道，又移文高麗，宜相親比，永孚于休。’僕義篤尊王，情深事大，及聞詔諭，即欲祇承。但慮足下欲罷不能，困而猶鬥。今錄詔書寄呈，請留心詳悉，且饒獮迭憊，終必貽譏；蚌鷸相持，亦爲所笑。宜迷復之爲戒，無後悔之自貽。”

是歲，遣林彦如唐。

（戊子）十一年春正月壬申，溟州將軍順式來朝。

乙亥，元尹金相、正朝直良等將往救康州，經草八城爲城主興宗所敗，金相死之。

是月，王答甄萱書曰：“伏奉吳越國通和使班尚書所傳詔書一道，兼蒙足下辱示長書敘事者，伏以華輶膚使，爰致制書，尺素好音，兼承教誨。捧芝檢而雖增感激，闢華牋而難遣嫌疑。今托回軒，輒敷危衽。僕仰承天假，俯迫人推，過叨將帥之權，獲赴經綸之會。頃以三韓厄會，九土凶荒，黔黎多屬於黃巾，田野無非於赤土。庶幾弭風塵之警，有以救邦國之災。爰自善隣，於焉結好。果見數千里農桑樂業，七八年士卒閑眠。及至酉年，維時陽月，忽焉生事，至於交兵。足下始輕敵以直前，若螳螂之拒轍；終知難而勇退，如蚊子之負山。拱手陳辭，指天作誓：‘今日之後，永世歡和，苟或渝盟，神其殛矣。’僕亦尚止戈之武，期不殺之仁，遂解重圍，以休疲卒，不辭質子，但欲安民。此則我有大德於南人也。豈謂敵血未乾，凶威復作。蜂蠆之毒，侵害於生靈；狼虎之狂，爲梗於畿甸。金城窘迫，黃屋震驚。仗義尊周，誰似桓文之霸；乘間謀漢，唯看莽卓之姦。致使王之至尊，枉稱子於足下；尊卑失序，上下同憂。以謂非有元輔之忠純，豈得再安於社稷。以僕心無匿惡，志切尊王，將援置於朝廷，使扶危於邦國。足下見毫釐之小利，忘天地之厚恩。斬戮君王，焚燒宮闕。殖醢卿士，虔劉士民，嫵姜則取以同車，珍寶則奪之秬載。元惡浮於桀紂，不仁甚於獍梟。僕怨極崩天，誠深却日。庶效鷹鷂之逐，以申犬馬之勤。再舉干戈，兩更槐柳。陸戰則雷馳電擊，水攻則虎搏龍騰。動必成功。舉無虛發，逐

尹邠於海岸，積甲如山；擒鄒祖於邊城，伏屍蔽野。燕山郡畔，斬吉奐於軍前；馬利城邊，戮隨晤於纛下。拔任存之日，邢積等數百人捐軀；破青州之時，直心等四五輩授首。桐藪望旗而潰散，京山含璧以投降。康州則自南而來歸，羅府則自西而移屬。侵攻若此，收復寧遙。必期泚水營中，雪張耳千般之恨；烏江亭上，成漢王一捷之功。竟息風波，永清寰海。天之所助，命將何歸？況承吳越王殿下德洽包荒，仁深字小，特出綸於丹禁，諭戢難於青丘，既奉訓謨，敢不尊奉。若足下祇承睿旨，悉戢凶機，不惟副上國之仁恩，抑亦紹東海之絕緒。若不過而能改，其如悔不可追。”

三月戊申，渤海人金神等六十戶來投。

夏四月庚子，幸湯井郡。

五月庚申，康州元甫珍景等運糧于古子郡，甄萱潛師襲康州，珍景等還，戰敗，死者三百餘人，將軍有文降于萱。

六月甲戌，碧珍郡地震。

癸巳，伊餐進慶卒，贈大匡。

秋七月辛亥，渤海人大儒範率民來附。

丙辰，自將擊三年山城，不克，遂幸青州。

八月，幸忠州。甄萱使將軍官昕城陽山，王遣命旨城元甫王忠率兵擊走之，官昕退保大良城，縱軍芟取大木郡禾稼，遂分屯烏於谷竹嶺路塞，命王忠等往諜于曹物城。

新羅僧洪慶自唐閩府航載《大藏經》一部至禮成



江，王親迎之，置于帝釋院。

九月丁丑，大相權信卒。嘗以破黃山郡功授重阿餐。

丁酉，渤海人隱繼宗等來附，見於天德殿三拜，人謂失禮，大相含弘曰：“失土人三拜，古之禮也。”

冬十一月，甄萱選勁卒攻拔烏於谷城，殺戍卒一千，將軍楊志、明式等六人出降，王命集諸軍于毬庭，以六人妻子徇諸軍棄市。

是歲，巡幸北界。

（己丑）十二年夏四月乙巳，幸西京，歷巡州鎮。

六月壬寅，以元甫長弼爲大相。

癸丑，天竺國三藏法師摩睺羅來，王備儀迎之，明年死于龜山寺。

庚申，渤海人洪見等以船二十艘載人物來附。

秋七月己卯，幸基州，歷巡州鎮。

辛巳，甄萱以甲卒五千侵義城府，城主將軍洪術戰死。王哭之慟，曰：“吾失左右手矣。”又侵順州，將軍元奉遁。

九月乙亥，幸剛州。

丙子，渤海正近等三百餘人來投。

冬十月丙申，百濟一吉干廉昕來投。

甄萱圍加恩縣，不克。

十二月，甄萱圍古昌郡，王自將救之。

（庚寅）十三年春正月丁卯，載巖城將軍善弼來投。

丙戌，王自將軍古昌郡瓶山，甄萱軍石山，相去五百步許，遂與戰。至暮，萱敗走，獲侍郎金渥，死者八千餘人。是日，古昌郡奏：“萱遣將攻陷順州，掠人戶而去。”王即幸順州，修其城，罪將軍元奉。

庚寅，以古昌郡城主金宣平爲大匡、權行張吉爲大相，於是永安、河曲、直明、松生等三十餘郡縣相次來降。

二月乙未，遣使新羅，告古昌之捷。羅王遣使報聘，致書請相見。是時新羅以東沿海州郡部落皆來降，自溟州至興禮府總百十餘城。

庚子，幸昵於鎮。

北彌秩夫城主萱達與南彌秩夫城主來降。

三月戊辰，以白書省郎中行順、英式並爲內議舍人。

夏五月壬辰，幸西京。

六月庚子，至自西京。

秋八月，創安和禪院，爲大匡王信願堂。

己亥，幸大木郡。以大丞弟弓爲天安都督府使，元甫嚴式爲副使。

癸卯，幸青州。

丙午，芋陵島遣白吉、土豆貢方物，拜白吉爲正位，土豆爲正朝。

九月丁卯，皆知邊遣崔奐請降。

冬十二月庚寅，幸西京，創置學校。

## 高麗史二

### 世家卷第二

#### 太祖二

（辛卯）十四年春二月丁酉，新羅王遣太守謙用復請相見。

辛亥，王如新羅，以五十餘騎至畿內，先遣將軍善弼問起居。羅王命百官迎于郊，堂弟相國金裕廉等迎于城門外，羅王出應門外迎拜，王答拜。羅王由左、王由右揖讓升殿，命扈從諸臣拜羅王。情禮備至。宴臨海殿，酒酣，羅王曰：“小國不天，爲甄萱榑喪，何痛如之。”泫然泣下，左右莫不嗚咽，王亦流涕，慰藉之。

夏五月丁丑，王遣羅王太后竹房夫人與相國裕廉，匣干禮文，波珍絜策宮、尹儒，韓絜策直、昕直、義卿、讓餘、寬封、含宜、熙吉等物有差。

癸未，王還，羅王送至穴城，以裕廉爲質而從，

都人士女感泣相慶，曰：“昔甄氏之來，如逢豺虎。今王公之來，如見父母。”

秋八月癸丑，遣甫尹善規等遺羅王鞍馬、綾羅、綵錦，並賜百官綵帛，軍民茶、幘頭，僧尼茶、香有差。

冬十一月辛亥，幸西京，親行齋祭，歷巡州鎮。

是歲，詔有司曰：“北蕃之人，人面獸心，飢來飽去。見利忘恥，今雖服事，向背無常，宜令所過州鎮築館城外待之。”

（壬辰）十五年夏五月甲申，諭群臣曰：“頃完葺西京，徙民實之，冀憑地力，平定三韓，將都於此，今者民家雌雞化爲雄，大風官舍頽壞，夫何災變至此！昔晉有邪臣潛畜異謀，其家雌雞化爲雄，卜云：‘人懷非分，天垂警戒，不悛其惡，竟取誅滅。’吳王劉濞之時，大風壞門拔木，其卜亦同，濞不知戒，亦底覆亡。且《祥瑞志》云：‘行役不平，貢賦煩重，下民怨上，有此之應’。以古驗今，豈無所召。今四方勞役不息，供費既多，貢賦未省，竊恐緣此，以致天譴，夙夜憂懼，不敢遑寧，軍國貢賦，難以蠲免，尚慮群臣，不行公道，使民怨咨，或懷非分之心，致此變異。各宜悛心，毋及於禍。”

六月丙寅，百濟將軍龔直來降。

秋七月辛卯，親征一牟山城，遣正胤武巡北邊。

九月，甄萱遣一吉粲相貴以舟師入侵禮成江，焚鹽、白、貞三州船一百艘，取猪山島牧馬三百匹而歸。

冬十月，甄萱海軍將尚哀等攻掠大牛島，命大臣萬歲等救之，不利。

十一月己丑，前內奉卿崔凝卒。

是歲，遣大相王仲儒如唐獻方物。

復攻一牟山城，破之。

（癸巳）十六年春三月辛巳，唐遣王瓊、楊昭業來冊王，詔曰：“王者，法天而育兆庶，體地而安八紘。允執大中，式彰無外，斗極正而衆星咸拱，溟渤廣而百谷皆宗。所以居戴履之倫，窮照臨之境。弘道修德，恭己虛懷。歸心者睠爲王人，嚮化者被以風教。由是舉封崇之命，稽旌賞之文，垂於古先，罔敢失墜。其有地稱平壤，師擅兼材，統五族之強宗，控三韓之奧壤。務權鎮靜，志奉聲明。爰協彝章，是加寵數。咨爾權知高麗國王事建，身資雄勇，智達機鈴，冠邊城以挺生，負壯圖而間出，山河有授，基址克豐。踵朱蒙啓土之禎，爲彼君長；履箕子作蕃之跡，宣乃惠和。俗厚知書，故能導之以禮義。風驍尚武，故能肅之以威嚴。提封於是謐寧，生聚以之完輯。而復行及唇齒，分篤皮毛，忿黠虜之挺袂，恤隣邦而救患。矧以披肝效順，秉節納忠，慕仁壽以康時，識文思之撫運。航深梯險，輸贐貢琛。繼陳述職之儀，茂著勤王之業。夫推至誠而享豐報，道之常也；奠真封而顯列國，禮之大也。勞有所至，朕無愛焉。今遣使太僕卿王瓊、使副太府少卿兼通事舍人楊昭業等，持節備禮，冊命爾爲高麗國王。於戲！作善，天降之祥；守正，神祚

之福。干戈慎於危事，文軌資於遠謀。永爲唐臣，世服王爵，往踐厥位，汝惟欽哉！”

又詔曰：“卿珠樹分輝，金鉤協兆。領日邊之分野，冠海外之英雄。士心同感於撫循，民意咸歌於惠養。而又誠堅事大，志在恤隣。（抹）〔秣〕馬利兵，挫甄萱之黨；分衣減食，濟忽汗之人。繼航海以拜章，每充庭而致貢。金石之誠明貫日，風雲之梗概凌空。名播一時，美流四裔。忠規若此，賞典寧忘。特議疏封，仍升峻秩。剪桐圭而錫命，目極蓬山；睠桃野以傾思，心隨濟水。勉祇異禮，永保崇勳。今授卿特進、檢校太保、使持節、玄菟州都督、上柱國，充大義軍使，仍封高麗國王。今差使太僕卿王瓊、使副太府少卿楊昭業等往彼備禮冊命，兼賜國信銀器匹段等，具如別錄，至當領也。”

又詔曰：“卿長淮茂族，漲海雄蕃，以文武之才控茲土宇，以忠孝之節來稟化風。貞規既篆於旗常，寵數是覃於簡冊。如綸如紱，已成虎穴之榮；宜室宜家，足顯鵲巢之美。俾頒湯沐，以慶絲蘿，永光輔佐之功，式協優隆之命。諒卿誠素，知我渥恩，卿妻柳氏今封河東郡夫人。”

又賜三軍將吏等詔曰：“朕以王建星雲稟秀，金石輸誠，信義著於睦隣，忠孝彰於事大。領三韓之樂土，每奉周正；越萬里之洪波，常陳禹貢。勳名已顯，爵秩未崇，宜寵錫以桐圭，俾真封於桃野。今封授高麗國王，差使往彼，備禮冊命，便令慰諭，想宜知悉。”

又賜曆日，自是除天授年號，行後唐年號。

（甲午）十七年春正月甲辰，幸西京，歷巡北鎮。

夏五月乙巳，幸禮山鎮。詔曰：“往者新羅政衰，群盜競起，民庶亂離，曝骨荒野。前主服紛爭之黨，啓邦國之基，及乎末年，毒流下民，傾覆社稷。朕承其危緒，造此新邦，勞役瘡痍之民，豈予意哉。但草昧之時，事不獲已。櫛風沐雨，巡省州鎮，修完城柵，欲令赤子得免綠林之難。由是男盡從戎，婦猶在役。不忍勞苦，或逃匿山林，或號訴官府者，不知幾許。王親權勢之家，安知無肆暴陵弱，困我編氓者乎？予以一身，豈能家至而目覩？小民所以末由控告，呼籲彼蒼者也。宜爾公卿將相食祿之人，諒予愛民如子之意，矜爾祿邑編戶之氓，若以家臣無知之輩使于祿邑，惟務聚斂，恣爲割剝，爾亦豈能知之？雖或知之，亦不禁制。民有論訴者，官吏徇情掩護，怨讟之興，職競由此。予嘗誨之，欲使知之者增勉，不知者能誠。其違令者別行染卷，猶以匿人過爲賢，不曾舉奏。善惡之實，曷得聞知？如此寧有守節改過者乎？爾等遵我訓辭，聽我賞罰，有罪者無論貴賤，罰及子孫。功多罪小，量行賞罰。若不改過，追其祿俸或一年、二三年、五六年以至終身不齒。若志切奉公，終始無瑕，生享榮祿，後稱名家，至於子孫，優加旌賞。此則非但今日，傳之萬世以爲令範。人有爲民陳訴，勾喚不赴，必令再行勾喚，先下十杖，以治違令之罪，方論所犯。吏若故爲遷延，計日罰責。又有怙威恃力，令

之不可觸者，以名聞。”

秋七月，渤海國世子大光顯率衆數萬來投，賜姓名王繼，附之宗籍，特授元甫，守白州以奉其祀，賜僚佐爵、軍士田宅有差。

九月丁巳，自將征運州，與甄萱戰，大敗之。熊津以北三十餘城聞風自降。

冬十二月，渤海陳林等一百六十人來附。

是歲，西京旱蝗。

（乙未）十八年春三月，甄萱子神劍幽其父於金山佛宇，殺其弟金剛。初，萱多妾媵，有子十餘人，第四子金剛身長多智，萱特愛之，欲傳其位。其兄神劍、良劍、龍劍等知之憂悶。時良劍、龍劍出鎮于外，神劍獨在側，伊粲能奐使人與良劍、龍劍陰謀，勸神劍作亂。

夏六月，甄萱與季男能父、女哀福、嬖妾姑比等奔羅州，請入朝。遣將軍庾黔弼，大匡萬歲，元甫香父、吳淡、能宣、忠質等領軍船四十餘艘，由海路迎之。及至，復稱萱爲尚父，授館南宮，位百官上，賜楊州爲食邑，兼賜金帛，奴婢各四十口，廐馬十匹，以先降人信康爲衙官。

秋九月甲午，幸西京，歷巡黃海州。

冬十月壬戌，新羅王金傳遣侍郎金封休請入朝。王遣攝侍中王鐵、侍郎韓憲邕等往報。

十一月甲午，羅王率百僚發王都，士庶皆從之，香車寶馬連亘三十餘里。道路填咽，觀者如堵，沿路



州縣，供億甚盛。王遣人問慰。癸卯，羅王與王鐵等人開京，王備儀仗出郊迎勞，命東宮與諸宰從衛而入館于柳花宮。癸丑，御正殿，會百官備禮，以長女樂浪公主歸于羅王。己未，羅王上書曰：“本國久經危亂，曆數已窮，無復望保基業，願以臣禮見。”不允。

十二月辛酉，群臣奏曰：“天無二日，土無二王，一國二君，民何以堪！願聽羅王之請。”壬申，御天德殿，會百僚。曰：“朕與新羅敵血同盟，庶幾兩國永好，各保社稷。今羅王固請稱臣，卿等亦以爲可，朕心雖愧，衆意難違。”乃受羅王庭見之禮，群臣稱賀，聲動宮掖。於是拜金傅爲政丞，位太子上，歲給祿千碩，創神鸞宮賜之。其從者並收錄，優賜田祿。除新羅國爲慶州，仍賜爲食邑。

是歲，遣禮賓卿邢順等如唐。

（丙申）十九年春二月，甄萱壻將軍朴英規請內附。

夏六月，甄萱請曰：“老臣遠涉滄波，來投聖化，願仗威靈，以誅賊子耳。”王初欲待時而動，憐其固請，乃從之。先遣正胤武、將軍述希，領步騎一萬，趣天安府。

秋九月，王率三軍至天安府，合兵進次一善郡。神劍以兵逆之。甲午，隔一利川而陣，王與甄萱觀兵。以萱及大相堅權、述希、皇甫金山、元尹康柔英等領馬軍一萬，支天軍大將軍元尹能達、奇言、韓順明、昕岳，正朝英直、廣世等領步軍一萬爲左綱，大相金

鐵、洪儒、朴守卿，元甫連珠、元尹萱良等領馬軍一萬，補天軍大將軍元尹三順、俊良，正朝英儒、吉康忠、昕繼等領步軍一萬爲右綱，溟州大匡王順式、大相兢俊、王廉、王父，元甫仁一等領馬軍二萬，大相庾黔弼、元尹官茂、官憲等領黑水、達姑、鐵勒諸蕃勁騎九千五百，祐天軍大將軍元尹貞順、正朝哀珍等領步軍一千，天武軍大將軍元尹宗熙、正朝見萱等領步軍一千，杆天軍大將軍金克宗、元甫助杆等領步軍一千爲中軍。又以大將軍大相公萱、元尹能弼、將軍王含允等領騎兵三百、諸城軍一萬四千七百爲三軍援兵。鼓行而前，忽有白雲狀如劍戟起我師上，向賊陣行。百濟左將軍孝奉、德述、哀述、明吉等四人見兵勢大盛，免胄投戈，降于甄萱馬前，於是賊兵喪氣，不敢動。王勞孝奉等，問神劍所在，孝奉等曰：“在中軍，左右夾擊，破之必矣。”王命大將軍公萱直擣中軍，三軍齊進奮擊，賊兵大潰，虜將軍昕康、見達、殷述、今式、又奉等三千二百人，斬五千七百餘級。賊倒戈相攻，我師追至黃山郡踰炭嶺，駐營馬城。神劍與其弟菁州城主良劍、光州城主龍劍及文武官僚來降，王大悅，勞慰之，命攸司虜獲百濟將士三千二百人並還本土，唯昕康、富達、又奉、見達等四十人並妻子送至京師。面責能奐曰：“始與良劍等謀囚君父立其子者，汝也。爲臣之義，當如是乎？”能奐俛首不能言，遂命誅之。流良劍、龍劍于真州，尋殺之。以神劍僭位爲人所脅，罪輕二弟，又且歸命，特免死，賜

官。於是甄萱憂慙發疽，數日卒于黃山佛舍。王入百濟都城，令曰：“渠魁既已納款，無犯我赤子。”存問將士，量才任用，軍令嚴明，秋毫不犯。州縣按堵，老幼皆呼萬歲，相慶曰：“后來其蘇。”

是月，王至自百濟。御威鳳樓，受文武百官及百姓朝賀。王既定三韓，欲使爲人臣子者明於禮節，遂自製《政誠》一卷，《誠百寮書》八篇，頒諸中外。

冬十二月丁酉，大匡裴玄慶卒。

是歲，創廣興、現聖、彌勒、內天王等寺，又創開泰寺於連山。

（丁酉）二十年夏五月癸丑，金傅獻鑄金安玉排方腰帶，長十圍六十二鈐，新羅寶藏殆四百年世傳聖帝帶。王受之。命元尹弋萱藏于物藏。初，新羅使金律來，王問曰：“聞新羅有三大寶，丈六金像、九層塔，並聖帝帶也。三寶未亡，國亦未亡。塔像猶存，不知聖帶今猶在耶？”律對曰：“臣未嘗聞聖帶也。”王笑曰：“卿爲貴臣，何不知國之大寶？”律慚，還告其王，王問群臣，無能知者。時有皇龍寺僧年過九十者，曰：“予聞聖帶是真平大王所服，歷代傳之，藏在南庫。”王遂開庫，風雨暴作，白晝晦冥，不得見。乃擇日齋祭，然後見之。國人以真平王是聖骨之王，稱曰聖帝帶。

遣王規、邢順如晉賀登極。

（戊戌）二十一年春三月，西天竺僧弘梵大師啞哩嚩日羅來，本摩竭陁國大法輪菩提寺沙門也，王大備

兩街威儀法駕迎之。

秋七月壬子，碧珍郡將軍李忞言卒。

是月，始行後晉年號。

築西京羅城。

冬十二月，耽羅國太子末老來朝，賜星主王子爵。

是歲，渤海人朴昇以三千餘戶來投。

（己亥）二十二年春三月戊辰，佐丞龔直卒。

是歲，晉遣國子博士謝攀來，冊王爲開府儀同三司、檢校太師，餘如故。

（庚子）二十三年春三月，改州府郡縣號。

秋七月，王師忠湛死，樹塔于原州靈鳳山興法寺，親製碑文。

冬十二月，開泰寺成，設落成華嚴法會，親製疏文。

是歲，重修新興寺，置功臣堂，畫三韓功臣於東西壁，設無遮大會一晝夜，歲以爲常。

晉歸我質子王仁翟。

（辛丑）二十四年夏四月乙未，大匡庾黔弼卒。

是歲，遣大相王申一如晉獻方物。

（壬寅）二十五年冬十月，契丹遣使來，遺橐駝五十匹。王以契丹嘗與渤海連和，忽生疑貳，背盟殄滅，此甚無道，不足遠結爲隣，遂絕交聘，流其使三十人于海島，繫橐駝萬夫橋下，皆餓死。

（癸卯）二十六年夏四月，御內殿召大匡朴述希親授《訓要》曰：“朕聞大舜耕歷山，終受堯禪；高帝

起沛澤，遂興漢業。朕亦起自單平，謬膺推戴，夏不畏熱，冬不避寒，焦身勞思，十有九載，統一三韓，叨居大寶二十五年，身已老矣。第恐後嗣縱情肆欲，敗亂綱紀，大可憂也。爰述《訓要》，以傳諸後，庶幾朝披夕覽，永爲龜鑑。其一曰：我國家大業，必資諸佛護衛之力，故創禪教寺院，差遣住持焚修，使各治其業。後世姦臣執政，徇僧請謁，各業寺社，爭相換奪，切宜禁之。其二曰：諸寺院皆道誡推占山水順逆而開創。道誡云：‘吾所占定外，妄加創造，則損薄地德，祚業不永。’朕念後世國王、公（候）〔侯〕、后妃、朝臣各稱願堂，或增創造，則大可憂也。新羅之末，競造浮屠，衰損地德，以底於亡，可不戒哉。其三曰：傳國以嫡，雖曰常禮，然丹朱不肖，堯禪於舜，實爲公心。若元子不肖，與其次子，又不肖，與其兄弟之衆所推戴者，俾承大統。其四曰：惟我東方，舊慕唐風，文物禮樂，悉遵其制，殊方異土，人性各異，不必苟同。契丹是禽獸之國，風俗不同，言語亦異，衣冠制度慎勿效焉。其五曰：朕賴三韓山川陰佑，以成大業。西京水德調順，爲我國地脉之根本，大業萬代之地，宜當四仲巡駐，留過百日，以致安寧。其六曰：朕所至願在於燃燈、八關。燃燈所以事佛，八關所以事天靈及五嶽名山大川龍神也。後世姦臣建白加減者，切宜禁止。吾亦當初誓心，會日不犯國忌，君臣同樂，宜當敬依行之。其七曰：人君得臣民之心爲甚難。欲得其心，要在從諫遠讒而已。從諫則聖，

讒言如蜜，不信則讒自止。又使民以時，輕徭薄賦，知稼穡之艱難，則自得民心，國富民安。古人云：‘芳餌之下，必有懸魚，重賞之下，必有良將；張弓之外，必有避鳥；垂仁之下，必有良民。’賞罰中則陰陽順矣。其八曰：車峴以南，公州江外，山形地勢，並趨背逆，人心亦然。彼下州郡人參與朝廷、與王侯國戚婚姻，得秉國政，則或變亂國家，或銜統合之怨，犯蹕生亂。且其曾屬官寺奴婢、津驛雜尺，或投勢移免，或附王侯宮院，姦巧言語，弄權亂政，以致災變者，必有之矣。雖其良民，不宜使在位用事。其九曰：百辟群僚之祿，視國大小，以爲定制，不可增減。且古典云：‘以庸制祿，官不以私。’若以無功人及親戚私昵虛受天祿，則不止下民怨謗，其人亦不得長享福祿，切宜戒之。又以強惡之國爲隣，安不可忘危。兵卒宜加護恤，量除徭役，每年秋閱勇銳出衆者，隨宜加授。其十曰：有國有家，儆戒無虞，博觀經史，鑑古戒今。周公大聖《無逸》一篇進戒成王，宜當圖揭，出入觀省。”十訓之終，皆結“中心藏之”四字，嗣王相傳爲寶。

五月，王不豫，停聽斷。

丁酉，宰臣廉相、王規、朴守文等侍坐，王曰：“漢文遺詔曰：‘天下萬物之萌生，靡有不死。死者，天地之理，物之自然，奚可甚哀。’前古哲王，秉心如此。予邁疾已歷二旬，視死如歸，有何憂也。漢文之言，即予意也。內外機務久不決者，卿等並與太子武

裁決而後聞。”

丙午，疾大漸，御神德殿，命學士金岳草遺詔，文成，王不復語。左右失聲大哭，王問：“此何聲也？”對曰：“聖上作民父母，今日欲棄群臣，臣等痛不自勝耳。”王笑曰：“浮生自古然矣。”言訖，有頃而薨。在位二十六年，壽六十七。遺命內外庶僚並聽東宮處分，喪葬園陵制度，依漢魏二文故事，悉從儉約。王規模宏遠，正朝廷，明賞罰，崇節儉，用賢良，重儒道，謚曰神聖，廟號太祖。葬于松嶽西麓，陵曰顯陵。穆宗五年加謚元明，顯宗五年加光烈，十八年加大定，文宗十年加章孝，仁宗十八年加仁勇，高宗四十年加勇烈。

李齊賢贊曰：“忠宣王嘗言：‘我太祖規模德量，生於中國當不減宋太祖。宋太祖事周世宗，世宗賢主也，待宋太祖甚厚，宋太祖亦爲之盡力。及恭帝幼冲，政出太后，迫于群情而受周禪，蓋出於不得已也。我太祖事弓裔猜暴之君，三韓之地，裔有其二，太祖之功也。以不世之功，處必疑之地，可謂危矣，而國人歸心，將士推戴，然猶固讓，欲徇延陵之節，弔伐之事，亦豈得已哉。其好生惡殺而信賞必罰，推誠功臣而不假以權，創業垂統固宜一揆矣。至若宋祖以江南李氏比之鼯睡卧榻，則石晉所賂契丹山後之十六州，蓋視爲橐中物。既收北漢，將長驅以定秦漢之疆耳。我太祖即位之後，金傅未賓，甄萱未虜，而屢幸西都，親巡北鄙，其意亦以東明舊壤爲吾家青氈，必席卷而

有之，豈止操雞搏鴨而已哉。由是觀之，雖大小之勢不同，二祖規模德量，所謂易地皆然者也。’忠宣聰明好古，中原博雅之士如王構、閻復、姚遂、蕭奭、趙孟頫、虞集皆遊其門，蓋嘗與之尚論也。”

## 惠宗

惠宗仁德明孝宣顯義恭大王，諱武，字承乾，太祖長子，母曰莊和王后吳氏，後梁乾化二年壬申生。太祖四年，立爲正胤，從討百濟，奮勇先登，功爲第一。二十六年五月丙午，太祖薨，奉遺命即位。六月壬申，葬太祖于顯陵。

（甲辰）元年，遣廣評侍郎韓玄珪、禮賓卿金廉如晉告嗣位，遂賀破契丹。

冬十二月，翰林院令平章事崔彥撝卒。

（乙巳）二年，晉遣范匡政、張季凝來冊王，敕曰：“省所奏，以先臣遺命及官吏推請權知國事，事具悉。圭茅積慶，忠孝因心，早彰幹蠱之名，顯著象賢之譽，雅當嗣習，深契物情。見先臣知子之明，成後嗣克家之美。遠陳章奏，尤驗純誠，欣慰之懷，寤寐無已。”

又詔曰：“卿才略耀奇，規模冠俗，荀息之忠貞自許，翁歸之文武兼全。鷹隼立之姿，折衝萬里；夏屋春臺之煦，化洽一隅。而又尊獎誠深，貢輸禮備。



是於剛日，乃降明恩。宜旌命世之英，俾峻真王之秩。爰旌亮節，仍進崇階。可持節、玄菟州都督、上柱國、充大義軍使，仍封高麗國王。今命使光祿卿范匡政、使副太子洗馬張季凝等往彼宣賜官告敕牒國信物等，具如別錄。敕賜高麗國王竹冊、法物等。竹冊一副八十簡，紫絲條聯紅錦裝背冊匣一具，黑漆銀含陵金銅鑲鑰二副，攀環紅錦托裏襯冊文兩幅，黃綾夾帕一條蓋冊匣三幅，黃綾夾帕一條蓋冊匣三幅，黃絹油夾帕一條，舉冊匣熟紫絲板二條，絡冊床熟紫絲油畫檐床一張，銀裹脚角竿頭金柏木冊案一面，紫綾案褥一領，夾裙襪全行事紫綾席褥一副，襯冊床紫綾席褥一副。”

又敕高麗國王：“省所奏進奉謝恩，紅地金銀五色線織成日月龍鳳襖段二枚，紅地金銀五色線織成龍床褥二面，金星皮甲二副，罽錦銀星皮甲二副，罽錦鍊鐵兜鍪四副，罽錦紅地金銀五色線織成花鳥罽錦捍膊四腰，角弓四張，紅地金銀五色線織成龍魚罽弓袋裁四具。竹箚箭二百隻：一百隻貼金，一百隻貼銀。木箚箭二百隻，紅地金銀五色線織成雲龍箭釵裁四具，金銀裝櫛鞘細縷雲天玉劍一十口，內二口金銀裝罽錦鞘銀裝錦細縷雲天長刀一十口。金銀裹槍一十根，金銀裝罽錦鞘匕首一十口，金銀裝鞘匕首一十口。細苧布一百匹，白氎布二百匹，細中麻布三百匹，事具悉。卿世篤忠貞，家傳勳閥。爰屬承襲之始，遠輸貢奉之儀。貝錦成章，橦華讓貴，咸陳筐篚，皆是珍奇。而又兵器駢羅，戎衣鮮麗，莫非精妙可驗，傾勤嘉獎所

深，再三無已。”

又敕高麗國王：“省所奏進奉金銀裝斫刺六根，罽錦鞘金銀裝劍六口，金銀裝罽錦鞘長刀一十口，紅地金銀五色線織成花鳥罽錦捍胯二腰，紅地金銀五色線織成花鳥罽錦倚背二面，紅地金銀五色線織成花鳥罽錦裙腰六腰，紅地金銀五色線織成罽錦鞘金銀裝匕首一十口，鍍金鷹鈴二十顆，銀鑲鏃子五色條銀尾銅全，鍍金鷄子鈴二十顆，銀鑲尾銅全。細白氎布一百匹，細中麻布一百匹。人參五十斤，頭髮二十斤，金銀地鐵文剪刀一十枚，金銀細縷剪刀二十枚，金銀細縷剪髭剪刀一十枚，銀花細縷剪刀二十枚，金銀重口大樣刀子三十柄，銀重口大樣刀子四十柄，金銀重口中樣刀子五十柄，銀重口中樣刀子五十柄，金銀重口小刀子五十柄，銀重口小刀子一百柄。金銀細縷撒火鏃二十枚，金銀細縷鉗子二十枚。香油五十斤，松子五百斤。事具悉。卿地控東溟，心馳北闕，奉九丘而作貢，歷萬里以來王。戎器堅剛，織文靡麗，苧麻如雪，至藥通神。首飾翫具之奇，香澤果實之類，名品既衆，羅列甚多。省閱之時，稱尚良切。”

又敕高麗國王：“省所上表賀，去年三月一日親幸澶州殺敗契丹，事具悉。朕以契丹顯違信義，輒肆侵陵。親御戎車，往平桀虜。靈旗一舉，狂寇四犇。卿遠聽捷音，頗摠憤氣，載馳章表，來慶闕庭，嘉乃忠誠，不忘于意。”

大匡王規譖王弟堯及昭，王知其誣，恩遇愈篤。

規又使其黨穴壁入王寢內，謀作亂，王徙避之，不問。

秋九月，王疾篤，群臣不得入見，憊小常侍側。戊申，薨于重光殿。在位二年，壽三十四。王氣度恢弘，智勇絕倫。自王規謀逆之後，多所疑忌，常以甲士自衛，喜怒無常，群小並進，賞賜將士無節，內外嗟怨。諡曰義恭，廟號惠宗，葬于松嶽東麓，陵曰順陵。穆宗五年加諡明孝，顯宗五年加宣顯，十八年加高平，高宗四十年加景憲。

李齊賢贊曰：“羽父請弑桓公將以求太宰，隱公不聽，亦不討之，終致蔦氏之禍。王規之譖兩王弟，亦羽父之意也。惠宗不致之罪，顧使居左右。其免於袖刃壁人之謀，可謂幸也。時去太祖棄代，甫規耳之不義，而得衆已能如漢、魏之曹、馬耶。其未有以竄殛之，何也？嗚呼！小人之難遠也如此，可不戒哉。”

## 定宗

定宗至德章敬正肅文明大王，諱堯，字天義，太祖第二子，母曰神明順聖王太后劉氏。以太祖六年癸未生。惠宗二年九月戊申，群臣奉王即位。己酉，王規謀逆伏誅。

（丙午）元年春正月，王將謁顯陵，致（齊）〔齋〕之夕，聞御殿東山松間有呼王名，若曰：“爾堯存恤細民，人君之要務。”

是歲，天鼓鳴，赦。

王備儀仗奉佛舍利步至十里所開國寺安之。又以穀七萬石納諸大寺院，各置佛名經寶及廣學寶以勸學法者。

（丁未）二年春，築西京王城。

（戊申）三年秋九月，東女真大匡蘇無蓋等來，獻馬七百匹及方物。王御天德殿，閱馬爲三等，評定其價。馬一等，銀注子一事，錦、絹各一匹；二等，銀鉢一事，錦、絹各一匹；三等，錦、絹各一匹。忽雷雨震押物人，又震殿西角，王大驚，近臣等扶入重光殿，遂不豫。赦。

始行後漢年號。

（己酉）四年，春正月辛亥，大匡王式廉卒。

三月丙辰，王疾篤，召母弟昭內禪，移御帝釋院，薨。在位四年，壽二十七。王性好佛多畏，初以圖讖決議移都西京，徵發丁夫，令侍中權直就營宮闕，勞役不息。又抽開京民戶以實之，群情不服，讟怨胥興。及薨，役夫聞而喜躍。謚曰文明，廟號定宗，葬于城南，陵曰安陵。穆宗五年加謚章敬，顯宗五年加正肅，十八年加令仁，文宗十年加簡敬，高宗四十年加莊元。

李齊賢贊曰：“定宗以人君之尊，步至十里所浮屠之宮，以藏設利。又以七萬石穀一日而分賜諸僧。一遭天譴，喪心生疾。所謂君子求福不回者，亦嘗聞其說耶。疾既大漸，能以宗社付之親弟，不使如王規者覬覦於其間，是可嘉也已。”

## 光宗

光宗弘道宣烈平世大成大王，諱昭，字日華，定宗母弟。以太祖八年乙酉生。定宗四年三月丙辰，受內禪即位。

秋八月，命大匡朴守卿等攷定國初有功役者，賜四役者米二十五碩，三役者二十碩，二役者十五碩，一役者十二碩，以爲例食。

（庚戌）元年春正月，大風拔木。王問禳災之術，司天奏曰：“莫如修德。”自是，常讀《貞觀政要》。

建元光德。

（辛亥）二年，創大奉恩寺于城南，爲太祖願堂。又創佛日寺于東郊，爲先妣劉氏願堂。

冬十二月，始行後周年號。

（壬子）三年，遣廣評侍郎徐逢如周獻方物。

（癸丑）四年，周遣衛尉卿王演、將作少監呂繼贊來，冊王爲特進、檢校太保、使持節、玄菟州都督、充大義軍使兼御史大夫、高麗國王。

（甲寅）五年春，創崇善寺，追福先妣。

（乙卯）六年，遣大相王融如周獻方物。

遣廣評侍郎荀質如周賀即位。

（丙辰）七年，周遣將作監薛文遇來，加冊王爲開府儀同三司、檢校太師，仍令百官衣冠從華制。前大

理評使雙冀、從文遇來。

（丁巳）八年春正月，王觀射于毬庭。

（戊午）九年夏五月，始置科舉，命翰林學士雙冀取進士。丙申，御威鳳樓放枋，賜崔暹等及第。

是歲，周遣尚書水部員外郎韓彥卿、尚輦奉御金彥英齎帛數千匹來市銅。

（己未）十年，遣春佐丞王兢、佐尹皇甫魏光如周獻名馬、織成衣襖、弓劍。

秋，遣使如周進《別序孝經》一卷，《越王孝經新義》八卷，《皇靈孝經》一卷，《孝經雌雄圖》三卷。

周遣左驍衛大將軍戴交來。

冬，遣使如周獻銅五萬斤，紫白水精各二千顆。

周侍御雙哲來，拜爲佐丞。

（庚申）十一年春三月甲寅，賜崔光範等及第。

定百官公服。

改開京爲皇都，西京爲西都。

評農書史權信譖大相俊弘、佐丞王同等謀逆，貶之。自是讒佞得志，誣陷忠良，奴訴其主，子讒其父，囹圄常溢，別置假獄，無罪而被戮者相繼，猜忌日甚。宗族多不得保，雖一子侄亦自疑阻，不使親近。人人畏懼，莫敢偶語。

（辛酉）十二年，修宮闕，移御正匡王育第。

賜王舉等及第。

（壬戌）十三年冬，遣廣評侍郎李興祐等如宋獻

方物。

（癸亥）十四年夏六月，還御宮，詔曰：“朕比爲重修大內，久在離宮，心存警備，事異尋常。百官奏事多不親聽，慮恐衆心或生疑阻，其爲軫念，寢食難忘。今者修營功畢，聽政有所。凡爾百僚，各敬爾事，依舊進奏，毋得稽留。庶幾魚水同歡，毋致君臣相阻。”

秋七月，創歸法寺。

冬十二月，行宋年號。

宋遣冊命使時贊來，在海遇風溺死者九十人，贊獨免，王特厚勞之。

（甲子）十五年春三月，賜金策等及第，御天德殿宴群臣，命策赴宴。

秋八月壬子，大匡朴守卿卒。

（乙丑）十六年春二月，加子卬元服，立爲王太子內史諸軍事內議令正胤，宴群臣于長生殿。

遣大承內奉令王輅如宋獻方物，帝授輅尚書左僕射，食實封三百戶，並賜官誥。

秋七月丙午，內議令徐弼卒。

（丙寅）十七年，賜崔居業等及第。

（丁卯）十八年。

（戊辰）十九年，創弘化、遊巖、三歸等寺。

以僧惠居爲國師，坦文爲王師。王信讒多殺，內自懷疑，欲消罪惡，廣設齋會。無賴輩詐爲出家，以求飽飫，旬者全至。或以餅餌米豆柴炭施與京外道路，

不可勝數。列置放生所，就傍近寺院演佛經。禁屠殺，肉膳亦買市廛以進。

（己巳）二十年冬十一月，王弟旭卒。

（庚午）二十一年，幸歸法寺。

（辛未）二十二年冬十二月壬寅，地震。

（壬申）二十三年春二月，地震。

秋八月，赦。

是歲，賜楊演等及第。

遣內議侍郎徐熙等如宋獻方物。帝制加王食邑，賜推誠順化守節保義功臣號，授熙檢校兵部尚書，副使內奉卿崔業檢校司農卿兼御史大夫，判官廣評侍郎康禮檢校少府少監，錄事廣評員外郎劉隱檢校尚書、金部郎中，並賜官誥。

（癸酉）二十四年春二月，賜白思柔等及第。

（甲戌）二十五年春三月，賜韓藺卿等及第。

是歲，西京居士緣可謀叛伏誅。

僧惠居死，以坦文爲國師。

（乙亥）二十六年夏五月，王不豫。甲午，薨于正寢。在位二十六年，壽五十一。王即位之初，禮待臣下，明於聽斷，恤貧弱，重儒雅，夙夜孜孜，庶幾治平。中歲以後，信讒好殺，酷信佛法，奢侈無節。謚曰大成，廟號光宗，葬于松嶽北麓，陵曰憲陵。穆宗五年，加謚宣烈。顯宗五年，加平世。十八年，加肅憲。文宗十年，加懿孝。高宗四十年，加康惠。

李齊賢贊曰：“光宗之用雙冀，可謂立賢無方乎？”



冀果賢也，豈不能納君於善，不使至於信讒濫刑耶？若其設科取士，有以見光宗之雅，有用文化俗之意，而冀亦將順以成其美，不可謂無補也。惟其倡以浮華之文，後世不勝其弊云。”

## 景宗

景宗至仁成穆明惠獻和大王，諱卬，字長民，光宗長子，母曰大穆王后皇甫氏。光宗六年乙卯九月丁巳生。十六年，立爲太子。二十六年五月甲午，光宗薨，王即位，大赦，還流竄、放囚繫、洗痕累、拔淹滯、復官爵、蠲欠債租調、毀假獄、焚讒書。

冬十月甲子，加政丞金傅爲尚父，制曰：“姬周啓聖之初，先封呂望；劉漢興王之始，首冊蕭何。自此大定寰宇，廣開基業，立龍圖二十代，躡麟趾四百年，日月重明，乾坤交泰。雖自無爲之主，亦關致理之臣。觀光順化衛國功臣、上柱國、樂浪王、政丞，食邑八千戶金傅，世處雞林，官分王爵。英烈振凌雲之氣，文章騰擲地之才。富有春秋，貴居茅土。《六韜》、《三略》，拘入胸襟；七縱五申，攝歸指掌。我太祖始修睦隣之好，早認餘風；尋頒駙馬之姻，內酬大節。家國既歸於一統，君臣宛合於三韓。顯播令名，光崇懿範。可加號尚父都省令，仍賜推忠順義、崇德守節功臣號，勳封如故，食邑通前爲一萬戶。”

是月，加上六代考妣尊號。

（丙子）元年夏六月庚申，黃州院二郎君並加元服，改院號爲明福宮。

冬十一月，宋遣左司禦副率于延超、司農寺丞徐昭文，冊王爲光祿大夫、檢校太傅、使持節、玄菟州諸軍事、玄州都督、大順軍事，食邑三千戶。

遣使如宋，賀即位。

放執政王誡于外。王嘗許先朝被讒人子孫復讎，遂相擅殺，復致冤號。及是，誡托以復讎，矯殺太祖子天安府院郎君，於是貶誡，仍禁擅殺復讎。

以荀質、申質爲左右執政，皆兼內史令。元甫壽餘爲近臣，知御廚事。

始定各品田柴科。

是歲，遣金行成如宋，入學國子監。

（丁丑）二年春三月，御東池龍船，親試進士，賜高凝等及第。

是歲，遣子如宋，獻良馬甲兵。

（戊寅）三年夏四月，政丞金傅卒，謚敬順。

宋遣太子中允張洎來聘。

（己卯）四年春三月，賜元徵衍等及第。

夏六月，宋遣供奉官閤門祗候王僕來，冊王爲侍中，加食邑一千戶。

是歲，渤海人數萬來投。

（庚辰）五年，以崔知夢爲內議令。

王承等謀逆伏誅。

（辛巳）六年夏六月，王不豫。

秋七月，王疾彌留。甲辰，召堂弟開寧君治內禪。遺詔曰：“一生一死，賢哲難逃；或短或修，古今皆是。寡人承四朝之餘烈，受三韓之霸圖，獲保山川土地，務安宗廟社稷。日慎一日，首尾七年。因此勤勞，遂成疾疹。冀怡神於釋負，將傳聖以紓憂。正胤開寧君治，國之親賢，予所友愛，必能奉祖宗之大業，保國家之昌基。咨爾公卿宰臣，其敬保我介弟，永綏我大邦。寡人每覽《禮經》，至‘男子不死婦人之手’，未嘗不臨文嘆仰，至于今日，左右嬪御已令屏去。倘或不延，歟至大期，更何所恨。服紀輕重，合依漢制。以日易月，十三日周祥，二十七日大祥。園陵制度，務從儉約。其西京、安東、安南、登州等諸道，膺鎮守之任，有軍旅之權者，所寄非輕，豈宜暫曠。不許離任赴闕，各於任所舉哀，三日釋服，其餘並委嗣君處分。”

丙午，薨于正殿。在位六年，壽二十六。王溫良仁惠，不好遊戲。末年厭倦萬機，日事娛樂，沈溺聲色，且好圍碁。昵近小人，疎遠君子，由是政教衰替。謚曰獻和，廟號景宗，葬于南畿山麓，陵曰榮陵。穆宗五年加謚成穆，顯宗五年加明惠，十八年加順熙，文宗十年加靖孝，高宗四十年加恭懿。

李齊賢贊曰：“滕文公問井地於孟子，孟子曰：‘仁政必自經界始，經界不正，井地不均，穀祿不平，是故暴君污吏必慢其經界。經界既正，分田制祿可坐

而定也。’三韓之地，非四方舟車之會，無物產之饒、貨殖之利。民生所仰，只在地力。而鴨綠以南，大抵皆山，肥膏不易之田，絕無而僅有也。經界之正若慢，則其利害比之中國相萬也。太祖繼新羅衰亂，泰封奢暴之後，萬事草創，日不暇給，止爲口分之法。歷四世，景宗作田柴之科，雖有疎略，亦古者世祿之意。至於九一而助，什一而賦，與夫所以優君子小人者，則不暇論也。後世屢欲理之，終於苟而已矣。蓋其初不以經界爲急，撓其源而求流之清，何可得也。惜乎當時群臣，未有以孟子之言講求法制，啓迪而力行之也。”

## 高麗史三

### 世家卷第三

#### 成宗

成宗康威章憲文懿大王，諱治，字溫古，戴宗第二子，母曰宣義太后柳氏。光宗十一年庚申十二月辛卯生。景宗六年七月甲辰，受內禪即位。

八月癸未，御威鳳樓，大赦，陞文武官一階。

冬十一月丁酉，追謚先考，遂謁陵。

是月，王以八關會雜技不經，且煩擾，悉罷之。幸法王寺行香，還御毬庭，受群臣朝賀。

（壬午）元年春三月庚戌，改百官號。

夏六月甲申，制曰：“后德惟臣，古今所同。朕新總萬機，恐有闕政，其京官五品以上各上封事論時政得失。”

是歲，遣侍郎金昱如宋告嗣位。帝詔報曰：“省所上表，‘兄高麗國王佑去年七月內薨謝，權以國務令臣

主持’。事具悉。卿世濟英材，家傳亮節，習禮樂詩書之道，識安危理亂之機。奄鍾手足之悲，諒極肺腸之痛，而乃稟元昆之理命，撫先政之舊封。一方之士庶安寧，萬室之蒸黎愛戴。越重溟而奉表，望雙闕以傾心。無虧事大之儀，頗得爲臣之禮。更宜善修刑政，恭守憲章，勿忘兢慎之規，永保延長之慶。佇期命使，別議加恩，睠注所深，寢興無舍。”

以王生日爲千春節，節日之名始此。

（癸未）二年春正月辛未，王祈穀于圜丘，配以太祖。乙亥，躬耕籍田，祀神農，配以后稷，祈穀、籍田之禮始此。

丁丑，宴群臣於天德殿，賜物有差。

甲申，以崔承老爲門下侍郎平章事。

二月戊子，始置十二牧。詔曰：“天高爲大，分象緯以著明；地厚無疆，列山川而播氣。庶望首天之類，咸悉樂生；足地之流，無不遂姓。見一夫之冒罪，則意甚泣辜；聞百姓之居貧，則情深責己。雖身居宮禁，而心遍蒸黎。旰食宵衣，每求啓沃；聽卑視遠，冀籍賢良。爰憑方伯之功，允協閭閻之望。效虞書之十二牧，延周祚之八百年。”

三月戊寅，宋遣大中大夫光祿少卿李巨原、朝議大夫將作少監孔維來冊王，詔曰：“王者闢四海以爲家，一六合而光宅。揆文教而奮武衛，式固鴻基；立萬國而親諸侯，咸遵茂典。其有三韓舊域，百濟遺封。地控鯨津，誠尊象闕。屬英王之捐館，位固難虛；聞

令季以撫封，才堪厥任。言念承宗之美，宜頒命德之文。權知高麗國事王治，鳳穴分華，蟠桃並秀。稟星雲之間氣，出作時英；懋文武之兼才，彌光世德。洎丕承於景烈，能善繼於貞規。遵魏闕之風猷，則虔修禹貢；奠艮宮之土宇，則靜撫周藩。爰議寵綏，適符利建。是命超加帝保，大啓王封，真一字於日中，鎮三山於海上。階勳並錫，食賦俱優。併示便蕃，允光奇傑。爾其纘乃舊服，承予厚恩。嚴六德以有邦，謹四封而事大。長爲外屏，肅奉中區，斯謂永圖，勿忘丕訓。可特授光祿大夫、檢校太保、使持節、玄菟州諸軍事、玄菟州都督，充大順軍使、上柱國、食邑二千戶，仍封高麗國王。”王受冊，詔文武官僚、將校、僧道、三軍萬姓等曰：“上天以雨露均霑，滋成萬物；王者以仁恩普及，撫養群生。況欲令人改過自新，須得棄瑕含垢。不穀謬將虛薄，獲嗣宗祧。旰食宵衣，每積憂勤之念；跼天蹐地，尤增兢慎之心。道貴守常，情專事大。所以差馳使价，特申述職之誠；俾執幣圭，代表朝宗之懇。今者果蒙鷁艦涉鯨溟之浪，便到國城；皇華臨菟郡之鄉，遽宣帝命。官崇一品，位陟三師，莫不驟加茅土之封，實荷彤旅之寵。既致一身之榮幸，合旌萬姓之忻懽。於是議獄緩刑，原情肆眚。爰布如綸之旨，式覃委轡之恩。可自太平興國八年三月二十二日昧爽前已發覺未發覺、已結正未結正犯罪人相鬥殺以下，罪無輕重，皆悉赦之。”

癸未，御詳政殿，賜文武元尹以上馬人一匹。

夏五月戊午，以佐丞徐熙爲兵官御事，大相鄭謙儒爲工官御事。

甲子，博士任老成至自宋，獻《太廟堂圖》一鋪並《記》一卷，《社稷堂圖》一鋪並《記》一卷，《文宣王廟圖》一鋪，《祭器圖》一卷，《七十二賢贊記》一卷。

是月，賜崔行言等及第。

始定三省、六曹、七寺。

六月庚寅，以光祿卿薛神祐爲刑官御事。

秋七月壬戌，明福宮大夫人皇甫氏薨。癸酉，率百官詣殯堂哭臨。

九月戊午，以佐丞李知白爲諫議大夫。

冬十月己亥，置酒店六所：曰成禮、曰樂賓、曰延齡、曰靈液、曰玉漿、曰喜賓。

十一月甲子，日南至，王御元和殿受朝賀，宴群臣於思賢殿。

十二月，以千春節改爲千秋節，賜群臣宴。

是歲，臨軒覆試，賜姜殷川等及第。

（甲申）三年春三月庚申，始行雩祀。

是月，賜李琮等及第。

夏五月庚戌朔，震刑官門柱，責御事、侍郎、郎中、員外，並罷之。以主農卿李謙宜爲御事，禮官侍郎韓彥恭、內史舍人崔延澤並爲侍郎，殿中丞朴俊光、民官員外郎韓光默爲郎中，考功員外郎黃至仁爲員外郎。



是歲，始定軍人服色。

命刑官御事李謙宜城鴨綠江岸以爲關城，女真以兵遏之，虜謙宜而去，軍潰不克城，還者三之一。

遣韓遂齡如宋獻方物。

（乙酉）四年夏五月，宋遣太常卿王著、秘書監呂文仲來加冊，王詔曰：“朕居域中之大，以天下爲家。萬國來庭，適協觀賓之象；三韓舊地，素爲禮讓之邦。玉靈交卜於剛辰，金印宜加於寵命。用旌世德，光我朝恩。大順軍使、光祿大夫、檢校太保、使持節、玄菟州都督、上柱國、高麗國王、食邑二千戶王治，溟渤炳靈，蓬壺誕秀。紹弓裘於先正，斯謂象賢；慕聲教於華風，彌觀亮節。而自瞻雲北闕，燾土東藩，化行而海不揚波，惠合而人皆受賜。加以航琛作貢，書契同文，衣冠襲鄒魯之容，帶礪保山河之誓。屹爲外屏，僉曰賢臣。是宜均灑澤以疇庸，遣皇華而錫命，尊爲漢傅，進彼侯封。常安百濟之民，永茂長淮之族。於戲！日月所照，貴在於無私；雷雨之行，是稱於覃慶。爾其冠仁佩義，移孝資忠。服大國之榮光，享真王之異數。奠茲震位，肅奉天朝。可特授檢校太傅，依前使持節、玄菟州諸軍事、菟玄州都督、充大順軍使、高麗國王，加食邑一千戶，散官勳如故。”王受冊，赦曰：“皇天在上，行春敷生植之功；王者守中，濟世播惠和之德。大信不約四時，而長養靡虧；至道無爲萬象，而經綸有度。莫不大爐貞觀，合璧重明。寡人忝守宗祧，實多蒙昧。宵衣軫慮，念負重以兢兢；

乙夜觀書，懷御奔而亶亶。守常是切，事大斯勤。所以遣獻鵠籠，遠越浮天之險；聯將鳥迹，寫陳任土之儀。今者龍綸鳳紵之書，光揚震域；駟騎星輶之命，禮重仁邦。授一品以居高，陟三師而寄重。既致邦家之慶幸，合旌黎庶之忻懽，美覃作解之恩，用慰含靈之望。可大赦境內，准大朝南郊赦旨，改太平興國十年爲雍熙二年。於戲！憂庶政則更約漢章，念群生則恒垂禹泣。更賴宰衡厥辟方嶽，勳臣肅整朝儀，重綏民望。必使戴我日月，並樂昇平；處我乾坤，大同文軌。赦書日行五百里，敢以赦前事言之者，以其罪罪之。”

賜秦亮等及第。

宋將伐契丹，收復燕薊，以我與契丹接壤，數爲所侵，遣監察御史韓國華齎詔來諭，曰：“朕誕膺丕構，奄宅萬邦。草木虫魚罔不被澤，華夏蠻夷罔不率從。蠹茲北虜，侵敗王略，幽薊之地，中朝土疆。晉漢多故，戎醜盜據。今國家照臨所及，書軌大同，豈使齊民陷諸獷俗。今已董齊師旅，殄滅妖氛，元戎啓行，分道間出。即期誅剪，以慶渾同。惟王久慕華風，素懷明略，效忠純之節，撫禮義之邦。而接彼犬戎，罹於蠱毒。舒泄積忿，其在茲乎？可申戒師徒，迭相犄角，協比隣國，同力盪平。奮其一鼓之雄，戡此垂亡之虜。良時不再，王其圖之。應虜獲生口牛羊財物器械，並給賜本國將士，用申勸賞。”

王遷延不發兵，國華諭以威德，王始許發兵西會，

國華乃還。先是，契丹伐女真，路由我境，女真謂我導敵構禍，貢馬于宋，因誣譖：“高麗與契丹倚爲勢援，標掠生口。”韓遂齡之如宋也。帝出女真所上告急木契以示遂齡，曰：“歸語本國，還其所俘。”王聞之憂懼。及國華至，王語曰：“女真貪而多詐，前冬再馳木契，言契丹兵將至其境，本國猶疑虛僞，未即救援，契丹果至，殺掠甚衆，餘族遁逃，入于本國懷昌、威化、光化之境，契丹兵追捕，呼我戍卒言：‘女真每寇盜我邊鄙，今已復讎，整兵而回。’於是女真來奔者二千餘人，皆資給遣還。不意反潛師奄至，殺掠吾吏民，驅虜丁壯沒爲奴隸，以其世事中朝，不敢報怨。豈期反相誣告，以惑聖聰。本國世稟正朔，謹修職貢，深荷寵靈。敢有二心，交通外國？況契丹介居遼海之外，復有二河之阻，無路可從。且女真逃難，受本國官職者十數人尚在，望召赴京闕，令人貢之使庭辨，庶幾得實，願達天聰。”國華許諾。”

冬十月，禁捨家爲寺。

（丙戌）五年春正月，契丹遣厥烈來請和。

三月，賜崔英藺及第。

始以詔稱教。

秋九月己丑，教曰：“上帝不言，列星辰而炤下；大君施化，籍賢彥以分方。寡人雖身居九掖，而心遍兆人，思與賢能共清風化，擢簪纓之彥，差牧宰之員，均賦稅以化人，尚廉平而成俗。然而人鮮克舉，事恐稽遲。更開戒勗之端，別降丁寧之旨。凡爾牧民之官，

無滯獄訟，懋實倉廩，賑恤窮民，勸課農桑，輕徭薄賦，處事公平。欲慎終而從其始，將潔流而澄其源。寧損己以益人，不飲泉而燃燭。如此則獄無冤滯，路不拾遺，處處而人樂其生，家家而衆安其業。金渾運轉，將七政以增光；玉燭循環，領四時而有度。凡百在外，勉遵不忘。”

（丁亥）六年春三月甲子，大匡崔知夢卒。

秋八月乙卯，命李夢游詳定中外奏狀及行移公文式。

是月，賜鄭又玄等及第。

教曰：“自昔結繩既往，畫卦以來，北辰御極之君，南面經邦之主，莫不習五常而設教，資六籍以取規，故乃有虞開上下之庠，夏后置東西之序，殷修兩學，周立二膠。擇先生而討論，命國子以隸習。君臣父子，咸知愛敬之風；禮樂詩書，足創經綸之業。所以人倫軌範，王道紀綱，灼爾可觀，煥然斯在。寡人道慚握鏡，德乏垂衣，纂承累聖之鴻基，奄有三韓之王業，心存慄慄，念切孜孜，欲使俗變澆醜，人知禮讓。杏壇槐市，增多鼓篋之徒；米廩稷山，蔚有橫經之子。況復保生之理，療病爲先。故乃神農御宇之年，備嘗藥草；秦帝焚書之日，不滅醫經。將除百姓之艱危，要廣十全之方術。近者廣募諸州郡縣子弟詣京習業，果以乘風而至，應詔而來。講肆之中，學徒頗衆。蓋以辭家路遠，爲客日多，且志惰於爲山，却情深於懷土。憫其離索，睽降諭言。願留者任住京華，求退

者許還桑梓，各有頒賜，以遂去留。然恐有性聰明，無師教授，未學一經之旨趣，虛過數紀之光陰。雖有前程，空爲棄物，得人無計，求士何因。今選通經閱籍之儒，溫古知新之輩，於十二牧，各差遣經學博士一員，醫學博士一員，勤行善誘，好教諸生，則必審量功績之淺深，超擢官榮而獎勵。應其諸州郡縣長吏百姓有兒可教學者，合可訓戒，勉篤師資。儻其父母未識國風，爲營家產，只見今朝之利，不思他日之榮，謂學習何爲，讀書勿益，却妨編柳，唯要負薪。其子則沒齒無聞，其親則榮身莫得。彼寧越之拋耕取貴，匡衡之鑿壁成功，或朱翁子衣錦以還鄉，馬長卿乘輅而返蜀。皆勤志業，以立榮名。言念伊人，寔多嘉獎。於戲！懷材抱器，事君王則忠之始也；立身揚名，顯父母則孝之終也。忠孝可稱，寵榮何悵？自後若有螢窗勵志，鱣肆明經，孝弟有聞，醫方足用，可其牧宰知州縣官具錄薦貢京師。”

九月戊辰，改諸村大監、弟監爲村長、村正。

冬十月，命停兩京八關會。

是歲，定五部坊里。

（戊子）七年春二月壬子，左補闕兼知起居注李陽上封事：“其一曰：古先哲王，奉崇天道，敬授人時，故君知稼穡之艱難，民識農桑之早晚，以致家給人足，年豐歲稔。按《月令》：‘立春前出土牛，以示農事之早晚’，請舉故事以時行之。其二曰：躬耕帝籍，寔明王重農之意；虔行女功，乃賢后佐君之德。所以致誠

於天地，積慶于邦家。按《周禮·內宰職》曰：‘上春詔王后率六宮之人生種稷之種而獻之于王’，以此言之，王者所舉，后必贊之。方今上春祈穀於上帝，吉日耕籍于東郊，君雖有事於籍田，后乃虧儀於獻種。願依《周禮》，光啓國風。其三曰：聖人俯察仰觀，以通時變；王者行仁布惠，用遂物情。按《月令》：‘正月中氣後，犧牲毋用牝，禁止伐木，無麋無卵無聚大衆，掩骼埋胔’，願當獻歲之晨，遍布行春之令，咸知時禁，俾識天常。”教曰：“李陽所論，皆據典經，合垂俞允。其出土牛事，今年立春已過，取後年立春前，所司更奏施行。其獻種之事宜，令禮官議定，奏取籍田吉日王后親行，始自今歲，以作通規。當正月中氣之初，若公私祭犧牲，勿用牝以傷生，禁伐木無犯盛德，所在無麋無卵，勿傷萌幼。除禦寇城防要事之外，毋聚大衆以防農。或畜或人，曝露枯骨腐肉，皆令掩埋，勿使死氣逆生氣也。於戲！天有四時，春布陽和之德；君行五教，仁爲禮義之先。宜遵先聖之典謨，用順勾芒之造化。遂使飛沈遂性，草木懷恩。至於枯朽之群，盡荷生成之惠，不亦美乎！宜頒兩京百司及十二牧知州縣鎮使等，咸使知委，勉行條制，當體予意，普示黎元，無犯此令。”

秋九月辛丑，賜李偉等及第。

冬十月，宋遣銀青光祿大夫、尚書禮部侍郎、上柱國呂端，銀青光祿大夫、行左諫議、上柱國呂祐之來，加冊王檢校太尉，加食邑一千戶，食實封五百戶，

依前充大順軍、使持節、玄菟州諸軍事、玄菟州都督、上柱國、高麗國王，散官勳如故。是年正月，宋帝親耕籍田，大赦，改元端拱，百官內外並加恩，遂遣端等來冊王，仍諭赦旨。王既受冊，赦絞罪以下；文班從仕年深者改服；武班年老無子孫自癸卯年錄軍籍者，皆放還鄉里，兩班並加恩。

十二月乙丑朔，依浮屠法以正、五、九月爲三長月，禁屠殺。

是歲，始定五廟。

以崔承老爲門下守侍中。

（己丑）八年春二月庚辰，教曰：“聞朝野士庶之病者，未能見醫，亦無藥物，不得瘳者多矣。朕深欲遍賜醫藥，然往古亦無博施之文。自今內外文官五品武官四品以上疾病，並令本司具錄以聞，遣侍御醫、尚藥直長、太醫、醫正等齋藥往治之。”群臣上表謝。

夏四月壬戌，教曰：“予方崇學校，欲理邦家，廓開函丈之筵，廣募樞衣之子，給田莊而肄業，差文學以爲師。年年懸甲乙之科，徵諸俊乂；日日訪丘園之士，待彼英髦。務得博識之儒，使助眇冲之政。懸旌勿怠，側席忘疲。然牛毛之學者雖多，麟角之成人甚少。空係名於國學，罕較藝於春場。宵旰凝懷，寢興軫慮。近覽有司所進舉人名數，唯太學助教宋承演、羅州牧經學博士全輔仁，誘以能諄，合宣父博文之意，誨而不倦，副寡人勸學之心。宜加獎擢之恩，用示殊尤之寵。”

乙丑，始營太廟。

癸酉，王詣太廟，率百官輸材。

五月辛卯，守侍中崔承老卒。

九月甲午，彗星見，赦。

冬十二月丙寅，教曰：“昔唐太宗每於皇考妣忌月禁屠殺，敕天下僧寺限五日焚修轉念，以爲常式。況寡人幼而即閔，長又早孤，未酬罔極之恩，每軫追思之念。盍遵往轍，以伸予懷。可自今太祖忌齋、王考戴宗忌齋期五日，王妣宣義王后忌齋期三日，焚修轉念，仍於是月禁屠殺，斷肉膳。”

丁丑，賜崔得中等及第。

遣侍郎韓藺卿、兵部郎中魏德柔如宋，帝並授光祿大夫。

（庚寅）九年夏六月，宋遣光祿卿柴成務太常少卿趙化成等來，加冊王推誠順化功臣，食邑一千戶，食實封四百戶，餘如故。王受冊，赦絞罪以下。

秋九月丙子，教曰：“凡理國家必先務本，務本莫過於孝。三皇五帝之本務，而萬事之紀、百善之主也。由是漢皇嘉楊引之尊親，旌門表里；晉帝獎王祥之至孝，命史書名。寡人幼而藐孤，長亦庸昧。叨承顧托，嗣守宗祧。追思祖考之平生，幾傷駒隙；每念兄弟之在昔，益感鵠原。是以取則六經，依規三禮，庶使一邦之俗，咸歸五孝之門，頃者遣使六道，頒示教條。恤老弱之饑離，賑鰥孤於窘乏。求訪孝子順孫、義夫節婦。有全州求禮縣民孫順興，其母病死，畫像奉祀，



三日一詣墳墓，饗之如生；雲梯縣祇弗驛民車達兄弟三人，同養老母，車達謂其妻事姑不謹即以棄離，二弟亦不婚娶，同心孝養；西都牧丹里朴光廉，母亡七日忽見枯木宛似母形，負至其家，養之盡禮；南海狼山島民能宣女咸富，其父死於毒虺，殯于寢室凡五月，供膳無異平生；慶州延日縣民鄭康俊女字伊，及京城宋興坊崔氏女，早寡不嫁，孝事舅姑，撫養兒息；折衝府別將趙英葬母家園，朝夕祀之。其咸富等男女七人，並令旌表門閭，免其徭役；車達兄弟等四人，免出驛、島，隨其所願，編籍州縣；順興等五人，擬授官階，以揚孝道。今差起居郎金審言等往彼，賜穀人一百石，銀盂二事，彩帛、布並六十八匹；趙英超十等，授銀青光祿大夫、檢校侍御、司憲左武侯、衛翊府郎將，仍賜公服一襲，銀三十兩，綵二十匹。於戲！君后，萬民之元首；萬民，君后之腹心。若有爲善，是吾福也；若有爲惡，亦吾憂也。光顯奉親之行，用彰美俗之心。田野愚氓，尚勤思孝；搢紳君子，其怠奉先？能爲孝子於家門，必作忠臣於邦國。凡諸士庶，可復予言。”

己卯，教曰：“我太祖應期降世，敷德臨人，百郡來庭，三韓安堵，尊居南面，創置西京。差宗室之親，守咽喉之地。分司職務，各掌權機。每當春秋，親修齋祭。欲防戎虜，以固藩籬。憑茲平壤之雄都，固我祖宗之霸業。厥後聖神相繼，社稷以寧。或依前跡以遵行，或命近臣而發遣，臨時制斷，歷代風殊。寡人

謬以眇冲，早承顧托。感當年之盛化，每切心遵；聞往日之洪猷，如承面訓。今者天人合慶，遐邇咸寧，三農共賀於豐穰，九穀皆登於實熟。欲取十月，言邁遼城，行祖禰之舊規，布邦家之新令。非但視關河之夷險，將兼知黎庶之安危。減增尹牧之員，刪定山川之祀。其行次儀仗，侍從官僚，御膳樂官，皆當減損。西都留守官並沿路州縣守令、諸鎮戎帥，不得輒離任所。稟予儉素之訓，戒爾繁華之風。”

冬十月甲子，幸西都。教曰：“虞舜巡泰嶽之年，諸侯麇至；唐皇幸洛陽之日，四海咸蘇。是以遐開展義之風，大舉省方之禮。緬徵古列，屬在時行。朕纂御靈圖，思崇寶業。自即真於南面，十換炎涼；未展禮於西巡，再思行邁。遵祖先之軌，順時令之宜。親省關河，歷觀黎庶。農桑豐稔，人物阜寧。其沿路縣吏州司田夫野老，懽呼路左，拜舞駕前。競陳執贄之儀，共表來蘇之意。是穹蒼之所佑，非冲眇之敢當。合施大賚之仁，俾慶中興之運。扈從臣僚及西京等諸州郡，見禁囚徒十惡外，絞罪以下並令出獄。平壤府開、平、黃、洞、安、鳳、信、白、貞、鹽、海等州，牛峰、兔山、遂安、土山、十谷、挾溪、江陰、德水、臨津、瓮津、咸從、軍岳等縣，及安城等十一驛，賜稻穀九千三百七十五石。西京入流年八十以上者，優賞各有差。三品以上，公服一襲；五品以上，彩二匹，幘頭二枚，茶一十角；九品以上，綵一匹，幘頭一枚，茶五角。入流以上，母妻年八十者，三品以上布一十

四匹、茶二斤，五品以上布一十匹、茶一斤，九品以上布六匹、茶二角。庶人男女百歲以上者，令京官四品存問其家，兼賜布二十匹、稻穀一十石；九十以上，布四匹、稻穀二石；八十以上，及篤疾者，布三匹、稻穀二石。隨駕軍人有父母年八十者，許先赴東京問安。於戲！乾坤覆載，遐覃不宰之恩；日月運行，宛放無私之照。適當在車駕之經歷，固合垂雨露之霑滋。”

十二月戊申，以姪誦爲開寧君。教曰：“周開麟趾之封，禮崇藩屏；漢敘犬牙之制，義篤宗支。故能敷大命於四方，固本支於百世。景彼前烈，予無間然。崇德宮嫡男誦，太祖令孫，寡人猶子，蒙能養正，纔當秤象之年；德不踰閑，已蘊成人之器。歷觀前籍，緬考古風，睦親爲百世之良規，慈幼是五常之雅旨。雖當齒學，敢恠疏封，將興美績於來今，顯降殊恩於爰始。今遣使工官御事知都省事朴良柔、使副殿中監趙光等，持節備禮，冊爾爲開寧君，爾其自家而國，移孝爲忠，遵君臣父子之規，威儀不忒，習禮樂詩書之教。敦閱是勤，勿務豪奢，毋耽酒色，知艱難於稼穡，輔政教於朝廷。敬哉慎哉，無廢予命。”

是歲教曰：“秦皇御宇，焚三代之詩書；漢帝應期，闡五常之載籍。國家草創之始，羅代喪亡之餘，鳥跡玄文燼乎原燎，龍圖瑞牒委於泥途。累朝以來，續寫亡篇，連書闕典。寡人自從嗣位，益以崇儒，踵修曩日之所修，繼補當年之所補。沈隱士二萬餘卷，

寫在麟臺；張司空三十車書，藏在虎觀。欲收四部之典籍，以畜兩京之府藏，青衿無闕市之勞，絳帳有執經之講。使秦韓之舊俗，知鄒魯之遺風，識父慈子孝之常，習兄友弟恭之懿。宜令所司於西京開置修書院，令諸生抄書史籍而藏之。”遣兵官侍郎韓彥恭如宋謝恩。

（辛卯）十年春二月辛酉，遣諸道安慰使問民疾苦。

閏月癸酉，始立社稷。教曰：“予聞：社，土地之主也。地廣不可盡敬，故封土爲社以報功也。稷，五穀之長也。穀多不可徧祭，故立稷神以祭之。《禮》曰：‘王爲群姓立社曰大社，自爲立社曰王社；諸侯爲百姓立社曰國社，自爲立社曰侯社；大夫以下成群立社曰置社。’故有國有家者，不可不立社稷。上自天子，下至大夫，示本報功，不可不備。爰自聖祖，至于累朝，未置夏松之祀，尚虧周栗之禋。朕繼承以來，凡所施爲，必依禮典。子穆父昭之室，髣髴經營；春祈秋報之壇，方將創立。其令群公，擇地置壇。”

是月，賜崔沆等及第。

夏四月庚寅，韓彥恭還自宋，獻《大藏經》。王迎入內殿，邀僧開讀。下教赦。

秋七月，旱。己酉，教曰：“季夏已闌，孟秋將半，尚愆時雨，深軫憂懷，未知政化之陵夷歟？刑賞之不中歟？啓牢獄、放囚徒，避正殿、減常膳，勤祈寺院、望祀山川，未觀石燕之飛，轉見金烏之赫。由

予涼德，致此亢陽，欲推養老之恩，以表憂農之念，准雍熙三年賜給老人制，在京城庶民年八十以上者，所司具錄姓名申聞。”

冬十月戊辰，幸西都所經州縣。父老有持牛酒以獻者，酒以賜軍士，牛還之。

逐鴨綠江外女真於白頭山外居之。

遣翰林學士白思柔如宋，謝賜經及御製。

（壬辰）十一年夏六月甲子，宋遣光祿卿劉式、秘書少監陳靖加冊王檢校太師，食邑一千戶，食實封四百戶，餘並如故。初，白思柔之入宋也，孔目吏張仁詮上書陳便宜，思柔以爲告國陰事，仁詮不敢還。至是，帝命陳靖等領還，且詔王釋仁詮罪。王上表略曰：“小人利豈虞僭越之誅；聖主寬恩，遠降哀矜之命。其張仁詮已依詔旨放罪。”

秋七月壬辰朔，流宗室郁于泗水縣。

冬十一月癸巳，改州府郡縣及關驛江浦號。

十二月，太廟成。庚申，教曰：“邦家之本，宗廟爲先。自昔帝王，莫不增修太室，創立闕宮，設子穆父昭之班，行三祫五禘之禮。我國朝乘時舉義，應運開都。雖累經纂業承基，而未設酎金灌玉。朕以謬傳神器，添屬孫謀。爰自前年新營太廟，在朝儒臣等其議定昭穆位次儀禮以聞。”

丙寅，教曰：“王者化成天下，學校爲先。祖述堯舜之風，聿修周孔之道，設邦國憲章之制，辨君臣上下之儀，非任賢儒，豈成軌範。揆天拓地，保大定功，

固將崇獎而行，不可斯須而廢。國朝創業已久，守文以興，寡人謬以眇躬，忝居大寶，思闡九流之說，廣開四術之門。發彼童蒙，置諸學校。黌中稷下，橫經之士成群；夏序虞庠，鼓篋之徒爲市。啓綸闈而較藝，闢會府以掄材。就省試者猶多，占仙科者尚少。斯則學無塾黨，才未精研。其令有司，相得勝地，廣營學舍，量給田莊，使之金鍊爲真，玉磨成器。凡在諸儒，尚知予意。”

是月，親祫于太廟。

（癸巳）十二年春三月乙未，教曰：“朕聞王者父天母地，兄日姊月，因時制禮，追孝敬親。天子七廟，諸侯五廟，祖功宗德，左昭右穆，大孝感于神明，至德動乎天地。我國以大聖生聖，重明繼明，保大定功，超今越古。朕謬叨顧命，繼守洪基，遵奉祖先，聿懷襟臆。爰從去歲新作闕宮，締構既完，蒸嘗有次，殷以十二君爲六代，唐以一十帝爲九室。《晉書》所云：‘兄弟旁及，禮之變也。’則宜爲主立室，不可以室限神。兄弟一行，禮文斯在。宜奉惠、定、光、景四主，通爲一廟。”

夏五月，西北界女真報契丹謀舉兵來侵。朝議謂其給我，不以爲備。

秋八月甲戌，賜李維賢等及第。

是月，女真復報契丹兵至。始知事急，分遣諸道兵馬齊正使。

冬十月，以侍中朴良柔爲上軍使、內史侍郎徐熙

爲中軍使、門下侍郎崔亮爲下軍使，軍于北界以禦契丹。

閏月丁亥，幸西京，進次安北府，聞契丹蕭遜寧攻破蓬山郡，不得進乃還。遣徐熙請和，遜寧罷兵。

（甲午）十三年春二月，蕭遜寧致書曰：“近奉宣命：‘但以彼國信好早通，境土相接，雖以小事大，固有規儀，而原始要終，須存悠久。若不設於預備，慮中阻於使人。遂與彼國相議，便於要衝路陌創築城池者。’尋准宣命，自便斟酌。擬於鴨江西里創築五城，取三月初擬到築城處下手修築。伏請大王預先指揮，從安北府至鴨江東計二百八十里，踏行穩便田地，酌量地里遠近，並令築城發遣役夫同時下手，其合築城數，早與回報。所貴交通車馬，長開貢覲之途；永奉朝廷，自協安康之計。”

始行契丹統和年號。

夏四月甲辰，禘于太廟躋戴宗于第五室，以功臣裴玄慶、洪儒、卜智謙、申崇謙、庾黔弼配太祖，朴術熙、金堅術配惠宗，王式廉配定宗，劉新城、徐弼配光宗，崔知夢配景宗。大赦，賜文武爵一級，執事者二級，百姓大酺三日。

是月，遣侍中朴良柔奉表如契丹告行正朔，乞還俘口。

六月，遣元郁如宋乞師以報前年之役。宋以北鄙甫寧，不宜輕動，但優禮遣還。自是與宋絕。

秋八月癸巳，臨軒覆試，賜崔元信等及第。

是歲，契丹遣崇祿卿蕭述管、御史大夫李洹等齎詔來撫諭。

以李承乾爲鴨江渡勾當使，尋遣河拱辰代之。

遣使契丹進妓樂，却之。

（乙未）十四年春二月己卯，教曰：“觀乎天文以察時變，觀乎人文化成天下。文之時義大矣哉，予恐業文之士，纔得科名，各牽公務，以廢素業。其年五十以下，未經知制誥者，翰林院出題，令每月進詩三篇、賦一篇，在外文官自爲詩三十篇、賦一篇，歲抄附計吏以進，翰林院品題以聞。”

是月，遣李周禎如契丹獻方物，又進鷹。

夏四月丁丑，內史侍郎崔亮卒。

五月戊午，教曰：“唐虞之制，周漢之儀，皆釐百辟之名，求奉一人之慶。今以諸官司事體雖遵於禮典，額名頗有所權稱，考厥典常，分其可否，悉除假號，克示通規。”

秋九月庚戌，定十道。

辛酉，覆試賜李子琳等及第。

是歲，遣李知白如契丹獻方物。

遣童子十人於契丹習其語。

遣左承宣趙之遴如契丹請婚，以東京留守駙馬蕭恒德女許嫁。

（丙申）十五年春三月，契丹遣翰林學士張幹忠、正軍節度使蕭熟葛來冊王曰：“漢重呼韓，位列侯王之上；周尊熊繹，世開土宇之封。朕法古爲君，推恩及



遠，惟東溟之外域，順北極以來王，歲月屢遷，梯航靡倦，宜舉真封之禮，用旌內附之誠。爰採彝章，敬敷寵數。咨爾高麗國王王治，地臨鯁壑，勢壓蕃隅，繼先人之茂勳，理君子之舊國，文而有禮，智以識機，能全事大之儀，盡協酌中之體。鴨江西限，曾無恃險之心；鳳宸北瞻，克備以時之貢。言念忠敬，宜示封崇。升一品之貴階，正獨坐之榮秩。仍疏王爵，益表國恩，冊爾爲開府儀同三司尚書令高麗國王。於戲！海岱之表，汝惟獨尊；辰卜之區，汝惟全有。守茲富貴，戒彼滿盈。無庸小人之謀，勿替大君之命。敬修乃事，用合朝經。俾爾國人，同躋壽域，永揚休命，可不美哉。”幹等至西郊築壇傳冊，王備禮受冊。大赦。

遣韓彥卿如契丹納幣。

夏四月辛未，鑄鐵錢。

秋七月乙巳，郁死于泗水縣。

冬十二月丁巳，賜郭元等及第。

（丁酉）十六年秋八月乙未，幸東京，宴群臣。扈從臣僚、軍士，賜物有差。中外官各加勳階，義夫節婦、孝子順孫，旌門賜物。遂頒赦。

九月，遂幸興禮府，御大和樓，宴群臣。捕大魚於海中。王不豫。己巳，至自東京。

冬十月戊午，王疾大漸，召開寧君誦親降誓言傳位，移御內天王寺。平章事王融請頒赦，王曰：“死生在天，何至釋有罪枉求延命乎？且繼我者何以布新

恩。”不許。薨。壽三十八，在位十六年，謚曰文懿，廟號成宗，葬于南郊，陵曰康陵。穆宗五年加謚康威，顯宗五年加章獻，十八年加光孝，文宗十年加獻明，高宗四十年加襄定。

李齊賢贊曰：“成宗立宗廟、定社稷，瞻學以養士，覆試以求賢。勵守令恤其民，賚孝節美其俗，每下手札，詞旨懇惻，而以移風易俗爲務。及乎契丹意在吞噬，遣將來侵，夙駕西都，進兵安北，即寇準澶淵之策也。其欲移關防於岳嶺，棄委積於大同，當時庸臣之議耳，必非成宗之本意也。嚮若觀崔承老之書，悅而繹之，去浮誇、務篤實，以好古之心求新民之理，行之無倦而戒其欲速，躬行心得而推己及人，齊變至魯、魯變至道可冀也。蕭遜寧爭能誣不恤民事以興無名之師，李知白安敢援不革土風以爲却敵之策乎？然其未老而樹繼嗣，爲國家之慮長矣；臨絕而惜肆赦，達死生之理明矣。所謂有志而可與有爲者，非耶？嗚呼！賢哉。”

## 穆宗

穆宗宣讓大王，諱誦，字孝伸。景宗長子，母曰獻哀太后皇甫氏。景宗五年庚辰五月壬戌生。成宗即位，養于宮中。九年六月，封開寧君。十六年十月戊午，受內禪即位。

十一月，遣閤門使王同穎如契丹告嗣位。

十二月壬寅，御威鳳樓，赦。褒孝順、洗痕累、救疾病。文武官及僧徒加一級，國內神祇皆加勳號，仍賜內外大酺一日。尊母皇甫氏爲王太后。

是月，契丹遣千牛衛大將軍耶律迪烈來賀千秋節，王迎命告于成宗柩前。

（戊戌）元年春正月，賜周仁傑等及第。

三月，賜姜周載等及第。

夏四月壬子，謁太廟。祔成宗，以侍中崔承老、太師崔亮配享。赦。

以王生日爲長寧節。

是月，契丹以前王薨，敕還納幣之物。

五月戊午，教有司曰：“太祖及皇考忌齋各限五日，焚修輟朝一日，惠、定、光、戴、成忌齋各限一日，以爲常式。”

秋七月庚午，太保內史令徐熙卒。

癸未，改西京爲鎬京。

（己亥）二年秋七月，作真觀寺于城南，爲太后願刹。

冬十月，幸鎬京齋祭，赦。存問耆老，賜物。兩京諸鎮軍年八十以上，有職者增級，無職者除陪戎校尉扈駕八品以下員吏軍人賜物有差。

契丹遣右常侍劉績來加冊王尚書令。

日本國人道要彌刀等二十戶來投，處之利川郡爲編戶。

遣吏部侍郎朱仁紹如宋，帝特召見。仁紹自陳國人思慕華風，爲契丹劫制之狀，帝賜詔贖還。

（庚子）三年冬十月，創崇教寺爲願刹。

是歲，賜宋翊等及第。

（辛丑）四年冬十一月，幸中原府，巡省風俗，宴群臣，赦。扈從官及所歷州郡官加一階，賜物有差。

（壬寅）五年夏四月壬申，親享太廟加上先王先后徽號。

五月，教曰：“余以弱齡，忝登寶位，繼祖先之基業，思邦國之興安，功不百而不行，利非千而不務，必欲延洪社稷，開濟生靈。爰自前年，迄于近日，不揣心之所欲，謂爲時之可行，或不念居安思危，臨深履薄，廣徵土木，勞役軍夫，築高臺而作深池，爲資遊賞；役人戶而造佛寺，漫有經營。此雖皆從執奏而施行，豈非一人之失德？非但致軍中之怨讟，抑亦爲宇內之艱難。若有訓衆而練兵，若有彼侵而我伐，將何賈勇，將何得人，何異截羽翼而欲高飛，去舟楫而涉大水。古史云：‘芳餌之下，必有懸魚；善賞之朝，必有勇士。’古猶如此，今豈無之。庶欲防已往之愆違，尤勵將來之懲勸。特宣朕意，用示軍行，宜其所司，各成六衛，軍營備置職員，將帥令其軍士蠲除雜役。”

秋八月甲子，賜朴元徽等及第。

（癸卯）六年春正月，教曰：“昔我太祖，既偃干戈，大開庠序，王室宗支，橫經問道；蓬廬賤子，負

笈追師。累朝以來，才士不乏。予謬以眇冲，嗣守艱大，欲廣真儒之道，以崇往聖之猷。但以誨人不倦者靡多，好古敏求者蓋寡，州鄉之內，黌校之中，或因小利，或逐異端，師長之教授漸惰，後學之功業不成。今者闡關容賢之門，恢弘進善之路，其三京十道群僚庶官體朕諭言，勸其藝業。令文儒醫卜之輩，就經明博達之師。博士師長獎勸生徒有勤勞者，錄名申聞。”

二月辛酉，教曰：“唐以八元而理，周因十亂而興。爲國所資，惟賢而已。余幼失義方，長無師訓。臨朝蒞事，慄慄兢兢。豈謂去年以來，屢見乾坤之變，又多邊境之憂，但深責己之懷，敢有尤人之念。追思曩代，或覽策書。宋公發善言，妖星退舍；隋主修德政，隣寇寢兵。是知小善亦能動天感人，克己自勤，安敢飾非拒諫。今見上自台輔，下至庶僚，曾無謬諤之言，但有阿諛之說。嗚呼！言而不用，余宜自慚，危而不扶，誰任其咎？京官五品以上，各上封事，皆陳藥石之辭，共贊邦家之業。”

是年，太后皇甫氏與金致陽通，生子，謀爲王，後逼大良君詢爲僧。

（甲辰）七年春三月，改定科舉法。

夏四月，賜黃周亮等及第。

六月己未，門下侍中韓彥恭卒。

冬十一月甲寅，幸鎬京，齋祭，赦杖罪以下。養耆老，加方嶽州鎮神祇勳號。

（乙巳）八年春正月，東女真寇登州，燒州鎮部落

三十餘所，遣將禦之。

三月己酉，汰外官。

夏四月癸酉，賜崔冲等及第。

是歲，宋温州文士周佇來投，授禮賓注簿。

（丙午）九年六月戊戌，震天成殿鴟吻。王憂懼責己，肆赦。孝順義節，並加恩賞，加國內神祇勳號，文武三品以上加勳，四品以下增一級，九品以上入仕滿二十年者改服。禪教僧徒大德以上加法號，年六十以上者加職有差。

是歲，彗星見。

（丁未）十年春二月，契丹遣耶律延貴來，加冊王爲守義保邦推誠奉聖功臣、開府儀同三司、守尚書令、兼政事令、上柱國，食邑七千戶，食實封七百戶。

創真觀寺九層塔。

夏六月，賜趙元等及第。

秋七月戊寅，流平章事韓藺卿于楊州、吏部侍郎金諾于海島。

冬十月戊申，幸鎬京，齋祭。赦流罪以下，加國內神祇勳號。

是歲，鎬京地震。

（戊申）十一年春三月，賜孫元仙等及第。

冬十月，幸鎬京，齋祭。

（己酉）十二年春正月庚午，幸崇教寺。及還，中路暴風折傘蓋柄。

壬申，御詳政殿觀燈，太府油庫災，延燒千秋殿。

王見殿宇府庫煨燼，悲嘆成疾，不聽政。王、國師二僧，太醫奇貞業、太卜晉含祚、太史潘希渥、宰臣參知政事劉璿、中樞院使崔沆、給事中蔡忠順等直宿銀臺，知銀臺事李周禎、右承宣李作仁、嬖臣左司郎中劉忠正、閤門舍人庾行簡等直宿於內，親從將軍庾方、中郎將柳琮、卓思政、河拱辰常直近殿門，刑部尚書陳頌亦入內直宿，戶部侍郎崔士威爲大定門別監，閉諸宮門戒嚴，唯開長春、大定門，仍設救命道場於長春、乾化二殿。王累日不豫，常居於內，厭見群臣。宰臣震恐，請入寢問疾，不許。王與蔡忠順、崔沆密議立嗣，遣皇甫俞義迎大良院君于神穴寺。

西京都巡檢使康兆領甲卒而至，遂謀廢立。二月戊子，請王出御龍興歸法寺。己丑，日色如張紅幕，兆兵入宮門，王知不免，與太后號泣，出御法王寺。俄而，俞義等奉院君而至，遂即位。兆廢王爲讓國公，遣兵殺金致陽父子及庾行簡等七人。王出自宣仁門，侍臣初皆步從，至是始有騎而從者，至歸法寺解御衣換食而進，兆召還沆等供職。王謂沆曰：“頃府庫災而變起所忽，皆由予不德，夫復何怨。但願歸老于鄉，卿可奏新君，且善輔佐。”遂向忠州，太后欲食，王親奉盤盂，太后欲御馬，王親執轡。行至積城縣，兆使人弑之，以王自刎聞。取門扇爲棺，權厝于館。王在位十二年，壽三十，性沈毅，少有人君之度，善射御，嗜酒好獵，不留意政事，信狎嬖倖，以及於禍。踰月，火葬縣南。陵曰恭陵，謚宣靈，廟號愍宗，皆康兆所

撰定，臣民莫不痛憤，而顯宗未之知。至契丹問罪，始知之。顯宗三年，移葬城東，改陵曰義，謚曰宣讓，廟號穆宗。五年加謚孝思，十八年加威惠，文宗十年加克英，高宗四十年加靖恭。

李齊賢贊曰：“慶父犯禮於魯，不韋嫁禍於秦，齊桓尸姜，始皇轅（毒）〔毒〕，何救萬世之恥哉？穆宗不戒覆車之轍，防閑於初，子母俱罹其殃，社稷幾至於亡。嗚呼！宣讓之不幸也，抑非不幸也。”



# 高麗史四

## 世家卷第四

### 顯宗一

顯宗元文大王，諱詢，字安世，安宗之子，母曰孝肅王后皇甫氏。成宗十一年壬辰七月壬辰生。稍長，封大良院君。年十二，千秋太后忌之，逼令祝髮。初寓崇教寺，有僧夢見大星隕寺庭變爲龍又變爲人，即王也，由是衆多奇之。穆宗九年，移寓三角山神穴寺，太后屢遣人謀害，寺有老僧穴地於室而匿之，上置卧榻以防不測。一日，王偶題溪水詩曰：“一條流出白雲峰，萬里滄溟去路通。莫道潺湲巖下在，不多時日到龍宮。”詠小蛇曰：“小小蛇兒遶藥欄，滿身紅錦自斑斕。莫言長在花林下，一旦成龍也不難。”又夢聞雞聲砧響，問於術士，以方言解之曰：“雞鳴高貴位，砧響御近，當是即位之兆也。”

十二年二月己丑，奉迎即位於延寵殿。庚寅，以

康兆爲中臺使、李鉉雲爲中臺副使、蔡忠順爲直中臺、尹餘爲尚書右丞兼直中臺。是月，遣司農卿王日卿如契丹，告哀稱嗣。罷教坊，放宮女一百餘人。毀閬苑亭，珍禽奇獸龜魚之類放之山澤。

三月，以柳允孚爲門下侍中，柳邦憲爲門下侍郎平章事，康兆爲吏部尚書、參知政事，陳頤爲刑部尚書、參知政事，劉璫、王同穎爲尚書左右僕射，崔沆、金審言爲左右散騎常侍，蔡忠順爲吏部侍郎左〔鍊〕〔諫〕議大夫，金勵爲兵部尚書，文仁渭爲工部尚書。是月，議築開京羅城。

四月丙戌朔，遣借工部侍郎李有恒如契丹賀太后生辰。

甲午，追謚考妣。

戊戌，赦。養老病，放逋懸，輕徭役，賞功臣，褒賢士，錄勳舊，除女樂，濟軍糧，群望神祇，加勳號，增文武官爵。

五月戊辰，改英華館爲會同館。

乙亥，納延興宮主女金氏爲妃。

戊寅，赦徒罪以下，加文武官階一級，考滿者增秩，賜京軍布有差。南道民戶實東北邊鎮者，放歸田里。

是月，賜安昌齡等及第。

六月，東北界蝗。

七月癸酉，教文官常參以上各上封事，極言時政得失。

辛巳，御毬庭，集民男女年八十以上及篤疾者六百三十五人，賜酒食布帛茶藥有差。

以翰林學士崔沆爲師傅。

八月甲午，門下侍郎平章事柳邦憲卒。

十月壬午，以韋壽餘爲門下侍郎平章事，陳頌爲內史侍郎平章事。

十二月丙申，教曰：“朕忝承祖業，恭紹丕基。御玄菟之封疆，奉皇天之眷命。子育黎庶，不敢遑寧。慮一德之未孚，或彝倫之攸斁。每躬勤於聽斷，冀馴致於太平。昨者方及秋旻，未收祆霧，陰陽交錯，氣候乖差。是增若厲之誠，乃切責躬之戒。避正殿，減常羞，旰食宵衣，心祈口禱，果蒙感通，便致清和。可謂能敬無災，轉禍爲福；固合益思祗畏，仰副高明。更勤恤於邦家，愈勵精於政事。然萬機之務，獨理爲難。允資臣下之功，共協乾坤之道。方因儆懼，乃示箴言。若乃衡軸之司，實是民瞻之地。固宜彌綸闕漏，獻納謨明，斟酌化源，佐佑王業。暨掄材之職，選士之權，搜草澤而無使遺賢，勉公平而勿遵阿黨。或懸科設法，折獄審刑，合盡哀矜，不行苛刻，足召和氣，俾無沈寃。至於百執事恪居官聯，謹守職務，儆之以揚清激濁，省之以背公向私。逮夫牧守之官，各懷字民之心，無忘愛物之意。至於鎮邊將帥，訓齊師旅，育養驍雄，務備不虞，戒于無度。咨！汝中外卿士，當夙夜以匪懈，在終始以不渝。噫！天鑑非遙，既垂敬戒；予心勿怠，已致感通。更增夕惕之誠，冀賴日

新之慶。故求共理，以保將來。”

（庚戌）元年春正月乙丑，廢上元道場。

閏二月甲子，復燃燈會。

夏四月癸丑，親祀太廟。

己未，賜徐崧等及第。

五月甲申，流尚書左司郎中河拱辰、和州防禦郎中柳宗于遠島。拱辰嘗擊東女真見敗，宗恨之。會女真九十五人來朝，至和州館，宗盡殺之，故並坐流。女真訴于契丹，契丹主謂群臣曰：“高麗康兆弑君，大逆也，宜發兵問罪。”

秋七月戊寅朔，契丹遣給事中梁炳、大將軍那律允來問前王之故。

八月丁未朔，遣內史侍郎平章事陳頤、直中臺尚書右丞尹餘如契丹。

九月，遣左司員外郎金延保如契丹秋季問候。左司郎中王佐暹、將作丞白日昇如契丹東京修好。

冬十月丙午朔，以參知政事康兆爲行營都統使檢校、尚書右僕射，上將軍安紹光爲行營都兵馬使，少府監崔賢敏爲左軍兵馬使，刑部侍郎李昉爲右軍兵馬使，禮賓卿朴忠淑爲中軍兵馬使，刑部尚書崔士威爲統軍使，率兵三十萬，軍于通州，以備契丹。

癸丑，契丹遣給事中高正、閤門引進使韓杞來告興師，參知政事李禮均、右僕射王同穎如契丹請和。

十一月丙子朔，遣起居郎姜周載如契丹賀冬至。

契丹主遣將軍蕭凝來告親征。

庚寅，復八關會，王御威鳳樓，觀樂。

辛卯，契丹主自將步騎四十萬渡鴨綠江，圍興化鎮，楊規、李守和等固守不降。

己亥，康兆與契丹戰于通州，敗績就擒。

庚戌，丹兵陷郭州。

壬子，丹兵至清水江，安北都護府使工部侍郎朴暹棄城遁，州民皆潰。

癸丑，丹兵至西京，焚中興寺塔。

甲寅，陷肅州。

庚申，大流星隕于郭州。

辛酉，契丹主攻西京，不拔，解圍而東。

癸亥，西京神祠旋風忽起，契丹軍馬皆僨。召還河拱辰、柳宗，復其爵。

壬申夜，王與后妃避丹兵南幸。

甲戌，次楊州，遣河拱辰及戶部員外郎高英起奉表往丹營請和。

（辛亥）二年春正月乙亥朔，契丹主入京城，焚燒太廟宮闕民屋皆盡。是日，王次廣州。

丁丑，扈從諸臣聞拱辰等被執，皆驚懼散走，惟侍郎忠肅、張延祐、蔡忠順、周佇、柳宗、金應仁不去。

戊寅，王發廣州，次鼻腦驛。壬午，次長谷驛。乙酉，丹兵退。丙戌，王過仁義縣，次水多驛。丁亥，踰蘆嶺入羅州。乙未，王回駕次伏龍驛。戊戌，次古阜郡。己亥，次金溝縣。庚子，次全州，留七日。壬

寅，楊規、金叔興與契丹戰死。

癸卯，契丹主渡鴨綠江引去。以蔡忠順爲秘書監、朴暹爲司宰卿、周佇爲禮部侍郎中樞院直學士、韓昌弼爲閣門通事舍人。暹自安北遁還京都，挈家，往其鄉務安縣，道逢車駕，隨至羅州，已而辭歸，又聞兵退，來謁，乃有是命，時議譏之。

二月丁未，發全州，次礪陽縣。戊申，次公州，留六日，納金殷傅長女爲妃。

庚戌，以金繼夫爲兵部侍郎、李端爲吏部員外郎。

丁巳，次清州。

己未，設燃燈會于行宮。是後，例以二月望行之。

庚申，發清州。丁卯，還京都，入御壽昌宮。

己巳，刑部奏：“劉彥卿世受國恩，不思報效，率先降敵，請流配妻子。”從之。

三月戊子，以卓思政爲御史中丞。

辛丑，以劉璫爲內史侍郎平章事，趙之遴、崔士威參知政事。

夏四月丁未，以卓思政爲右諫議大夫。以久旱禱雨于宗廟，移市肆，禁屠宰，斷織扇，審冤獄，恤窮匱。

己酉，以皇甫俞義、崔昌並爲侍御史，柳韶爲殿中侍御史，金宗鉉、朴從儉並爲監察御史。

壬子，贈戰没中丞盧頤禮賓卿。

丙辰，賜戰没大將軍蔡溫謙、申寧漢，郎將元泰、別將崔元、拾遺乘里仁、太史丞柳仁澤家米布有差。

丁巳，命有司收瘞中外戰死骸骨，祭之。教宰相曰：“《語》云：‘危而不持，顛而不扶，將焉用彼相？’《書》曰：‘惟木從繩則正，后從諫則聖。’君臣之義，得不悉心以匡救乎？朕自叨纘服，備歷艱危，夙夜競愧，思免厥愆。卿等勉輔不逮且無面從。”以李靖、崔輔成爲尚書左右丞。

辛酉，禱雨于松嶽，大雨。

乙丑，遣工部郎中王瞻如契丹謝班師。先是，王欲遣使契丹，命太史筮之，得乾之蠱，奏曰：“乾爲君爲父，乾健則無所不通。九五曰：‘飛龍在天，利見大人。’蠱之爲卦，尊者在天，卑者在下，此亦以下事上之象，吉。”

丁卯，置迎賓、會仙二館，以待諸國使。

五月乙亥，東北女真酋長鉏乙豆率其屬七十人來獻方物，各賜衣服銀皿。

戊寅，以庾方爲兵部尚書兼上將軍，崔賢敏爲工部尚書，金審言爲禮部尚書，崔冲爲右拾遺。

丁亥，加平壤木覓、橋淵、道知巖、東明王等神勳號。

丁酉，以朴昇爲殿中侍御史。

六月癸卯朔，以姜邯贊爲翰林學士承旨。

丁卯，以李靖爲殿中監，孫夢周爲尚書左丞。

秋七月癸酉，以崔士威爲西北面行營都統使，張延祐、蔡忠順並爲中樞使。

甲申，刑部奏：“郎中白行隣當南幸之際，留在京

城自稱御史中丞，與李因禮、巨貞等召募徒奴爲軍，見敵不戰而潰，請除名。”從之。

壬辰，教曰：“去年契丹圍西京，沙門法言見義奮勇，忘生徇國，可贈首座。”

八月癸卯，刑部奏：“趙容謙、柳僧虔、李載、崔楫、崔成義、林卓，當南幸之時，驚動行宮，請除名支配。”從之。

甲辰，以梁稹爲御史中丞。

乙巳，以文仁渭爲右僕射，朴忠淑爲西京副留守。

庚戌，以張延祐判御史臺事。

丙辰，論康兆黨，流卓思政、朴昇、崔昌、魏從政、康隱于海島。

丁巳，以皇甫俞義爲吏部郎中，柳韶爲侍御史，曹子奇、李擇成並爲殿中侍御史，李仁澤爲監察御史。

乙丑，遣戶部侍郎崔元信如契丹。

丙寅，御寬仁殿門，饗耆老孤獨篤疾者，賜物有差。

己巳，以參知政事崔士威爲西京留守。

是月，增修松嶽城。築西京皇城。東女真百餘艘寇慶州。

九月丙子，左僕射、參知政事趙之遴卒。以崔士威爲吏部尚書，朴暹爲將作監，康義爲尚書右丞，朴從儉爲侍御史。

乙酉，耽羅乞依州郡例賜朱記，許之。

壬辰，以李昉爲西京副留守。



冬十月庚子朔，以兵部尚書庾方參知政事、西京留守兼西北面行營都兵馬使。

乙丑，遣都官郎中金崇義如契丹賀冬至。

命尚書張延稜修營宮闕。

十一月壬午，遣刑部侍郎金殷傅如契丹賀生辰。

十二月己酉，以文仁渭參知政事。

是月，契丹殺河拱辰。

（壬子）三年春二月甲辰，女真酋長麻尸底率三十姓部落子弟來獻土馬。三十姓曰阿干頓、曰尼忽、曰尼方固、曰門質老、曰弗遮利、曰居質阿、曰黏間逸、曰尼質阿、曰耶邏多、曰邀揭囉、曰要悅逸、曰鬱喏、曰烏臨大、曰蒙骨拽、曰暈底憲、曰徒怠、曰耶兀逸、曰拏乙信、曰拏乙晏、曰冬骨逸、曰支闍逸、曰魚瑟殷、曰麼乙逸、曰塗沒尼、曰云突梨、曰押間伊、曰惱一伊、曰排門異、曰佛徐逸、曰滿尹伊。

乙卯，教曰：“《語》曰：‘百姓不足，君孰與足’。頃因戎事，民失農業，道殣相望。念黎庶之若此，豈君父之獨安。其令尚食太官減省常膳。”

戊午，以韋壽餘爲侍中，劉璿爲門下侍郎，崔士威爲內史侍郎平章事，崔沆爲吏部尚書、參知政事，朴忠淑爲尚書左僕射，蔡忠順爲禮部尚書。

三月庚午，慶州地震。

壬申，宋人王福、錢華、楊太、葉清、王弩、李太、林惜來投。

夏四月癸亥，門下侍中韋壽餘卒。

是月，霜。契丹詔王親朝。

五月己巳，東女真寇清河、迎日、長鬐縣，遣都部署文演、姜民瞻、李仁澤、曹子奇督州郡兵擊走之。撤慶州朝遊宮，以其材修皇龍寺塔。

乙酉，謁元陵。

丙戌，集僧于內殿講仁王般若經。

六月甲辰，以時御宮庭湫隘，令常參官五日一見。

乙巳，以李守和爲左拾遺。

庚戌，宋人葉居腆、林德、王皓來投。

癸丑，禮官請令中外陳賀生辰。教曰：“寡人早值閔凶，永違供養，每及劬勞之日，益切追感之心，豈忍悲懷反受慶會。今後兩京諸道進賀一切禁之，止置祝壽道場，永爲恒式。”監察御史李仁澤與東北面行營兵馬使姜邯贊有隙，論訴不已，命罷仁澤職。以旱，命有司治冤獄，放輕繫，禱祠山川。

甲子，遣刑部侍郎田拱之如契丹夏季問候，且告王病不能親朝。丹主怒，詔取興化、通州、龍州、鐵州、郭州、龜州等六城。

秋七月戊寅，教曰：“朕頃在泗水，彥孝、孝質二人扶持左右，夙著勤勞，可賜良田以賞其勞。”

八月丙申朔，日食。

戊戌，日本國潘多等三十五人來投。

壬寅，耽羅人來獻大船二艘。東北州鎮有年。

九月己巳，遣西頭供奉官文儒領如契丹來遠城。

冬十月丙午，南楚人陸世寧等來獻方物。

閏月，女真毛逸羅、鉏乙豆率部落三十姓詣和州乞盟，許之。

庚午，遣工部尚書、參知政事張瑩、禮部侍郎劉徵弼如契丹。

癸未，契丹使太尉韓邠來。

十二月丁丑，慶州地震。教曰：“昔在晉朝，大室燒毀，杜預謝鯤等奏修嘉德門，權安神主，以行祭禮。今以寡人不德，致令清廟挺災，惻愴雖深，興營未暇，乃欲先造木主置于齋坊，其令禮官擬議奏聞。”

庚寅，張瑩與契丹引進使李延弘來。

是月，作西京木覓祠神像。創重光寺。

（癸丑）四年春正月丁酉，遣禮賓少卿張洎如契丹。

庚戌，宋閩人戴翼來投，授儒林郎守宮令，賜衣物、田莊。

辛酉，以金作賓爲御史中丞、韓昌弼爲右補闕、黃周亮爲侍御史。

壬午，慶州地震。

癸未，教曰：“朕以眇躬，忝爲元首，愆違所積，變異相仍，祆不妄作，是用憂懼。宜令有司，講求弭災之道以聞。”

庚寅，遣中樞院使蔡忠順如契丹。

三月辛丑，金州地震。

戊申，契丹使左監門衛大將軍耶律行平來責，取興化等六城。

夏四月乙丑，右常侍全輔仁上表乞致仕，不允。

丙子，隕霜殺草。癸未，以工部尚書、參知政事張瑩爲西京留守。

五月丁酉，契丹來告改統和爲開泰。

壬寅，女真引契丹兵將渡鴨綠江，大將軍金承渭等擊却之。

癸卯，納敬章太子女爲妃。

六月丁卯，遣借尚書右丞金作賓如契丹賀改元。

癸酉，松嶽崩。

秋七月戊申，契丹使耶律行平復來索六城。

八月乙亥，謁義陵，赦。

九月丙午，御寬仁殿覆試，賜林維幹等及第。

庚戌，教曰：“輔國大將軍宋能、驃騎大將軍庾孫，逮事太祖，從軍有勞，今尚無恙，已及期頤，其各加大匡。”

丙辰，以吏部尚書、參知政事崔沆監修國史，禮部尚書金審言修國史，禮部侍郎周佇、內史舍人尹徵古、侍御史黃周亮、右拾遺崔冲並爲修撰官。

冬十月，修功臣堂。

十一月丁未，金州地震。

十二月戊午朔，日食。

丙戌，金、慶二州地震。

（甲寅）五年春正月甲午，宮闕成。

壬子，彗見于五車。

二月庚申，彗入大陵。

甲子，御新闕。鐵利國主那沙使女真萬豆來獻馬及貂鼠、青鼠皮。

丙子，教：“民年七十以上無官者，並加正位級。”

甲申，以光休、梁一、巨貞並爲郎將，以賞戰功。

三月庚寅，白虹貫日。

辛丑，白氣貫日。

壬子，教曰：“追尊祖考，以明功烈，人子之志也。朕取來月，饗于闕宮。宜委所司議定。”禮官奏加上先王先后尊謚。

夏四月甲戌，致仕門下侍中柳允孚加內史令。

丙子，親禘于齋坊，始以穆宗祔。赦流罪以下。以劉瑨檢校太師、守門下侍中，崔士威爲門下侍郎平章事，金審言爲內史侍郎平章事。

丁丑，賜禹玄符等及第。

五月辛卯，太白晝見。

丙午，中樞院副使田拱之卒。

六月庚申，教曰：“防戍軍道死者，官給斂具函其骨，驛送于家，其商旅死而不記姓名本貫者，所在官司爲之權厝，誌其老壯形貌，勿使疑誤，以爲永式。”

是月，加陳頔、李禮均爲門下侍郎平章事，王同穎爲內史侍郎平章事，尹餘爲司宰卿，王佐暹爲將作少監，以奉使契丹被留未還也。

秋七月庚寅，修社稷壇。

八月甲子，遣內史舍人尹徵古如宋，獻金線織成龍鳳鞍幘、繡龍鳳鞍幘各二，良馬二十二匹，仍請歸

附如舊。宋帝詔登州置館于海次以待之。

己巳，移御明福宮。

丙子，慶州地震。

己卯，以內史侍郎平章事金審言爲西京留守，盧戢爲御史中丞。

癸未，以梁稹爲吏部侍郎中樞副使。

九月乙酉，以孫夢周爲翰林學士承旨，李龔爲翰林學士。

丙申，契丹遣將軍李松茂又索六城。

冬十月己未，契丹遣國舅詳穩蕭敵烈來侵通州興化鎮，將軍鄭神勇、別將周演擊敗之，斬七百餘級，溺江死者甚衆。

十一月癸未朔，上將軍金訓、崔質等率諸衛軍作亂，流中樞院使張延祐、日直皇甫俞義。

乙酉，金訓等請武官常參以上皆兼文官，從之。

庚寅，訛言北山諸寺僧舉兵來，京城大駭，戒嚴。

十二月丁巳，赦流罪以下，減諸死罪杖流，除皇甫俞義、張延祐及常赦不免外諸流配人並與量移。海濱山川神祇各加勳號，京中人戶賜穀有差，孝子順孫、義夫節婦量賜分物。文官七品以上入仕二十年者，改服章。道官加次第職。

（乙卯）六年春正月，契丹作橋於鴨綠江，夾橋築東西城，遣將攻破，不克。

癸卯，契丹兵圍興化鎮，將軍高積餘、趙弋等擊却之。

甲辰，又侵通州。

三月癸未，幸西京。

甲午，王宴群臣於長樂宮。誅金訓、崔質等十九人。

己亥，契丹侵龍州。女真以船二十艘寇狗頭浦，鎮溟道都部署擊敗之。

夏四月庚申，契丹使將軍耶律行平來，又索六城，拘留不遣。

是月，王至自西京。

五月辛丑，大流星隕于西南。

癸卯，以金殷傅知中樞事。

六月己酉朔，日食。

閏月甲辰，以李周憲爲刑（郎）〔部〕尚書，張延祐爲戶部尚書。

宋泉州人歐陽徵來投。

秋七月庚申，罷武官所請建官號。都兵馬使奏：“將軍鄭神勇、林英含及軍士一萬二千五百餘人皆有邊功，請增級以賞。”從之。

八月乙未，內史令柳允孚卒，輟朝三日，謚敬安。

九月甲寅，契丹使監門將軍李松茂來索六城。

己未，契丹來攻通州。

癸亥，興化鎮大將軍鄭神勇、別將周演、散員任億、校尉楊春、太醫丞孫簡、太史丞康承穎等引兵出契丹軍後，擊殺七百餘級，神勇及六人死之。

丁卯，契丹攻寧州城，不克而退。

庚午，大將軍高積餘，將軍蘇忠玄、高延迪，散員金克，別將光參等追擊，死之。丹兵虜兵馬判官王佐、錄事盧玄佐而去。

十一月己巳，戶部尚書張延祐卒。

甲戌，慶州地震。

是歲，契丹取宣化、定遠二鎮，城之。遣民官侍郎郭元如宋獻方物，仍告契丹連歲來侵。表曰：“借以聖威，示其睿略，或至傾危之際，預垂救急之恩。”

（丙辰）七年春正月庚戌，契丹耶律世良、蕭屈烈侵郭州。我軍與戰死者數萬人，獲輜重而歸。

甲寅，契丹使十人到鴨綠江，不納。

乙卯，移御壽昌宮。贈鄭神勇尚書右僕射、上柱國，周演將軍，任憶中郎將，楊春郎將，孫簡尚藥奉御，康承穎太史令。授神勇子均伯郎將兼尚乘奉御。戊午，以姜民瞻爲內史舍人。

壬戌，兵部奏：“郎將秦明、柳高價、康孝等七十四人請增爵一級，以賞邊功。”從之。

丙寅，以故將軍高延迪死事賻其家米五十碩、麥三十碩、布一百匹。

丁卯，以金殷傳爲戶部尚書，李守和、崔冲爲左右補闕，李作忠、歐陽徵爲左右拾遺。

戊辰，以尹徵古爲中樞院副使。

己巳，以張瑩爲左散騎常侍，蔡忠順復爲禮部尚書。

壬申，奉太祖梓宮復葬顯陵。庚戌之亂移安梓宮



于負兒山香林寺，至是還葬。

郭元還自宋，帝詔曰：“朕位居司牧，志存安民。雖分域以有殊，惟推誠而無間。念卿本道，固深軫於懷思；睽彼隣封，亦久從於盟好。所期輯睦，用泰黎蒸。”

二月己卯，以金老玄爲尚書右僕射。

庚辰，兵部奏：“中郎將蔡宏、李康等一百五十九人並有戰功，請增爵一級。”從之。

壬午，契丹王美、延相等七人來奔。

甲申，金訓等父母妻妹祖孫叔伯緣坐者皆放之，其子若同產兄弟歸之本貫，常赦不原。

己丑，王以壽昌宮怪異數見，移御明福宮。

辛丑，太白經天。兵部奏：“將軍黃虎猛等三十九人皆有戰功，請加職一級。”從之。

甲辰，契丹曹恩、高忽等六人來投。

夏四月甲申，以異膺甫攝司憲大夫，徐訥爲中丞，柳韶爲雜端，曹子奇爲侍御司憲，金祐甫、李成功爲殿中侍御司憲，安宰均、李元秀、劉玄佐、李懷、郭紳、李周佐爲監察。司憲臺庭柏樹枯死有年，至是復生。

五月乙巳，宮人金氏生王子，賜名欽，仍賜延慶院金銀器、匹段、田莊、奴婢、鹽盆、魚梁。

辛亥，契丹馬兒保、良王保、可新等十三戶來投。

乙丑，尚書省奏：“龜州軍橘仙、永夢謀叛。”斬之。

契丹要豆等三人來投。

六月丙子，以金殷傳爲中樞使上護軍，郭元爲刑部侍郎右諫議大夫，皇甫俞義爲給事中，金猛爲中樞直學士。

戊寅，契丹志甫等三人來投。

庚辰，王子生於恒春殿，賜名秀。

乙酉，契丹張烈、公現、申豆、猷兒、王忠等三十戶來投。

秋七月甲辰，都兵馬使奏：“將軍高積餘、中郎將徐肯、郎將守岳等三千一百八人曾於通州之役殺獲甚多，請不拘存沒增職一級。”從之。

辛亥，御明福殿覆試，賜金顯等及第。

庚戌，以李周憲爲尚書右僕射。

丁巳，契丹由道、高宗等九人來投。

庚申，教曰：“比聞秋稼將成，飛蝗爲害，豈刑政之或戾，將災沴之使然。其內外囚徒，流以下取保出獄，疏理速決。”

八月，契丹朱簡、從道等八人來投。

九月己酉，教曰：“南界州縣蝗旱重仍，言念飢民，能無責己。宜避正殿，減常膳，禁諸宮院飲酒作樂。”契丹羅墾等五人來投。

甲寅，以李周憲爲西京留守。

丙寅，以孫夢周爲禮部尚書。

辛未，契丹奉大、高里等十九人來投。

冬十一月辛丑朔，賜鄭神勇家良田二十結。

癸丑，以崔沆爲內史侍郎平章事，庾方爲刑部尚書、參知政事。

丙辰，祈雪于群望。

契丹匡父兒等十人來投。

十二月辛巳，以元祐爲工部尚書，智蔡文爲右常侍，皆以武職兼之。

乙未，契丹瑟弗達等六人來投。

是歲，復行宋大中祥符年號。

（丁巳）八年春正月丁未，檢校太尉、左散騎常侍、參知政事張瑩上表乞退。

三月甲辰，賜鄭倍傑等及第。

丙午，白氣貫日。

丁巳，以李端爲司憲中丞。

夏四月，遣門下平章事崔沆、中樞副使尹徵古于泗州奉遷安宗梓宮，王備法駕迎于東郊。

五月戊申，以李龔知中樞事。

壬子，中樞使戶部尚書金殷傅卒。

乙丑，加上考妣尊謚。

六月，螟。

秋七月戊戌，契丹光正等七戶來投。

庚子，兵部奏：“正輔李龍奉、正朝任述光等三十人皆有邊功，請加鄉職一級。”從之。

辛丑，宋泉州人林仁福等四十人來獻方物。

己酉，女真靺鞨木史率部落來朝，賜爵及衣物。契丹買瑟、多乙、鄭新等十四人來投。

遣刑部侍郎徐訥如宋獻方物。

戊午，上將軍、尚書右僕射安紹光卒。

八月癸酉，契丹果許伊等三戶來投。

乙亥，謁乾陵。

乙酉，東女真蓋多弗等四人來投，請效邊功。許之，優禮賜物。

壬辰，西女真楷信擒契丹東京崇聖寺僧道遵以來。

癸巳，契丹蕭合卓圍興化鎮，攻之九日不克。將軍堅一、洪光、高義出戰，大敗之，斬獲甚多。

甲午，黑水靺鞨阿離弗等六人來投，分處江南州縣。

九月甲辰，契丹群其、昆伎、女真孤這等十戶來投。

己酉，兵部尚書金徵祐上表致仕。

壬子，契丹烏豆等八人來投。

戊午，御宣政殿閱兵。

是月，旱蝗，王避正殿，減常膳。

冬十月壬申，修顯陵。

十一月丙申，以李元爲龍虎軍上將軍兼戶部尚書。

己亥，太白經天。

十二月丙寅，以蔡忠順爲左散騎常侍中樞使。

乙亥，謁顯陵，赦。

是月，教：“高勾麗、新羅、百濟王陵廟並令所在州縣修治，禁樵採，過者下馬。”

（戊午）九年春正月乙未朔，遣使西京祭太祖于聖

容殿，以重新肖像也。

丙申，西女真未闕達等七人來獻甲鍪及馬。定安國人骨須來犇。

庚子，宰臣率百官上表請還御正殿，復常膳。不允。

壬子，東女真鋤栗弗、西女真阿主等四十餘人來獻馬及甲鍪旗幟、貂鼠、青鼠皮。

戊午，群臣累請復常膳，許之。

二月戊辰，賜海弩二軍校尉船頭以下茶布有差。

己巳，西女真凌舉、渠伊等來獻皮鐵甲及馬。

乙亥，教曰：“《禮記》：‘季春之月，省囹圄，去桎梏。’內外法司宜遵《月令》以導陽和，用爲恒式。”以盧戩爲中樞副使上護軍。

己卯，東女真孫於率部落來獻馬及貂皮，賜衣帶、貨物。

甲申，門下省奏：“龍川校尉朴鳴金願以所授邊功階職代授其父。”從之。

乙酉，加國內山川神祇勳號。西女真麻捫、麻闕達等來獻土馬，賜貨物。

丙戌，契丹張正等四人來投。

三月甲午朔，契丹宋匡襲、伊蓋等十餘人來投。

癸卯，收瘞郊（圻）〔圻〕餓死人骸骨。

甲辰，以鄭忠節、金承渭並爲兵部尚書。東女真阿梨古、西女真凌渠等百餘人來獻方物，並賜爵，又賜匹段。

庚申，白氣貫日。

夏四月戊辰，王后金氏薨于玄德宮。

庚午，黃霧四塞，凡四日，京城多患瘴疫。王分遣醫療之。

辛巳，東女真仇陁囉、西女真渠逸等二十餘人來獻土馬器仗，賜衣帶、貨物。西女真木史、木開等二百戶來投。

閏月戊戌，東女真酋長阿廬大等來獻土馬、貂鼠皮，賜衣物。

癸卯，宋江南人王肅子等二十四人來獻方物。

是月，修開國寺塔，安舍利，設戒壇，度僧三千二百餘人。

五月乙丑，契丹史夫來投。

戊寅，飯僧十萬。（東）〔東〕女真牛那、特烏、伊弗等三十餘人來獻土馬、兵器，並賜爵及衣物。

己卯，以姜邯贊爲西京留守、內史侍郎平章事，梁稹爲禮部尚書兼中樞使，李龔爲翰林學士承旨，徐訥爲左諫議大夫。

庚辰，佐尹康閏奉等十九人以戰功增職一級。

西北界螟。

壬午，教：“乙卯年契丹入寇之時，諸州鎮將卒有功績者增級，死者優加賻贈。”

癸未，賜黃靖等及第。

甲申，西女真陁億、實弗等十人來獻馬及甲鍪，並增職賜物。

六月乙未，以蔡忠順爲吏部尚書、參知政事。

戊戌，西北女真加乙弗等三十人來獻馬及兵仗。

己亥，以李龔、周佇爲左右常侍。

戊申，始創大慈恩玄化寺，以資考妣冥福。

庚戌，彗見，長四丈餘。

癸丑，東女真尼骨伊、西女真諸毛等來朝。

庚申，兵部奏：“將軍楊渥、中郎將咸進等四百四十九人皆有邊〔切〕〔功〕，增職一級。”從之。

秋七月乙亥，大醺于毬庭。

丁丑，王子生於延慶院，賜名曰亨，改院爲宮，仍賜禮物。

是月，修濟危院。東女真烏頭朱等三十餘人來獻土馬兵仗，並賜衣物。

八月壬辰，以晉含祚爲戶部尚書。

九月戊寅，以朱德明爲工部尚書。

丁亥，內史侍郎平章事金審言卒。東女真尼于弗來朝，增授鄉職。以尹徵古爲中樞使。教：“犯死罪者免死，杖流遠地，赦流以下。”

冬十月丙午，右僕射金老玄卒。以勤幹稱，每有營造，必令監督。

丁未，賜龜州女真木史等三十四人絹紬布五百餘匹，以賞捕賊功。

戊申，以內史侍郎平章事姜邯贊爲西北面行營都統使。

辛亥，移御壽昌宮。東西女真酋長鹽之渠、伊那、

徐乙那等五十人來獻馬及甲冑兵仗，並賜衣物。

是月，遣禮賓少卿元永如契丹請和。

行宋天禧年號。

十一月癸亥，輔臣以彗星已滅，表請御正殿、復常膳，從之。

丙寅，以全仁輔爲尚書左僕射，韓彬卿爲侍講學士。以于山國被東北女真所寇廢農業，遣李元龜賜農器。

十二月辛卯，東北女真阿次、烏乙弗等十四人來獻馬及兵器。

壬辰，契丹人王遂來投。

戊戌，契丹蕭遜寧以兵十萬來侵，王以平章事姜邯贊爲上元帥大將軍，姜民瞻副之，帥兵至興化鎮，大敗之。遜寧引兵直趨京城，民瞻追及於慈州，又大敗之。

辛亥，奉太祖梓宮移安于負兒山香林寺。

甲寅，京城戒嚴。

丙辰，赦流罪以下。

丁巳，彗見。

（己未）十年春正月辛酉，蕭遜寧至新恩縣，去京城百里。王命收城外民戶入內，清野以待。遜寧遣耶律好德齎書至通德門告以回軍，潛遣候騎三百餘至金郊驛。我遣兵一百，乘夜掩殺之。

丙子，東女真酋長于那等來朝。

二月己丑朔，丹兵過龜州，邯贊等邀戰，大敗之，



生還者僅數千人。

壬辰，右僕射全輔仁卒。以明經出身，累授學官，時稱宿儒，然性輕躁。

甲午，姜邯贊凱還，王親迎于迎波驛。

壬子，宴將帥于明福殿，並勞三軍。

三月戊午朔，日食。

辛酉，尚書左僕射文仁渭卒。

癸亥，以通州都府署庾伯符等一百七十三人力戰死敵，命贈官，賜其家米麥有差。

甲子，以異膺甫爲右僕射，姜民瞻爲鷹揚上將軍、柱國，柳參爲禮賓卿，金宗鉉爲禮部員外郎。

戊辰，鐵利國主那沙使阿盧太來獻土馬。

甲申，慮囚，疏決輕繫。

夏四月癸卯，禱雨于神祠。

丙辰，鎮溟船兵都部署張渭男等獲海賊八艘，賊所掠日本生口男女二百五十九人，遣供驛令鄭子良押送其國。

五月丙寅，太白晝見。

戊辰，契丹東京文籍院少監烏長公來見。

辛巳，以旱，慮囚。

壬午，遣使如鐵利國報聘。

六月丙戌朔，東女真酋長那沙弗等率衆來朝。

戊子，以羅敏爲尚書禮部侍郎兼右諫議大夫。

秋七月辛酉，以異膺甫、李元爲左右僕射。

己巳，宋泉州陳文軌等一百人來獻土物。

庚午，西女真酋長阿羅弗率衆來獻馬。

壬申，宋福州虞瑄等百餘人來獻香藥。

己卯，于山國民戶曾被女真虜掠來奔者，悉令歸之。

八月己丑，遣禮賓卿崔元信、李守和如宋賀正。

辛卯，契丹東京使工部少卿高應壽來。

乙未，遣考功員外郎李仁澤如契丹東京。

乙巳，門下侍中劉璫卒。

壬子，東女真毛逸羅率衆來朝，增階職。

九月甲寅朔，太史奏：“日食，陰雲不見。”

乙卯，移御壽昌宮。

壬戌，以重陽節賜宴宋及耽羅、黑水諸國人于邸館。

冬十月甲申朔，以柳韶爲司憲中丞。

甲午，兩浙忘難等六十人來。

十一月癸丑朔，以姜邯贊爲門下侍郎、同內史門下平章事。

庚申，徙江南州縣丁戶以實象山、伊川、遂安、新恩、峽溪、牛峰等縣。

辛巳，奉太祖梓宮復葬顯陵。

十二月癸未朔，王子生於安福宮，賜名緒，改宮號曰延德，仍賜禮物。

庚寅，東黑水國酋長仇突羅來獻土馬兵仗。

壬辰，以大寒疏決獄囚。

丁酉，以崔士威爲清河縣開國男。

戊戌，以姜民瞻爲右散騎常侍。

甲辰，以庾方爲千乘縣開國男，蔡忠順爲濟陽縣開國男。

丙午，謁顯陵。

辛亥，彗見。

（庚申）十一年春正月癸亥，以晉含祚爲右僕射兼都正使，崔元爲戶部尚書，李可道爲尚書右丞，李守和爲起居郎，崔冲爲起居舍人，李作忠爲右補闕。

丙寅，黑水靺鞨闕尸頃、高之問等二十四人來獻土物。

辛未，以朴有仁、金哥爲左右拾遺。西女真酋長高豆花來獻方物。

二月戊子，以遂安縣隊正赫然及軍李曾，龜州軍柴音達戰死，優賜妻子貨物。

己丑，前庫部令史庾翰與其男沒蕃逃歸，王念其勞苦，特加官，賜衣糧。

壬寅，東女真黔佛羅等七人來獻契丹官印一顆及土馬。

甲辰，以門下侍郎陳頔、李禮均，內史侍郎王同穎，司宰卿尹餘，將作少監王佐暹，少府丞金德華，將作注（薄）〔簿〕金徵祐，太醫監金得宏被留契丹，各賜其妻米穀有差，封佐暹妻爲開城郡君，子夷甫授禮部主事。

己酉，宋泉州人懷贄等來獻方物。

是月，遣李作仁奉表如契丹請稱藩納貢如故，且

歸所拘人只刺里，被留凡六年。

三月癸丑，歸契丹使耶律行平。

己未，契丹使檢校司徒韓紹雍來。

辛酉，以姜民瞻爲兵部尚書。

甲子，女真歸德將軍弗那率衆來朝。

丁卯，以將軍彭洪霸等十人有邊功，並增一級。  
特賜故將軍鄭神勇家穀三百碩。

夏四月庚子，王臨軒遣門下侍郎崔士威、知中樞事姜民瞻，冊子欽爲開府儀同三司、檢校太師、守司徒兼內史令、上柱國、崇仁廣孝輔運功臣，封延慶君。

癸卯，宴文武常參以上官於明福殿，賜物有差。

丁未，遣禮部尚書梁稹、刑部侍郎韓去華如契丹，告封王子。宰臣庾方等諫止之，不納。

己酉，東女真酋長達魯率衆來獻蕃米三百石。

五月辛亥朔，設師子座一百於內庭，講《仁王經》三日。

丁巳，以尹徵古爲右散騎常侍。

乙亥，御明福殿覆試，賜李元顯等及第。黑水靺鞨烏頭那等七十餘人來獻方物。

庚辰，以崔元信、李守和奉使污辱，並流之。

以安鴻漸爲司憲雜端。

六月，西北界蝗。

癸巳，遣持書使借司宰少卿盧執中如契丹東京。

己亥，弗奈國酋長沙訶門遣女真奴鬱達來獻土物。

秋七月乙丑，以久旱慮囚。

癸酉，大雨。

八月丙戌，王以安西道屯田一千二百四十結施納于玄化寺，兩省再三論駁，不納。

丁亥，追贈新羅執事省侍郎崔致遠內史令，從祀先聖廟庭。

庚子，以重修大內移御壽昌宮。

九月丁巳，宴群臣於寬仁殿。

己未，王如玄化寺親擊新鑄鍾，又令群僚擊之，各捨衣物匹段。

冬十月己丑，以玄化寺僧法鏡爲王師。

閏十二月庚戌，以李玄載爲殿中侍御司憲。

癸亥，漣州地震。

是年，遣崔齊顏如契丹賀千齡節，金猛如宋。

（辛酉）十二年春正月庚辰，白氣貫日。

己丑，契丹東京使左常侍王道冲來告其主將受冊禮。

乙巳，改紫宸殿爲景德殿，上陽宮爲正陽宮，左右朝天門爲朝宗，柔遠門爲崇福。

是月，黑水靺鞨酋長阿頭、陀弗等來獻馬及弓矢。

二月丁未，契丹遣檢校司空御史大夫姚居信來聘。

辛亥，五冠山崩。

癸酉，東女真懷化將軍摩底介率衆來朝。

甲戌，賜京城男女年九十以上者酒食、茶藥、布帛有差。

三月壬午，以庾方爲內史侍郎平章事，朱德明爲

尚書左僕射，金玄涉爲刑部尚書，朴訥岳爲工部尚書，徐訥爲國子祭酒、知吏部事。

乙酉，西女真毛逸羅、那忽邏等來獻土馬、貂鼠皮。

癸巳，鐵利國遣使表請歸附如舊。

乙未，契丹東京使檢校散騎常侍張澄岳來聘。

丙申，玄化寺北山崩，出玉璞。改文功殿爲文德殿。

夏四月己巳，講《仁王經》於毬庭三日。

庚午，禱雨。

五月庚辰，造土龍於南省庭中集巫覡禱雨。

丙戌，慮囚。

戊子，命尚書左丞李可道往取慶州高僊寺金羅袈裟、佛頂骨，昌林寺佛牙並置內殿。

庚寅，雨。

六月丁卯，以張瑩爲尚書左僕射、同內史門下平章事，仍令致仕。周佇爲翰林學士承旨。遣韓祚如宋謝恩。

秋七月甲戌朔，日食。

丙子，耽羅獻方物。

癸巳，東女真黑水酋長居蔚摩頭蓋來。

癸卯，改明慶殿爲宣政，靈恩殿爲明慶，景德殿爲延英。

八月辛亥，以金因渭爲尚書右僕射，仍令致仕。

己未，王如玄化寺親篆碑額，嘗命翰林學士周佇

製碑文，參知政事蔡忠順製碑陰並書。

戊辰，王子生於延德宮，賜名基。

辛未，加賜王子欽護國功臣號。以崔士威檢校太師、守門下侍中，崔沆檢校太傅、守門下侍郎、同內史門下平章事，庾方檢校太保，蔡忠順、尹徵古並檢校太尉。

壬申，御寬仁殿覆試，賜趙霸等及第。

是月，東女真實彬、阿梨古來朝。

九月癸酉朔，以李龔爲中樞使檢校司空。

乙未，黑水靺鞨蘇勿蓋、高之門來獻方物。遣中樞使李龔、兵部侍郎柳琮如契丹賀受冊。

冬十月己酉，以李周憲爲尚書左僕射、參知政事。

乙卯，東西女真酋長阿盧大、阿蓋等來朝。

十一月癸未，知中樞事兵部尚書姜民瞻卒。

十二月乙巳，中樞使右散騎常侍尹徵古卒。

戊午，以崔士威判尚書吏部事，金猛爲吏部侍郎。

（壬戌）十三年春正月丁丑，以郭元爲右散騎常侍，李作仁同知中樞事，金猛權知中樞事。

丁亥，黑水酋長沙逸羅、曼投弗等來朝。

甲午，贈新羅翰林薛聰弘儒侯，從祀先聖廟庭。

丁酉，以劉徵弼爲翰林學士秘書監。

二月辛丑朔，西女真這羅來獻人口方物。

壬寅，以李龔爲刑部尚書。

己酉，耽羅獻方物。遣軍器少監金仁裕如契丹春季問候。

壬子，契丹孟流、演舉等四人來奔。

丙辰，宮城東北廊一百五十餘間火。

丁卯，遣參知政事朴忠淑、國子司業李瓊如契丹。

三月癸酉，以李可道同知中樞事。

乙亥，尚書右僕射李周憲卒。

夏四月，契丹遣御史大夫上將軍蕭懷禮等來，冊王開府儀同三司、守尚書令、上柱國、高麗國王，食邑一萬戶，食實封一千戶，仍賜車服、儀物。自是復行契丹年號。

丁卯，以蔡忠順爲內史侍郎平章事兼西京留守。

五月庚午，禱雨于群望。

乙亥，溟州上言：“銀鑛出旌善縣。”

丙子，韓祚還自宋，帝賜《聖惠方》、《陰陽二宅書》、《乾興曆》、《釋典》一藏。

癸巳，冊子延慶君欽爲王太子。

黑水靺鞨疎意等三十餘人來朝。

六月庚子，冊子亨爲平壤君。

癸卯，冊子緒爲樂浪君。

乙巳，以庾方爲門下侍郎平章事。

壬子，置東宮官（囑）〔屬〕。

戊辰，延德宮主金氏卒。

秋七月丙子，都兵馬使奏：“于山國民被女真虜掠逃來者處之禮州，官給資糧，永爲編戶。”從之。

東西女真阿羅大等來獻土物。

八月庚子，契丹東京持禮使李克方來言：“自今



春、夏季問候使並差一次，與賀千齡節正旦使同行。  
秋、冬季問候使並差一次，與賀太后生辰使同行。”

甲寅，宋福州人陳象中等來獻土物。鐵利國首領那沙遣黑水阿夫間來獻方物。

辛酉，廣南人陳文遂等來獻香藥。

甲子，納國子祭酒徐訥女爲淑妃。

九月己巳，賜京城男女年八十以上及篤癘疾者酒食茶布有差。

丙子，契丹東京使王守榮來。

癸未，遣都官郎中尹宗元如契丹賀太后生辰。

丁亥，遣左散騎常侍郭元、尚書右丞王諝如契丹。

戊子，契丹首于昧、烏於乙等十九人來投。

冬十月庚戌，慮囚。

乙卯，冊延慶宮主金氏爲王妃。以霖雨不止，祈晴于群望。

己未，以徐訥爲中樞使、右散騎常侍，李可道爲中樞使、國子祭酒，韓祚、柳韶爲左右諫議大夫。

辛酉，以周佇爲禮部尚書，李作仁爲司憲大夫，金猛爲中樞副使。

十一月乙酉，契丹東京使高張胤來。

十二月辛丑，契丹弗大等十一人來投。

癸丑，西女真魚尼底來告：“親姑曾隨投化人昧那來住大國京都，已經數年，思戀本蕃，乞以土馬贖之。”即命放歸，還其馬。

己未，東女真首領史彬來獻馬及弓矢。



## 高麗史五

### 世家卷第五

#### 顯宗二

（癸亥）十四年春正月壬申，宴宰樞于內殿。

乙亥，以蔡忠順爲太子少師，徐訥參知政事，郭元爲中樞使。

丁丑，以庾方爲西北面行營都統使。

戊寅，契丹焦福等十一戶來投。

壬午，以晉含祚、朱德明爲尚書左右僕射。

是月，黑水靺鞨烏沙弗等八十人來獻馬及方物，各賜布帛。

二月戊戌，以李龔爲西京留守。

丙午，追封崔致遠爲文昌侯。

東女真酋長阿盧弗、西女真那闕蓋來朝。

三月丁卯，遣秘書監劉徵弼如契丹。

夏四月庚子，契丹遣左散騎常侍武白、耶律克恭

等來冊太子欽爲輔國大將軍、檢校太師、守太保兼侍中、高麗國公。

是月，女真靺鞨群豆等七十餘人來獻土馬。

五月丙寅，契丹東京持書使盧知祥來。

乙亥，金州地震。始令震處行解怪祭。

丁丑，契丹麻許底等十三戶來投。

戊子，宴文武參內群僚於天福殿，賜馬人一匹。

壬辰，契丹大世奴、齊化那等八人來投。

女真酋長尼于弗來朝。

六月戊戌，以旱，慮囚。

乙巳，御天德殿覆試，賜張喬等及第。

秋七月癸亥朔，契丹遣太保黃信來賀生辰。

己卯，吏部奏：“前大常齋郎全彥追服母喪，以孝聞，請加次第職，用勸將來。”從之。

八月壬子，還御闕。

九月己巳，靺鞨首領阿令朱來朝。

癸酉，大醺毬庭。

丙子，以崔輔成爲兵部尚書。

己丑，以盧戡爲三司使。

閏月庚子，契丹使栗守常來聘。

壬寅，契丹東京使高仁壽來。

冬十月辛未，以李周佐爲侍御史，皇甫穎爲殿中侍御史，許元爲左拾遺。

十一月丙申，黑水酋長耶肸羅等來朝。

宋泉州人陳億來投。

十二月丁丑，以立春節宴宰樞及上將軍於乾德殿。

己卯，以庾方爲太子太保，李龔爲內史侍郎平章事、監修國史，李元檢校太子太保。

（甲子）十五年春正月甲寅朔，以郭元爲刑部尚書，劉徵弼爲禮部尚書。

契丹馬史刀等三人來投。

戊戌，太白晝見。

丁巳，冊景興院主金氏爲德妃。

三月辛卯，賜李子淵等及第。

甲午，西女真高豆老、東女真瑟弗達等九十人來投。

辛丑，以王希傑爲西京副留守。

夏四月己卯，禱雨于群廟。

壬午，黑水靺鞨古刀買等來獻土物。

五月丁亥，太史局奏：“日當食不食。”

癸巳，雨。自春旱甚，民有團聚籲天祈禱。是日，王晨起聞其聲，因輟膳齋沐焚香立于殿庭，仰天祝曰：“寡人有過，請即降罰；萬民有過，寡人亦當之。乞垂膏澤，以救元元。”大雨。

庚子，東女真懷化將軍阿闕那來朝。

庚戌，禮部尚書周佇卒。

六月辛酉，門下侍郎平章事崔沆卒。

秋七月丙戌朔，契丹遣檢校司徒高壽來賀生辰。

壬辰，西女真酋長闍羅、東女真奴乙堅等來獻馬。

乙巳，以徐訥爲西北面行營都統，郭元副之。

壬子，以耽羅酋長周物、子高沒並爲雲麾大將軍上護軍。

九月乙未，以金因渭爲尚書左僕射、參知政事，仍令致仕。

甲寅，黑水靺鞨阿里古來。

是月，大食國悅羅慈等一百人來獻方物。大食國在西域。

冬十月丙辰，契丹遣檢校左僕射李正倫來。

十一月乙酉朔，太史局奏：“日當食不食。”

庚寅，以李龔爲尚書左僕射、同內史門下平章事。

丙午，以李可道爲戶部尚書。

己酉，尚州地震。

十二月壬申，以黃周亮爲御史中丞，崔冲爲中樞直學士，李仁澤爲侍御史，崔象輿爲殿中侍御史。

（乙丑）十六年春正月庚寅，女真懷化將軍耶古伽、歸德將軍阿骨陀老等來朝，各賜爵及衣物。

乙未，以庾方判尚書兵部事，蔡忠順判尚書禮部事。

丁酉，赦皮渭宗等六人，復其爵。初，渭宗以兵部郎中巡徼行外，見契丹將軍耶律撒割游獵，與禮賓注簿鄭民義等五人馳出斬之而歸，以邀功賞。所司以擅兵出塞，流遠方。至是放還。

辛亥，女真酋長毛逸羅來朝，以有功邊圉加授大匡，優賜衣物。

二月戊辰，以郭元爲推誠文理功臣、上柱國，李

可道爲致盛功臣，金猛爲宜春縣開國男，羅敏爲致君文德功臣，柳韶同知中樞事。

壬午，以寒食宴文武常參以上官於內殿。

三月己丑，白氣貫日。

庚寅，停諸營作，放農民。

甲辰，延慶宮主金氏卒。

夏四月甲子，教曰：“農事方殷，亢陽爲沴，恐乏蒸民之食，軫予宵旰之懷。是宜避正殿、減常膳、禁屠宰、輟樂懸、審冤獄、禱群望。匪惟寡德，深合責躬，凡百官僚，亦當自勗。”

辛未，嶺南道廣平、河濱等十縣地震。壬申、乙亥，又震。

六月甲寅，以宮人庾氏爲貴妃。

己未，教曰：“法天順時，然後可以禦災沴而致和平。今內史門下省，及諸官司，凡所奏行，多違時政，欲望陰陽調洽，豈不謬哉。宜各悉心，勉遵月令，以副予意。”

秋七月辛巳朔，契丹遣監門衛大將軍韓椅來賀生辰。

乙酉，以韓遂良爲侍御史，金忠贊、柳伯仁並爲殿中侍御史，金錫之、韓延祚、崔延嘏、金令器並爲監察御史。

丁亥，慶尚、清州、安東、密城地震。

丁未，以柳韶爲太子賓客。

九月辛巳，大食蠻夏、詵羅慈等百人來獻方物。

冬十一月己卯朔，太史奏：“日當食不食。”群臣表賀。

十二月戊午，以崔冲爲翰林學士內史舍人知制誥。教：“凡犯罪收職田者蒙赦，除真盜及僞造公私文書、受財枉法、監臨自盜諂曲奸邪所犯外，並聽還給。”

（丙寅）十七年春正月丁亥，以李端爲御史大夫。

壬辰，東女真歸德將軍居間鬱等來朝。

二月癸亥，契丹遣太傅李知順來聘。

乙丑，白氣貫日。

三月庚寅，賜崔貺等及第。

夏四月庚午，以智蔡文爲右僕射。

閏五月壬子，東西女真酋長各率部落子弟來獻土馬弓弩。

甲子，契丹遣御院判官耶律骨打來請假途，將如東北女真，不許。

六月戊寅，以李端爲右常侍知中樞事，皇甫俞義爲御史大夫。

秋七月甲辰朔，契丹遣監門衛大將軍王文簡來賀生辰。

丁未，大雨，凡四日，京城民家漂毀者甚多。

八月壬午，宋廣南人李文通等三人來獻方物。

九月甲子，幸海州神光寺。

冬十月癸酉朔，日食。

壬午，至自海州。

十一月，以黃周亮爲太子少詹事，崔齊顏爲太子



右庶子，崔冲爲太子中允。

（丁卯）十八年春正月辛亥，以崔士威爲太子太師，蔡忠順、李龔並爲門下侍郎，徐訥爲內史侍郎，郭元、李可道並參知政事，李端、金猛並爲中樞使，梁稹爲左僕射，崔冲爲給事中。

壬子，東女真酋長昌夫等來獻方物。

丙寅，門下侍郎平章事庾方上表乞骸，許之，加特進門下侍中。

戊辰，契丹遣李正允來。

二月戊子，修太廟，復安神主。

甲午，黑水靺鞨歸德大將軍阿骨阿駕來獻土馬器仗。

三月乙卯，女真首領瑟弗達等一百人來朝。

夏四月甲戌，隕霜。

壬午，謁太廟，加上先王先后尊號，以裴玄慶、洪儒、卜智謙、申崇謙、庾黔弼、崔凝配享太祖，朴述希、金堅術配惠宗，王式廉配定宗，劉新成、徐弼配光宗，崔知夢、朴良柔配景宗，崔承老、崔亮、李知白、徐熙、李夢游配成宗，韓彥恭、金承祚、崔肅配穆宗，赦流以下。

五月庚子朔，禱雨于群望。

甲寅，以旱，避正殿、減常膳、疏決獄囚。

乙卯，再雩。

丁巳，公州隕霜殺苗。

庚申，以王子亨爲開府儀同三司、檢校太（帥）

〔師〕兼內史令，緒爲開府儀同三司、檢校太傅兼尚書令。

丙寅，雨。

六月己卯，以黃周亮爲刑部侍郎，李周佐爲起居舍人，許元爲侍御史，李惟亮爲殿中侍御史，秦玄錫爲右補闕，李膺年爲監察御史。

癸未，楊州奏：“莊義、三川、青淵等寺僧犯禁釀酒，共米三百六十餘石，請依律斷罪。”從之。

甲申，教曰：“前工部侍郎庾稟廉等一百四十三人，雖犯諂曲奸邪之罪，已經累赦，並削罪名敘用。”

耽羅獻方物。

辛卯，東女真酋長毛逸羅等二十餘人來朝。

秋七月己亥朔，契丹遣太傅李匡一、耶律胡都哀來賀生辰。

庚子，靈光郡獻珊瑚樹高八尺，枝八十一。

癸亥，松岳崩。

八月戊辰朔，契丹東京使高延來。

丁亥，宋江南人李文通等來獻書冊，凡五百九十七卷。

九月戊戌朔，命創慧日重光寺，徵發人夫工匠。輔臣諫官皆奏：“百姓勞弊，不宜興作。”左承宣李獨奏曰：“爲佛造寺，功德無量，勞民何傷？”

壬戌，以郭崇元、李能封年高，並爲將軍。

冬十月壬午，講《仁王經》於毬庭。

（戊辰）十九年春正月戊戌，以林維幹爲右拾遺知

制誥兼東宮侍讀學士。

是月，女真歸德將軍高豆等七十餘人來朝，骨夫率部落五百戶來附。

二月辛未，檢校右僕射金慶廉卒。以善大字名一時。

甲戌，遣禮部員外郎金哥如契丹東京。

丁亥，放輕繫。

癸巳，遣太府卿金作賓如契丹。

三月己亥，放輕繫。

己未，御文德殿覆試，賜鄭在元等及第。

辛酉，契丹遣將軍耶律素、房州防禦使楊延美等來聘。

是月，東女真歸德將軍阿骨來。

夏四月辛未，雨雹。

五月辛丑，女真來攻平海郡，不克而還，追捕賊船四艘，盡殺之。

六月己巳，以雨甚祈晴于群廟。

閏月甲寅，北蕃酋長阿忽等五十七人來附。

秋七月乙未，契丹遣瀋州刺史蕭瓊、亳州刺史傅用元來賀生辰。

丁酉，東女真噲拔部落三百餘戶來附。

乙卯，王妃金氏薨。

是月，東西女真酋長尼烏弗、豆盧蓋等二百餘人來獻方物。

八月，西北界蝗。

九月丙申，宋泉州人李顗等三十餘人來獻方物。

戊申，遣左司郎中林福如契丹賀皇后生辰。

冬十月癸酉，遣尚書右丞鄭莊如契丹謝恩。

丁亥，東女真賊船十五艘寇高城。己丑，侵龍津鎮，虜中郎將朴興彥等七十餘人。

十一月癸卯，遣太僕卿王希傑、殿中侍御史李惟亮如契丹賀生辰。

十二月壬辰，東女真沙逸羅等來獻馬。

（己巳）二十年春正月癸巳，千秋太后皇甫氏薨于崇德宮。

二月庚辰，以宮人韓氏父彬卿兼太子賓客同知中樞使柱國。

丁亥，避王嫌名，改人姓筍爲孫。

閏月己亥，女真賊船三十餘艘來寇東鄙，船兵都部署判官趙閏貞擊走之。

是月，東、西女真阿忽、沙一、羅骨蓋等一百餘人來獻土馬兵器，增爵一級。

三月庚午，五冠山崩。

庚辰，東女真賊船十艘寇溟州，兵馬判官金厚擊却之。

夏四月戊戌，賜王子亨穀二千石、田三百結、臧獲三十口。

庚子，設藏經道場於會慶殿，飯僧一萬于毬庭。

庚戌，契丹遣大將軍耶律延寧、海北州刺史張令儀來聘。

契丹人曹兀挈家來奔。

乙卯，王議增太廟籩豆，禮部據《王制》“豐年不奢，凶年不儉”之義，執不可，乃止。

五月乙丑，東女真四百餘人寇洞山縣。

六月癸丑，耽羅世子孤烏弩來朝，授游擊將軍，賜袍一襲。

盜起廣州山藪。乙卯，遣龍虎軍將校往捕之。

丙辰，徵有妻僧充重光寺役徒。

秋七月戊午朔，契丹遣將軍耶律管寧、崇祿少卿李可封來賀生辰。

耽羅獻方物。

聞喜縣出水精、玉璞四萬餘枚。

乙酉，耽羅民貞一等還自日本。初，貞一等二十一人泛海漂風到東南極遠島，島人長大，遍體生毛，語言殊異，劫留七月，貞一等七人竊小船東北至日本那沙府，乃得生還。

八月丁亥朔，日食。

乙未，東女真大相噲拔率其族三百餘戶來投，賜渤海古城地處之。

己亥，宋廣南人莊文寶等八十人來獻土物。

癸卯，王西巡。庚戌，次平州。甲寅，次白州。

是月，開京羅城成，凡二十一年而功畢。

九月戊午，契丹東京將軍大延琳遣太府丞高吉德告建國兼求援。延琳，渤海始祖大祚榮七代孫，叛契丹，國號興遼，建元天興。

甲子，移幸鹽州。路上御製《重陽詠菊詩》一首，宣示翰林學士以下，即令和進。

丁卯，遂幸海州。所歷州縣耆年篤疾賜酒食布貨有差，長吏加職一級。

乙亥，教曰：“近聞宮院所屬莊戶徭役煩重，民不聊生，殿中省檢覈存恤。”

丁丑，宴扈從文武常參以上，賜物有差。

冬十月甲午，王至自海州。

十一月庚申，以朴從儉爲禮賓卿左諫議大夫。

丙寅，賜開京羅城及重光寺造成都監員吏職一級。

以平章事徐訥判西京留守事，尚書左僕射李端爲西京留守使，黃周亮爲國子祭酒翰林學士，崔冲爲右諫議大夫，李作忠爲給事中。

丁卯，以李可道檢校太尉、行吏部尚書兼太子少師、參知政事。

戊辰，刑部尚書、參知政事郭元卒。

庚午，贈光宗宮人金氏賢妃。

甲申，東女真求頭等三十餘人來朝。

十二月庚寅，雷震。

興遼國太師大延定引東北女真與契丹相攻，遣使乞援，王不許。自此路梗，與契丹不通。

壬辰，命西北面判兵馬事柳韶赴鎮以備興遼。

（庚午）二十一年春正月丁巳，東女真烏乙那等五十人來獻馬。

丙寅，興遼國又遣水部員外郎高吉德上表乞師。

二月丙戌，以蔡忠順判西京留守事，李作仁參知政事，柳韶爲中樞使。

甲午，交州翼嶺、洞山縣地震。

乙未，東女真毛逸羅來獻土馬。

辛丑，積慶宮主卒，謚孝惠，葬平陵。

三月癸酉，以郭仲爲右承宣，崔延壽爲考功郎中兼御史雜端，柳雲爲侍御史。

夏四月乙酉，教曰：“上年十二月，宋曆以爲大盡，而我國太史所進曆以爲小盡，又今正月十五日奏太陰食而卒不食，此必術家未精也，御史臺推鞠以聞。”

戊子，東女真曼門等六十餘人來獻戈船四艘、楫矢十一萬七千六百。

甲午，御文德殿覆試，賜崔惟善等及第。

己亥，鐵利國主那沙遣女真計陁漢等來獻貂鼠皮、請曆日，許之。

五月甲寅，以金猛爲太子少傅，劉徵弼爲太子賓客，黃周亮爲太子右庶子，崔冲爲太子右諭德。

乙卯，東女真奉國大將軍蘇勿蓋等來獻馬九匹、戈船三艘、楫矢五萬八千六百及器仗。

乙丑，契丹水軍指麾使虎騎尉大道李卿等六人來投。自是，契丹、渤海人來附甚衆。

辛未，加姜邯贊門下侍中。

六月辛卯，特赦殊死二罪流遠地，餘皆原之。築羅城、營重光寺員吏僧俗工匠並加階職，赴役者減今

年調布。諸州郡縣逋欠限戊辰年蠲免。城麟州，威遠、定戎鎮及西巡扈從有功勞者，加次第職，白身賜物有差。

秋七月甲子，積慶公主卒。

乙丑，興遼國行營都部署劉忠正遣寧州刺史大慶翰齎表來乞援。

己巳，宋泉州人盧遵等來獻方物。

戊寅，內史侍郎晉含祚卒。含祚治術數，每遇國家有事，輒質以圖讖，遂至大用，時議輕之。

八月戊申，以王可道爲內史侍郎判三司事，李周佐爲御史中丞。

九月辛亥朔，耽羅獻方物。

丙辰，興遼國郢州刺史李匡祿來告急，尋聞國亡，遂留不歸。

甲戌，遣金哥如契丹賀收復東京。

乙亥，契丹遣千牛將軍羅漢奴來，詔曰：“近不差人往還，應爲路梗。今渤海偷主俱遭圍閉，並已歸降，宜遣陪臣速來赴國，必無虞慮。”

冬十月辛巳朔，以韓祚知西京留守事。

是月，契丹奚哥、渤海民五百餘人來投，處之江南州郡。

十一月乙丑，西女真曼門等二十七戶來附，處之東界。

癸酉，御史雜端崔延壽劾奏參知政事李作仁詐稱太祖功臣後蔭其子，免官。



十二月辛卯，以徐訥爲門下侍郎、同平章事、判尚書吏部事。

丁酉，中樞使金猛卒。

癸卯，以崔齊顏爲中樞使，黃周亮爲中樞副使。

是月，東女真寧塞將軍睦史阿骨、柔遠將軍闕那、歸德將軍阿箇朱來獻馬及鐵甲楛矢。

京城疫，人多死。

（辛未）二十二年春正月辛酉，東女真尼牛弗來獻馬及器械。

乙亥，親耕籍田，赦流罪以下，圜丘、方澤升壇執禮員吏及孝子順孫、義夫節婦、耆老篤疾者，賜物有差。

丙子，以左僕射梁稹爲東京留守使。

二月己卯，宴文武常參以上于文德殿。

己丑，冊王子基守太尉兼尚書令開城國公。

是月，東、西女真八十餘人來獻土物。

三月甲寅，以宮人韓氏爲尚宮，金氏爲尚寢，韓氏爲尚食，徐氏爲尚針。

是月，女真沙逸羅等四十餘人來獻土馬。

契丹、渤海民四十餘人來投。

夏四月丁亥，霜。

戊子，禱雨于群望。

乙巳，王不豫。

以左僕射李端參知政事。

五月壬子，以柳韶爲吏部尚書、參知政事，皇甫

俞義爲中樞使。

丁巳，以崔士威爲內史令，仍令致仕，李龔爲司空左僕射判東京留守事。

戊午，赦公罪徒以下。

丁卯，以王琳檢校右僕射羅州牧使。

辛未，王疾篤，召太子欽屬以後事，俄而薨于重光殿。壽四十，在位二十二年。王幼聰悟仁惠，及長敏學，工書好詞翰，凡耳目所經，不復遺忘。謚曰元文，廟號顯宗，葬于松嶽西麓，陵曰宣陵。文宗十年加謚大孝，仁宗十八年加德威，高宗四十年加達思。

史臣崔冲贊曰：“《傳》稱：‘天將興之，誰能廢之。’千秋太后自縱淫荒，潛圖傾奪，穆宗知百姓之屬望，排千秋之惡黨，遠馳使命，以授神器，俾固本支。所謂‘天之將興，誰能廢之’者，詎信歟？然以姨母貽孽、戎臣構逆、強鄰伺釁，京闕俱燼，乘輿播遷，艱否極矣。反正之後，和戎結好，偃革修文，薄賦輕徭，登崇俊良，修政公平，寘民安輯，內外底寧，農桑屢稔，比之周之成康，漢之文景，亦無愧矣。”

李齊賢曰：“崔冲之言，世所謂命也。句踐嘗膽，雪恥會稽；小白忘莒，遺患於齊。人君恃有天命，縱欲敗度，雖得之必失之，是故君子理思亂，安思危，慎終如始，以對天休。如顯宗所謂，吾無間然者乎？”

## 德宗

德宗敬康大王，諱欽，字元良，顯宗長子，母曰元成太后金氏。顯宗七年丙辰五月乙巳生。十一年，封延慶君。十三年，立爲太子。明年，契丹冊封高麗國公。二十二年五月辛未，顯宗薨，即位於重光殿，居翼室，朝夕哀臨。甲戌，率群臣成服。

六月丁丑朔，以徐訥檢校太師。

己卯，以姜邯贊檢校太師、侍中。

乙酉，西女真寧塞大將軍阿志大等二十七人來獻良馬。

乙未，東女真將軍大宛沙伊羅等五十八人來獻良馬。

鐵利國主武那沙遣若吾者等來獻貂鼠皮。

宋台州商客陳惟志等六十四人來。

丙申，葬顯宗于宣陵。

戊戌，王釋服。

庚子，謁景靈殿告即位。

癸卯，御神鳳樓，揭雞竿于毬庭，肆赦。

秋七月戊申，賜輔臣諸道進馬。

己酉，以柳詔爲中軍兵馬元帥。

庚戌，以蔣劇孟爲兵部尚書，洪賓爲刑部尚書，李有暹爲工部尚書，金宗鉉爲右諫議大夫，皇甫穎爲

御史雜端，門思明爲殿中侍御史，孫謂爲殿中丞，朴毅夫爲監察御史。

己未，契丹報哀使工部郎中南承顏來告聖宗崩，宣詔於顯宗返魂堂。

辛酉，王引契丹報哀使舉哀於內殿。

丙寅，以鄭流源爲侍御史。

丁卯，渤海監門軍大道行郎等十四人來投。

己巳，渤海諸軍判官高真祥、孔目王光祿自契丹持牒來投。

契丹賀先王生辰使耶律溫德、趙象玄來。壬申，傳命於返魂堂。

八月丁丑，東女真將軍古於夫等三十人來獻方物。

甲申，制曰：“女真將軍阿豆閒等三百四十戶來投，勒留嘉、鐵二州之地，然阿豆閒本東蕃子項史之族，宜遣置東蕃。”

壬辰，王可道請納妃。

癸巳，以李端爲左僕射、參知政事。

乙未，侍中致仕姜邯贊卒。

辛丑，檢校太保朴訥岳、左僕射朱德明卒，並輟朝一日。

九月丙午朔，幸外帝釋院。

己酉，以皇甫穎爲御史中丞，金令器爲侍御史，李子淵爲右補闕賜緋魚，文在先爲殿中侍御史，李慶膺爲監察御史賜金魚。

庚戌，以盧戡爲戶部尚書，閔可舉爲工部尚書，

許元爲內史舍人。

丙辰，以秦玄錫爲御史雜端。

東女真懷化將軍烏於那、開老等六十七人來獻土物。

丙寅，以密直學士秘書少監朴有仁權知左承宣。

己巳，追尊妣王太后。

辛未，幸妙通寺。

冬十月乙亥朔，以徐訥爲門下侍中，王可道、柳韶並爲門下侍郎、同內史門下平章事。

丁丑，契丹王守男等十九人來投，處之南地。

戊寅，宰輔表請復常膳，許之。

庚辰，享國老於毬庭，樂懸而不作。

辛巳，納王可道女爲妃。

遣工部郎中柳喬如契丹會葬，郎中金行恭賀即位，表請毀鴨綠城橋，歸我被留行人。

乙酉，東女真元甫開老等四十六人來朝，增爵賜物。

憲臺奏：“尚書左僕射判東京留守事李襲橫斂財物，又使家奴借乘驛馬，請論如法。”從之。

丁酉，幸毬庭，飯僧三萬。

癸卯，加左僕射異膺甫守司徒、右僕射，金如琢守司空。

閏月己酉，始設國子監試。

己未，幸外帝釋院。

壬戌，幸龍興寺。

甲子，封王氏爲賢妃。

十一月乙亥，東京留守使戶部尚書李作仁卒。

庚寅，命有司賜諸國來投人衣服絁絮。

壬寅，東女真將軍毛伊羅來獻馬，且言以蕃地僻遠不及會葬，願謁陵寢，許之。

癸巳，東女真烏頭乃等四十餘人來獻方物。

辛丑，金行恭回報契丹不從所奏，遂停賀正使，仍用聖宗太平年號。

（壬申）元年春正月辛巳，御史臺劾太府卿王希傑、右司郎中柳伯仁、禮部郎中崔復珪、員外郎李膺年、分司西京，求田殖貨，請黜免。從之。

甲申，以林維幹爲右承宣吏部郎中，賜金紫。

乙酉，契丹遺留使來，至來遠城，不納，遂城朔州。寧仁鎮、派川等縣備之。

丁亥，幸外帝釋院。

己丑，改王生日仁壽節爲應天節。

丁酉，西女真者昆等八人來投。

戊戌，制曰：“左僕射異膺甫加司徒、右僕射金如琢加司空，其班在參知政事之下中樞使之上，並加俸祿。”

渤海沙志、明童等二十九人來投。

二月壬寅朔，以通州振威副尉戶長金巨、別將守堅當庚戌丹兵之來，堅壁固守，又禽其大夫馬首，加金巨郎將，守堅贈郎將。

丁未，太白晝見。

戊申，渤海史通等十七人來投。

鐵利國遣使修好。

壬子，以皇甫俞義參知政事，黃周亮爲中樞使。

乙卯，燃燈，幸王輪寺。

三月壬申朔，賜白可易等及第。

癸酉，契丹殿直高善悟、殿前高真成等十五人，左廂都指揮使大光、保州懷化軍事判官崔運符、鄉貢進士李運衡等來奔。

乙亥，以朴有仁爲翰林學士，林維幹爲御史雜端。

癸巳，以王可道監修國史，李端爲內史侍郎、同內史門下平章事，黃周亮修國史，劉徵弼爲尚書左僕射，羅敏爲禮部尚書。

甲午，幸妙通寺。

戊戌，論庚戌年以來戰亡功。贈潘希岳少府監，金延慶軍器監，田仁穎禮賓少卿，庾伯夫衛尉少卿，金良佐少府少監，梁伯殿中丞。

庚子，以旱，放奉恩、重光兩寺役夫。

夏四月壬寅朔，避殿減膳，禁屠殺，放輕繫。

丁未，東女真元尹古豆老等來獻土物。

戊申，契丹奚家內乙古等二十七人來投。

辛酉，親醮于毬庭禱雨。

五月壬申，以諒陰停賀應天節。

丁丑，渤海薩五德等十五人來投。

癸未，復常膳、御正殿，視朝。

丁酉，王以皇考諱辰道場如玄化寺。

六月辛丑，王以太祖諱辰道場如奉恩寺。

丙午，以庚伏放輕罪。

己酉，西女真懷化將軍尼冬等八人來朝，增爵一級。

辛亥，渤海于音、若己等十二人來投。

壬子，東女真歸德將軍也於浦等八人來獻土物。

甲寅，王受菩薩戒於膺乾殿。

乙卯，渤海所乙史等十七人來投。

秋七月壬申，以李禮均等八人使於契丹被留不還，賜妻子物有差。

乙亥，西女真大相也半等二十五人來獻土物。

丁丑，東女真正朝加伊老、懷化將軍也半、歸德將軍開老、元甫古刀化等九十一人來獻土物。

庚寅，王以皇妣諱辰如奉恩寺。

丙申，渤海高城等二十人來投。

戊戌，以金宗鉉爲右散騎常侍。

八月壬寅，大相主烏歐母棄市。

庚戌，以柳琮爲左散騎常侍，皇甫穎爲尚書右丞知御史臺事，秦玄錫爲御史中丞。

癸丑，幸妙通寺。

乙卯，東女真正甫豆於甫等二十人來獻土物。

丁巳，以李端爲平章事，皇甫俞義爲吏部尚書、參知政事。

戊午，王如奉恩寺，以僧法鏡爲國師。

庚申，東女真甫尹大由等三人來朝。



九月癸酉，東女真大相也乙漢等三十人來朝。

丙子，錄內外囚，放徒罪以下。

庚寅，東女真奉國大將軍要乙乃等五十人來朝。

乙未，幸外帝釋院。

冬十月丙午，渤海押司官李南松等十人來奔。

辛亥，尚州界十餘縣地震。

壬子，契丹注簿劉信思等五人來奔。

丙寅，契丹濟乙男等十人來奔。

十一月丙子，羽陵城主遣子夫於仍多郎來獻土物。

西女真正朝大浦古之門等十四人來獻土物。

十二月辛丑，以李作忠爲左諫議大夫，盧祐、朴  
敷命爲監察御史。

甲辰，契丹羅骨等十人來投。

（癸酉）二年春正月辛未，東女真將軍開多間等二  
十五人來朝。

鐵利國遣使獻良馬、貂鼠皮。王嘉之，回賜甚優。

乙亥，宋劉守全等十四人來奔。

己卯，以黃周亮判御史臺事，崔冲爲右散騎常侍，  
閔可舉爲禮部尚書，柳琮爲工部尚書，李周佐爲右諫  
議大夫。

辛巳，東女真將軍寶伎、阿於乃等一百十三人來  
獻土物。

丁亥，禮部尚書羅敏上表乞退。

乙未，契丹仇乃等十八人來奔。

左右衛猛校尉吳幸、李璜、申先立等抄掠丹兵七

人，賜職一級。

二月壬寅，西女真持印古音波及契丹太師古省奐等十一人來獻土物及兵仗。

己酉，東女真懷化將軍居於蔚等四十九人來朝。

乙卯，以金忠贊爲禮賓卿知中樞院事。

三月辛未，西女真將軍尼于弗來獻土物。

海賊寇杆城縣白石浦，擒獲五十人以獻。

賜崔希穆等及第。

契丹奚家古要等十一人來投，處之江南。

夏四月戊戌，渤海首乙分等十八人來投。

己亥，東女真歸德將軍古於夫等二十六人來獻土物。

戊午，渤海可守等三人來投。

壬戌，海賊寇三陟縣，擒獲四十餘人。

五月戊子，西女真正位沙於下等三人來朝。

癸巳，渤海監門隊正奇叱火等十九人來投。

六月辛丑，渤海先宋等七人來投。

壬寅，安東府陝州地震。

甲辰，西女真懷化大將軍居伊羅等二十四人來朝。

宋申流等十二人來奔。

丙辰，東女真大相古之門等四十一人來朝。

壬戌，西女真中尹古舍等六人來投，古毛漢等二十五人來獻土物。

秋七月壬辰，東女真左尹阿浦等四十三人來獻土物。

八月甲午朔，宋泉州商都綱林藹等五十五人來獻土物。

戊午，祔顯宗于太廟。

命平章事柳韶創置北境關城。

九月癸亥朔，日色如彗。

以柳琮爲兵部尚書，韓彬卿爲工部尚書，林維幹爲御史中丞，李子淵爲吏部郎中御史雜端右承宣，廉顯爲右輔闕，李惟道爲監察御史。

冬十月癸巳，東女真歸德將軍要賓、柔遠將軍古之門等三十七人來朝。

己亥，西女真太師阿角八等十四人、東女真元甫烏頭那等六十三人來朝。

以黃周亮爲戶部尚書，閔可舉爲刑部尚書。

甲辰，贈先代功臣。加崔凝司徒，劉新城太傅，崔承老大匡，崔亮三重大匡，徐熙太師，李知伯大匡，李夢游司空，韓彥恭太傅，金承祚司空，崔肅太師，姜邯贊大丞，崔沆正匡。

丁未，契丹侵靜州。

己酉，教曰：“朕謬承先業，統御三韓，志敦理國，安民心切。奉先思孝，今當祫享之歲，克備親行之禮，欲覃殊恩，內外同歡。可大赦國內，除不忠不孝、坐贓奸盜外，流罪以下咸赦之，斬絞配有人島，曾流者量移，收贖者免放。”

十一月癸亥朔，以元穎爲西京副留守知分司戶部事。

辛卯，以西女真于火等一百五十六人開拓關城時並有功勞，加爵一級。

十二月辛丑，西女真甫尹、甫失等三十九人來獻土物。

甲辰，以門思明、文在先爲侍御史，李紳爲殿中侍御史，林思行爲監察御史。

癸丑，渤海奇叱火等十一人來投，處之南地。

（甲戌）三年春正月丁卯，冊王姊爲延慶宮長公主。

辛未，教曰：“從儉節用，足民之道。尚衣局、御衣所染葑芝草計一年支用外，毋得多取。”

丙戌，東女真正朝多老間等五十八人來獻土物。

丁亥，以黃周亮爲政堂文學判翰林院事。

戊子，以皇甫穎爲中樞副使，林維幹爲翰林侍講學士。

二月壬辰朔，東女真柔遠大將軍主達等三十六人來獻土物。

己亥，納景興院長女金氏爲后。

東女真佐尹阿刀間等四十二人來獻土物。

三月丁丑，以金鼎爲工部尚書，蔣劇孟爲尚書右僕射，李有暹爲兵部尚書，李作忠爲御史大夫知翰林院事，李周佐爲國子祭酒、左諫議大夫，秦玄錫爲中樞直學士知制誥，盧祐爲殿中侍御史，金元鼎、金敬和、朴丁固並爲監察御史。

戊寅，東女真奉國將軍阿刀間等三十二人來獻

土物。

庚辰，教曰：“農桑，衣食之本。諸道州縣官勉遵朝旨，無奪三時，以寧萬姓。”

丁亥，宴群臣於文德殿。

夏四月丙申，東女真懷化將軍伊羅等二十五人來獻土物。

己酉，賜李端推忠佐理功臣、上柱國。

五月庚申朔，東女真歸德將軍骨甫等二十七人來獻土物。

丁丑，門下侍郎平章事王可道卒。

甲申，以翰林學士朴有仁爲平壤君文學，中樞院直學士秦玄錫爲樂浪君文學。

丙戌，以崔輔成爲尚書左僕射。

六月己丑朔，震皇城朱雀門廊屋。

壬辰，東女真寧塞將軍尼仇刀等三十人來獻土物。

秋七月庚寅，西女真元尹毛烏等二十二人來獻土物。

丙申，以李端爲門下侍郎平章事，閔可舉、劉徵弼爲尚書左右僕射，金鼎爲兵部尚書，張允含、任簡並爲工部尚書。

辛亥，以皇甫俞義爲內史侍郎、同內史門下平章事，黃周亮爲吏部尚書，崔齊顏爲戶部尚書，劉志誠爲禮部尚書。

壬子，以元台璠爲侍御史。

癸丑，以崔冲爲刑部尚書中樞使，金忠贊爲右散

騎常侍。

九月癸卯，王寢疾，顧命曰：“朕疾不瘳，已至大漸，宜以愛弟平壤君亨纘登寶位。”遂薨于延英殿，殯於宣德殿。在位三年，壽十九。王生而岐嶷，執性剛斷。既長，踏磚輒破，人以爲德重之故。謚曰敬康，廟號德宗，葬于北郊，陵曰肅陵。文宗十年，加謚宣孝，仁宗十八年，加剛明，高宗四十年，加光莊。

李齊賢贊曰：“慶陵朝，頭陀山人李承休進《帝王韻記》有曰：‘德何止四年，鳳鳥來呈瑞。’考之《實錄》，未見其事，唯俚語相傳言：‘鳳鳥來儀於威鳳門，群鳥隨而噪之，鳳乃飛去。國人憎鳥，少長持弓彈射。德宗一代，京城無鳥’。夫鳳，羽族之長也，爲群鳥所逐，豈曰鳳哉？蓋《韻記》之無稽耳。德宗居喪能盡子之孝，爲政不改父之道，任用舊臣徐訥、王可道、崔冲、黃周亮之儔，朝廷無欺蔽，而民安其生，雖微鳳鳥，尊號曰德，不亦宜乎。”

## 高麗史六

### 世家卷第六

#### 靖宗

靖宗弘孝安懿康獻容惠大王，諱亨，字申照，德宗母弟。顯宗九年七月戊寅生，岐嶷明睿。五歲封內史令平壤君。德宗三年九月癸卯，受顧命即位于重光殿。冬十月丁巳朔，告朔于太廟。

庚午，葬德宗于肅陵。

遣輔臣賜西京八關會酺二日。

十（二）〔一〕月庚寅，御神鳳樓，大赦，受中外群臣賀。

宋商客、東西蕃、耽羅國各獻方物。

庚子，設八關會，御神鳳樓，賜百官酺。夕幸法王寺。翼日大會又賜酺，觀樂。東西二京、東北兩路兵馬使、四都護、八牧各上表陳賀。宋商客、東西蕃、耽羅國亦獻方物，賜坐觀禮，後以爲常。

十二月己巳，以王弟緒守太師兼內史令，基守太保。黃周亮爲禮部尚書、參知政事，崔齊顏爲吏部尚書，劉志誠爲工部尚書，李珍爲戶部尚書，郭紳爲殿中監，金令器爲御史中丞，金忠贊、李作忠爲左右散騎常侍。

（乙亥）元年春正月丙戌朔，放朝賀。

壬寅，以崔冲爲中樞使刑部尚書。

東女真懷化將軍毛伊羅等五十七人來朝，賜物有差。

丁未，以庾昌爲殿中丞，柳雲爲起居郎，金廷俊爲殿中侍御史，鄭倍傑、金顯爲左右拾遺知制誥，鄭順之爲監察御史。

辛亥，王子生于延興宮，賜名訥。

二月己卯，西女真酋長哥兒古等十二人來朝。

辛巳，東女真奉國將軍高之問等三十五人來朝。

三月乙酉，以李端爲門下侍郎、同內史門下平章事，皇甫俞義爲內史侍郎、同內史門下平章事。

丙戌，賜金無滯等及第。

癸卯，冊延興宮主韓氏爲惠妃。翌日，赦徒罪以下。

夏四月甲寅，親饗國老年八十以上男女於毬庭。

丁巳，禮部奏：“禁京城名山樵採，遍植樹木。”從之。

五月甲辰，祈晴于川上。

契丹來遠城使檢校右散騎常侍安署牒興化鎮曰：



“竊以當郡，最近仁封，有小便宜，須至披達。載念貴國，元爲附庸，先帝每賜優洽，積有歲月，靡倦梯航。昨因伐罪之年，致阻來庭之禮。既剪除於凶逆，合繼續於貢輸。曷越數年，不尋舊好，累石城而擬遮大路，豎木寨而欲礙奇兵。不知蜀國之中，別有石牛之徑。舉是後也，深取誚焉。今皇上紹累聖之基坰，統八方之國界，南夏帝主，永慕義以通歡；西土諸王，長向風而納款。唯獨東溟之域，未賓北極之尊。或激怒於雷霆，何安寧於黎庶。其於違允，自有變通。”

六月丙辰，京城地震。

太白晝見。

癸亥，以致仕邢研機檢校尚書右僕射李徵佐爲尚書兵部侍郎，示優老也。

辛未，東女真烏於古等二十七人來朝。

是月，寧德鎮回牒契丹來遠城云：“竊以公文聿至，備見親仁，責諭頗多，固須宣剖。略言一概，無至多譚，其來示云‘昨因伐罪之年，致阻來庭之禮。既剪除於凶惡，合繼續於貢輸’者，竊念當國於延琳作亂之初，是大國興兵之際，道途艱阻，人使寢停，厥後內史舍人金哥慶克復於東都，戶部侍郎李守和續進獻其方物。先大王之棄國也，閤門使蔡忠顯將命而告終；先皇帝之升遐也，尚書左丞柳喬遄征而會葬；今皇帝之繼統也，給事中金行恭乘傳而朝賀。然則平遼以來，就日相繼，豈可謂致阻來庭之禮乎？又云‘累石城而擬遮大路，豎木寨而欲礙奇兵’者，且義

爻設險，有土常規。魯國廢關，通人深誠。是以列茲城寨，備我提封。蓋圖其帖息邊氓，非欲以負阻皇化。又云‘唯獨東溟之域，未賓北極之尊’者，昨緣梯航六使被勒留於上國之中，宣定兩城致入築於我疆之內，未蒙還復，方切禱祈，幸遇皇帝陛下啓運惟新，與民更始。天上之汪洋四洽，日邊之章奏尋陳。乞放行人，併歸侵地，無由得請，以至于今。倘俞懇實之誠，敢怠樂輸之禮。祇在恩命，何煩責言。又云‘或激怒於雷霆，何安寧於黎庶’者，伏想今皇上字小情深，聽卑道廣，乃睠寅賓之域，必加推置之恩，於我無辜，有何憑怒，細詳來誨，似涉戲言。”

秋七月丁亥，以金忠贊爲兵部尚書，李懷爲三司使，李惟道爲殿中侍御史，金顯、趙霸爲左右拾遺，李公顯、殷伯並爲監察御史。

癸巳，尚書吏部奏：“前尚書左僕射李龔曾犯污辱之罪，累經赦宥，請復其職。”從之。御史臺論劾，未幾罷。

甲午，以皇甫穎爲中樞使兼御史大夫。

以王生日爲長齡節。

庚戌，制曰：“先王憂服未闋，其犯斬罪者，杖配無人島；絞罪者，杖配有人島。”

八月庚申，以李子淵爲給事中，金令器爲內史舍人。癸亥，太白晝見。

辛未，京城地震，聲如雷。

甲戌，西女真大將軍尼于弗等四十四人來朝。

庚辰，東女真大完皆多漢等五十二人來朝。

九月戊子，東蕃歸德將軍吳多等二十三人來朝。

癸卯，慶州等處十九州地震。

是月，築長城於西北路松嶺迤東，以扼邊寇之衝。

冬十月辛酉，東女真首領魚弗老等六人來朝。

壬戌，以林宗翰爲監察御史。

丙寅，式目都監奏：“收黃州等十州郡僧官印。”

十一月癸未，東女真酋長阿盧幹等六十五人來朝。

十二月壬子，東蕃大完高陶化等三十人來朝。

（丙子）二年春正月庚辰朔，放朝賀。

乙酉，東蕃懷化將軍沙羅等八十三人來朝。

甲午，犯公徒私杖以下，及諸徵贖者，悉令原免。

二月庚戌朔，有事于方澤。

壬子，御殿視朝，賜百官祿牌。

以柳韶爲門下侍郎、同內史門下平章事，崔齊顏爲尚書左僕射、中樞使，李作忠爲吏部尚書、翰林學士承旨。

制曰：“太尉、尚書左僕射異膺甫引年致仕而功存社稷，予不敢忘，其子孫無官者，量授初職。”

甲寅，東蕃首領大信等來獻駱駝。

己未，東蕃寧塞將軍阿骨等一百三十五人來朝。

己巳，東蕃將軍開路等七十一人來獻駿馬。

庚午，以李周佐爲右散騎常侍，秦玄錫爲衛尉卿左諫議大夫，元台璫爲起居郎，韓延祚爲侍御史。

辛未，東蕃賊船寇三陟縣桐津戍，擄略人民，守

將設伏草莽，伺賊還，鼓譟掩擊，俘斬四十餘級。

壬申，以門思明爲御史中丞。

三月癸未，以皇甫俞義爲門下侍郎、同內史門下平章事，劉徵弼參知政事兼西京留守使。

戊子，幸三角山。癸巳，還宮。

戊申，東蕃酋長貴正等八十二人來獻駿馬。

夏四月壬子，以立夏節進冰，制曰：“今年不早熱，其待五月進冰。”有司奏：“日在北陸而藏冰，西陸而出之，獻羔而啓之。藏之也周，用之也徧，則無愆伏凄苦之災。故凡用冰之法，自春分至立秋而盡，若於五月始進，則有乖古法，非所以調順陰陽也，請以立夏進之。”從之。

癸丑，雨雹。

庚申，東女真酋長烏夫賀等八十六人來朝。

辛酉，隕霜。

乙丑，東北女真首領太史阿道閒等五十九人來朝。有司言：“太史，契丹職名也。阿道閒今既歸化，請改授正甫。”從之。

門下侍郎平章事致仕蔡忠順卒。

癸酉，雩。

丁丑，制：“前尚書左僕射李龔雖再被彈奏，以先朝宰相，久居文翰之任，可復其官。”仍令致仕。

五月己卯，禁內外名山樵採。

辛卯，制：“凡有四子者，許一子出家於靈通、嵩法、普願、桐華等寺，戒壇試所業經律。”

有司奏：“自春少雨，請依古典審理冤獄，賑恤窮乏，掩骼埋胔。先祈岳鎮海瀆諸山川能興雲雨者於北郊，次祈宗廟，每七日一祈，不雨還從岳鎮海瀆如初。旱甚則修雩、徙市、斷織扇、禁屠殺、勿飼官馬以穀。”王從之。避正殿減常膳。

己亥，雨雹。

癸卯，設道場於文德殿，禱雨五日。

六月乙卯，設道場于文德殿，禱雨。

乙丑，親醮乃雨。

丙寅，輔臣上言：“昔者聖帝明王皆不免災異，而惟能修德行政，變災爲福。今自春以來，旱氣滋甚，而聖上避殿減膳，宵旰憂勞，責躬自省，時雨應期，普潤田野，豐稔可期。伏請御正殿、復常膳，視事如舊。”制曰：“寡人不德，致此旱災。今雖得雨，猶有後慮，然大臣之請，不可違。”乃從之。

戊辰，京城及東京尚、廣二州，安邊府等管內州縣地震，多毀屋廬。東京三日而止。

壬申，有司奏：“門下侍中致仕庾方等十七人請限立秋每十日一賜冰。”從之。

秋七月戊寅，中樞院奏：“制旨令進人參三百斤，近所進一千斤，足以供御用。國府之貢，皆民膏血，不可妄斂，乞勿令復進。”王不悅，門下省駁奏：“古之帝王節嗜欲、去奢侈，恭己修身，虛心納諫，所以養民庶而致太平也。今災變屢作，宜齊心責躬，豈可枉費無益，損民膏血。乞從密院所奏。”從之。

辛巳，宋商陳諒等六十七人獻土物。

壬午，制：“近者天地見怪，倣誠不德，日慎一日，不敢遑寧。群公庶僚，除休暇輟朝外，視事無怠，以塞災變。”

庚寅，知中樞院事兵部尚書金忠贊卒，謚恭靖。

壬辰，制曰：“乙卯歲，契丹犯邊，太史丞康承穎先鋒戰死，厥功可嘉，其贈軍器少監，授子和初職。”

日本國歸我漂流人謙俊等十一人。

庚子，惠妃韓氏薨。

是月，進奉兼告奏使尚書右丞金元冲如宋，至瓮津船敗而還。

八月壬戌，以皇甫穎爲兵部尚書，李作忠爲中樞院使，郭紳爲御史大夫。

癸亥，飯僧一萬於毬庭。

丙寅，制：“昨覽刑部所奏犯斬絞二罪，朕方在憂服，屢致變怪，欲施好生之德，以示恤民之心。其犯斬絞二罪者，除刑配無人島，雖犯二罪，情有可矜者，配有人島。”於是免死者百十六人。

戊辰，以秦玄錫直門下省，金令器、林維幹爲左右諫議，朴敷命爲侍御史，徐維傑爲尚書左司郎中右承宣。

東京管內州縣及金州密城地震，聲如雷。

九月丁丑，東女真將軍阿骨等百三十五人來獻駿馬。

冬十月丁卯，東女真奉國將軍要耶等七十四人

來朝。

十一月己丑，設八關會，宋商及東女真、耽羅各獻方物。

丁酉，東女真將軍吾乙耶等七十八人來朝。

十二月戊申，東女真奉國大將軍姚乙道等七十四人來朝。

辛酉，祔德宗於太廟。

（丁丑）三年春正月甲戌朔，放朝賀。

二月丙辰，門下侍郎平章事致仕朴忠淑卒，謚貞慎。

己未，西北路兵馬使捕東女真交通契丹者沙伊邏等五十五人，送于西京。

癸酉，彗星五出，長各五六尺。

三月己亥，賜盧延霸等及第。

夏四月丁卯，親禘于太廟，赦。

西蕃酋長沙蘊等來獻土物。

閏月壬辰，東女真正甫阿道間等五十三人來朝。

五月癸丑，賜東女真歸德將軍尼句豆等五十七人職一級。

乙丑，王如玄化寺。

六月己卯，親饗國老於毬庭。

秋七月壬戌，以母后諱辰，百官上表陳慰。

乙丑，御乾德殿宣麻，以劉徵弼爲內史侍郎、同內史門下平章事、西京留守使，黃周亮爲內史侍郎、同內史門下平章事，崔齊顏爲尚書左僕射、參知政事、

中樞使，崔冲參知政事、修國史。

八月乙亥，冊弟樂浪君緒守太師兼內史令。壬午，冊弟開城國公基守太保。

乙酉，宋商朱如玉等二十人來。

丁亥，宋商林贊等來獻方物。

九月己酉，龜、朔、博、泰等州，威遠鎮，地震。

丙寅，王如普濟寺。

是月，契丹來遠城奉皇帝宣旨牒寧德鎮曰：“高麗之國，早務傾輸。近歲以來，稍聞稽闕，欲載修於職貢，合先上於表章。苟驗實誠，別頒俞命。”門下侍中徐訥等十四人議奏曰：“宜遣使告奏。”

冬十月庚午，東女真將軍阿留大等五十九人來朝。

丙子，西北路兵馬使奏：“契丹以船兵侵鴨綠江。”

十一月癸丑，宥公杖罪以下。

十二月丁亥，遣殿中少監崔延嘏如契丹，奏云：“當國伏自前皇太后聖帝降冊命以頒宣，疏土封而定分，但茲東域，仰戴北辰，連年不絕以勤王，遞代相傳而述職。頃以先臣亡兄篡承祖業，歸附皇朝。聞一德之君臨，新頒慶澤；將兩條之公事，專奏宸聰。未垂俞允之恩，轉積遲疑之慮。自從曩歲，以到今辰，雖迭換於炎涼，且久停於朝貢。近蒙睿旨，頗愜鄙懷。謹當遵太后之遺言，固爲藩屏；撫小邦之弊俗，虔奉闕庭。更從文軌以輸誠，永效梯航而展禮。”

乙未，賜玄德宮主金氏萬齡宮。

（戊寅）四年春正月戊戌朔，契丹遣馬保業來。



辛酉，東女真歸德將軍高之問來朝，改授懷化將軍，兼從皆授職。

二月癸未，燃燈。王如奉恩寺謁太祖真。燈夕必親行香真殿，以爲常。

三月辛亥，崔延嘏還自契丹，詔曰：“省所奏乞修朝貢事具悉。以小事大，列國之通規；捨舊謀新，諸侯之格訓。卿本世稟聲朔，歲奉梯航。先國公方屬嗣藩，遂稽任土。時候屢更於灰管，天朝未審於事情。近覽奏章，備觀誠懇。欲率大弓之俗，荐陳楛矢之儀。載念傾虔，信爲愛戴。允俞之外，嘉歎良多。勉思永圖，無曠述職。”

庚申，東女真歸德將軍仇知羅等三十二人誘其屬恢八等三十人來朝。

夏四月丁卯朔，冊宮人韓氏爲麗妃。

戊辰，平章事柳韶卒。

是月，遣尚書左丞金元冲如契丹起居謝恩，仍請年號。

六月乙酉，侍中庾方卒。

秋七月辛丑，太白晝見。

戊申，尚書刑部奏：“京外斬絞二罪百有三人。”制：“降斬罪杖配無人島，絞罪杖配有人島。”

甲寅，金元冲還自契丹，詔曰：“省所上表夏季起居事具悉。卿挺生方略，善撫世封，得愛戴於東韓，盡傾虔於北闕。屬歆蒸之在候，馳章奏以問安，嘉矚之懷，每興增切。”又詔曰：“省所上表，謝恩令朝

貢，並進捧金吸瓶、銀藥瓶、幘頭、紗紵布、貢平布、腦原茶、大紙、細墨、龍鬚笠席等事具悉。卿權司國字，欽奉朝廷，昨差使人遠敷忠款，述累世傾輸之節，達近年阻限之由，乞重效於梯航，願永爲於藩翰。載觀恭順，尋示允從，煩致謝章，仍陳貢筐，顧閱之際，媿歎良深。”又詔曰：“省所奏已行用重熙年號事具悉。卿昨者乞修朝貢，尋允奉陳，使介回旋，知我紀年之號；書文稟用，見其向日之誠。省覽歎嘉，不忘于意。”

八月乙丑朔，始行契丹重熙年號。

以水潦損禾停徵諸道秋役軍。

丙寅，東蕃懷化將軍阿豆等四十九人來朝。

丁卯，遣持禮使閤門祗候金華彥如契丹東京。

丁丑，西北蕃歸德將軍耶半等二十六人來朝。

戊子，宋明州商陳亮、台州商陳維績等一百四十七人來獻土物。

冬十月辛卯，契丹遣馬保業來，詔曰：“卿協副人情，分權國務，昨馳章表，遠達闕庭，述阻絕之端由，瀉傾輸之懇款。雖已從於告奏，宜特示於綏存，注想所深，不忘于意。今差東上閤門使左千牛衛大將軍馬保業往彼安撫。”

十一月甲寅，以黃周亮爲門下侍郎平章事，李作忠參知政事、柱國。

乙卯，契丹東京回禮使義勇軍都指揮康德寧來。

己未，遣崔忠恭如契丹賀永壽節，仍賀正。

十二月甲戌，東女真歸德將軍高之問等五十人來朝。

癸未，內史門下省言：“東池白鶴鵝鴨山羊之類，日飼稻粱，爲費多矣。前典云‘犬馬非其土性不畜，珍禽奇獸不育于國’，又云‘鳥獸昆虫各遂其性’，蓋不以玩好傷物性也，乞放海島。”從之。

（己卯）五年春正月辛丑，祭雨師。

丙午，以工部尚書元穎爲春夏番西北路兵馬使，太府少卿楊帶春副之；右散騎常侍秦玄錫爲東路兵馬使，殿中侍御史林宗翰、王夷甫副之。

二月壬戌朔，遣殿中監李成功如契丹獻方物。

丁卯，遣戶部郎中庾先謝安撫，仍請罷鴨江東加築城堡。

乙亥，燃燈，王如奉恩寺。丙子，御重光殿，觀樂。壬午，祭老人星於南郊。

辛卯，賜黃抗之等及第。

三月辛丑，東北路兵馬使奏：“女真諸蕃子等六十人請執贄入朝。”許之。

夏四月辛酉朔，庾先還自契丹，詔曰：“省所告鴨江東城壁似妨耕鑿事具悉。乃睠聯城置從先廟，蓋邊隅之常備，在疆土以何傷。朕務守成規，時難改作。先臣欽曾煩告奏，致阻傾輸。卿襲爵云初，貢章纔至，所欲當遵於曩舊，乃誠更勵於恭勤，即是永圖，兼符至意，厥惟墾殖，勿慮驚騷。”

契丹遣大理卿韓保衡來冊王，詔曰：“地控東域，

星環北辰，愈堅奉上之心，宜舉策勳之典。遐馳使馭，載啓王封。是謂恩榮，所宜祇荷。今差大理卿韓保衡往彼，賜卿官告一通，敕牒一道，到可祇受。”官告曰：“朕體天洪覆，酌古通規，內則推皇家懷遠之誠，外則付王國專征之柄。航棧不可以輕入，車書不可以妄同。庶及群雄，永全大義。與其軒習弧矢而夏陳干戚，曷若周分藩屏而漢誓山河。其有業重桓文，望高辰卜，紹祖服之云始，革先王之不恭。貢土疆而廣我提封，奉玉幣而首諸方面。安和是務，忠肅爲容，宜舉彝章，特敷寵數。權知高麗國王，奇姿玉瑩，偉量淵淳。鼇丘聳架海之雄，旁鍾秀拔；龍宿挺麗天之彩，俯降精英。而自守名區，大開霸府。動靜先遵於典則，寐興能制於驕矜。千里甸畿，先臻富庶；一方民俗，咸荷恩榮。成奕世之令名，得殿邦之異略。是用專馳駢轡，遠降龍綸。玄菟全封，榮加於一字；溫貂峻秩，兼示於三師。馭貴崇階，褒功懿號，廣疏井賦，茂獎忠庸。於戲！星辰在拱北之躔，則爲合度；江漢得朝宗之路，乃是安流。勉服斯言，勿煩常訓。可授開府儀同三司、守太保兼侍中、上柱國、高麗國王，食邑七千戶，食實封一千戶，仍賜輸忠保義奉國六字功臣。”

五月庚子，日本民男女二十六人來投。

秋七月，契丹遣少府監陳邁來賀生辰。

遣右散騎常侍林維幹如契丹謝冊封。

八月庚申朔，宋商惟禎等五十人來獻方物。

冬十一月辛丑，設八關會，御神鳳樓，賜酺。幸法王寺。

十二月丁巳朔，遣戶部侍郎宋融如契丹賀永壽節兼賀正。

制曰：“候在大寒，風雪嚴凝，言念貧窮，必至凍餒。其外國投化人及沒蕃懷土男女共八十餘人，有司量其老幼，各賜絺布。”

閏月丁亥朔，契丹東京回禮使大堅濟等九人來。

（庚辰）六年春正月丙辰朔，日食。

以崔延嘏爲西京副留守。

辛酉，東女真奉國大將軍徭漁等五十人來獻土物。

壬申，遣右散騎常侍秦玄錫如契丹獻方物。

丙子，安山郡大君金氏告其子李公叶不孝，棄市。

庚辰，東女真綏遠將軍巴桀等四十人來獻駿馬。

甲申，西北女真歸德將軍高寶等四十六人來獻馬及土物。

二月庚寅，昇平門廊屋數百間災，延燒御史臺。

丁酉，以吏部員外郎金廷俊權知承宣。

戊申，東女真懷化將軍徭寶等四十八人來獻駿馬。

壬子，命有司定權衡、平斗量。

甲寅，冊麗妃韓氏爲王后，翼日告于太廟，百官賀。

三月辛酉，東女真奉國將軍阿骨等三十三人來獻馬十五匹。

壬戌，西北女真寧塞將軍仍保等二十五人來獻

土物。

甲戌，西北女真酋渠古史門等二十六人來獻土物。

壬午，制曰：“內史侍郎平章事劉徵弼，積閼襲慶，以文翰輔佐累朝，其功可錄。授其子綽工部書令史。”

夏四月丙戌，契丹東京民巫儀老、吳知桀等二十餘人來投，賜物及田宅，處之嶺南。

辛丑，契丹橫宣使秦州防禦使馬世長等來。

丁未，禱雨于臨海院。

壬子，以東女真酋渠烏陁爲都領將軍。

甲寅，西北女真奉國將軍阿伊化等二十七人來獻土物。

五月乙卯朔，禱雨于北岳。

辛酉，醮于會慶殿禱雨。

壬戌，大雨彌月。

以李令幹爲史館修撰，李象先爲監察御史。

六月乙巳，遣尚書右丞柳伯仁如契丹謝恩。

東女真寧塞將軍慕伊羅等五十人來獻土物。

癸丑，塞北奚家積乙仇等來投。

秋七月乙丑，震宜春樓。

崇化宮王妃卒。

契丹遣夏州觀察使趙安仁來賀生辰。

戊辰，尚書左僕射致仕梁楨卒。

八月乙酉，刑部尚書判御史臺事李周佐卒。

遣工部侍郎庾昌如契丹賀皇太后生日。

癸巳，東女真古陶達等五十三人來獻土物。

九月乙卯，以李懷爲尚書右僕射，元穎爲工部尚書。

西北女真將軍耶盤等來獻駿馬十三匹。

丁巳，以李子淵知中樞院事，王寵之爲中樞院知奏事。

庚申，契丹東京回禮使都指揮使高維翰來。

壬申，北女真將軍尼迂火骨輔來投，賜田宅，處之圻內。

冬十月甲申，西北女真仍化老等十三人來投，命充爲課戶。

乙酉，西北女真正朝孚巨等一百餘人來獻土物。

庚寅，納知中樞院事金元冲女爲妃。

癸卯，東女真將軍沙伊羅、西北女真將軍董化盧各率衆二百餘人來獻土物。

是月，庾昌還自契丹，詔曰：“近以群輿抗議，徽懿加尊，雖答疏以屢回，而叫閭之莫却。載矜懇到，難默都俞。眷藩國之同休，宜詔函之寵錫。今已定十二月上旬大行禮冊，故茲詔示。”

十一月丙寅，大食國客商保那盍等來獻水銀、龍齒、占城香、沒藥、大蘇木等物，命有司館待優厚，及還，厚賜金帛。

辛未，遣工部侍郎李仁靜如契丹賀永壽節兼賀正。

十二月丁酉，東女真元尹阿豆簡等五十人來獻馬三十五匹。

契丹東京民二十餘戶來投。

（辛巳）七年春正月庚戌朔，放朝賀。

丙辰，西女真大丞高支智等十五人來獻馬。

二月庚辰朔，尚書工部奏：“松岳東西麓植松以壯宮闕。”從之。

己丑，賜俞暢等及第。

壬寅，西女真奉國將軍尼于大等十八人來獻名馬。

三月庚戌朔，東女真中尹也賜老等來朝。

夏四月己卯，東女真酋長大相伊蓋等來朝。

癸巳，設藏經道場于會慶殿。春秋二季例設此會，春六日，秋七日。

五月乙卯，謁顯陵。丙辰，謁宣陵。制曰：“聖祖統三之時，扈從臣僚子孫有沈于廡庶未有官資者，有司召試文武才藝，皆許登仕。”仍賜：上護軍洪賓、尹修己，大將軍韋靖、金琢磨、石忠、梁抱質、河興休、智孟、吳金甫、韓所寶、敷暢，監察御史金瓊，馬各一匹。

庚午，設金剛明經道場于文德殿禱雨。

乙亥，雨。

六月乙酉，東女真正甫烏夫等二十六人來朝。

秋七月己未，西女真歸德將軍所智羅等來朝。

辛酉，契丹遣衛尉少卿耿致君來賀生辰。

八月乙未，東女真柔遠將軍波乙達等五十人來朝。

是月，彗星見東方，長三十尺許，二十餘日乃滅。

九月丁未朔，尚書兵部奏：“選軍別監選取文武班



七品以上員子弟除業文赴舉外，並充軍伍。此雖安不忘危之慮，然皆累世勳舊之子孫，故祖宗以來不與于役。況在甲子、丙子年間已有禁制，非惟忘其先世之功，亦違舊制。請勿充隊伍。”從之。

冬十月，幸鎬京。

彗星長三十尺許，出東方十餘日。

辛巳，駕至大同江，留守使、參知政事皇甫穎奉迎江頭，王御龍船賜宴輔臣，命將軍承愷等射，右拾遺金尚賓進諫，乃止，入御宣恩館。

己丑，設八關會，御靈鳳門受百官賀，賜酺。遂幸興國寺行香，移御長樂宮。

己亥，以崔冲爲內史侍郎平章事，皇甫穎守司空、左僕射。

十一月丙午朔，至自鎬京。

加徐訥、洪賓、有暹、安甫、高烈等重大匡。

己未，宋商王諾等來獻方物。

東女真柔遠將軍沙伊羅、寧塞將軍耶於蓋等六十二人來獻馬。

十二月辛巳，閱射于東池龜齡閣。

壬午，東女真奉國將軍阿加主等五十五人來獻土物。

是歲，遣翰林學士承旨朴有仁、右丞李惟亮如契丹賀冊禮，判衛尉事柳參獻方物。

（壬午）八年春正月丙午朔，放朝賀。

己酉，東女真首領昆豆等來獻（駭）〔駿〕馬。

甲寅，金吾衛上將軍刑部尚書安保上表請老，不允。

庚申，西北路兵馬使籍鴨綠以東至清塞鎮轄下立石村蕃戶以聞。

己巳，東女真歸德將軍阿兜幹等四十九人來獻土物。

二月戊寅，東女真柔遠將軍高之問等三十六人來獻土物，拜職有差。

戊子，燃燈，王如奉恩寺。

丙申，西女真酋長高之知等十二人來獻土物。禮賓省奏：“之知等於往年平虜、寧遠兩城拓開之時，頗有勞效，請優賜禮物。”從之。

己亥，東京副留守崔顥、判官羅旨說、司錄尹廉、掌書記鄭公幹等奉制新刊《兩漢書》與《唐書》以進，並賜爵。

三月乙巳，內史門下奏請：“御殿視朝之日，令百官各自奏對。”從之。

丙辰，西北女真寧塞將軍耶於蓋等來獻土物。

甲子，將軍尼于弗等四十七人來獻土物。

夏四月丙戌，霜。

壬寅，東女真大相吳於達請耕牛，乃賜東路屯田司牛十頭。

五月己巳，王如玄化寺。

六月乙亥，王以太祖諱辰道場如開國寺。

丁丑，制曰：“農事方殷，時雨阻降，凡可以救旱

者，有司具以奏聞。”

庚辰，禱雨于宗廟山川。

甲申，內史令徐訥卒。

丙戌，都兵馬使奏：“東路烈山縣寧波戍隊正簡弘與賊鬥，衆寡不敵，矢盡力窮而死，請追加職賞。”從之。

東女真歸德將軍耶伊弗等二十五人來朝。

乙未，內史侍郎平章事劉徵弼卒。

秋七月乙巳，延昌宮妃卒。

乙卯，契丹遣吏部郎中馮立來賀生辰。

八月戊寅，以李子淵爲中樞副使。

庚辰，東女真柔遠將軍沙伊羅等六十八人來獻土物。

甲申，御宣政殿，聽斷刑部奏讞。

九月丁巳，東女真歸德將軍阿蓋等五十人來獻方物。

乙丑，西北女真柔遠將軍高豆老等來獻土物。

冬十一月辛卯，契丹遣檢校禮部尚書兼御史王永言來詔曰：“朕以關南十縣我國舊基，將舉兵師，議復土壤。宋朝累馳專介，懇發重言，定於舊貢銀絹三十萬兩匹外，每年別納金繒之儀，用代賦與之物，再論盟約，永卜歡和。其諸道兵馬等優給蠲免賦調並已放還本部。夫何眇躬，成此美事。今文武百辟，中外庶官，屢拜封章，載稽典故，謂予有元功大略，加予以懿號鴻名，不獲固辭，勉依群請，已撰定十一月三日

兩宮並行大禮。卿稱藩事上，望闕輸忠，遐想聞知，必增慶悅。今差禮部尚書王永言齎詔往彼示諭。”

丁酉，東女真寧塞將軍冬弗等來獻馬。

十二月癸卯，致仕門下侍郎平章事皇甫俞義卒。

甲寅，以李令幹爲秘書少監兼翰林侍講學士。

（癸未）九年春正月庚午朔，放朝賀。

庚辰，以黃周亮爲守太保兼門下侍中判尚書吏部事、上柱國。

甲申，西女真歸德將軍骨蓋等三十六人來獻土物。

二月壬寅，以崔齊顏爲門下侍郎、同內史門下平章事，判尚書戶部事，崔冲守司徒修國史、上柱國，皇甫穎爲內史侍郎、同內史門下平章事、上柱國，李作忠爲內史侍郎、同內史門下平章事，判尚書禮部事，金廷俊、高肅成爲左右承宣。

壬子，燃燈。王如奉恩寺。

三月丙子，西女真酋長高豆老等四十人來獻土物。

己丑，設百座道場于會慶殿，飯僧一萬。

壬辰，東女真將軍開老等四十人來獻馬。

夏四月戊戌，東北路兵馬使奏：“女真柔遠將軍沙伊羅誘致水陸賊首羅弗等四百九十四人，詣和州館，請朝。”有司議奏：“此類人面獸心，宜令兵馬使量減人數，分次赴朝。”從之。

壬寅，制曰：“時雨愆期，農功可慮，豈刑罰不中而民有怨乎？所司其審流罪以下，皆令原放。”

癸卯，東女真將軍尼多弗等來朝。

五月丁卯朔，日食。

制曰：“寡人不德，致此旱乾，屢有災變，宜令尚食局放鷹鷂軍，又禁簋漚捕魚。”

甲戌，肆赦。

戊寅，避正殿。

己卯，雨。

乙未，雨。百官詣乾德殿表賀。

六月丙午，以金令器爲刑部尚書。

丁巳，東女真酋長紐弗達等二十五人來朝。

東北路兵馬使奏：“沿海分道判官皇甫瓊獨領戰艦，深入大洋，奮擊水賊，俘斬甚衆，請行褒賞。”從之。

秋七月丁卯，契丹遣侍御史姚居善來賀生辰。

丁丑，東女真酋長阿豆幹等六十六人來朝。

八月己未，決內外死刑，避正殿，素膳，輟樂。

九月壬申，親醺于毬庭。

丁丑，有司奏：“重光寺成造都監使鄭莊與吏胥承迪盜監臨之物，請准法杖配。”制從輕典，御史臺論請依律科斷，允之。

庚辰，東女真寧塞將軍冬弗老、柔遠將軍沙伊羅等率化外女真八十人來朝，奏云：“化外人妄懷狼戾，曾擾邊疆，泊蒙洪育，頓改前非，今引水陸蕃長詣闕陳款，願爲邊民，自今每侯隣寇動靜以報。”王嘉之，特賜金帛加等。

冬十月壬寅，東女真寧塞將軍耶沙蓋等八十人來

獻方物。

十一月戊寅，東京回禮使、檢校左僕射張昌齡來。

辛巳，契丹遣冊封使蕭慎微、使副韓紹文、都部署利川管內觀察留後劉日行、押冊使殿中監馬至柔、讀冊將作少監徐化洽、傳宣檢校左散騎常侍韓貽孫等一百三十三人來。丁亥，王設壇受命。詔曰：“朕猥以眇德，嗣受丕圖，賴六聖之垂休，致八方之咸乂。近從群懇，祇受鴻名。凡在照臨，畢均慶賞。卿世欽聲朔，地襲土茅，航深罄述職之儀，事大竭爲臣之節。屬陳鉅禮，載舉章彝。特推進秩之恩，併茂疇庸之數。今遣使左監門衛上將軍蕭慎微、使副尚書禮部侍郎韓紹文，持節備禮，冊命並賜車服、冠劍、印綬及國信物等，具如別錄，到可祇受。”冊文曰：“朕膺穹旻之寄，紹祖宗之基。四表歸仁，偃靈旗而定霸；百官考禮，鏤寶冊以加尊。遐眷帝臣，踐開國社，航海之誠靡怠，帶河之誓愈堅。屬覃慶之在辰，宜頒恩而及遠。式遵徽典，特舉寵章。咨爾輸忠保義奉國功臣、開府儀同三司、守太保兼侍中、上柱國、高麗國王，食邑七千戶，食實封一千戶王亨，英哲間時，仁慈纘服。張皇土宇，亘日域以分圻；尊獎天朝，仰宸居而送款。戴舜樹弼成之業，匡周規夾輔之勳。化被蒼隅，聲敷青畎。朕昨戒嚴駕，巡撫京畿。邦尹展肆覲之儀，都人契來蘇之望。干戈不試，獄市惟齊。群方則慕義向風，交馳玉帛；鄰國則畏威懷德，增納金縑。聿臻累洽之期，適享虛名之冊。是推皇澤，首及王藩。進絕

席之崇資，正專車之峻秩。爰田益賦，美號褒功。是用遣使蕭慎微、使副韓紹文，持節備禮，冊命汝爲守太傅兼中書令，加食邑三千戶，食實封三百戶，仍賜同德致理四字功臣，散官勳爵如故。於戲！守君子國，冠諸侯王。論道而爲周師，奮庸而登漢相。維堅臣節，以答皇家。享富貴於昌時，傳功名於長世。輝流竹素，永惟欽哉。”

丙寅，東蕃賊以船八艘寇瑞谷縣，虜四十餘人。以不謹備防，罪其將卒。

十二月庚申，毛羅國星主游擊將軍加利奏：“王子豆羅近因卒，一日不可無嗣，請以號，仍爲王子。”仍獻方物。

（甲申）十年夏四月庚戌，東女真一千四十五人執贄請盟，各賜衣著銀器。

賜金元鉉等及第。

五月丁卯，東女真將軍仇羅等二十五人來獻土物。

六月乙巳，王受（普）〔菩〕薩戒於乾德殿。

秋七月癸酉，契丹遣檢校太保劉從政來賀生辰。

遣右僕射李瓌、尚舍奉御崔希正如契丹謝封冊。

八月癸卯，東女真將軍阿刀間等四十六人來獻土物。

九月辛酉，東女真將軍沙伊羅等六十六人來獻土物。

癸亥，東女真將軍包伎等五十九人、西女真大將軍高豆老等二十七人來獻土物。

丁卯，東女真將軍仇尼道等二十六人來獻土物。

冬十一月乙亥，兵馬使金令器奏：“今築長、定二州及元興鎮城，不日告畢，勞效甚多，其督役州鎮官吏：一科七品以上超正職一級，父母封爵；八品以下超正職一級，加次第階職。二科加正職一級並階職。且三城之地，元是賊巢，侵擾可慮，兵馬軍事，分屯要害，水陸捍禦，賊不得近，其軍士：一科別將以上超正職一級，父母封爵；隊正以上超正職一級，並鄉職軍人超鄉職一級。二科隊正以上及船頭加正鄉職一級，軍人及梢工、水手加鄉職且賜物有差。當築城時，出戰有功：一科攝兵部尚書高烈等十人，次一科少府監柳喬等五人，二科大樂丞鄭霸等五人，亦加褒賞，以勸後來。”制可。

癸未，東女真將軍烏乙達等男女一百四十四人來獻駿馬，奏曰：“我等在貴國之境，慕化臣服有年矣，每慮醜虜來侵，未獲奠居，今築三城以防賊路，故來朝謝恩。”王優賞遣還。

（乙酉）十一年春正月戊午朔，放朝賀。

丁丑，祭風師於東北郊。

東女真歸德將軍阿豆主等五十人來獻土物。

二月戊子朔，賜臨津課橋院號曰慈濟寺。先是，津無船橋，行人爭渡，多致陷溺，命有司作浮梁，自此人馬如履平地。

甲午，東女真柔遠將軍巴乙達等六十五人來獻駿馬。



三月己巳，東女真懷遠將軍鹽漢等七十五人來朝。

庚午，幸妙通寺。

丙子，以穀雨節降霜，錄囚。

夏四月丁亥朔，太史奏：“日當食，陰雲不見。”群臣表賀。

戊戌，東女真首領沙於頭等三十五人來獻駿馬。

己亥，東女真將軍要於那等七十人來獻良馬。

庚子，寧塞將軍高陶化等七十人來獻土物。

丙午，西北路兵馬判官監察御史李春奏：“蕃賊百餘人侵寧遠鎮長平戍，擄掠軍士三十餘人，請治將校不能守禦之罪。”從之。

戊申，祭雷師於西南郊。

己酉，秘書省進新刊《禮記正義》七十本，《毛詩正義》四十本，命藏一本於御書閣，餘賜文臣。

五月庚申，制：“以小暑將至，挺重囚、放輕繫。”

丙寅，大宋泉州商林禧等來獻土物。

東路軍士與蕃賊戰勝者，各賜內廐馬。

閏月辛丑，以久雨慮囚，放輕繫。

六月己卯，契丹橫宣使檢校太傅判三班院事耶律宣來。

庚辰，祭零星。

秋七月丁酉，契丹遣檢校尚書右僕射高惟幾來賀生辰。

九月庚寅，東女真將軍高之問等四十五人來朝。

冬十（二）〔一〕月庚寅，以盛寒放輕繫，停不

急之役。

東女真高遮等三十六人來獻土物。

十二月壬子，慮囚。

（丙戌）十二年春二月丙寅，燃燈，賜酺。

壬申，祭馬祖。

三月辛巳朔，日食。王避殿素欄救食。

辛卯，賜李仁挺等及第。

辛丑，命侍中崔齊顏詣毬庭行香，拜送街衢經行。分京城街衢爲三道，各以彩樓子擔《般若經》前行，僧徒具法服步行讀誦，監押官亦以公服步從巡行街衢，爲民祈福，名曰經行。自是歲以爲常。

夏四月辛亥，祭仲農。

丁卯，王不豫，移御山呼殿。丁丑，移御大內法雲寺。丙戌，百官禱于佛寺。

五月乙未，吏部奏：“衛尉卿知太史局事徐雄被疾請告已經一百八十餘日，國制凡見任官乞假滿百日者罷職，請解雄職。”制曰：“雄精於其業，爲日官之長，特賜告二百日。”

丁酉，王疾彌留，召弟樂浪君徽入卧內，詔令權總國事。詔曰：“朕承先君之末命，嗣累聖之丕圖，十有二載，賴天之休，國內乂安。春夏以來，憂勞爽和，藥石無效，遂至大漸，欲以神器歸之有德。內史令樂浪君徽，朕之愛弟也。仁孝恭儉，聞於隣國，宣傳大寶，以顯耿光。”是日，薨。壽三十三，在位十二年。移殯于宣德殿。王寬仁孝友，識度弘遠，英武果斷，

不拘小節。謚曰容惠，廟號靖宗，葬于北郊，陵曰周陵。有司奉遺命，山陵制度悉從儉約。文宗十年加謚弘孝，仁宗十八年加英烈，高宗四十年加文敬。

李齊賢贊曰：“契丹貪暴，不足保信。太祖深以為戒，然而幸其一災而棄舊好，亦非計也。顯宗艱難反正，日不暇給。德宗未及方剛之年，尤宜戒之在門。王可道議絕和親，不若皇甫俞義繼好息民之論也。靖宗嗣位三年，我大夫崔延嘏如契丹。四年，契丹之使馬保業寔來，自是復尋舊盟。感之匪由至誠，致之必有奇策，君子以為善繼善述，以保其國。”



## 高麗史七

### 世家卷第七

#### 文宗一

文宗章聖仁孝大王，諱徽，字燭幽，古諱緒。顯宗第三子，母曰元惠太后金氏。顯宗十年己未十二月癸未生。十三年，封樂浪君。靖宗三年，冊爲內史令。十二年五月丁酉，靖宗薨，即位于柩前，百官奉國璽詣重光殿朝賀。

己亥，制曰：“先朝所御倚床踏斗，皆以金銀裝釘，又以金銀線織成罽錦爲茵褥，宜令有司代以銅鐵綾絹。”

庚子，王率百官詣殯殿哭盡哀。

六月甲寅，遣尚書工部郎中崔爰俊如契丹告哀。

己未，醺本命于大內，每遇是日必親醺。

丁卯，御神鳳樓，大赦。凡有職者加一級。

秋七月己卯朔，以母后諱（晨）〔辰〕道場幸王

輪寺。

辛巳，制：“八音島水軍殷質、壤島水軍匡協、寬達、英吉有擒賊功，並授中尹。”

戊戌，制：“往者東賊圍靜邊鎮，別將鄭匡順力戰却敵，沒於陣下，其功甚大，可贈金吾衛郎將。”

八月壬子，設華嚴經道場于乾德殿。

庚申，御乾德殿視朝，退御宣政殿，召侍中崔齊顏、平章事崔冲等論時政得失。

九月己卯，王如普濟寺飯僧。

癸未，以致仕尚書左僕射崔輔成、右僕射趙顥、上將軍異膺甫、金洪光年老，賜酒食衣服。

乙酉，設百座《仁王經》道場于內殿三日。

丁酉，臨津縣人裴行矯制授趙京等七人職，法當絞，會赦，免歸鄉。

己亥，親饗年八十以上官員，及百姓男女、孝子順孫、義夫節婦、鰥寡孤獨、廢疾於毬庭，賜物有差。

丙午，幸妙通寺行香。

冬十月癸丑，有司奏：“宮殿、城門、寺院、官名、府號，與御名同音者，悉改之。”

丙辰，設消災道場於會慶殿。

十一月戊子，侍中崔齊顏卒。

庚寅，設八關會，幸法王寺。

十（一）〔二〕月丙午朔，百官詣乾德殿賀成平節，宴宰樞、給舍、中丞以上侍臣于宣政殿。成平節、王生日也。每遇節日，國家設祈祥迎福道場於外帝釋

院七日，文武百寮於興國寺，東西兩京、四都護、八牧各於所在佛寺行之，以爲恒式。

壬戌，契丹遣起居舍人周宗白來歸贖。

（丁亥）元年春正月丙戌，制曰：“頃於甲申歲寇賊侵掠東北路，軍士李暹漢等四十人先鋒告捷，其各賞職有差。”

丁亥，制曰：“卒中樞院使林維幹，忠貞輔弼，績效實多，宜行異數可授其子良概八品職。”

丁酉，制曰：“諸州府郡縣逐年盛設輪經會，慮外吏憑此聚斂，以成勞弊，今後醉飽娛樂之事，並宜禁斷。”

壬寅，以司宰卿盧祐知東北面兵馬事，刑部侍郎三司副使李仁靖充西北面兵馬副使。

二月丙午朔，西北路兵馬使楊帶春奏：“轄下連州防禦長吏軍民等八百餘人告云：‘防禦副使蘇顯自下車以來，勸課農桑，存恤民庶，政績茂著。’理合升聞。”制：“令尚書吏部准制量用。”

己未，燃燈，王如奉恩寺。翼日，宴親王及近臣。

壬戌，契丹遣忠順軍節度使蕭慎微、守殿中少監康化成等來祭靖宗于虞宮，王往參之。

丁卯，都兵馬使奏：“東蕃酋長阿兜幹內附以來，久承恩賞，背我投丹，罪莫大焉。其黨首領高之問等今在蕃境，請密遣軍士拘執入關，拷訊端由，依律科罪。”從之。

甲戌，幸外帝釋院。

三月乙亥朔，日食。御史臺奏：“春官正柳彭、太史丞柳得韶等昏迷天象，不預聞奏，請罷其職。”制：“原之。”復駁曰：“日月食者，陰陽常度也。曆算不愆則其變可驗，而官非其人，人失其職，豈宜便從寬典，請依前奏科罪。”從之。

癸未，親設般若道場於乾德殿五日。

丙戌，東女真奉國將軍沙伊羅等來獻土物，加歸德大將軍。

辛卯，門下侍郎平章事皇甫穎上言：“臣無嗣，乞以外孫金祿崇爲後。”從之。官祿崇九品。

戊戌，東女真將軍耶於害等六人各率其衆款塞，賜田宅，處之內地。

夏四月丙午，御乾德殿視朝，又御宣政殿召宰臣御史臺論時政得失。

丁未，以崔冲爲門下侍中，金令器爲門下侍郎平章事，金元冲爲內史侍郎平章事，朴有仁爲尚書左僕射、參知政事，李子淵爲吏部尚書、參知政事。

戊午，加致仕守太尉異膺甫開府儀同三司。

癸亥，王以自春不雨避殿、輟常朝、斷屠宰、止用脯醢，令中外慮囚。

甲子，禘于太廟。

乙丑，以武臣高烈守司空、尚書，左僕射何興休守工部尚書。

丁卯，親設百座仁王道場於會慶殿，飯僧一萬于毬庭。



辛未，賜金鼎新等及第。

癸酉，東女真阿加主等來獻土物，授平遠大將軍。

五月丁丑，東女真將軍烏於乃來朝。

己卯，大雨。

乙未，門下省奏：“時雨既洽，請復常膳。”從之。

戊戌，東女真大相烏弗遮來朝。

己亥，王以顯宗諱（晨）〔辰〕道場如玄化寺。

六月乙巳，王如奉恩寺。

戊申，制曰：“法律，刑罰之斷例也。明則刑無枉濫，不明則罪失輕重。今所行律令，或多訛舛，良用軫懷。其令侍中崔冲集諸律官重加詳校，務從允當。書算業亦令考正。”

乙卯，王率公卿大夫如奉恩寺，以王師決凝爲國師。

丁巳，召見崔冲等於文德殿，問軍國庶務。

庚申，東女真寧塞將軍老道、歸德將軍耶思老等來獻土物，授思老懷化將軍。

乙丑，契丹人高無諸等來投。

庚午，東女真沙伊弗等來朝。

秋七月甲戌朔，幸王輪寺。

庚辰，制曰：“守司徒左僕射蔣劇猛，久著邊功，國耳忘家，宜申異寵，以示眷懷。其子孫除常例奏蔭外，可特賜一子官。”

長淵縣民文漢假言托神，顛狂弑其父母，又殺親妹、小兒等四人，棄市。尚書刑部奏：“縣令崔德元、

尉崔崇望等不能善政化民，致有不祥之變，且申報稽遲，宜罷其職。”從之。

辛巳，以禮部尚書李守和爲西北面秋冬番兵馬使、兵部侍郎三司副使朴宗道爲東北面兵馬副使。

壬午，召見宰相於文德殿，問時政得失。

戊子，以崔惟善爲御史雜端，金義珍爲殿中侍御史。

壬辰，以中樞使王寵之爲西北面中軍使兼行營兵馬使。

八月戊申，御史臺奏：“近日除李希老、洪德威爲監察御史。希老性躁急，歷仕中外，無成績。德威當靖宗喪制未闋，今年燈夕與衛尉注簿徐宜罄置酒作樂，極歡自恣，殊無臣子之義。俱不宜風憲，請黜之。”不允。再駁切直，從之。

辛亥，親設《金剛經》道場於文德殿五日。

甲子，東女真柔遠將軍無伊老、阿豆等來獻土物。

己巳，蒙羅古村、仰果只村等三十部落蕃長率衆內附。

九月乙亥，王如普濟寺。

丁丑，宋商林機等來獻土物。

壬午，契丹遣福州管內觀察使宋璘來冊王。其冊曰：“眷乃馬韓之地，素稱龍節之邦，代襲王封，品高人爵。分頒金盃，表榮冠於諸侯；申錫彤旌，得顯征於四履。爰屬傑時之器，允膺纘服之權。載歷臧時，式均徽典。權知高麗國王事王徽，應基運之數，鍾英

異之靈。天麟迥首於龜龍，遙明嘉瑞；日觀遍崇於嵩華，夙煥幽經。負文武之全才，識忠孝之大本。粵自勝衣有始，構室推良，靜守貞純，動循禮樂。慕桓文之霸業，精衛霍之兵符。富厥令圖，稔茲淑會。洎帥臣之告闕，亟藩國之歸尊。而能惠洽一方，情協群望，及露章而斯暨，故寵數以難稽。是用宜顯被於紫綸，俾特建於玄社。倚爲左相，峻陟三師。超躋馭貴之階，優賜褒功之號。盈疏實賦，劇轉清勳。於戲！周天王之重非熊，止遙分於齊壤；漢高祖之刑白馬，仍納約於劉宗。順考古先，罕偕恩禮，用卜攸長之祚，愈堅匡合之誠。勉佩訓言，仰迪神祐。可特授開府儀同三司、守太保兼侍中、上柱國，封高麗國王，食邑七千戶，食實封一千戶，兼賜匡時致理竭節功臣之號。”

冬十月甲辰，致仕門下侍郎平章事皇甫穎卒。

乙巳，東女真將軍高都達等四十人來獻土物。

丁未，東女真蒙羅等村古無諸等三百十二戶來附。

庚申，晉州牧使司宰卿崔復主奏：“招安逋民一萬三千餘戶，復其業。”王嘉獎之。

十一月丁丑，東女真將軍馬志、高謝等四十六人來獻駿馬。

己丑，召見宰臣於文德殿，議時政得失。

丙申，尚書吏部奏：“伏准宣旨：凡內外大小衙門官員皆減一人，惟巡邊官司仍舊。今伏審涇西山南道州牧務劇員少，事多壅滯，甚爲不便，請岳牧州府員數並令仍舊，永爲定制。”從之。

十二月辛丑朔，致仕門下侍郎平章事李端卒。

己酉，延德宮妃李氏生子，賜名佖。

庚戌，尚書吏部奏：“舊制，凡諸官僚例非上章請老者，年至六十九則歲杪解職。今茶房太醫少監金徵渥年當致仕，宜罷。”制曰：“徵渥名醫，職在近侍，可許數年供職。”

丙辰，以戶部尚書朴成傑爲西北面行營兵馬使。

丁巳，東女真也古、西女真高舍等來朝。

（戊子）二年春正月庚午朔，放朝賀。

乙亥，東女真懷化將軍仇羅麻里弗等四十人來獻名馬，賜物有差。

閏月庚子朔，告朔于太廟。

丙午，東女真歸德將軍沙伊羅、柔遠將軍沙時賀等三十五人來獻土馬。

庚戌，東女真懷化將軍都仇羅等三十八人來獻土物。

辛亥，西女真寧塞將軍高之智等二十四人來獻土物。

契丹遣千牛衛大將軍王澤等來致國信。

二月辛巳，慮囚。

甲申，燃燈，以望日癸未寒食，至是日行之。

三月庚子，御史臺奏：“伏審前月制：‘播穀伊始，雨澤愆期，深用惕厲，其丙戌年肆赦，頒示賑濟條畫內可行之事未得施行者，速令攸司舉行。’臣等已遵制旨施行，唯今大雲、大安兩寺之役方興，丁匠廢農。

一夫不耕，必有飢者，三時之務，安可奪焉。又況赦書云‘一切土木之役，限三年停罷。’舉國欣欣，皆感德音，而竟不行之。信者，國之大寶，不可棄也。食言之謗，恐由此起。伏望兩寺之役須俟農隙。”從之。

癸卯，尊靖宗定信王妃爲容信王后。

辛亥，設消災道場於內殿，放輕繫、蠲逋欠。

甲寅，延昌宮主盧氏卒。

乙丑，雩。

夏四月庚午，幸外帝釋院，聽軒欄說經故事。行幸山林，將駕還，必駐是院，命僧乘鳳輦軒欄講法，以爲常式。

甲戌，幸妙通寺。

甲午，隕霜于土山縣。

五月甲子，王如玄化寺。

六月戊辰，王如奉恩寺。

癸未，祭中霤。

丁亥，祭後農。

東女真首領吳史等二十六人來朝。

己丑，慮囚。

秋八月庚午，設金剛明經道場於會慶殿。

丙子，附靖宗于太廟。

九月甲寅，東女真歸德將軍阿豆等三十六人來朝。

丙辰，設百座仁王道場於會慶殿三日，飯僧一萬於毬庭，二萬於外山名寺。

冬十月甲戌，王乘象輅宿齋宮。乙亥，禘于太廟，還御神鳳樓，赦。

十一月乙未，門下侍中崔冲以下，兩府及常參員祿饗執事者，並推恩增級。

戊申，設八關會，幸法王寺。

己未，契丹遣崇祿少卿邢彭年來賀生辰。

辛酉，契丹東京回禮使棣州刺史高慶善來。

十二月乙丑朔，御乾德殿受生辰賀。

甲午晦，日食。

（己丑）三年春正月乙巳，東女真阿骨等三十二人來獻駿馬。

契丹遣蕭惟德、王守道來冊王，詔曰：“卿纘襲王封，紹興祖業。飛章雙闕，嘉織筐之聿修；考禮曲臺，宜冊函之顯錫。兼申頒賜，用示眷懷。今差使千牛衛上將軍蕭惟德、使副御史大夫王守道，持節備禮，冊命並賜車服、冠劍、印綬，及衣帶、匹段、鞍馬諸物，具如別錄，到可祇受。”冊曰：“朕絳闕承祧，祖有功而宗有德；青藩建社，大者王而小者侯。雖武肅於群雄，亦柔懷於遠裔。式全大義，永保鴻圖。其有纘服開榮，飛章述職。控臨日域，居蒼龍列宿之方；尊獎天庭，奉白馬刑牲之約。爰舉旌疇之命，是行冊拜之儀。咨爾匡時致理竭節功臣、開府儀同三司、守太保兼侍中、上柱國、高麗國王，食邑七千戶，食實封一千戶王徽，玉藻含溫，金球播雅，宇量平吞於渤澥，風稜峻屹於崑崙。蠅宇觀書，洞探經綸之略；鶴鈴蘊

術，深知戰伐之機。粵自分啓三陲，紹興五霸，尋就頒於鳳紵，俾爲長於兔城。四方于宣，匡合之名輝信史；一變至道，拊循之化洽熙民。加以靖恭無驕滿之容，忠孝有委輸之節。豐陳筐筥，繼走梯航，宜考禮於曲臺，載圖勳於盛府。班崇絕席，秩峻專車。襲乃王封，增之井賦，仍錫褒功之號，併推懋賞之恩。遣使千牛衛上將軍蕭惟德、使副御史大夫王守道，持節備禮，冊命爾爲守太傅兼中書令，特封高麗國王，加食邑三千戶，食實封三百戶，仍賜資忠奉上四字功臣，階勳如故。於戲！周賜彤弓，尤重專征之柄；漢頒玄鉞，益雄作翰之權。今古相望，寵靈若是，勉副殿邦之寄，無忘奉國之誠。欽荷丕言，以綏吉履。”丙午，王受冊於南郊。

二月乙亥，以崔冲守太保，李子淵守司徒，王寵之守司空、上柱國，鄭傑同知中樞院事，蔡忠顯爲禮部尚書，崔延嘏、楊鑑爲左右散騎常侍。

甲申，冊弟平壤公基守太師兼內史令。

三月癸巳朔，東北路監倉使奏：“交州防禦判官李惟伯繕理城池，修備器械，爲諸郡第一，且其所部連城、長楊吏民等言‘惟伯上任以來，勸農恤民，雖秩滿當代，願得見借’。”王嘉之，付尚書吏部。

庚子，饗八十以上國老尚書右僕射崔輔成、司宰卿趙顥、太子詹事李澤成等於閤門，王親臨賜酒，仍賜輔成顥等公服各一襲、幘頭二枚、腦原茶三十角，澤成公服一襲，許令閤門乘馬出正衙門，三老固辭。

翼日饗庶老男女及義夫節婦、孝子順孫、鰥寡孤獨、廢疾于毬庭，賜物有差。

癸卯，以韋靖爲尚書右僕射，魏崇攝戶部尚書，吳演爲攝工部尚書。

乙巳，契丹所擄鳳州喜達等三十人還。

甲寅，東女真麻離害等二十人來獻良馬。

戊午，以李仁靜爲尚書左僕射柱國，金廷俊爲中樞院使判御史臺事，鄭傑爲秘書監知中樞院事，金元鼎爲禮賓卿同知中樞院事。

夏四月乙丑，西女真符巨等二十人來獻良馬。

丁亥，東女真奉國將軍沙伊羅等七十九人來獻駿馬。

戊子，納平章事金元冲女爲妃。

五月甲子，御文德殿覆試，賜朴仁壽等及第。

六月戊辰，東蕃海賊寇臨道縣，擄十七人。

壬申，東北路兵馬使奏：“雲岳縣折衝軍隊正惟古等十一人夜巡行到泉井戍，有蕃賊四十餘人突入屯中，軍卒皆奔匿，惟古挺身奮擊，賊遂潰走，請量功授職。”

戊子，制：“每歲自六月至立秋，頒冰于諸致仕輔臣三日一次，僕射尚書卿監大將軍以上七日一次，以爲永制。”

秋七月丁酉，東蕃海賊寇金壤縣，擄二十人。

八月己巳，宋台州商徐贊等七十一人來獻方物。

辛巳，宋泉州商王易從等六十二人來獻珍寶。



九月庚子，延德宮妃生子，賜名蒸。

冬十月丁亥，慮囚。

十一月壬寅，耽羅國振威校尉夫乙仍等七十七人、北女真首領夫舉等二十人來獻土物。

戊午，東南海船兵都部署司奏：“日本對馬島官遣首領明任等押送我國飄風人金孝等二十人到金州。”賜明任等例物有差。

十二月己未朔，契丹遣殿中少監馬祐來賀生辰。

（庚寅）四年春正月己丑朔，放朝賀。東北面都兵馬使朴成傑奏：“上年十月海賊奪鎮溟兵船二艘而去，兵馬錄事文揚烈即率兵船與元興都部署判官宋齊罕追至賊穴，焚蕩廬舍，斬馘二十級而還，其功可賞。”制：“付都兵馬使。”

癸卯，以門下侍中崔冲守太傅。

丙午，東北面兵馬錄事衛尉注簿朴庸載陛辭，制：“蕃人有欲來朝者，非賊首那拂，勿許入朝。”以蕃類三百人勒留京館故也。

乙卯，以金元冲爲門下侍郎平章事、判尚書刑部事，李子淵爲內史侍郎平章事，鄭傑爲中樞院使、翰林學士承旨。

三月丙午，東女真寧塞將軍鹽漢等十二人、柔遠將軍阿加主等三十人、中尹仍于憲等四人、將軍要羅那等三十八人來獻良馬，懷化將軍阿加主等六人進豹鼠皮，賜物有差。鹽漢等十五人以曾犯邊，留之。

夏四月辛酉，謁顯、宣二陵，肆赦。

癸酉，渤海開好等來投。

癸未，命有司：“檢定東女真大、小乞羅尼村疆界以備寇。”

六月戊辰，東蕃海賊寇烈山縣寧波戍，掠男女十八人。

己卯，制：“東北界沿海城堡軍民未獲安業，欲懷遠人，莫如慎簡元帥，宜以兵部尚書楊鑑爲今秋冬番兵馬使。”

秋七月丙戌朔，東蕃賊寇派川縣。

庚子，以伏熱停修羅城。

戊申，東女真酋長骨羅介等來獻土物，又贖還沒蕃男女四人，賜金帛。

八月辛巳，東女真阿加主、鹽漢、沙伊羅等歸我没蕃靜邊鎮副將皇甫冲、隊正宋迎。

九月丁亥，契丹東京回禮使忠勇軍都指揮使高長安來。

己亥，東北面兵馬使奏：“海賊寇掠烈山縣，遣兵馬錄事文揚烈以戰艦二十三艘追至椒子（而）〔島〕奮擊大敗之，斬九級，焚其部落屋舍三十餘所，毀戰艦八艘，獲兵器以百數，請賞其功。”從之。

乙巳，設百高座仁王道場於會慶殿三日。

冬十一月己酉，鎮溟都部署副使金敬應率舟師擊海賊三艘于烈島敗之，斬數十級以獻，沒溺者甚衆，命有司論賞。

閏月壬戌，契丹橫宣使匡義軍節度使蕭質來。

辛未，契丹漢兒曹一來投。

十二月甲申，契丹遣高州觀察使蕭玉來賀生辰。

（辛卯）五年春正月癸丑朔，放朝賀。

癸亥，幸真觀寺，轉新成華嚴般若經。

二月癸巳，京市署火延燒一百二十戶。

命有司給材瓦。

乙未，燃燈，王如奉恩寺。翼日，命肆花宴，召近侍同宴。

庚子，白翎鎮城廊二十八間及民家七十八戶災。按察副使尚書兵部員外郎劉肅劾奏：“鎮將崔成道、副將崔崇望等不爲謹慎，以致火災，請削見任，科罪。”從之。

三月壬戌，禱雨于川上。

戊辰，尚書左僕射李守和卒。

壬申，禱雨于川上。

夏四月辛巳朔，雩。

賜崔錫等及第。

壬午，幸普濟寺，設五百羅漢齋。

乙未，制：“放還廣仁館拘留東女真賊首阿骨等七十七人。”

庚子，內史門下奏：“重興大安、大雲等寺，創新補舊，土木興役，凡所營爲事非急切，匠夫疲於日夜餉饋，勞於轉輸，妻還子去，道路相繼，春夏以來，略無休息。況去歲不稔，生民乏食，力不能堪，應須興役，請俟農隙。”從之。

丁未，內史門下奏：“制：‘皇甫延爲鷹揚軍大將軍兼攝太府卿，秦彥爲左右衛大將軍，盧能訓爲神虎衛大將軍’。三人曾坐罪削職，雖因赦復官，更無功效，不合遷擢，請罷之。”制：“可，唯皇甫延勿罷。”

戊申，親醺于毬庭。

五月丁巳，以旱，赦。

辛未，再雩。

秋七月庚戌，幸興王寺。

己未，日本對馬島遣使押還被罪逃人良漢等三人。

戊寅，東女真元甫古舍等二十六人來獻土物。

八月己卯朔，中樞使禮部尚書鄭傑卒。

辛丑，親饗年八十以上僧俗男女一千三百四十三人，篤廢疾僧俗男女六百五十三人，孝子順孫節婦十四人于毬庭，賜物有差。

甲辰，龜州郎將康隣、昌州別將康彥、崔立等捕殺蕃賊六人。

乙巳，東女真歸德將軍豆也弗等三十一人來獻土物。

九月己酉朔，東北面兵馬副使金化崇奏：“女真寇邊，遣軍士擊，斬五十九級。”遣閤門通事舍人徐亶賜教曰：“爾富蘊兵謀，遐分閫寄。偵戎醜之作梗，擾我邊封；聘婉畫以出奇，形茲捷奏。顧多俘馘，可獎勞庸。今差閤門通事舍人徐亶往彼宣諭，賜爾衣襪、綵段、銀器，其軍前員將隨等第亦賜匹段。”

甲寅，西北面兵馬使朴宗道奏：“昨率軍將巡行關

外，遇東蕃賊，擊斬十餘級，奪戰馬二十匹，鎧仗無算。”王優獎之。

冬十月丁亥，東北面兵馬使奏：“蕃賊寇邊，遣兵馬錄事尹甫敬忠、長州防禦使金旦等追擊，斬二十餘級。”

庚寅，幸三角山。壬寅，還京都。

丁未，契丹東京回禮使檢校工部尚書耶律守行來。

十一月庚申，設八關會。月食在望，以十三日爲初會。

十二月戊寅朔，契丹遣恩州刺史劉從備來賀生辰。

（壬辰）六年春正月戊申朔，放朝賀。

甲寅，以崔惟善爲翰林學士。

丙辰，東女真懷化將軍包加主等來獻良馬。

丙寅，東女真正甫馬波等男女四十八人請入定州關外爲編戶，賜田宅處之內地。

甲戌，西女真寧塞將軍高反知、東女真歸德將軍多老等數十人來獻良馬。

二月丁丑朔，安西都護府地震。

戊寅，冊延德宮主李氏爲王妃。

庚辰，東蕃元甫阿麟等二十九人來獻良馬。

辛巳，新築社稷壇於皇城內西。戊子，親幸祀事，賜執事員吏爵一級，隨駕軍士賜物有差。又賜築壇監役員吏職一級。

三月丁未，王如大安寺飯僧。

庚戌，以李子淵守太尉。

乙卯，以金元鼎爲御史大夫。

戊午，命太史金成澤撰《十精曆》，李仁顯撰《七曜曆》，韓爲行撰《見行曆》，梁元虎撰《遁甲曆》，金正撰《太一曆》，以禳來歲災祥。

壬戌，王如玄化寺飯僧。

壬申，三司奏：“耽羅國歲貢橘子改定一百包子，永爲定制。”從之。

夏四月己卯，以王務崇爲中樞院左副承宣，崔成節爲中樞院右副承宣、殿中侍御史。

丙戌，幸大安寺，以修葺功畢，設落成道場。

丁亥，以李仁靖檢校司徒、尚書左僕射，仍令致仕。

壬寅，沒蕃人毛阿真率男婦十六人還。

五月庚戌，北路三撒村賊魁高演與蕃兵圍淄潭驛，兵馬錄事金忠簡、慈州防禦判官張立身等率兵出戰，大破之，乘勝追擊，斬擄五十餘級。

甲寅，王以旱，避正殿，減常膳，令中外慮囚。

乙卯，東女真酋長高之問等二十五人來獻土物。

戊午，制曰：“頃在統和間，丹兵入寇，我皇考顯宗避難于山南。于時尚書右僕射朴暹負綈扈從，克著勤勞，比及收復京城，終始一節，以安社稷，可圖形閣上，以示來者。”

癸亥，命文武常參以上及致政舊臣各上封事，陳時政得失。

六月乙亥，設金剛道場於文德殿禱雨。大雨。

戊寅，宋進士張廷來授秘書校書郎，教曰：“魏之樂毅，翼彼燕王；吳之陸機，歸諸晉室。皆因遭際，式契一同。汝二謝名流，三張世襲，登俊造而飛價，曄儒雅而飭身。周遊不羈，縱丈夫之志；寅緣有素，臻君子之邦。既諧得士之昌，深慰思賢之竭。授汝文職，輔予朝綱。他山之石，諒符於我用；合浦之珠，休擬於言旋。預推肩一之心，終贊膺千之運。今賜汝教書一道，並賜衣帶、綵段、白銀等物，至可領也。”

己卯，東女真高之問等航海來攻三陟縣臨遠戍。守將河周呂率兵出城，徇于軍曰：“彼衆我寡，若人自爲戰，不愛其身，則戰必勝矣。”遂擁干挺刃而進。適有安邊都護判官金崇鼎巡所管諸戍，行至近境。賊聞其角聲，謂援兵徑至，遂驚亂。周呂軍乘勝擊之，俘斬十餘級，賊奔潰。

秋七月戊午，以崔惟善爲刑部尚書，李令幹爲禮部尚書，王祚爲戶部尚書，庾達爲工部尚書，金顯爲散騎常侍。

八月癸酉朔，制：“以韓式、文質、牛奇理、金悅等於聖考南巡扈從有功，並追贈左右衛上將軍。”

乙酉，致仕檢校太師、尚書左僕射崔輔成卒，輟朝一日。

宋商林興等三十五人來獻土物。

辛卯，宋咸州没蕃高士文自東女真來投。

九月癸卯朔，以金元鼎同知中樞院事，李令幹爲翰林學士。

宋商趙受等二十六人來獻土物。

壬子，宋商蕭宗明等四十人來獻土物。

己未，東女真將軍沙時賀等四十人來獻駿馬。

庚申，設百高座道場於會慶殿三日，飯僧三萬於毬庭及諸名寺。

冬十月癸未，冊姪璵守太保兼尚書令。

丙戌，錄蘇康漢平虜鎮戰死之功，贈興威衛上將軍。

甲午，冊姪暄守太尉兼尚書令。

十一月甲辰，御宣政殿，御史臺奏論時政得失。

乙丑，以張廷爲右拾遺。

十二月壬申朔，契丹遣永州刺史耶律士清來賀生辰。

甲午，致仕門下侍郎平章事金令器卒，輟朝三日。

（癸巳）七年春正月丙午，白氣貫日竟天。

丙辰，太白晝見。

二月乙亥，彗出庫樓入翼，長丈餘。

丁丑，東女真阿夫漢等三十三人來獻駿馬，又贖還沒蕃六人，職賞有差。

耽羅國王子殊雲那遣其子陪戎校尉古物等來獻牛黃、牛角、牛皮、螺肉、榧子、海藻、龜甲等物，王授王子中虎將軍，賜公服、銀帶、彩段、藥物。

三月戊申，賜禹相等及第。

夏四月丁酉，親醮于毬庭。

六月癸未，王受菩薩戒於乾德殿。



秋七月戊午，禮儀司奏：“謹按《唐書》：‘玄宗天寶八載閏六月庚寅，上親謁太清宮冊聖祖玄元皇帝等五尊號，御含元殿受群臣上冊，大赦天下。’乞依此制，每閏月朔，御便殿視朝。”制可。

己未，以李子淵、王寵之爲門下侍郎平章事，金廷俊、朴成傑並參知政事。

辛酉，東女真懷化將軍古刀達等三十人來獻馬，並還沒蕃人，賜物加等。

閏月癸未，東北路文、湧二州大水，漂沒民戶百餘，遣使宣慰。

八月丁酉，御史臺上言：“准尚書工部奉制：‘羅城東南隅高岸者，所以補都邑之虛缺。今爲川潦襄壤，宜徵役夫三四千人修防’。當司勘會其岸，傍邊皆是田疇，恐損禾稼，請待收穫。”從之。

九月甲申，御史臺奏云：“宮城外諸曹侍臣夙夜侍從，寓宿無所，竊審中朝之制，諸詞臣同會於舍人院，今制誥員僚請於翰林院寓宿。”制可。

丙戌，幸西京。

庚寅，次安西都護府，留三日。辛卯，次北嵩山神光寺，設羅漢齋，宴諸王、宰樞、侍臣。癸巳，登都護府南山，召親王、宰樞、侍臣置酒，至夜而罷。

冬十月丙申朔，日食。

庚子，駕至大同江御樓船，宴諸王、宰樞。

壬寅，幸興福寺，遂御大同江樓船，宴上將軍以上臣僚。

甲辰，饗孝順義節、鰥寡孤獨，賜物有差。

己酉，設八關會，幸興國寺。

癸丑，宴東班常參以上，西班牙郎將以上，於長樂殿，賜帛有差。

甲寅，幸重興寺。

乙卯，車駕發西京，御大同江樓船，東望江岸，命將軍鄭曾等八人射，郎將惟現矢過江，王嘉獎之，遂宴諸王、宰樞、侍臣。

丙辰，留守使戶部尚書王夷甫等至生陽驛辭，各賜公服一襲。

丁巳，次慈悲嶺彌勒院行香施衣，行過呂嶺，道有一婦抱兩孩兒，王憐之，賜米。

辛酉，至自西京。

十一月己丑，制曰：“《書》云：‘一人元良，萬邦以貞’。太子，國之本也。定立儲副，嫡庶有別，所以重宗統、一民心也。凡有國家者，惟此爲急。延德宮妃長子佺可改名勳，立爲太子。”

十二月丙申朔，契丹遣利州刺史蕭素來賀生辰。

（甲午）八年春正月丙寅朔，放朝賀。

壬申，東女真中尹英孫等十八人來獻名馬。

二月癸卯，冊勳爲王太子。其冊曰：“粵自生民置君，覽萬機而允理；立嗣必子，歷百世以弗磨。是爲通規，匪由私愛。朕謬據元元之首，思弘永永之休。國本貞于植寧，孫謀光于錫羨。但綴旒而在慮，方主器以佇賢。果能蒙祐璇旻，毓明琅震。既亶聰而稔譽，

宜貳體以躋榮。咨爾長子勳，汪度包寬，嶷姿挺秀。處齠年之列，不雜群嬉；昵耆德之流，樂聞善道。重海之謳歌胥洽，盈庭之矚注僉同。是用陟紫殿之副尊，示青牆之峻級。練辰斯吉，綸需特豐。今遣使兼太尉守門下侍郎王寵之、使副兼司徒尚書右僕射朴成傑等，持節備禮冊命爾爲王太子。於戲！劉徹之七歲登儲，信爲美事；周昌之三朝問豎，可俟勤誠。勉乃令圖，率茲芳烈，饗高位而彌惕，服正言之惟師。俾嘉淑以有彰，亦撫監而無忽。敬佩予訓，不其偉歟。”

丙午，御神鳳樓，大赦。凡有職者加一級。

癸丑，饗于宗廟山陵，宴群臣於乾德殿，賜幣有差。

三月甲戌，賜勒留東女真阿骨等五十九人布物有差。

夏四月庚戌，加李子淵太傅。制：“赦前見罷員吏，皆復其官。”

壬子，北女真寧塞將軍高遮等三十九人來獻駿馬。

己未，賜柳善餘等及第。

是月，遣給事中金良贄如契丹告立太子。

五月己卯，加國內名山大川神祇“聰正”二字功號。

耽羅國遣使賀冊立太子，加使者十三人職。稍工儉從，賜物有差。

乙酉，震會慶殿。

六月丁未，王受菩薩戒於內殿。

秋七月庚午，宋商趙受等六十九人來獻犀角、象牙。

己丑，王子生，賜名顥。

是月契丹始設弓口門欄于抱州城東野。

八月壬子，以中樞院使金元鼎爲西北面兵馬使。

庚申，東路兵馬使奏：“長州地高且險，城中無井，乞令設柵南門外平地，徙民居之，有急入城。”從之。

九月己巳，錄壬辰年淄潭驛破賊之功，賞軍士職有差，賜物優厚。

庚午，宋商黃助等四十八人來。

冬十月乙未，東女真柔遠將軍尼多弗等二十八人來獻駿馬，歸我被擄人信金、位奉、遲禮等三人，且言：“蕃人實彬、鹽漢、比丹、摩里弗等四人曾受契丹官爵，聞王惠愛異土之人，願得入覲，故謹與俱來。”賜尼多弗、實彬、鹽漢、比丹、摩里弗職加等，其餘賜物有差。

甲辰，契丹橫宣使益州刺史耶律芳來。

十一月甲子，契丹宣諭使益州刺史耶律幹來。

十二月庚寅，契丹遣復州刺史耶律新來賀生辰。

有司請追贈太祖功臣大匡千明等三千二百人次第職，從之。

辛亥，命揀東宮侍衛公子及給使。

（乙未）九年春二月乙巳，東女真奉國將軍尼多弗等二十七人來獻土物。

戊申，寒食饗宋商葉德寵等八十七人於娛賓館，黃拯等一百五人於迎賓館，黃助等四十八人於清河館，耽羅國首領高漢等一百五十八人於朝宗館。

夏四月辛丑，雨雹雪。

五月辛酉，契丹遣耶律革、陳顗來冊王，詔曰：“卿嗣立世勳，茂修文教。效珍職筐，尊獎於皇家；奕慶藩圭，撫寧於青域。屬茲行禮，思與同休。爰特降於冊函，仍優加於賄命。式昭眷想，當體恩榮。今差匡義軍節度使耶律革等，往彼備禮冊命，仍賜車輅、冠服、圭劍等，及特賜諸物，具如別錄，至可領也。”冊曰：“王者，禮遇群后，懷和萬邦。錫以彤旌，寵价藩之功茂；賜之膳胙，表王室之慶成。順考前規，允膺休典。朕甫鍾嘉運，勉徇鴻名。繇蕤之儀，適交修於朝右；蓼蕭之澤，宜遐冒於海隅。妙簡靈辰，式揚昆命。匡時致理，竭節資忠，奉上功臣、開府儀同三司、守太保兼中書令、上柱國、高麗國王，食邑一萬戶，食實封一千三百戶王徽，淹融迪裕，忠肅秉彝。木德司仁，旁鍾於醇粹；珠衡挺異，迥賦於英標。而自嗣興乃邦，纘服前烈，樹桓文之遐業，撫辰卞之全封，善政其蘇，驩謠允穆。賓王請朔，久堅事大之誠；候律占風，克謹守邦之職。作皇家之外蔽，壯戎翰之中權，實寬東顧之憂，率資北面之力，存逢邦慶，永念世勳，乃臨遣於使駢，特進加於朝冊。維師陞秩，奉邑增封，申昭柔遠之恩，式協疇庸之典。今遣使匡義軍節度使、饒州刺史兼御史大夫耶律革、使副崇祿卿

護軍陳顗，持節備禮，冊命爾爲守太師，加食邑五千戶，食實封五百戶，餘如故。於戲！鸞冕八章異其數，象輅九旂昭其文。講備物於曲臺，溢榮暉於列國。斂膺殊禮，永懋令圖。矧當熙盛之期，益著匡寧之績。儀形群岳，貽燕後昆，寶朕訓言，膺受繁祉。”王受冊于南郊。

癸亥，遣利州刺史蕭祿來冊王太子官，告曰：“古之諸侯，厥有世子，貞列邦而爲重，守冢社以惟艱。永念亢宗，必先立嫡。近省來奏，深嘉乃誠。爰念稟朔尊王，蓋絕專封之禮；瞻天請命，固求樹本之恩。特舉舊章，懋膺榮典。匡時致理竭節資忠奉上功臣、開府儀同三司、守太（傳）〔傳〕、中書令、上柱國、高麗國王，食邑一萬戶，食實封一千三百戶王徽子勳，憑積德之厚，稟貽謀之休。越在齠年，鬱爲雅器。綴胄筵而讓齒，趨師席以參玄。而況寶系莫竟，昌源寢遠。肯堂肯構，既克紹於世風；拜後拜前，是併敷於朝典。顧三韓之右地，總百濟之舊名。榮分父母之邦，爵復公侯之始。示予綏援，弘爾善祥。於戲！當紈綺之齡，受絲綸之寵，黑輜異等，玄袞升華，所宜崇孝敬以承親顏，敦信厚而儀公族。勿驕勿惰，有初有終。欽茲惟休，無忝慈訓。可特封三韓國公。”太子迎命于閤門庭。

乙亥，大雨雹。

秋七月丁巳朔，都兵馬使奏：“契丹前太后皇帝詔賜鴨江以東爲我國封境，然或置城橋、或置弓口欄子、

漸踰舊限，是謂不厭。今又創立郵亭，蠶食我疆。魯史所謂：‘無使滋蔓，蔓難圖也’，宜送國書於東京留守，陳其不可。若其不聽，遣使告奏。”於是致書東京留守曰：“當國襲箕子之國，以鴨江爲疆，矧前太后皇帝玉冊頒恩，賜茅裂壤，亦限其江。頃者，上國入我封界，排置橋壘。梯航納款，益勤於朝天；霄闥抗章，乞復其舊土。至今未沐俞允，方切禱祈。又被近日常遠城軍夫，逼邇我城，移設弓口門，又欲創亭舍。材石既峙，邊民騷駭，未知何意。伏冀大王親隣軫念，懷遠宣慈，善奏黈聰，還前賜地，其城橋弓欄亭舍，悉令毀罷。”

庚申，以崔冲爲內史令，仍令致仕，李子淵爲門下侍中、判尚書吏部事，金廷俊爲內史侍郎平章事，朴成傑爲內史侍郎平章事、上柱國，金元鼎爲尚書左僕射、參知政事兼太子少保。

契丹康慶遵等十五人來投，歸我沒蕃人五十三口。

癸亥，以智猛守司空，仇勝爲刑部尚書，金所寶爲戶部尚書，皇甫延爲工部尚書，皆以武職兼之。

壬申，東女真首領耶時老等二十六人來獻土物，職賞有差。

癸酉，制曰：“先太后親姊金氏，當寡人與德宗幼少之時，保護有勞。朕欲封崇爵邑，酬答前勞，宜令中樞院准制施行。”

八月庚寅，慮囚。

己亥，尚書吏部奏：“檢校將作少監庾恭義，大匡

黔弼之曾孫，前有所犯，久滯散秩。曾降制旨‘太祖配享功臣之後，雖有罪犯，並須敘用’。今恭義宜授肅州防禦使。”門下省奏：“恭義曾犯諂諛，名載罪籍，不可敘用。況牧民之寄，重於製錦，苟非其人，必傷其手。請罷之。”制可。

九月癸亥，契丹興宗告哀使鴻臚少卿張嗣復來。王聞嗣復過鴨綠江，減常膳、輟音樂、禁屠宰、斷弋獵。

乙丑，王服素襴率百官出昌德門前，嗣復傳詔舉哀行服，輟朝市三日。

辛未，禮賓省奏：“宋都綱黃忻狀稱‘臣携兒蒲安、世安來投，而有母年八十二在本國，悲戀不已，請遣還長男蒲安供養。’”王曰：“越鳥巢南枝，況於人乎！”許之。

丙子，遣知中樞院事崔惟善、工部侍郎李得路如契丹弔喪會葬。

冬十月乙酉，生辰回謝使戶部侍郎崔宗弼還自契丹，奏：“禮部云：‘帝名宗真，汝名犯宗字，宜改之’。臣於表狀改稱崔弼。”門下省奏：“宗弼宜答以‘我國不知所諱，誤犯之，表章所載未敢擅改’。彼若強之，但減點畫，庶合於禮。宗弼擅改表文，有辱使命，請科罪。”原之。

丙申，制曰：“古先帝王，尊崇釋教，載籍可考。況聖祖以來，代創佛寺，以資福慶。寡人繼統，不修德政，災變屢見。庶憑法力，福利邦家。其令有司，



擇地創寺。”門下省奏：“自古聖帝明王，無有創起寺塔以致太平，惟崇重法門，慎省政教，不傷民力，則自然宗社靈長。昔達摩對武帝言‘造寺造塔，殊無功德’，是尚無爲功德，不尚有爲功德也。且聖祖創寺者，一以酬統合之志願，一以厭山川之違背耳。今欲增創新寺，勞民於不急之役，怨讀交興，毀傷山川之氣脉，災害必生，神人共怒，非所以致太平之道。”不納。

十一月乙丑，幸東池。檢校衛尉少卿崔成節無故人至帳殿前，王驚，命下獄。法司奏：“闖入御所者斬。”王曰：“雖律有正條，以此加刑，是爲苛政，又文筆有用，可原之。”門下省駁奏，不納。

契丹東京回禮使檢校工部尚書耶律道來。

十二月甲寅朔，契丹遣金州刺史耶律長正來賀生辰。

（丙申）十年春正月辛未，隕石于黃州，聲如雷。

甲戌，東女真奉國將軍阿加主等五十人來，獻駿馬三十二匹。

二月甲午，有司奏：“沒蕃人廉可偁，軍器丞位之子，三韓功臣、司徒邢明之孫，於庚戌年中充環衛公子軍役，會丹兵闖入京城震騷，奉二親避兵于故鄉峰城縣，道遇賊，被虜而去。清寧元年正月携一子亡來，請可偁父祖永業田舍，並令還給。”制曰：“可偁功臣苗裔，丁年被俘，棄蕃土妻兒，惟携一子，皓首而歸，深可憐憫，可給舊業田廬。”

癸卯，始創興王寺于德水縣。

己酉，耽羅國獻方物。

三月甲寅，冊子蒸爲國原侯，王潛御便次，觀禮訖，召侍中李子淵、參知政事金元鼎、尚書左僕射智猛等置酒達曙。

閏月癸未朔，告朔于太廟。

乙酉，守司空尚書右僕射致仕高烈卒。烈善射，屢立軍功，爲一時名將。及沒，聞者皆惜之。輟朝三日，令百官會葬。

夏四月丙寅，以智猛守司空。

丙子，御乾德殿覆試，賜李幹方等及第。

秋七月丁酉，以東蕃賊屢侵邊境，遣東路馬兵貳師侍御史金旦往討之。旦誓衆曰：“臨敵忘家，以身徇國，分也。我生死正在今日。”三軍感激奮勵，勇氣自倍，破其屯落二十餘所，賊大潰，獲兵仗羊馬無算。

八月戊辰，以決內外死囚，避正殿、素膳、停樂。

西京留守報：“京內進士、明經等諸業舉人所業書籍，率皆傳寫，字多乖錯，請分賜秘閣所藏九經、漢晉唐書、《論語》、《孝經》、子史諸家文集、醫卜、地理、律算諸書，置于諸學院。”命有司各印一本送之。

庚午，飯僧三萬。

九月甲申，制：“諸州牧、刺史、通判、縣令、尉及長吏，政績勤慢清濁、百姓貧富苦樂，可遣使按驗。”所司乃以程驛民吏勞於迎送，請停之。王曰：“朕惟先代頻遣使臣，採訪民瘼，故諸道宰民者，悉務

清廉，以安民庶。近來綱紀弛紊，且無懲革，不勤公事，但謀私利，要結權豪，里巷多囊橐之收，田原罕桑麻之勸，或地有魚鹽梓漆，或家有畜產貲財，皆被侵奪。若有恠之者，即假事嚴加枷杖，傷其性命，懷冤抱痛，無所告陳。間有欲正之者，又因貴要之囑，卒莫能行。蠹民之害，日益月滋。官吏既已如此，小民安得聊生。朕晨夕孳孳，庶幾釋其煩弊，而當軸秉鈞者，不以爲可，論說紛紛，何哉！今以兼侍御史刑部員外郎李攸績爲山東南忠、慶、尚州三道撫問使，兼御史雜端兵部郎中金若珍、禮部郎中崔尚並爲山南晉、羅、全、清、廣、公、洪州七道撫問使，兼監察御史、試殿中內給事安民甫爲關西、北、關內三道撫問使，監察御史閔昌壽爲關內東道撫問使，分道發遣，毋或阻滯。”

己丑，祀太一於壽春宮以禳火災。

癸巳，命太子與諸王置酒東池樓，召秀才崔應、李曙、御室忠，令賦《東池尋勝詩》，各賜匹段。

制曰：“近覽日官所奏，數有天變。此蓋寡人德薄，政令不一所致也。鰥鰥以懼，夙夜未遑。自今月避正殿，減常膳，庶答天譴。凡百卿士，各慎爾位，直言予過，無有所隱。”

丙申，制曰：“釋迦闡教，清淨爲先。遠離垢陋，斷除貪欲。今有避役之徒，托號沙門，殖貨營生，耕畜爲業，估販爲風，進違戒律之文，退無清淨之約。袒肩之袍，任爲酒甕之覆；講唄之場，割爲葱蒜之疇。

通商買賣，結客醉娛，喧雜花院，穢臭蘭盆，冠俗之冠，服俗之服，憑托修營寺院，以備旗鼓歌吹，出入閭閻，搪揆市井，與人相鬥，以致血傷。朕庶使區分善惡、肅舉紀綱。宜令沙汰中外寺院，其精修戒行者，悉令安住，犯者以法論。”

冬十月己酉朔，日本國使正上位權隸滕原、朝臣賴忠等三十人來，館于金州。

辛亥，王太子見于太廟。

壬戌，親禘于太廟，加上九廟尊號。祭畢，御齋宮受群臣賀，還御神鳳樓，赦。制曰：“朕謬承祖禰之遺芬，統山河而守業，日新一日，雖休勿休。弓懷永於寶圖，竭奉先於宗祏。今者躬虔禘禮，適振德音，思與群生，同茲丕慶，可大赦中外。”

十一月辛巳，宋商黃拯等二十九人來獻土物。

是日，初雪，百官表賀。

壬午，幸內帝釋院，以僧海麟爲王師。

壬辰，設八關會，幸法王寺。

甲午，東女真耶賜老等五十人來獻土物。

十二月戊申朔，契丹遣永州刺史蕭惟新來賀生辰。

丙辰，中外進箋賀王太子長興節於壽春宮。

斬東女真柔遠將軍沙支何等二人，以嘗劫掠朔州人物也。

是歲，作長源亭於西江餅嶽之南。

## 高麗史八

### 世家卷第八

#### 文宗二

（丁酉）十一年春正月戊寅朔，放朝賀。

己丑，以高維爲右拾遺。中書省奏：“維系出耽羅，不合諫省，如惜其才，請授他官。”從之。

乙未，隕石于黃州，聲如雷。

二月癸酉，設消災道場于乾德殿五日。

三月乙酉，契丹遣蕭繼從、王守拙來冊王，詔曰：“卿控臨祖服，藩屏皇家。薦號龍庭，方畢推崇之禮；均休兔域，宜行冊拜之恩。式示寵頒，用昭溫睭。今差天德軍節度使蕭繼從、左千牛衛大將軍王守拙等充封冊使副，並賜卿冠服、車輅、銀器、匹段、鞍馬、弓箭等，具如別錄，至可領也。”冊曰：“我國家重蒼睭命，累聖垂休，推恩信於萬邦，寧分中外；褒功勳於庶位，詎隔邇遐。眷三韓閭閻之雄，限伯禹方隅之

表。其有踐開青社，遙控紫庭，紹匡合之霸圖，修委輸之臣節。雖日中有子，曾申錫於王封；而天下同文，旋弼成於帝化。屬均大慶，思答洪勳。爰卜臧辰，式頒寵典。咨爾匡時致理竭節資忠奉上功臣、開府儀同三司、守太師兼中書令、上柱國、高麗國王，食邑一萬五千戶，食實封一千八百戶王徽，精儲龍宿，傑出雞林，博通幼尚於詩書，聰悟生知於禮樂。宏謀秘奧，常探金櫝之編；敏思適妍，已著錦樓之集。粵自襲爵朱蒙之國，宣風玄菟之鄉，以寬猛董雄師，以惠和熙雅俗，膏雨霑一方之澤，景星爲千古之祥。當聖考臨軒，頗盡匡周之禮；迨冲人纂業，尤堅奉啓之誠。剡華楮以飛章，匭青茅而入貢。載觀忠義，無替敬恭。近者，迫群興懇切之詞，推寡昧優崇之號，勉從勤請，遂舉盛儀。方覃象魏之恩，首獎桓文之略。是用移晉相專車之秩，陞漢臣獨坐之班，兼益戶封，併昭宸獎。今遣使天德軍節度使蕭繼從、使副左千牛衛大將軍王守拙，持節備禮，冊命爾爲兼尚書令加食邑五千戶，食實封二百戶。於戲！飛龍在運，白馬伸盟。寵錫彤弓，位冠於五侯九伯；榮調玉鉉，權崇於四輔三公。矧乃居先人賜履之邦，襲伯氏揚旂之寄，弼翊可以希於善善，拊循可以慕於優優。宜樹芳猷，別凝茂績，應福謙於神道，契助順於天心，敬戒於茲，長守富貴。”王率百官受冊于南郊。

契丹又遣蕭素、柴德滋來冊王太子，詔曰：“卿慶鍾王胤，幼標聰悟之名；爵列國公，早被豐優之命。

束蕝屬行於成禮，編筠思洽於殊休。宜有寵頒，式符眷矚。今差利州管內觀察使蕭素、司農卿柴德滋充封冊使副，並賜卿冠服、車輅、銀器、匹段、鞍馬、弓箭等，具如別錄，至可領也。”冊曰：“朕嗣守丕圖，奄宅縣宇，徇縉紳之抗疏，束茅蕝以陳儀。上奉慈顏，方增於懿號；下褒眇德，亦被於虛稱。載惟延賞之恩，宜舉襲封之典。咨爾匡時致理竭節資忠奉上功臣、開府儀同三司、守太師兼中書令、上柱國、高麗國王，食邑一萬五千戶，食實封一千八百戶王徽子勳，鵷鷺瑞質，駉駉奇蹤。挺歧嶷之英姿，蘊溫良之妙德。肯堂承訓，允符作室之言；良冶傳芳，期肖爲裘之業。爰自綺紈之歲，已膺綸綍之榮。今屬玉檢，推尊銷金，在運率土，皆霑於慶，宥承家宜，被於寵靈。特霈筠編，茂均蕭澤。是用遣使利州管內觀察使蕭素、使副守司農卿柴德滋，持節備禮，冊命爾爲順義軍節度使、朔武等州觀察處置等使、崇祿大夫、檢校太尉、同中書門下平章事、使持節、朔州諸軍事、行朔州刺史、上柱國、三韓國公，食邑三千戶，食實封五百戶。於戲！爵疏五等，首冠於（候）〔侯〕封；寄重十連，兼提於相印。服是休美，永惟敬哉。”太子率宮官百僚詣南郊受冊，王潛幸觀禮。

丙申，吏部奏：“配享功臣侍中崔肅曾孫懋，請依丙申年祫禮赦文，以蔭加戶部令史同正。”從之。

癸卯，以異惟忠同知中樞院事，任從一爲尚書左僕射，王懋崇爲御史大夫，金元晃爲工部尚書。

夏四月丙辰，幸佛日寺，飯僧。

壬戌，制曰：“去年遣使請罷弓口門外郵亭，時未撤毀。又於松嶺東北漸加墾田，或置庵子屯畜人物，是必將侵我疆也，當亟請罷之。”中書省奏：“彼朝時無擾邊，且新皇帝即位來加冊命，今未回謝，先言疆場之事，似爲不可。”王曰：“彼若先置城柵，則非惟噬臍，彼必謂我不覺也。宜於仲秋先遣使謝冊，繼行奏請。”

丙寅，詔曰：“兩行封冊使副同時偕至，中外吏民疲於支待，其有錯誤當坐者，皆放除之。其所過州縣，減今年租稅之半，受冊時諸執事及升壇陪位官常參以上並增級，鄉職以下加同正職，掌固算士、書手、近仗、軍頭皆許登仕，其餘軍卒賜物有差。”

癸酉，賜李暎等及第。

五月丁丑，設消災道場于壽春宮三日。

戊寅，禮部奏：“自孟夏雨澤愆期，又廣州報田野乾焦，殆失歲望。請於松岳、東神堂、諸神廟、山川、朴淵等五所每七日一祈，又令廣州等州郡各行祈雨。”制可。

壬午，禱雨于諸神廟。

丙戌，東女真懷化將軍高都達等二十五人來獻土物。

丁亥，興盛宮妃徐氏卒。

戊子，再禱乃雨。

六月丁未，契丹東京持禮回謝使檢校工部尚書耶



律可行來。

戊辰，東女真柔遠將軍要於乃等二十五人來獻土物。

秋七月戊子，設消災道場于乾德殿五日。

壬辰，命有司試宋投化人張琬所業遁甲三奇法、六壬占，授太史監候。

甲午，饗年八十以上男女及孝順義節、鰥寡孤獨、廢疾者於毬庭，賜物有差。

辛丑，御宣政殿，聽斷中外重刑。

八月丁未，宋商葉德寵等二十五人來獻土物。

丙寅，以秘書省校勘慶鼎相權知直翰林院。中書省言：“鼎相鐵匠之裔，不宜清要職，請削之。”王曰：“‘采葑采菲，無以下體’，蓋貴其可用者耳，鼎相才識有可採用，豈宜論其世系。”不允。

丁卯，宋商郭滿等三十三人來獻土物。

辛未，幸西京，命侍中李子淵、平章事王寵之等留守上都。

九月甲申，遣王夷甫、崔爰俊如契丹謝賜冊命。

冬十月丁巳，設八關會，幸長慶寺。

癸亥，契丹橫宣使泰州刺史耶律宏來。

十一月丙子，至自西京。

丁丑，以金廷俊爲門下侍郎、同內史門下平章事。

十二月癸卯朔，契丹遣右諫議大夫王宗亮來賀生辰。

丁未，遣尚書戶部侍郎安民甫如契丹賀太皇太后

生辰。

己酉，遣尚書工部侍郎崔繼游賀天安節。

辛亥，左僕射智猛以老乞退，優詔不允。中書省奏曰：“七十而致仕，禮也，請許之。”制曰：“予嘗以智猛之先有功於國，故未及請老已許數年侍朝，繼賜几杖。今因所奏，遽改前言，恐猛謂朕爲戲耳。”中書省又奏曰：“伏審禮制，凡老臣知天地之事者，則賜之几杖。今猛徒藉門蔭而不知天地之事，又無矢石之勞，其餘政事無所諮訪，若念先臣功勞，則賜一年侍朝可矣。若加以數年，又賜几杖，恐恩禮太過，請收成命。”從之。

辛酉，以金元鼎爲內史侍郎、同內史門下平章事，金顯爲尚書左僕射、參知政事，韓功敘爲尚書右僕射。御史臺奏：“按官制，左右僕射各一人，今任從一已授右僕射，而功敘又爲之，增一右僕射，不合舊制，請罷功敘。”不允。

（戊戌）十二年春二月辛亥，都兵馬使奏：“界內鐵貢舊充兵器，近創興王寺，又令加賦，民不堪苦，請減鹽、海、安三州丁酉、戊戌二年軍器貢鐵，專供興王之用，以紓勞弊。”從之。識者曰：“《唐史》稱：‘列剎盈衢，無救危亡之禍；緇衣滿路，豈益勤王之師。’國家此舉，豈非謬甚。”

戊午，內史舍人知東宮侍讀事崔尚奏：“昨伴送丹使王宗亮夜至金郊驛，宗亮見列炬曰：‘郊餞被酒，所以犯夜，燃炬徒隸，衣單可悶，後宜侵早啓行。嘗聞

貴朝引見客使，勸酒至夜。今觀禮樂一似中華，歎美不已，然三詣王府，宴必張燈。我朝之法，惟昏夕許用花燭。人臣會客，雖至侵夜，不得燃燭。’臣亦念王者向明而治，宜於大昕，接見賓客。況燈燭亦民膏血，費用太多，恐虧儉德。昔陳敬仲飲桓公酒，辭公火繼之命，曰：‘臣卜其晝，未卜其夜。’乞自今宴好之禮，止令卜晝。辭歸之禮，宜用會朝時。”從之。

辛酉，契丹遣檢校尚書右僕射蕭禧來告太皇太后喪，王以玄冠素服迎之。

夏四月壬子，地震。

丙辰，東女真柔遠將軍多老等來獻良馬。

五月庚辰，東女真歸德將軍霜昆等三十三人來獻良馬，賜衣服器皿有差。

戊子，王如奉恩寺冊海麟爲國師、爛圓爲王師。

壬辰，制曰：“時當盛農，雨澤愆期，恐有冤獄，以致天災。”遂放輕繫。

六月壬寅，契丹遣左領軍衛上將軍蕭俛來致太后遺物。

戊申，中書門下省奏：“伏審制旨太史監候李神貺察風雲水旱之候，罔有差違，勿拘考績，擢授八品。神貺未知世系，初入朝行，再被論奏，且候察乃其職也，不宜超授。”制曰：“精於其術未有如神貺者，可依前制。”

癸丑，東女真正朝分大等二十三人來獻土物，賜物有差。

甲寅，王受菩薩戒於乾德殿。

秋七月己卯，中書門下省奏：“伏准制旨，以景昌院所屬田柴移屬興王寺，其魚梁、舟楫、奴婢悉令還官。夫宮院，先王所以優賜田民，貽厥子孫，傳於萬世，無有匱乏者也。今宗枝彌繁，若欲各賜宮院，猶恐不足，況收一宮田柴屬於佛寺，歸重三寶，雖云美矣，有國有家之本，不可忘也。請田民、魚梁、舟楫仍舊還賜。”制曰：“田柴已納，三寶難可追還，宜以公田依元數給之，餘從所奏。”

庚寅，制曰：“數年以來，水旱不調，災變屢見，是皆刑政所失，怨憤所招，若欲仰答天譴，俯慰人望，宜宥罪寬刑，反身修德。其兩京文武南班員吏有犯當降黜者，及諸州府郡鎮長吏將校有罪受黜者，主司酌其輕重，依舊敘用。其諂曲奸邪再犯私罪者，不在此例。公徒私杖以下，原之。”

八月乙巳，宋商黃文景等來獻土物。

王欲於耽羅及靈巖伐材造大船，將通於宋。內史門下省上言：“國家結好北朝，邊無警急，民樂其生，以此保邦，上策也。昔庚戌之歲，契丹問罪，書云：“東結構於女真，西往來於宋國，是欲何謀。”又尚書柳參奉使之日，東京留守問南朝通使之事，似有嫌猜，若泄此事，必生罅隙。且耽羅地瘠民貧，惟以海產乘木道經紀謀生，往年秋伐材過海，新創佛寺，勞弊已多，今又重困，恐生他變。況我國文物禮樂興行已久，商舶絡繹，珍寶日至，其於中國實無所資，如非永絕

契丹，不宜通使宋朝。”從之。

九月己巳朔，忠州牧進新雕《黃帝八十一難經》、《川玉集》、《傷寒論》、《本草括要》、《小兒巢氏病源》、《小兒藥證病源一十八論》、《張仲卿五臟論》九十九板，詔置秘閣。

乙亥，契丹東京回禮使檢校左散騎常侍耶律延寧來。

冬十一月庚午，制：“以靖宗魂堂金銀器及北朝弔祭禮物繒綵化成藏經，追福靖宗。”

乙酉，東女真柔遠將軍多老等二十二人來獻土物。

十二月丁酉朔，契丹遣筵州刺史郭在貴來賀生辰。

東女真懷化將軍尼冬火等二十六人來獻土物，各增爵賜物有差。

閏月丙子，東女真寧塞將軍古刀達等五十人來獻駿馬。

丙申晦，日食。

（己亥）十三年春正月丁酉朔，御乾德殿受朝賀，仍宴諸王、輔臣，命平章事致仕金廷俊赴之，夜艾而罷，各賜廐馬一匹。

乙巳，東女真正位沒於金等十八人來獻駿馬。

丁未，東女真中尹耶施老等三十五人來獻良馬。

二月丁卯，東女真正甫吳史等二十二人來獻駿馬。

甲戌，安西都護府使都官員外郎異善貞等進新雕《肘後方》七十三板、《疑獄集》一十一板、《川玉集》一十板，知京山府事殿中內給事李成美進新雕《隋

書》六百八十板，詔置秘閣，各賜衣襪。

遣告奏使尚書工部員外郎崔奭珍如契丹。

乙亥，東女真寧塞將軍居多弗來獻方物。

御乾德殿覆試，賜楊信麟等及第。

三月壬戌，命起居注李攸績、監察御史李秉陽、金吾將軍邦賢檢囚，放輕繫六十三人。

夏四月丙子，親禘于太廟。宋商蕭宗明等乞就街路瞻望法駕，許之。是日肆赦。

庚辰，知南原府事試禮部員外郎李靖恭進新雕《三禮圖》五十四板、《孫卿子書》九十二板，詔置秘閣，仍賜衣襪。

五月乙未，盜入顯陵廟室。下陵室侍衛大將軍殷貞等獄，罪之。

丙辰，制：“兩京百寮樵蘇地限馬首嶺，樹禁標，違者痛理。”

六月乙酉，制：“靖宗宮人韓氏、小韓氏、韋氏歲給內莊宅粳米三十石。”

秋八月戊辰，宋泉州商黃文景、蕭宗明、醫人江朝東等將還，制：“許留宗明、朝東等三人。”

癸酉，宴年八十以上工部尚書洪楷、上將軍何興休于閣門。王親勸花酒，歡宴盡日。仍賜衣服，又賜醕庶老及篤廢疾男女孝順義節一千二百八十人于毬庭廊下，西京及諸州郡亦同日賜醕。

乙酉，宋商傅男等來獻方物。

丁亥，制：“兩京及東南州府郡縣一家有三子者，

許一子年十五剃髮爲僧。”

九月丙申，契丹東京回謝使檢校右散騎常侍耶律延寧來。

冬十月甲申，契丹多于伊、男于陵等二人來投。

十一月乙巳，設八關會，幸法王寺。

甲寅，東女真歸德將軍毛下等二十四人、正甫高史等二十三人來獻駿馬。

十二月辛酉朔，日食。

契丹遣檢校司徒耶律德來賀生辰。

慮囚。

（庚子）十四年春正月辛卯朔，放朝賀。

癸丑，設天帝釋道場于文德殿七日。

二月癸亥，幸長源亭。

甲戌，燃燈，王如奉恩寺。

三月丁巳，以李靖恭爲侍御史。

夏四月己未，以王寵之守太尉，金元鼎守司徒，金顯守司空。

五月甲午，親醮于毬庭。

六月庚午，以金義珍知尚書吏部事，楊國楨知御史臺事。

秋七月乙巳，宋商黃助等三十六人來獻土物。

癸丑，東南海船兵都部署奏：“對馬島歸我飄風人禮成江民位孝男。”王賜使者禮物優厚。

八月戊午，制曰：“自夏涉秋，霖雨不止，慮有冤枉，以傷和氣，令御史中（承）〔丞〕朴忠、左副承

宣姜源廣、左拾遺崔錫、神虎衛大將軍曹玉慮囚。”

癸亥，宋商徐意等三十九人來獻土物。

乙亥，宋商黃元載等四十九人來獻土物。

九月戊戌，東女真懷化將軍阿蘭等十九人來獻土物。

癸卯，以宋進士盧寅有文才授秘書省校書郎。

乙巳，以異惟忠爲中樞院使。

癸丑，慮囚。

冬十一月庚寅，契丹宣賜使高州管內觀察使蕭奧來。

戊戌，設八關會，幸法王寺。

東女真歸德大將軍阿家主等三十七人來獻土物。

十二月丙辰朔，契丹遣永州管內觀察使耶律烈來賀生辰。

甲子，內史門下省火，延燒會慶殿東南廊。

（辛丑）十五年春正月戊子，太白晝見。

癸丑，以異惟忠爲刑部尚書，金化崇爲翰林學士，王懋崇爲戶部尚書判御史臺事，金元晃爲兵部尚書。

二月辛酉，以任從一爲尚書左僕射中樞使。

癸未，制曰：“刑政，王化所先，峻則民殘，寬則民慢。刑得其中，陰陽和而風雨順；法失其宜，怨氣積而災眚作。虐臣酷吏，世常有之。朕邇追訓誥，篤慎典刑，每慮臣虐吏酷，不得其中。自今秋部員吏，精擇委任，使無冤獄。”

三月壬辰，以崔順漢爲戶部尚書、鄭層攝工部



尚書。

丁酉，以去年門下省直宿日有火災，降參知政事金顯爲左僕射、右散騎常侍崔爰俊判少府監事。

己酉，賜羅繼含等及第。

夏四月丙辰，契丹東京回禮使檢校工部尚書蕭噉思來。

甲戌，以張仲英爲工部尚書。

六月癸丑，王如奉恩寺，遂詣國子監。謂侍臣曰：“仲尼百王之師，敢不致敬。”遂再拜。

丁巳，以宋進士陳渭爲秘書校書郎，蕭鼎、蕭遷爲閣門承旨，葉盛爲殿前丞旨。渭有文藝，鼎等三人曉音律。

己卯，以弟內史令基改爲中書令，其餘嘗爲內史者皆改中書。

秋八月壬子，東路兵馬使奏：“定州別將耿甫率二十餘人偵賊，忽遇賊魁阿下費等二百餘人，與戰敗之，斬十數級，請賞其功。”從之。

以金行瓊爲翰林學士。

戊辰，以崔惟善判尚書禮部事。

丙子，宋商郭滿等來獻土物。

閏月辛巳朔，告朔于太廟。

九月丁卯，都兵馬使奏：“賊酋阿羅弗等犯境劫掠邊民，平虜鎮兵馬錄事康瑩、西北面兵馬錄事高慶仁率兵追及降魔鎮敗之，斬獲數十級，多收兵仗，合示褒賞。”從之。

戊寅，以任從一參知政事、王懋崇知中樞院事。

冬十月丁未，以韓敘功檢校司空守尚書左僕射。

十一月庚戌朔，以崔有孚、金陽爲太子左右庶子，崔尚、李攸績爲左右諭德，朴忠爲中允，鄭功志、黃抗之爲左右贊善大夫。

辛未，以崔惟善參知政事權判翰林院事。

十二月庚辰朔，契丹遣檢校太傅、寧州刺史蕭述來賀生辰。

丙申，以王寵之爲門下侍中、判尚書吏部事，金元鼎爲門下侍郎、同中書門下平章事，崔惟善爲中書侍郎、同中書門下平章事，異惟忠參知政事、柱國，金元晃爲中樞院事，金義珍爲左散騎常侍、同知中樞院事，金良贊爲御史大夫。

丙午，以宋人蕭宗明權知閤門祇候。

（壬寅）十六年春正月壬戌，東京回禮使、檢校尚書、右僕射耶律章來。

罷金元鼎出爲西京留守使。

二月己亥，冊子燾爲檢校尚書令守司徒。

乙巳，耽羅高叶等來獻土物。

夏六月丙子朔，東女真歸德將軍分大等來朝。

乙巳，以禮賓卿知御史臺事崔賞知西北面秋冬番兵馬事，禮部侍郎左諫議大夫洪德威爲東北面秋冬番兵馬副使。

秋七月庚申，中樞使兵部尚書金元晃卒，謚毅敬，官其一子。

壬申，東女真毛乃等來朝。

八月戊寅，東女真勒於乙、于毛乃等來朝。

乙酉，幸興王寺。制曰：“是寺鳩孱已久，巨構將成。今親觀厥功，特申異數。應內外重刑並降從流配，公徒私杖以下，咸赦除之。董役官吏並加爵賞。”

壬寅，開城侯暄卒。

冬十月己卯，耽羅星主高逸來獻方物。

庚子，東女真歸德大將軍摩里害、阿加主來朝。

十二月甲戌朔，契丹遣泰州管內觀察使高守正來賀生辰。

（癸卯）十七年春正月癸卯朔，宴群臣于乾德殿，賜帛有差。戊申，三司奏：“翼嶺縣及西北面成州簞田場地產黃金，請附貢籍。”

二月甲戌，以刑部侍郎、右諫議大夫李攸績爲西北面春夏番兵馬副使，少府少監李得路爲東北面春夏番兵馬副使。

丁丑，東女真歸德將軍懷化等來獻駿馬。

己丑，東女真歸德將軍霜昆等來獻良馬。

庚寅，以蔣英爲侍御史，尹祚明爲殿中侍御史。

三月丙午，契丹送《大藏經》，王備法駕迎于西郊。

辛亥，耽羅新星主豆良來朝，特授明威將軍。

夏四月乙亥，賜太子秘閣“九經”及史傳百家書。

辛丑，以李璜爲戶部尚書，朴希仲攝工部尚書。

五月甲辰，御文德殿覆試，賜洪器等及第。

秋七月庚申，以太僕卿閔昌素知西北面秋冬番兵馬事，尚書右丞金錫祚爲東北面秋冬番兵馬副使。

戊辰，以金元鼎守太尉門下侍中，尋卒。

八月辛卯，以王懋崇爲東北面行營兵馬使，異惟忠判三司事西北面中軍兵馬使，王夷甫兼西京留守使。

九月庚子，制曰：“今歲雨澤不降，西成未期，其令州郡預備救荒。”

壬寅，宋商郭滿等來獻土物。

庚戌，加朴成傑檢校太尉、門下侍中，任從一中書侍郎平章事、柱國，並依舊致仕。

冬十月庚午，宋商林寧、黃文景來獻土物。

壬辰，幸長源亭。

十一月癸卯，契丹遣益州刺史蕭格來聘。

甲子，東女真歸德將軍摩離害、綏遠將軍多老大等來朝。

十二月戊辰朔，契丹遣右諫議大夫李日肅來賀生辰。

丙戌，以兵部侍郎鄭同祚充西京副留守，太府少卿朴臣厚充東京副留守。

（甲辰）十八年春正月丁酉朔，放朝賀。

辛酉，西北路兵馬使奏：“去壬寅年蒙浦村賊謀侵我疆，潛入平虜鎮，設伏折衝、降魔兩戍間。有化內番長齊俊那知之，來告鎮將，先伏兵草莽以待之，賊果突入，我兵齊發，俘斬甚多，請厚賞俊那金帛。”從之。

(三)〔二〕月癸酉，制曰：“准舊例發遣春秋外山祭告使一十餘道，使命煩多，驛路凋弊。自今東北兩界監倉使洹西道按察使皆兼祭告使，其山南諸道依舊遣使，以爲恒式。”

三月甲寅，設仁王道場于會慶殿三日，飯僧一萬於毬庭。

夏四月庚午，制：“大雲寺先王始創，以福邦家，其所給公田地瘠稅少，齋供不周，加賜良田一百頃。”

庚寅，制：“自五月十五日至七月十五日於臨津普通院設粥水蔬菜，以施行旅。”

五月乙巳，命參知政事異惟忠饗西女真寧遠將軍高之知等十三人于禮賓寺，賜例物。

閏月戊辰，東女真賊首麻叱蓋等百餘人航海寇平海郡南浦，燒民家，擄男女九人。

辛未，兵部奏：“軍班氏族成籍既久，蠹損朽爛，由此軍額不明，請依舊式，改成帳籍。”從之。

六月辛丑，都兵馬使奏：“賊首麻叱蓋等入寇平海，守邊員將不能追捕，請令憲司斷罪。”從之。

秋七月丁卯，東北面兵馬使奏：“豸豸縣曾於戊子年被東藩海賊攻劫，殺傷男女百餘人。今春又有山火延燒城堡倉庫及民居，再經禍亂，民不安居，請徙城之，以扼海賊之衝。”詔移于陽村，在舊城南二千餘步。

丙戌，宋商陳鞏等來獻土物。

庚寅，太僕寺奏：“請依舊例遣六道選馬使。”

從之。

八月甲午朔，宋商林寧等來獻珍寶。

冬十月丙辰，契丹遣檢校右散騎常侍耶律亘來，詔曰：“朕荷累聖之鴻休，纘一寧之嘉祚，勵精求理，寅畏居懷，十稔于茲，四方大定。圓極祐曆，繼薦瑞於昌期；群辟拜章，議推功於眇德。勤請彌切，牢讓靡遑，俯徇輿情，勉應徽號，已定次年元日行禮。卿稱藩作翰，事上輸忠，聞究盛儀，諒增同慶。今差禮賓使耶律亘齎詔往彼示諭，想宜知悉。”

十一月己卯，以太子納妃告景靈殿。

壬午，戶部奏：“廣州牧自春至秋，久旱不雨，重以雨雹，闔境禾穀一無所收。又鳳州曾於庚子年大水，廬舍禾稼漂蕩幾盡，民無定居，請停兩官，轄下發使量田。”從之。

十二月壬辰朔，契丹遣司農卿胡仲來賀生辰。

契丹高奴等三人、黑水包棄等八人來投。

（乙巳）十九年春正月辛酉朔，放朝賀。

甲申，東女真尼之達等十六人來獻駿馬。

（三）〔二〕月辛卯朔，東女真首領霜昆等二十二人來獻土物。

辛丑，東女真將軍阿符漢、吳火文等二十七人來獻良馬。

甲寅，冊子熙爲守仁保義功臣、開府儀同三司、守司空兼尚書令、上柱國、雞林侯，食邑一千戶。

己未，契丹東京留守牒報冊上皇太后尊號“慈懿

仁和文惠孝敬顯聖昭德廣愛宗天皇太后”，加上皇帝尊號“聖文神武全功大略聰仁睿孝天祐皇帝”。

夏四月癸巳，契丹遣耶律寧、丁文通來冊王，詔曰：“卿忠勤奉上，熙洽逢辰。展縟憲於曲臺，既增殊號；霈鴻恩於遐域，式表同休。往陳冊拜之儀，優示頒宣之命。用昭溫眷，當体至懷。今差寧遠軍節度使耶律寧、益州管内觀察使丁文通充封冊使副，並賜卿冠服、車輅、銀器、匹段、鞍馬、弓箭、酒等，具如別錄，至可領也。”冊曰：“朕誕膺駿命，慎守丕圖。上則荷累聖之貽謀，采昌運祚；下則親諸侯而立國，廣樹藩維。其有嗣爵朱蒙，申疆玄菟，延世大開於王社，納忠遐獎於帝宸。適逢熙洽之期，載益厯鴻之號。縟儀束絕，方薄浹於殊休；懿冊編瓊，宜先加於異數。咨爾匡時致理竭節資忠奉上功臣、開府儀同三司、守太師中書令兼尚書令、上柱國、高麗國王，食邑二萬戶，食實封二千戶王，慶鍾奕葉，道冠生民。維岳降神，素推於雄傑；自天生德，夙富於溫仁。而自表海襲封，帶河傳誓。化敷辰卞，洽宣綏撫之功；業茂桓文，妙盡修輪之節。任土述賓王之職，守方遵請朔之文。爰尚周勤，靡忘欽顧。乃者，勉從群請，增上諱稱，載惟匡合之謀，特降褒崇之命。既念功而錫號，仍與邑以疏封。是用遣使寧遠軍節度使耶律寧、副使益州管内觀察使丁文通等，持節備禮，冊命加爾守正保義四字功臣，食邑三千戶，食實封三百戶，餘如故。於戲！高而愈卑，持盈之格訓；小則事大，保國之令

猷。王其表率一方，儀刑群岳，勿爽慎終之道，勿愆效順之誠。繼汝先風，爲予外蔽，寶是敕戒，永孚于休。”庚子，王受冊于南郊，其賜物則九旒冠、九章服、玉圭玉冊、象輅、衣襪、匹段、弓箭、鞍馬等物。又遣耶律迪、麻晏如冊王太子，詔曰：“卿鑿楹稟訓，早居世子之榮；繼組分封，爰列上公之爵。束蒨屬行於盛禮，編筠思洽於洪恩。兼示頒霑，用昭眷矚。今差利州管內觀察使耶律迪、衛尉卿麻晏如等充封冊使副，賜卿冠服、車輅、銀器、匹段、鞍馬、弓箭、酒等，具如別錄，至可領也。”冊曰：“朕奉圓靈之休命，承列聖之慶謀。內則懷帝室之茂親，方深雍睦；外則眷王藩之令胄，更厚撫綏。其有玉蔓延華，珠躔挺粹，然毓躬於震域，諒馳懇於宸庭。會逢父靖之期，增峻龐鴻之號，宜加異數，用浹殊休。咨爾順義軍節度、朔武等州觀察處置等使、崇祿大夫、檢校太尉、同中書門下平章事、使持節、朔州諸軍事、行朔州刺史、上柱國、三韓國公，食邑三千戶，食實封五百戶王勳，國棟奇材，天球偉器，挹清猷而照俗，包茂略以經時。識君臣父子之儀，知禮樂詩書之教。矧夙推於令譽，嘗優被於恩章，進秩國公，協親藩后。碧幢按部，操節制之雄權；黃閣調元，領平章之鉅任。而能寬以涵物，原而律身，載量英敏之才，爰降寵嘉之典。榮飛鳳紵，貴珥貂綏，兼益崇階，併昭盛紀。是用遣使利州管內觀察使耶律迪、副使守衛尉卿麻晏如，持節備禮，冊命爾爲兼侍中加特進，餘如故。於戲！



一時之遇，千古所稀。念繼世之勳，予不忘於獎邵；懸匡邦之志，爾宜盡於勤能。無恃寵以驕人，勉竭忠而奉主。服是不訓，永保休貞。”癸卯，太子受冊于南郊，其賜物則九旒冠、九章服、牙笏、竹冊、革輅、衣襪、匹段、鞍馬、弓箭、酒等物。

五月癸酉，御景靈殿召王師爛圓，祝子煦髮爲僧。己卯，幸靈通寺。

六月甲午，御文德殿覆試。侍御史盧旦奏事忤旨，王怒不設科，惟取十上不第者，賜李元長等恩賜及第。

辛亥，東女真懷化將軍仍蔚等十七人來獻駿馬。

秋七月，自春涉夏雨澤未洽，至是甘霖霈然，命近臣賦《喜雨詩》。

乙亥，幸東池，御龍船置酒。太子、宗室侍宴，夜分乃罷。

八月丙午，遣尚書右僕射金良贄、殿中少監徐靖如契丹謝冊命。

九月癸未，宋商郭滿、黃宗等來獻土物。

遣禮部尚書崔尚、將作少監金成漸如契丹謝太子冊命。

冬十二月丙戌朔，契丹遣左諫議大夫傅平來賀生辰。

（丙午）二十年春正月丙辰朔，放朝賀。

乙亥，制：“自今年，限三年禁中外屠殺。”

己卯，以金良儉爲春夏番知西北面兵馬事。

二月己亥，雲興倉災。

辛亥，制曰：“雲興倉之災，官失其守，以積年之所畜，棄一夜之橫災，可不痛哉。此後凡倉廩府庫，別置禁火員吏，御史臺以時點檢。闕日直者，勿論官品，先禁後聞。”

三月戊午，親醮于毬庭。

丁丑，有星出乾方，大如月，俄變爲彗孛。

契丹復國號曰大遼。

夏四月庚寅，京城地震。

癸巳，再雪。

壬寅，制：“以近侍爲京城左右倉及龍門雲興倉別監。”

癸卯，禘于太廟及別廟。

賜高仲臣等及第。

甲辰，遣司宰卿高復昌如遼，賀改國號。

丙午，攝太僕卿李聰顯以疎慵不勤免。

五月乙卯，制：“改國原侯名蒸爲祁。”

禱雨于川上。

秋七月甲寅，詔曰：“孟秋之月，成熟之時，餘陽用事，旱氣猶深。此必刑罰有失，冤抑所致。朕霄旰思慮，未獲寧居。凡中外百司，審刑察獄，罔有冤濫。”

九月乙丑，幸王輪寺。

庚辰，幸妙通寺，設摩利支天道場。

冬十一月壬子，遼橫賜使歸州刺史耶律賀來。

十二月辛巳朔，遼遣崇祿卿王去惑來賀生辰。

(丁未)二十一年春正月庚戌朔，放朝賀。

庚申，興王寺成。凡二千八百間，十二年而功畢。王欲設齋以落之，諸方緇流坌集無算，命兵部尚書金陽，右街僧錄道元等擇有戒行者一千赴會，仍令常住。

戊辰，特設燃燈大會於興王寺五晝夜，敕令百司及安西都護，開城府廣、水、楊、東、樹五州，江華、長湍二縣，自闕庭至寺門，結綵棚，櫛比鱗次，連亘相屬，輦路左右又作燈山火樹，光照如晝。是日，王備鹵簿，率百官行香，施納財襯，佛事之盛，曠古未有。

辛未，御帳殿于神鳳樓東，宴群臣。

丙子，謁昌陵，賜執事者爵一級，侍從軍士賜物有差。

閏月丁亥，東女真懷化將軍仍蔚等二十二人來獻土物。

二月己酉朔，御神鳳樓，以興王寺成肆赦。

庚午，制：“自今諸州縣勿貢魚脯。”

三月己丑，中書令致仕王寵之卒。

癸巳，制：“故門下侍中崔沆、姜邯贊，參知政事金猛，清節直道，歷輔累朝，功在方策。今四方樂康，民受其賜，皆諸公之力也。可贈沆、邯贊守太師兼中書令，猛太子太師門下侍中。”

戊戌，幸長源亭。

乙巳，制：“漕運雜穀四萬九千四百石于朔北諸州郡，以給邊民。”

夏五月戊戌，宴國老於閣門，賜衣物。

六月辛酉，王受（普）〔菩〕薩戒于乾德殿。

秋七月癸巳，太白晝見。

九月乙酉，幸松岳亭置酒，命詞臣賦詩。

丁酉，國師海麟請老還山，王親餞于玄化寺，賜茶藥、金銀器皿、綵段、寶物。

冬十二月乙巳朔，遼遣寧川管內觀察使胡平來賀生辰。

（戊申）二十二年春正月甲戌朔，日食。

丁丑，東女真歸德將軍霜鯨等來朝。

癸巳，幸興王寺，設慶成會，信宿乃還。

丁酉，以崔惟善判尚書吏部事，王懋崇判尚書刑部事，金義珍判尚書兵部事，餘並如故。

戊戌，以金行瓊爲兵部尚書，李頌爲右散騎常侍。

二月辛亥，以將作監全錫祚知西北面春夏番兵馬事，太府少卿李徵望爲東北面春夏番兵馬副使。

三月丁卯，耽羅星主游擊將軍加也仍來獻土物。

夏四月甲子，以崔尚同知中樞院事。

丙寅，御文德殿覆試，賜崔駟等及第。

五月甲午，制曰：“自春徂夏，時雨愆期，驕陽肆威，稼穡焦槁。此蓋寡人涼德，致茲咎徵，思欲側身，用答天譴。自今日以前，內外雜犯，公流私徒以下，罪皆原之。”

六月壬寅，東女真歸德將軍安矩等來朝。

庚申，東界兵馬使奏：“判官任希悅、錄事鄭申、

將軍巨興等乘戰艦巡行椒島，遇賊船十艘，與戰，敗之，獲七艘，俘斬甚多。”王嘉之，賜希悅等便服一襲，金鍍銀帶一腰。諸有戰功者，悉加爵賞。

秋七月辛巳，宋人黃慎來見，言：“皇帝召江淮兩浙荆湖南北路都大制置發運使羅拯曰：‘高麗古稱君子之國，自祖宗之世，輸款甚勤，暨後阻絕久矣。今聞其國主，賢王也，可遣人諭之。’於是拯奏遣慎等來傳天子之意。”王悅，館待優厚。

宋商林寧等來獻土物。

丁酉，東界兵馬使奏：“判官任希悅、都部署副使裴行之、元興鎮副使石秀珪等又巡椒島，夜至閭羅浦遇賊船八艘，擊破三艘，餘賊登岸奔潰，追斬三十餘級。”王厚加爵賞。

八月丁巳，命太子召宋進士慎修、陳潛古、儲元賓等試詩賦於玉燭亭。

己未，以姜源廣爲御史大夫。

庚申，以衛尉卿文揚烈知西北面秋冬番兵馬事，刑部侍郎洪德威爲東北面秋冬番兵馬副使。

九月甲申，守太師中書令致仕崔冲卒。

冬十月乙卯，東女真懷化將軍阿隣等來朝。

十二月己亥朔，遼遣益州管內觀察使魏成來賀生辰。

戊申，尚書左僕射王顯三上章乞退。

是歲，創新宮于南京。

（己酉）二十三年春正月戊子，東女真懷化將軍沙

於賀來朝。

二月戊午，以太僕卿河周呂知東北面春夏番兵馬事，太府少卿朴陽旦爲西北面春夏番兵馬副使。三月己巳，幸興王寺，登南峰禊飲，製《上巳詩》，命侍臣和進。

夏四月，旱。

癸卯，幸真觀寺。

五月庚辰，幸長源亭。得瑞文石于亭下淵中，命文臣進謠詩。

甲申，禱雨。

癸巳，以鄭惟產爲尚書左丞右諫議大夫，楊稚春爲侍御史，韓億、李德昇並爲殿中侍御史，孫冠爲左補闕，趙倫簡、沈周贊並爲監察御史。

六月壬寅，宋商楊從盛等來獻土物。

秋七月乙丑朔，日食。

丁丑，宋商王寧來獻土物。

癸巳，以尚書左丞右諫議大夫鄭惟產爲西北面秋冬番兵馬副使，兵部侍郎李澄望爲東北面秋冬番兵馬副使。

冬閏十一月丁酉，王弟平壤公基卒。

十二月癸亥朔，遼遣御史中丞高聳來賀生辰。

遼東京回禮使檢校右僕射耶律極里哥來。

（庚戌）二十四年春正月癸巳朔，放朝賀。

庚子，星隕于大丘縣，化爲石。

己酉，以金良鑑爲尚書右丞左諫議大夫，李靖恭

爲翰林學士，金拱爲右副承宣，朴德英爲右補闕，康安庶爲殿中侍御史，金銳、金上琦爲左右補闕。

二月丙寅，幸興王寺。以新創慈氏殿設慶成大會，經宿而還。

壬申，燃燈，王如奉恩寺。癸酉，大會，王與太子、諸王、侍臣宴于重光殿，至曉乃罷。以寒食在十五日，國忌在十三日，乃用十二日爲燈夕。

三月己未，以金德符爲太子賓客。

夏四月辛酉朔，王曲宴于賞春亭，令太子、諸王、侍臣各賦《賞花詩》。

辛未，禱雨于川上。

壬申，以兵部侍郎、左諫議大夫文正爲西北路兵馬副使，秘書少監高維爲東北路兵馬副使。

丙子，御文德殿覆試，賜崔翼臣等及第。

五月壬寅，王出子窺于玄化寺剃髮爲僧。

六月，城興王寺。

秋七月乙未，以尚書右丞諫議大夫金良鑑爲西北路兵馬副使，戶部侍郎金若珍爲東北路兵馬副使。

八月辛未，平章事致仕金義珍卒。

己卯，御史大夫姜源廣卒。

宋湖南荆湖兩浙發運使羅拯復遣黃慎來。

制：“西女真酋長懷德，父尼于弗自先朝有邊功，授懷德奉國將軍。”

九月丙申，王宴于賞春亭，命近臣賦詩，夜分乃罷。

冬十月庚午，王如玄化寺。

十一月甲午，置固守炭鐵庫于京城四面。

十二月丁巳朔，遼遣衛尉卿和勗來賀生辰。

（辛亥）二十五年春正月丁亥朔，放朝賀。

己亥，以金行瓊爲尚書左僕射、判尚書刑部事，崔有孚爲尚書右僕射，洪德威爲兵部尚書，鄭惟產爲翰林學士。

辛丑，以金良鑑爲尚書左丞知御史臺事，盧寅爲尚書右丞左諫議大夫。

壬寅，以子琇爲檢校尚書令、守司空，崔惟善守司徒，異惟忠守司空。

壬子，以金行瓊參知政事。

癸丑，西女真懷化將軍紛泰等來獻土物。

二月辛未，燃燈，王如奉恩寺。

戊寅，特設燃燈會，謁景靈殿。

三月庚寅，遣民官侍郎金悌奉表禮物如宋。初，黃慎之還，移牒福建，請備禮朝貢。至是，遣悌由登州入貢。

戊戌，追贈姜源廣太子太師。

辛丑，東女真歸德將軍霜昆等二十二人購還我被虜人。

戊申，幸大安寺。

夏四月壬戌，雩。

丁卯，西女真酋長奴于達等十人來獻土物，各賜職。



癸酉，親醮于毬庭。

戊寅，幸王輪寺。

壬午，西女真酋長麻胡達等十八人來獻土物，加歸德將軍，賜例物。

五月乙酉，以王懋崇爲中書侍郎、同中書門下平章事、判尚書兵部事。

丁亥，禱雨于川上。

癸巳，西女真裒演等來朝，優加職賞。

戊戌，憲司奏：“宋人禮賓省注簿周沆，本以文藝見用，今犯賊，請收職田遣還。”制可。

辛亥，王如玄化寺。

六月庚申，以鞍工宋由乃三韓功臣、太傅蘇格達玄孫，特免其役，許入仕。

甲子，禱雨于川上。

秋七月甲申，幸王輪寺。

八月辛酉，東女真歸德將軍高舍等十五人來獻土物。

丙子，懷化將軍沙於賀等二十人來獻良馬。

丁丑，宋商郭滿等三十三人來獻土物。

九月乙酉，宋商元積等三十六人來獻土物。

庚寅，王以重陽御賞春亭，宴太子及雞林侯、平壤侯、宰相異惟忠、王懋崇等，各賜馬一匹。

丁酉，宋商王華等三十人來獻土物。

冬十月乙卯，宋商許滿等六十一人來獻土物。

十一月乙未，設八關會，幸法王寺。

辛丑，西女真酋長漫頭弗等率衆來投，職賞有差。

壬寅，西女真酋長幼主等十人、東女真酋長多盧昆、霜鯨等五十八人來獻土物。

丙午，守司徒庾高滿卒。

十二月辛亥朔，遼遣益州刺史高元吉來賀生辰。

丙子，以柳洪爲給事中左承宣，殷鼎爲秘書少監右副承宣。

## 高麗史九

### 世家卷第九

#### 文宗三

（壬子）二十六年春二月辛亥朔，詔禮部重定禮服制度。

丁巳，幸興王寺。

丙寅，以兵部侍郎文正爲西北面兵馬副使，戶部侍郎閔昌壽爲東北面兵馬副使。

壬申，東女真麼豆漢等二十五人來投。

甲戌，特設燃燈會於重光殿。

三月癸巳，以金德符爲尚書右僕射，李聰顯爲禮部尚書，金陽爲工部尚書。

甲午，幸真觀寺。

庚子，御文德殿覆試，賜朴維恪等及第。

夏四月甲子，大雨雹。

己巳，中書侍郎平章事異惟忠卒。

五月丙申，西女真歸德將軍麼舍乃等來獻土物。

六月庚戌，宋遣醫官王愉、徐先來。

甲戌，金梯還自宋，帝附敕五道。其一曰：“卿繼奕世而有邦，以勤王爲可願。百名修貢，既申琛贄之儀；累幅摛辭，更致燠寒之問。其勤至矣，何慰如之。”其二曰：“卿世綏三韓，雄視諸部而能謹事大之節，堅面內之誠。乃心朝廷，寔發寤寐，有嘉侯庶，克紹先猷，省閱以還，褒嘆良至。”其三曰：“忠孝之純，雖遠而應；往來之尚，無德不酬。載嘉述職之勤，宜有解衣之錫。今人使金梯回賜國信物色，別賜衣帶錦綺等，具如別幅<sup>〔1〕</sup>，至可領也。”其四曰：“人使金梯至，省所進奉：御衣二領，黃罽衫一領，銷金紅羅袂複，紅罽便服一領，銷金紅羅袂複，共用銀鈹鏤裝烏漆箱盛，金鍍銀鑲鑰封，全紅梅花羅袂帕外羃，金腰帶一條，重四十兩；紅羅繡袂袋銀鈹鏤匣，重八十兩；紅羅繡袂複封，全紅梅花羅袂帕外羃，金束帶一條，重三十兩；紅羅繡袂袋銀鈹鏤匣，重六十兩；紅羅繡袂複封，全紅梅花羅袂帕外羃，金合二副，共重六十兩；各副盛罽勒帛二條，罽袂袋子二枚，銷金紅梅花羅袂複封，全共用紅梅花羅袂帕外羃，金盤盞二副，共重四十兩；紅梅花羅袂複封，全共用紅梅花羅袂帕外羃，金注子一副，重六十五兩；紅梅花羅袂複封，全紅梅花羅袂帕外羃，金鋸鑼一隻，重一百五十

〔1〕 原作“帕”，疑誤，今改。

兩；紅梅花羅袂複封，全紅梅花羅袂帕外羈，紅罽倚背六隻，紅梅花羅袂複，黃罽倚背四隻，紅梅花羅袂複，紅罽褥六隻，紅梅花羅袂複，黃罽褥四隻，紅梅花羅袂複，共用銀鍍裝烏漆箱二副盛，銀鑲鑰封，全紅梅花羅袂帕外羈；細弓四張，共用紅梅花羅袂袋盛；哮子箭二十四隻、細鏃箭八十隻、金鍍銀裝罽器仗二副、紅錦袂袋封；全白銀裝黑皮器仗一副、紅錦袂袋封；全金鍍銀裝白皮器仗一副、紅錦袂袋封，全共用紅梅花羅袂帕外羈；銀裝長刀二十隻、銀鍍鏤裝烏漆鞘綵條全白錦外袋十個封、全青錦外袋十個封，全共用紅梅花羅袂帕外羈；細馬四匹、鞍二副、金鍍銀橋瓦鉸具、罽大小韉鑣、紅羅鞍褥等、全紅羅繡袂帕外羈；鞍二副、銀鍍鏤橋瓦鉸具、黑皮大韉、紅羅小韉、紅羅鞍褥等，全紅羅繡袂帕外羈；香油二十缸，松子二千二百斤，人參一千斤，生中布二千匹，生平布二千匹，事具悉。卿世撫遼東，寔冠帶禮義之國；心存闕下，希文物聲明之風。爰遣使人，遐將貢篚。承考惟孝，事大則忠。發於至誠，輶是雙美。覽閱之際，嘉嘆良多。今使回賜卿銀器等，具如別幅，至可領也。”其五曰：“省人使金梯奏：‘於普炤王寺等處納附銀設齋祝聖壽事。’箕子啓封，肇於遼左；僧伽演教，迫在泗濱。會使指之來斯，致齋修而勤甚。載披善祝，益炤端誠。”帝以本國尚文，每賜書詔，必選詞臣著撰而擇其善者。所遣使者，其書狀官必召赴中書試以文，乃遣之。

秋七月癸巳，以翰林學士國子祭酒鄭惟產知西北面秋冬番兵馬事，兵部侍郎李碩爲東北面秋冬番兵馬副使。

丙午，校尉巨身謀逆伏誅。

閏月甲寅，以崔有孚判尚書刑部事。

九月甲子，東女真霜昆等來獻駿馬。冬十一月丙午朔，遼遣永州刺史耶律直來行三年一次聘禮。

十二月乙亥朔，遼遣檢校太尉張日華來賀生辰。

庚寅，東女真沙於賀等來獻土物。

戊戌，以李徵望爲兵部尚書。

（癸丑）二十七年春正月乙巳朔，放朝賀。

地震。

戊辰，王如普濟寺。

二月乙亥朔，命有司作亭于平理驛，以爲行幸駐蹕之所。

戊寅，以鄭惟產攝刑部尚書，盧寅爲殿中監，柳洪爲兵部侍郎中樞院知奏事。

甲申，幸興王寺。

乙未，東女真歸順州都領大常古刀化、副都領古舍，益昌州都領歸德將軍高舍、都領黔夫，甌城州都領奉國將軍耶好、歸德將軍吳沙弗，恭州都領奉國將軍多老、番長巴訶弗，恩服州都領元甫阿忽、都領那居首，温州都領三彬、阿老大，誠州都領尼多弗等率衆內附，乞爲郡縣。賜古刀化名孫保塞、高舍名張誓忠，各授懷化大將軍；耶好名邊最、多老名劉咸賓、

各授奉國大將軍；吳沙弗名魏蕃，授懷化將軍；阿忽名揚東茂，授歸德將軍；古舍名文格民、黔夫名康績、巴（阿）〔訶〕弗名盧守、那居首名張帶垣、三彬名韓方鎮、阿老大名高從化、尼多弗名趙長衛，各授大常，仍賜物有差。

城州都領奉國大將軍蘇德等十四人來獻名馬。

丁酉，王如奉恩寺，特設燃燈會，慶讚新造佛像。街衢點燈兩夜，各三萬盞。重光殿及百司各置綵樓燈山作樂。戊戌，御殿觀燈置酒，太子及宰樞、臺省侍臣、知制誥侍宴，夜分乃罷。

三月己酉，設《般若經》道場于會慶殿五日，以禳災變。

丁巳，幸開國寺。

丁卯，幸弘化寺，遂如玄化寺置酒蓬萊亭，夜分乃還。

夏四月甲戌朔，日食。

丙子，制曰：“東北邊十五州外蕃人相繼歸附，願置郡縣，于今不絕，此實賴宗廟社稷之靈。其令宰臣先告事由，待遠近畢納款拓定州縣，而後親行恭謝，其行禮及太子攝事之儀，有司詳議以聞。”

壬辰，幸龜山寺，遂置酒于龜臺，太子、諸王、宰樞侍宴，夜半乃還。

丁酉，幸外帝釋院。

五月丁未，西北面兵馬使奏：“西女真酋長曼豆弗等諸蕃請依東蕃例分置州郡，永爲藩翰，不敢與契丹

蕃人交通。”制：“許來朝。因命後有投化者，可招諭而來。”又奏：“平虜鎮近境蕃帥柔遠將軍骨於夫及覓害村要結等告云：‘我等曾居伊齊村爲契丹大完職名，邇者再蒙招諭，於己酉年十一月赴朝，厚承恩賚，且受官職，不勝感戴。顧所居去此四百里往復爲難，請與狄耶好等五戶引契丹化內蕃人內徙覓害村附籍，永爲藩屏。’於是檢得戶三十五、口二百五十二，請載版圖。”蕃帥又言：“三山村谷海邊分居蕃賊殺掠往來人物，爲我仇讎。今欲報讎，告諭化內三山村中尹夜西老等三十徒酋長，東蕃黑水人，其種三十，號曰三十徒。亦皆響應，各率蕃軍，方將進討，請遣鄉人觀戰。”於是遣定州郎將文選及將校譯語等著蕃服與那復其村都領霜昆下蕃軍同發，文選等馳報：“骨面等村都領各將兵到三山阿方浦探候賊穴，凡三所：一爲由戰村、一爲海邊山頭、一爲羅竭村。賊一百五十戶，築石城於川邊，置老小男女財產于城中，以步騎五百餘人逆戰。我蕃軍大呼急擊，彼衆大潰，斬二百二十級，餘衆走保其城。我蕃軍乘勝追擊，攻城縱火，生擒三百三十二人，在城拒戰者皆燒死。又進攻由戰村場，適有大雨，糧少引還。居數日，文選等復與蕃兵二千三十人進屯由戰村石城下，賊閉城固守，以城險竟不得攻，糧盡引還。”羅竭村之役，都領大完多於皆、阿半尼等蕃軍將六百八十餘人力戰破賊，文選等十五人監戰有功，請行恩賞，以示勸懲。”門下侍中崔惟善等十三人議奏：“三山村賊本非犯邊之寇也，今蕃軍等不因朝



旨，專仗闔威以報私讎，請勿行賞。”從之。

己酉，醮百神於毬庭，禳災變。

庚午，王如玄化寺。

六月甲戌，王如奉恩寺。

戊寅，東北面兵馬使奏：“三山、大蘭、支櫛等九村及所乙浦村蕃長鹽漢，小支櫛前里蕃長阿反伊，大支櫛與羅其那、烏安、撫夷州、骨阿伊蕃長所隱豆等一千二百三十八戶來請附藉。自大支櫛至小支櫛裹應浦海邊長城凡七百里，今諸蕃絡繹歸順，不可遮設關防，宜令有司奏定州號且賜朱記。”從之。

己卯，西京將軍柳涉防守鴨綠船兵有契丹人來投，其追捕者越入長城逼靜州，涉不能守禦，制：“令免官”。

乙未，東路兵馬使奏：“東蕃大齊、者古、河舍等十二村蕃長昆豆、魁拔等一千九百七十戶，請依霜昆例內附。又豆龍、骨伊、餘波漢等部落蕃長阿老漢等亦願爲州縣。此輩所處遼遠，在古未嘗朝覲，今皆歸服，若定封疆、設關防，則餘波漢嶺外齊遮古、大史伊、稱見、昆俊、丹俊、無乙比、化豆等壤地無際、蕃戶連居，不可窮塞設險，請待領外諸蕃盡爲州縣，然後漸至遠蕃。”許之。

丙申，兵馬使奏：“東蕃海賊，寇東京轄下波潛部曲，奪掠民口。元興鎮都部署軍將率戰艦數十艘出椒島與戰，斬十二級，奪俘十六人。”王喜，賜知兵馬事秘書監李成美、領軍都部署將軍廉漢等銀藥合各一事，

其餘有功將吏職賞有差。

庚子，祈晴于川上。

秋七月壬寅朔，有司言：“東北面兵馬使所奏：‘支櫛村、那發村、裏卧立村、大信村、西好村、無主其村等部落蕃長請貢方物名馬。’”制從之。

丙午，制曰：“黑水譯語加西老論東蕃，爲州縣，可授監門衛散員，賜名高孟。”

東南海都部署奏：“日本國人王則貞、松永年等四十二人來，請進螺鈿鞍橋、刀、鏡匣、硯箱、櫛書案、畫屏、香爐、弓箭、水銀、螺甲等物，壹歧島勾當官遣藤井安國等三十三人，亦請獻方物東宮及諸令公府。”制：“許由海道至京。”

八月丁丑，太白晝見。

丁亥，遣太僕卿金良鑑、中書舍人盧旦如宋謝恩，兼獻方物。宋醫王愉、徐先等還。

九月甲辰，翰林院奏：“東女真大蘭等十一村內附者請爲濱、利、福、恒、舒、濕、閩、戴、敬、付、宛十一州各賜朱記，仍隸歸順州。”從之。

戊辰，設消災道場于會慶殿五日。

冬十月壬午，冊封平壤侯琇，綵棚、樂部，供張甚盛，王率宮嬪、太子、諸王潛幸觀禮。

十一月辛亥，設八關會，御神鳳樓觀樂。翼日大會，大宋、黑水、耽羅、日本等諸國人，各獻禮物名馬。

十二月庚午朔，遼遣寧州刺史大澤來賀生辰。

丙申，以鄭惟產爲禮部尚書，崔惟吉爲戶部尚書，閔昌壽爲刑部尚書。

（甲寅）二十八年二月庚午，日本國船頭重利等三十九人來獻土物。

甲午，冊封長女爲公主。

夏四月戊辰朔，以旱，徙市。

甲戌，大雨，百官表賀。

乙酉，設百高座於內殿講《仁王經》三日。

甲午，命太子覆試，賜李岷等及第。

六月癸酉，東女真懷化將軍祖仰仁等來獻馬。

丙子，宋楊州醫助教馬世安等八人〔來〕。

秋七月己亥，以李徵望爲尚書右僕射，金若珍爲左散騎常侍，盧旦爲尚書禮部侍郎右諫議大夫。

庚子，設文豆婁道場於東京四天王寺二十七日，以禳蕃兵。

八月壬申，東女真歸德將軍所羅等二十八人來獻名馬，賜物有差。

辛卯，以李頌權西京留守使。

九月丙申，錄文昌侯崔致遠五代孫善之爲都染署史。

乙卯，西女真歸德將軍古守等十人來獻馬。

冬十二月甲子朔，遼遣崇祿卿賈詠來賀生辰。

（乙卯）二十九年春正月甲午朔，放朝賀。

壬寅，門下侍中崔惟善卒。

丙午，以李徵望爲尚書左僕射判兵曹事，鄭惟產

參知政事、監修國史，柳洪爲中樞副使。

三月己未，以鄭惟產爲太子少師，崔惟吉爲太子賓客。

夏四月丙寅，遣刑部侍郎崔奭如遼賀天安節，殿中內給事全咸正賀坤寧節，都官員外郎趙惟阜賀正，殿中侍御史許忠進方物。

丙戌，以旱，放諸處土木役夫。

閏月丙申，日本商人大江等十八人來獻土物。

五月辛酉朔，太史奏：“自春至夏，亢陽不雨，恐傷稼穡，請禱于丘陵川瀆。”制可。

乙酉，宋商王舜滿等三十九人來獻土物。

六月壬子，日本人朝元時經等十二人來獻土物。

丙辰，宋商林寧等三十五人來獻土物。

秋七月乙丑，遼東京兵馬都部署牒告改咸雍十一年爲太康元年。

庚午，日本商五十九人來。

癸酉，遼東京兵馬都部署奉樞密院劄子移牒請治鴨江以東疆域。己卯，遣知中樞院事柳洪、尚書右丞李唐鑑同遼使審定地分，未定而還。庚辰，以李頌爲中書侍郎、同中書門下平章事、上柱國，鄭惟產爲吏部尚書，金若珍爲戶部尚書、參知政事、權判三司事兼太子少保，文正爲刑部尚書知中樞院事，金悌爲禮賓卿同知、中樞院事，崔惟吉爲尚書右僕射，李靖恭爲禮部尚書、太子賓客，洪德成爲秘書監左諫議大夫兼太子少詹事。

八月庚寅朔，日食。

甲寅，以盧旦爲翰林學士，方吳桂爲戶部尚書，曹爲一攝工部尚書。

冬十月丙申，彗見于軫星，長七尺餘。

十一月乙亥，遼遣橫宣使益州管內觀察使耶律甫來。

十二月戊子朔，遼遣太傅武達來賀生辰。

丁未，以李頤判西北面兵馬事，金若珍判東北面兵馬事，崔惟吉、金陽爲尚書左右僕射，柳得韶爲工部尚書判司天太史局事，盧寅、金良鑑爲左右散騎常侍，崔奭爲殿中監知御史臺事，慎脩、盧師象並爲侍御史，金上琦、陳潛古爲左右補闕，李峻爲左拾遺，黃師霸、洪奭並爲殿中侍御史。

（丙辰）三十年春正月戊辰，東女真歸德將軍張向等十九人來獻駿馬。

己巳，以儲元賓爲右拾遺。

甲戌，東女真歸德將軍開老等十人來獻名馬。

二月丁亥朔，日食。

庚戌，東女真可封等二十人來獻土物。

三月壬申，御文德殿覆試，賜李昱等及第。

夏四月丁未，遼遣永州管內觀察使蕭惟康來告皇太后喪。詔曰：“昊天不弔，大行皇太后上僊，慈顏永訣，眇質疇依，攀戀所深，悲號無措。卿疏封王社，作翰皇家，聞報訃音，諒增哀懇。”己酉，王素瀾率百官出閣門前迎詔舉哀。

遣戶部尚書王錫、刑部侍郎李子威，如遼奉慰會葬。

六月己亥，王受菩薩戒于內殿。

秋八月丁亥，遣工部侍郎崔思諒如宋謝恩兼獻方物。

庚戌，有司奏：“北朝於定戎鎮關外設置庵子，請遣使告奏毀撤。”從之。

九月甲子，以李靖恭爲兵部尚書，文晃爲御史中丞，梁侯紹爲監察御史。

冬十月己丑，以朴寅亮爲右副承宣。

戊戌，有司奏：“日本國僧俗二十五人到靈光郡告曰：‘爲祝國王壽，雕成佛像。’請赴京以獻。”制：“許之。”

十一月庚午，日長至。制略曰：“一<sup>〔1〕</sup>陽布氣，萬物懷生，宜加含養，期致遂性。其令州府郡縣禁人漁獵，違者罪之。”

遼遣崇祿卿石宗回來致大行皇后遺留衣服、綵段、銀器，詔曰：“昊穹不弔，慈壺纏憂，痛極彌留，無所迨及，爰遵遺命，式示寵頒。”

十二月癸未朔，遼遣崇祿卿郭善利來賀生辰。

是歲，改官制。

（丁巳）三十一年春正月壬子朔，放朝賀。

壬戌，以李石爲工部尚書。

---

〔1〕 原作“二”，疑誤，今改。

二月乙未，燃燈，御重光殿觀樂。壬寅，王子國原公祁納妃，賜匹段、布貨、金器、鞍馬等物。

癸卯，特設燃燈會於重光殿三日。

丙午，東女真懷化將軍方鎮等二十人來獻駿馬。

三月甲寅，幸興王寺，轉新成金字《華嚴經》。

乙卯，以子朝鮮侯燾、雞林侯熙進爵爲公，忝檢校司空金官侯、愔檢校司空卞韓侯。

辛未，王巡京城西北察修築之狀，置酒日月寺西山。

丁丑，又巡東南，置酒望海山。

夏五月壬戌，以李頌守太師兼門下侍中，是日卒。

甲戌，王以顯考忌服素欄避正殿，令中外斷音樂、禁弋獵終月。

六月丁未，以母后忌，宰臣奉表陳慰，中外斷音樂。

秋七月己酉朔，宋商林慶等二十八人來獻土物。

八月辛卯，祈晴于川上。

羅州道祭告使太府少卿李唐鑑奏：“中朝使命往來，高巒島亭稍隔水路，船泊不便，請於洪州管下貞海縣地創置一亭，以爲迎送之所。”制從之，名亭爲安興。

九月辛亥，宋商楊從盛等四十九人來獻土物。

冬十一月丙辰，以鄭惟產判尚書禮部事，金行瓊判尚書兵部事，文正參知政事兼西京留守使，崔惟吉守司空判三司事，金悌爲左散騎常侍知中樞院事，金

良鑑同知中樞院事，盧寅爲禮部尚書。

乙丑，東女真歸德將軍康守等五十八來獻名馬。

十二月丁丑朔，遼遣檢校太傅楊祥吉來賀生辰。

耽羅國獻方物。

乙巳，以金若珍爲太子太保，文正爲太子少保，盧旦直門下省，崔奭爲左諫議大夫，吳英霸爲御史雜端，金爲鉉爲侍御史，洪器爲右補闕，楊信麟爲右拾遺。

（戊午）三十二年春二月丙辰，燃燈，以寒食故先三日而行。

夏四月乙巳，賜禹元齡等及第。

甲子，以宋帝節日設祝壽齋于東林、大雲二寺。

辛未，宋明州教練使顧允恭齎牒來報帝遣使通信之意。王曰：“敢期大朝降使外域，寡人一喜一驚。凡百執事，各揚爾職，館待之事，罔有闕遺。勤謹著能者當行超擢，怠劣有過者別論貶黜。”

五月庚子，遣工部尚書文晃，戶部侍郎崔思訓迎宋使于安興亭。

六月甲寅，宋國信使左諫議大夫安燾、起居舍人陳睦等到禮成江，命兵部尚書盧旦爲筵伴至西郊亭，又遣中樞院使刑部尚書金悌爲筵伴入順天館，以知中樞院事戶部尚書金良鑑、禮部侍郎李梁臣爲館伴。

丁卯，命太子詣順天館導宋使至閭闔門下馬入會慶殿庭，王適不豫，使左右扶出受詔。其詔曰：“卿世荷百祿，撫有三韓。慕義向風，一意朝廷之重；方舟



入貢，屢浮江海之淵。載修恭順之誠，宜被褒嘉之錫。特馳使指，往諭朕懷。緬惟俊明，當體眷遇。今差左諫議大夫安燾、起居舍人陳睦賜卿國信物等，具如別錄，至可領也。”賜：國王衣二對，各金銀葉裝柴匣盛一對；紫花羅夾公服一領；淺色花羅汗衫一領；紅花羅繡夾三襜一條；紅花羅繡夾包肚一條；紅花羅繡勒帛一條；白絁綾夾袴一腰；靴一緡，紅透背袋盛，紅羅繡夾複二條；腰帶二條，各紅透背袋盛，羅繡複一條，金鍍銀匣盛一條；玉一十六稻；鏤塵百戲孩兒頭尾共一十事，玳瑁襯金鑠紅鞋成釘一條，透犀一十七稻，頭尾共一十事，玳瑁襯金鑠紅鞋成釘；馬四匹，一匹鬧裝金鏤銀起突釵蔓陀羅花鉸具、紫羅繡鞍韉鑣纓袋複全，一匹鬧裝金鍍銀起突釵寶相花鉸具、艾碧繡鞍韉鑣纓袋複全，一匹散促結金鍍銀起突釵蔓陀羅花鉸具、纓轡紫羅屨事件〔全〕，一匹散促結金鍍銀起突釵寶相花鉸具、纓轡艾碧羅屨事件全；鞭二條，各紫羅繡袋盛，一條玳瑁，一條碌牙；金花銀器二千兩；盆一十面；蓋碗一十副，每副二件。雜色川錦一百匹：列仙細五匹，天下樂暈文五匹，雜花暈文五匹，合羅雲雁細五匹，盤毬雲雁細一十四匹，欖雁雲地細一十四匹，簇四金鵬大一十四匹，翠毛獅子大一十四匹，黃獅子大二十匹，寶昭大二十匹；色花羅一百匹：明黃一十四匹，藍黃一十四匹，淺粉紅一十四匹，深粉紅一十四匹，杏黃一十四匹，梔黃一十四匹，淺色一十四匹，梅紅一十四匹，紫一十四匹，雲碧一十四匹；色大綾一百匹：明黃一十四匹，

藍黃二十匹，淺粉紅一十匹，深粉紅一十匹，杏黃一十匹，梔黃一十匹，淺色一十匹，梅紅一十匹，紫一十匹，雲碧一十匹；色小綾二百匹：明黃二十匹，藍黃二十匹，淺粉紅二十匹，深粉紅二十匹，杏黃二十匹，梔黃二十匹，淺色二十匹，梅紅二十匹，紫二十匹，雲碧二十匹；色花紗五百匹：明黃五十匹，藍黃五十匹，淺粉紅五十匹，深粉紅五十匹，杏黃五十匹，梔黃五十匹，淺色五十匹，梅紅五十匹，紫五十匹，雲碧五十匹；白綃二千匹。別賜：龍鳳茶一十斤，每斤用金鍍銀竹節合子，明金五綵裝，腰花板朱漆帕匣盛，紅花羅夾帕複，龍五斤、鳳五斤。供御杏仁煮法酒一十瓶，各用金鍍銀鍍花瓶明金五綵裝，腰花板朱漆盞子盛，紅花羅夾帕複；鏤金紅黃碌牙拍板一十串，各梅紅茸條結金鍍銀鐸子生色銷金袋明金五綵裝，腰花板朱漆匣二具盛；紅黃牙笛一十管，各金鍍銀絲札纏生色銷金袋明金五綵裝，腰花板朱漆匣二具盛；紅黃牙箏一十管，各金鍍銀絲札纏生色銷金袋明金五綵裝，腰花板朱漆匣二具盛。龍鳳燭二十對：龍一十對，鳳一十對。已上各用紅錦袋明金五彩裝腰花板朱漆匣四具盛。王迎詔禮畢，謂左右曰：“豈謂皇帝陛下不遺小國，遠遣大臣，特示優賜，榮感雖極，兢慚實多。”太子率群臣陳賀，東西二京、東北兩界兵馬使、八牧、四都護府亦表賀，命太子宴客使于乾德殿。己巳，又命知中樞院事吏部尚書柳洪詣館設拂塵宴。

秋七月乙未，安燾等還，王附表謝之。且自陳風

痺，請醫官藥材。時與宋絕久，燾等初至，王及國人欣慶，除例贈衣帶鞍馬外，所贈金銀寶貨米穀雜物無算。將還，舟不勝載，請以所得物件貿銀。王命有司從其請。燾、睦性貪嗇，日減供億之饌，折價貿銀甚多。時人云：“自呂侍郎端使還之後，不見中華使久矣。今聞其來，瞻仰峻節，不圖所爲如是。”

是月，興王寺金塔成，以銀爲裏金爲表，銀四百二十七斤，金一百四十四斤。

九月癸酉朔，日本國歸耽羅飄風民高礪等十八人。

甲午，都兵馬使奏：“八助音部曲城在海濱平地屢被東路海賊來侵，民不安居，請徙其城。”制從之。

女真高麻秀等十四人來投，處之南界州縣。

冬十月甲辰，東女真麻里害等二十三人來朝，改名賜職。

十一月丁酉，遼宣賜使益州管内觀察使耶律溫來。

十二月辛丑朔，遼遣衛尉卿呂士安來賀生辰。

（己未）三十三年春正月辛未朔，放朝賀。

二月庚戌，御乾德殿集百官宣麻，以金悌爲吏部尚書、參知政事兼太子少保。

癸亥，東女真酋長屢羅等來獻駿馬。

夏四月甲辰，國內名山大川神祇加“知幾”二字號。

己酉，東北面兵馬使奏：“女真耶邑幹自定州弘化戍來款云：‘父阿羅弗、母吳曬、兄齊主那等六人曾於丁巳年向化來投，願隨居之。’”王曰：“夷狄雖同禽

獸，尚有孝心，宜令隨父母親屬徙置嶺南。”

西女真須于那等七人來朝，納北朝所授職牒，有司請改授元甫職。從之，賜金帛。

五月戊辰，北蕃賊寇平虜關，隊正康金、從甫等潛伏草莽，伺賊至，射前鋒二人，賊犇潰。兵馬使請加論賞，從之。

六月丁酉朔，日食。

癸亥，西女真歸德將軍高亂等二十人來獻駱駝。

秋七月辛未，宋遣王舜封、邢慥、朱道能、沈紳、邵化及等八十八人來。詔曰：“省所上表：‘臣年衰所自，風痺忽嬰，當國醫寡術而功遲，藥不靈而力薄。伏望聽卑在念，拯弱推仁。選周室之十全，就加診視；分神農之百品，許及餌嘗。所敷惻怛，恭俟俞允。’事具悉。卿有土東蕃，乃心中夏，述奕世嚮風之志，修頻年底貢之儀。因敕使人，往頒詔幣，迨茲復命，載閱露章，申繹忱辭，有嘉亮節。且聞疹癘之久，未遭醫劑之良，念來諗之勤倦，軫永懷於惻怛。特馳信介，參挾善工，博求百藥之珍，再越重溟之阻，俾加攻治，行即夷瘳。況忠義之所存，宜神明之來相，更維慎齋，庸副遐思。今差閤門通事舍人王舜封、翰林醫官邢慥等往彼看醫，兼賜藥一百品。具如別錄，至可領也。”瓊州沈香、廣州木香、康寧府鐵粉、廣州丁香、東京鉛霜、邕州自然銅、廣州血竭、階州雄黃、西戎天竺黃、並州石膏、鄆州天麻、西戎安息香、壽州石斛、懷州牛膝、齊州天南星、鄆州阿膠、益州芎藭、廣州

肉苳蔻、齊州半夏、銀州柴胡、夏州肉蓯蓉、蜀州大黃、廣州沒藥、代州鹿角膠、原州甘草、鄆州赤箭、真定府薏苡仁、台州烏藥、廣州檳榔、蘇州麥門冬、定州枸杞、商州枳殼、廣州餘甘子、北京山芋、廣州葦發、東京郁李仁、柳州桂心、西京菖蒲、廣州蓬莪茂、蔡州丹蓼、西京槐膠、海州海桐皮、東京遠志、漢州蜀椒、威勝軍黃耆、益州升麻、齊州防風、鄆州天門冬、漢州防己、益州獨活、同州熟乾地黃、蜀州附子、定州續斷、陳州白僵蠶、益州羌活、蜀州天雄、滁州山茱萸、蜀州烏頭、定州狗脊、蘇州吳茱萸、蜀州側子、廣州藿香、真定府車前子、西京躑躅、鄭州麻黃、西京赤芍藥、汝州澤瀉、潞州杜仲、西京生乾地黃、廬州秦皮、蔡州白芷、西京旋覆花、德州白薇、澤州地母、并州酸棗仁、東京牽牛、涇州秦艽、東京蒺藜子、宕州膏本、蜀州當歸、東京蔓荊子、益州乾漆、潞州前胡、東京兔絲子、泗州葛根、澤州茵芋、潞州胡麻子、澤州黃芩、蔡州地榆、定州五靈脂、西京莽草、定州大戟、漢州五茄皮、梓州厚朴、定州茜根、西京仙寧脾、定州地骨皮、西京何首烏、商州威靈仙、西京牡丹皮。別賜牛黃五十兩、龍腦八十兩、朱砂三百兩、麝香五十兩，已上各用間金鍍銀釵花合一具盛，共重四百兩，朱漆外匣全。下藥供御杏仁煮法酒一十瓶，用間金鍍銀釵花瓶十一隻盛，重一千兩，朱紅漆明金雕花外匣全。

八月丁巳，宋商林慶等二十九人來獻土物。

九月，日本國歸我飄風商人安光等四十四人。

冬十一月己巳，日本商客藤原等來，以法螺三十枚、海藻三百束施興王寺，爲王祝壽。

壬申，耽羅勾當使尹應均獻大真珠二枚，光曜如星，時人謂夜明珠。

戊寅，設八關會，御毬庭觀樂，命太子詣法王寺。

十二月乙未朔，遼遣起居郎馬高俊來賀生辰。

（庚申）三十四年春二月丙申，制曰：“故門下侍中王寵之、禮部尚書中樞使鄭倍傑，皆忠謇不群，才猷出類，去世雖遠，吾豈忘哉。宜錫殊恩，以昭寡人思賢之意，可贈寵之守太師中書令，倍傑弘文廣學推誠贊化功臣、開府儀同三司、守太尉門下侍中、上柱國、光儒侯。”

壬寅，太白晝見。

三月丙寅，冊子燾爲檢校司空、守尚書令、扶餘侯。

壬申，刑部奏：“戶部擅以興王寺田給萬齡殿，請罪之。”制：“削戶部官吏職，放還田里。”

東女真懷化將軍劉信等來朝。

遣戶部尚書柳洪、禮部侍郎朴寅亮如宋，謝賜藥材，仍獻方物。

夏五月丁卯，賜金尚礪等及第。

六月，興王寺石塔成，赦。

秋七月癸亥，柳洪等還自宋，帝附敕八道，其一曰：“卿宅彼遼左，式是海東。若昔撫封，維躬保享，

迪德不爽，修職有嚴。載披忱辭，灼見勤款。庸加褒顯，以厚眷私。”其二曰：“省所進謝恩，御衣二領、金腰帶二條、金鍔鑼一面、金花銀器二千兩、色羅一百匹、色綾一百匹、生羅三百匹、生綾三百匹、幘頭紗四十枚、帽子紗二十枚、廚屏一合、畫龍帳二對、大紙二千幅、墨四百挺、金鍍銀粧皮器仗二副、細弓四張、哮子箭二十四隻、細箭八十隻、鞍轡二副、細馬二匹、散馬六匹，事具悉。比飭信臣，彼頒禮幣，用將至意，庶答寅衷。具使貢辭，旅庭修報，載惟忱順，良用嘆嘉。”其三曰：“卿守邦有截，效職匪紆。厥惟勤修，茲用領識。誕申賜好，式厚寵光，益務肅心，以永終譽。今柳洪等回賜卿國信物色，並別賜衣襪、錦綺。”其四曰：“卿祇慎一德，拊循三韓，積勤勞於歲年，客疾癘於支末。頃者聞問，恒焉置懷。術求倉令之餘師，藥按桐君之舊錄。冀善服食，俾躬有瘳。迨踰寒暄，何恙未已，遐念所苦，曰紆朕憂。驚想海邦，緩音驛使。卿其專和致福，虞意持神，毋忘養順，用介壽祺。”其五曰：“省所上進，金合二副、盤盞二副、注子一副、紅廚倚背一十隻、紅廚褥二隻、長刀二十隻、生中布二千匹、蓼一千斤、松子二千二百斤、香油二百二十斤、鞍轡二部、細馬二匹、螺鈿裝車一兩，事具悉。卿世濟令德，物修多儀，若時忼來，茲用厚往。具敷禮錫，式顯命寧。膺福所同，申好彌永。今回賜卿衣著銀器。”其六曰：“省所進太皇太后方物具悉。卿遠因膚使，欽問東朝，已屬僊游，

遂虛方物，顧閔艱之在疾，閱豐腴以增哀。特有匪頒，往旌勤順。今賜卿衣著銀器。”其七曰：“省所進皇太后方物事具悉。卿以朕誕膺寶曆，祇養慈闈，發贄東蕃，貢書長樂，禮豐物腆，志厚事勤。宜有恩頒，用將眷渥。今回賜卿衣著銀器。”其八曰：“遠飭使旌，恪修邦篚，橫絕巨浸，震驚烈風，人方遘危，物或傾載。諒操舟之未善，匪將命之不虔。矧卿致恭有先，申好維永，已亮忠誠之厚，詎專庭實之多。宜体諭言，務從矜釋。”初，洪等放洋，颶風忽起，幾覆舟，及至宋，計所貢方物，失亡殆半，王依敕釋洪等罪。

丁卯，宋遣醫官馬世安來。

九月辛酉，宰相鄭惟產三上章請老。賜几杖，令視事。未幾，固辭。許之。

丙戌，幸西京。

閏月庚子，日本國薩摩州遣使獻方物。

冬十一月己丑朔，日食。

己亥，王至自西京，赦。

十二月己未朔，遼遣永州管內觀察使高嗣來賀生辰。

東蕃作亂，以中書侍郎平章事文正、判行營兵馬事同知中樞院事崔奭、兵部尚書廉漢爲兵馬使，左承宣李顥爲兵馬副使，將步騎三萬，分道往擊之，擒斬四百三十一級。

（辛酉）三十五年春正月乙未，以廉漢爲兵部尚書。



丁酉，以文正爲長淵縣開國伯，崔爽爲吏部尚書、參知政事，金良鑑參知政事、判尚書兵部事，王錫爲戶部尚書知吏部事。

丁未，知西北面兵馬事王佇奏：“西蕃酋長阿夫渙等九人，專心保塞，宜加爵賞。”命以阿夫渙等三人爲柔遠將軍，山豆等六人爲懷化將軍，賜物有差。

二月辛酉朔，西女真酋長遮亶等六人來獻鐵甲兵仗，賜衣帶綵帛有差。制曰：“凡東西酋長欲來見者，兵馬使申報取旨後方許赴闕，以爲永制。

丙寅，以金梯爲太子太保，柳洪、李覲並爲太子賓客，李日禎爲禮部郎中御史雜端。

甲戌，宋商林慶等三十人來獻土物。

丙子，制曰：“去冬十二月，東北路戎醜一朝掃滅，邊陲廓清。是皆上賴宗廟之威靈，下仗群帥之雄略。今已凱還，宜告太廟及六陵，可擇日行事。”

三月甲午，幸長源亭。

辛丑，以金良鑑權判中樞院事。

己未，以宋帝節日，賜宴于馬世安所館，兼致禮幣。

夏四月丙子，雩。

庚辰，遣禮部尚書崔思齊、吏部侍郎李子威如宋獻方物，兼謝賜醫藥。

壬午，禮賓省奏：“宋人楊震隨商船而來，自稱舉子屢試不中，請依所告，遣還本國。”從之。

五月己丑，東女真酋長陳順等二十三人來獻馬。

制曰：“凡蕃人來朝者，留京毋過十五日，並令起館，以爲永式。”

辛卯，以朴寅亮、吳英淑爲左右承宣，崔思玄爲右副承宣。

戊戌，遣閣門引進使高夢臣如遼賀天安節，右補闕魏絳謝宣賜生辰，戶部郎中河忠濟進方物，閣門祇候崔周砥賀正。

秋七月丁酉，制曰：“霖雨不時，恐傷禾稼，有司其擇日祈晴。”

己亥，參知政事致仕李徵望卒，謚匡靖。命百官會葬，輟朝十日。

八月己未，西女真漫豆等十七人挈家來投，禮賓省奏曰：“舊制，本國邊民曾被蕃賊所掠、懷土自來者，與宋人有才藝者外，若黑水女真並不許入。今漫豆亦依舊制遣還。”禮部尚書盧旦奏曰：“漫豆等雖無知之俗，慕義而來，不可拒也。宜處之山南州縣，以爲編戶。”從之。

辛酉，制：“西京宮闕年久，頽毀頗多，宜募工修葺。且去京東、西各十餘里更卜地構左右宮闕，以爲省方巡御之所。”

戊辰，宋商李元績等六十八人來獻土物。

己巳，雨雹傷禾。

壬申，東女真歸德將軍胡幹來獻馬。

九月丁酉，東北蕃賊首阿亥遣子弟徐害等來朝。

冬十月甲子，幸平州溫泉。癸酉，還宮。

丙子，赦。

十一月丁亥，以李靖恭參知政事、修國史。

壬寅，遼遣橫宣使利州管內觀察使耶律德讓來。

丁未，兵部尚書廉漢上章請老，賜詔不允。

十二月癸丑朔，遼遣崇祿卿楊移孝來賀生辰。

癸亥，知太史局事梁冠公奏：“奉宣勘進來壬戌年曆日並無疑誤，惟臘日自己未年以來，依大宋曆法用戌日，臣未詳可否。臣按《陰陽書》云：近大寒前後先得辰爲臘，我國用此日久矣，況古史曰：‘夏曰嘉平，殷曰清祀，周曰大蜡，漢曰臘。’其稱各異，皆以卒歲之功，因獵取獸，合聚萬物，以報百神，可不重歟？不宜擅變其法，請委有司詳定，然後施行。”制可。

戊辰，雷震寧州靈化寺佛殿天王塑像。

壬申，工部尚書洪德成再上章請老，賜詔不允。

庚辰，以柳洪爲中樞院使，李顥爲左散騎常侍知中樞院事，盧旦爲右僕射翰林學士承旨，崔思齊爲右散騎常侍，崔思訓爲中樞院知奏事，林概爲衛尉卿知御史臺事，崔思玄爲吏部郎中御史雜端，李資仁爲侍御史。

（壬戌）三十六年春二月癸丑，以國子祭酒宋德延知西北面兵馬事，衛尉少卿金義忠爲東北面兵馬副使。

甲子，東女真裒於古等來朝。

三月庚子，命有司禱雨于山川社稷。

夏四月己卯，醺太一九宮于會慶殿。

羅州牧管下洪原縣民掘地得黃金一百兩、白銀一百五十兩，以獻。王曰：天賜也。遂還之。

五月癸未，慮囚。

癸巳，醺九曜堂禱雨。庚子，又禱于興國寺。

丁未，大雨。

六月辛酉，赦，加兩京百官職一級。

丙寅，守司空尚書左僕射金德符卒。

秋七月戊申，崇慶宮主李氏卒。

八月甲寅，以李子威爲右副承宣，宋德延知御史臺事，高景爲侍御史，楊信麟爲殿中侍御史。

戊午，御文德殿斷死刑，命門下侍郎文正、左僕射李靖恭參詳。

乙亥，宋商陳儀等來獻珍寶。

是月，配東蕃賊首張向等十四人於山南遠地。

九月癸未，王南巡。丁亥，次峰城縣，設重陽宴，令兩府及侍臣賦《途中遇重陽詩》。癸卯，次天安府。乙巳，至溫水郡。

冬十月戊申朔，宣示御製《暮秋南幸次天安府詩》，命近臣依韻和進，第其甲乙，左散騎常侍李顗詩最警絕，王嘉歎，賜廐馬一匹，其餘賜絹有差。

辛亥，宰臣以幸溫泉表賀。

庚申，發溫泉。癸亥，次天安府。

十一月戊寅朔，王太子上表行在，賀朔。王特回詔答之。

甲申，還京。制：“加所過山川神號，侍從臣僚亦

加職賞，其餘吏卒賜物有差。”

丙戌，日本國對馬島遣使獻方物。

十二月丁未朔，遼遣永州管內觀察使李可遂來賀生辰。

丁巳，中書侍郎平章事金若珍卒，輟朝三日。

（癸亥）三十七年春正月丁丑朔，放朝賀。

丁亥，饗老人於毬庭，賜物有差。

戊子，以李靖恭、崔奭並爲中書侍郎、同中書門下平章事，金良鑑、王錫爲左右僕射。

二月丁未朔，賜群臣祿牌。

辛未，東女真歸德將軍姚彬、寧遠將軍方鎮等來獻馬，各賜職賞。

三月丁丑，賜陰鼎等及第。

己丑，命太子迎宋朝《大藏經》，置于開國寺，仍設道場。

辛卯，幸開國寺。

夏四月乙丑，王子忱卒。

癸酉，制曰：“自春而夏，農事方興，霜雹爲災，言念獄囚，慮有冤滯，內外罪囚，宜從寬典。凡內外土木之役，悉令停罷。”

五月丙子，王不豫。

癸卯，太白晝見。

六月丁卯，禱雨于宗廟社稷。

秋七月癸丑，百官設《華嚴經》道場于興國寺五日，以祈風雨調順。

辛酉，王疾篤，遺詔曰：“朕以眇躬，纘守祖業，天命有數，寢疾彌留，閔予不祐，已及大期。一日萬機，不可乍曠。今以軍國政事一以委太子勳，用傳寶位。卿等宜體懇言，勉盡忠孝。”遂薨于重光殿，殯于宣德殿之西。壽六十五，在位三十七年。王幼聰哲，及長好學善射，志略宏遠，寬仁容衆，凡所聽斷，不復遺忘。謚曰仁孝，廟號文宗。葬于佛日寺南麓，陵曰景陵。仁宗十八年加謚剛正，高宗四十年加明戴。

李齊賢贊曰：“顯德靖文，父作子述，兄終弟及，首尾幾八十年，可謂盛矣。而文宗躬勤節儉，進用賢才，愛民恤刑，崇學敬老，名器不假於匪人，威權不移於近昵。雖戚里之親，無功不賞；左右之愛，有罪必罰。宦官給使不過十數輩，內侍必選有功能者充之，亦不過二十餘人。冗官省而事簡，費用節而國富。太倉之粟，陳陳相因。家給人足，時號太平。宋朝每錫褒賞之命，遼氏歲講慶壽之禮，東倭浮海而獻琛，北貊扣關而受廩。故林完以爲我朝賢聖之君也，獨其徙一畿縣作一僧寺，侈峻宇於宮闕，侔崇墉於國都，黃金爲塔，百物稱是，殆將比擬蕭梁，而不知欲成人之美者，歎息於斯焉耳。”

## 順宗

順宗宣惠大王，諱勳，字義恭，古諱然。文宗長

子，母曰仁睿太后李氏。文宗元年十二月己酉生。八年二月，冊爲王太子。三十七年七月辛酉，文宗薨，奉遺詔即位，遣左拾遺知制誥吳仁俊如遼告哀。八月甲申，葬文宗于景陵。庚子，御神鳳樓，赦。

冬十月癸酉朔，設道場于會慶殿三日，飯僧三萬。

甲申，制：“加王弟運守太師兼中書令，食實封一千戶。”王小有疾，居廬哀毀，疾益篤。

乙未，命母弟國原公運權總國事。遺詔曰：“朕比承君父之遺言，獲主邦家之重器。每思眇質，謬膺顧托之權；樂與群公，共講長久之策。冀保祖宗之慶，永光堂構之功。不謂居喪過哀，積憂成患，經時累朔，有加無瘳。爰及冬初，遂至大漸。念明滅風燈之體，寧免幻期；而纂承社稷之圖，合憑預屬。今母弟守太師中書令國原公運，多能天縱，盛德日躋。稼穡艱難，備明乃事；刑政利病，悉究于心。如其升九五之尊，足以安億兆之望。可於柩所，便即君權。凡於國朝賞罰大事，一稟嗣君處分。在外州鎮官員，只於本郡舉哀，輒不得擅離理所。喪服之制，以日易月，山陵制度，務從儉約。於戲！生也有涯，難遑者始終大義；人誰不沒，所傷者修短異途。惟憑一二股肱，中外文武，同輸忠力，輔我親王，庶延寶曆之無窮，長使環區之有寄。即朕之瞑目，復何憾哉。”是日，薨于喪次，移殯于宣德殿。壽三十七，謚曰宣惠，廟號順宗。葬于城南，陵曰成陵。仁宗十八年加謚英明，高宗四十年加靖憲。

李齊賢贊曰：“三年之喪，自天子達于庶人。然其所謂齊衰之服，饘粥之食，顏色之戚，哭泣之哀，使四方來觀而悅者，自滕文公之後，未之聞也。順宗遭文考之喪，哀毀成疾，四月而逝。雖於聖人之制有所過焉，其親愛之誠則至矣。”



## 高麗史十

### 世家卷第十

#### 宣宗

宣宗安成思孝大王，諱運，字繼天。古諱蒸，又祈。文宗第二子，順宗母弟。文宗三年九月庚子生，幼而聰慧，及長孝敬恭儉，識量弘遠，博覽經史，尤工製述。十年三月，冊爲國原侯，累封尚書令，進爵爲公。三十七年七月，順宗即位，加守太師兼中書令。十月乙未，順宗薨。丙申，奉遺詔服袞冕，即位於宣政殿，受百官賀。

丁酉，設金剛明經道場於乾德殿。

戊戌，王率百官服喪服，詣宣政殿行祭禮畢，百官詣西上閣門奉慰又陳慰，于慈壽殿。

十一月庚申，親臨啓殯，哭盡哀，葬于成陵。

丁卯，翰林院奏：“凡內外州府郡縣、寺院、公私門館號、及臣僚以下，名犯御諱者，及音同者，請改

之。”制從之。

戊辰，御神鳳樓，赦。加文武官一級。

是月，遣侍御史李資仁如遼告喪。

十二月壬申，設《華嚴經》道場于乾德殿五日。

丁丑，設八關會，御神鳳樓前帳殿，受百官賀，遂幸法王寺。以前月值國恤，至是行之。

丁亥，御乾德殿視朝。退御宣政殿，門下侍郎平章事李靖恭、中書侍郎平章事金良鑑，參知政事王錫、柳洪陳時政得失。

（甲子）元年春正月辛丑朔，放朝賀。

己巳，普濟寺僧貞雙等奏：“九山門參學僧徒請依進士例三年一選。”從之。

三月庚子朔，東女真將軍分那老等二十人來獻馬。

夏四月，遼遣敕祭使益州管內觀察使耶律信、慰問使廣州管內觀察使耶律彥等來。甲戌，祭文宗曰：“惟靈性極禮義之端，體涵中和之粹。王爵馭貴，早襲青社之封；木神則仁，全賦東方之氣。躬懷忠款以力行，職述貢儀而歲至。一匡致主，朝廷賴其勲；千里于蕃，生民受其賜。方當拱手以仰成，何意上天之不遺。聞訃悼懷，輟朝增歆。嗚呼！歲陰不留，人生如寄，一千年時運之逢，五十載君臣之義。遽藏夜壑之舟，難秘東園之器。宜遄遣於輶音，俾往申於奠禮。魂兮有知，歆此至意。”丁丑，祭順宗曰：“惟靈辰象純精，嶽瀆秀氣。慶發世國，才爲王臣，甫從英妙之年，爰被寵嘉之命，撫封日域，述職天朝。翊戴輪勤，

開庇底父。方茂稱藩之績，遽纏陟岵之憂。議以奪情，俾其襲爵，指輶駢之既駕，聞驛訃之云來。復嗟殲良，益用震悼。何舟壑之不息，乃人琴之俱亡。言念忠圖，想見風矩。臨遣輪馭，往陳奠觴。冥神有知，諒我遐意。”

五月壬戌，賜高旻翼等及第。

六月壬午，東女真寇興海郡母山津農場，戍卒擊敗之，擒五人。

戊子，日本國筑前州商客信通等獻水銀二百五十斤。

乙未，王子生於延和宮。

秋八月壬申制：“顯宗南幸時，門下侍中朴成傑扈從有功，於三韓後壁上功臣楊規等錄券，並錄施行。”

甲申，宋遣祭奠使左諫議大夫楊景略、副使禮賓使王舜封，弔慰使右諫議大夫錢勰、副使西上閤門副使宋球等來。

辛卯，祭奠使聚僧徒設道場於文宗魂殿三晝夜。

壬辰，又設於順宗魂堂。

癸巳，祭文宗。祝曰：“惟王紹承慶緒，撫有侯封。道民師俗，禮義是宗。壹意朝廷，倦倦者忠。百名修貢，既久益恭。重溟萬里，一葦以通。精誠所兆，風濤順從。維此中國，四海會同。較功悼德，孰與王宗。謂宜壽考，藩屏于東。遽茲淪謝，傷怛何窮。遣使陳奠，以寓予衷。”詔曰：“父兄之喪，人倫之大感；贈賻之禮，朝廷之至恩。興言恭順之蕃，宜被哀

榮之典。特馳使指，往致奠儀，以示眷存，以慰號慕。”其弔慰書曰：“不意閔凶，奄失所怙。復聞同產，相繼淪亡。痛毒荐仍，何以勝處。達於予聽，良用惻傷。卿紹承父兄，素有孝友。覬能抑割，以副眷存。今遣使弔慰，兼賜卿弔慰物色，具如別錄，至可領也。”

甲午，祭順宗曰：“惟王資質茂美，孝友夙成。履信思順，休有德聲。營營服喪，得禮之經。撫綏一國，良協民情。謂膺遐福，保此安榮。爲屏爲翰，翼戴朝廷。如何不淑，沈痾遽嬰。惟天報施，稱物平衡。孰云積善，而夭厥齡。飭我使指，爰棘其行。庶陳薄奠，以寫斯誠。”

以王生日爲天元節。

九月己亥，宴宋使于會慶殿。壬寅，又如之。甲辰，餞宴，附表以謝。

（乙丑）二年春二月丁卯，設天帝釋道場于文德殿。

辛未，設《金剛經》道場于乾德殿七日。

癸酉，遼報改元大安。王命有司告于太廟、六陵。

乙亥，始令駕幸時奉《仁王般若經》前導，遵宋制也。

丁丑，對馬島勾當官遣使進柑橘。

丁亥，幸歸法寺飯僧。

三月丙申，王欲詣文考返魂堂行寒食兼上巳祭，有司以無哭位難之，王曰：“禮當從宜。”遂減法從

而往。

戊戌，宋密州報帝崩，皇太子即位。

戊申，設佛頂道場于文德殿。

甲寅，王如興王寺飯僧。

夏四月庚午，王弟釋煦逃入宋。

賜金昫等及第。

戊寅，幸外帝釋院。

甲申，親醺于毬庭。

庚寅，以旱，命有司講《雲雨經》於臨海院七日，又禱于山嶽。壬辰，命近臣錄囚，放輕繫。

五月甲寅，設金剛明經道場于乾德殿七日，禱雨。

六月丁丑，王受菩薩戒於乾德殿。

秋七月壬寅，饗年八十以上男女于毬庭，賜衣帶、例物有差。

壬子，以文宗大祥幸興王寺行香。

八月辛未，遣戶部尚書金上琦、禮部侍郎崔思文如宋弔慰，工部尚書林概、兵部侍郎李資仁賀登極。

丁丑，奉安文宗神御于景靈殿，親行奠禮。

戊寅，御宣政殿，聽斷刑部所奏死囚，停音樂、進素膳。

九月己酉，放輕繫。

壬子，親奠于順宗魂殿。

遼遣御史中丞李可及來賀生辰，不及期。人嘲之曰：“使名可及，何不及耶。”

冬十月癸酉，祔文宗于太廟。

乙亥，設百高座道場於會慶殿，講《仁王經》三日，飯僧三萬。

十一月丁酉，祔順宗于太廟。

丙午，遼遣落起復使高州管内觀察使耶律盛來。

癸丑，遼遣保靜軍節度使蕭璋、崇祿卿溫嶠等來，冊王爲特進、檢校太師兼中書令、上柱國，食邑一萬戶，食實封一千戶，兼賜冠冕、車馬、圭印、衣帶、綵段等物。己未，王受冊于南郊。

（丙寅）三年春正月己未，以外戚禮部侍郎李預妻王氏等授尚宮以下內職，爲王太子宫官，賜俸有差。

二月庚申朔，以守太師兼中書令崔冲，守太尉、門下侍中金元冲配享靖宗廟，守太尉、門下侍中崔齊顏，守太師兼中書令李子淵，檢校太師、門下侍中王寵之，守太尉、中書令崔惟善配享文宗廟。

丙寅，王上冊于王太后，御乾德殿，受中外賀，賜群臣宴。

毛羅游擊將軍加於乃等來賀，獻方物。

丁卯，積慶宮主適扶餘侯燾。

戊辰，御神鳳樓，大赦。

庚辰，以朝鮮公燾、雞林公熙守太保，常安侯琇、扶餘侯燾、金官侯杰、卞韓侯愔守司徒，辰韓侯愉守司空。

閏月甲寅，遣衛尉少卿崔思說如遼賀天安節，殿中少監郭尚獻方物，戶部侍郎金士珍謝賀生辰。

三月辛酉，避先王謚，改侍中崔肅謚仁孝爲忠懿。

己卯，對馬島勾當官遣使獻方物。

乙酉，禱雨于山川。

夏四月癸巳，又禱。

甲午，以盧神烈爲戶部尚書，文幹攝兵部尚書，王國髦爲衛尉卿。

辛丑，有司以久旱徙市。

庚戌，親禘太廟加上太祖以下先王先后尊號。

癸丑，以李靖恭爲門下侍中、判尚書吏部事，崔奭、金良鑑並爲門下侍郎平章事，柳洪、王錫爲中書侍郎平章，盧旦爲尚書左僕射、參知政事，崔思諒爲中樞院使，文晃知中樞院事。

甲寅，以禘饗曲赦。

五月戊午，御乾德殿覆試，賜朴景伯等及第。

丙子，遣尚書禮部侍郎崔洪嗣如遼謝落起復，禮賓卿李資智賀正，知中樞院事李子威、尚書左丞黃宗慤謝冊命，又遣告奏使尚書右丞韓瑩。時遼欲於鴨綠江將起樅場，故請罷之。

太白晝見。

六月丁亥朔，王如奉恩寺。

癸卯，詔曰：“朕承遺命，叨居大位。近來變怪屢作，旱魃爲災。庶賴佛神之陰護，群臣匡輔之力，而使陰陽順序，上下咸和。省躬責己，屢示恩宥，尚不得雨，此蓋涼德所致。然恐群下所行，或不合義。命世賢材，棄不見用。惟爾文武常參官、致政舊德、及散任三品以上員，限今月二十六日各上封事。朕之過

失、刑政之得失、民庶之弊癘，直言不諱。又舉忠直清廉有才德者，各一人。男女僧道篤行孝順及不孝悌者，在官不守公道、擾亂法度、侵害小民者，具錄以聞。”

秋七月丙寅，詔曰：“朕覽群臣所上封事，多言世俗尚侈靡，莫有禁制。其令所司與宰臣、諸學士、風憲長官，據先王典禮，凡衣服良馬品制，斟酌詳定以聞。”

戊寅，德宗后金氏薨。

八月丙戌朔，以刑部尚書邵台輔爲西北面兵馬使，工部尚書柳奭爲東北面兵馬使。

癸卯，宣慰國老，賜宴於閤門，駕幸毬庭，親饗庶老男女，賜物有差。篤疾廢疾者，別給酒食。

九月戊午，召兩京武官閱射于東亭，數月而罷。

甲子，遼遣守殿中監史洵直來賀生辰。

丁卯，卞韓侯愔卒。

冬十月甲辰，命內外官表賀太后生辰，且於正至八關亦如之，永爲定制。

己酉，祈雪。

十一月壬戌，親醺祈雪。

戊辰，設八關會，幸法王寺，遂幸神衆院。己巳，大會雪，侍宴群臣皆霑服，及夕將還，天霽月明。王駐輦昌德門外，命諸王奉觴獻壽。諫議金上琦、李資仁，補闕魏繼廷諫，乃止。

十二月戊戌，召兩京文官閱射于東亭。



(丁卯)四年春正月甲寅朔，放朝賀。

乙丑，遣告奏使秘書監林昌概如遼。

己巳，命有司祭山川廟社，以祈神兵助戰。

甲戌，親醺于會慶殿。

戊寅，東女真將軍阿盧漢等十九人來獻土物。

己卯，以邵台輔爲吏部尚書。

庚辰，遣密進使閣門引進使金漢忠如遼。

二月庚寅，以林概爲御史大夫，高景爲御史雜端，崔思說爲侍御史。

甲午，幸開國寺，慶成《大藏經》。

丁酉，燃燈，王如奉恩寺。

東女真將軍怪八等十九人來獻馬。

癸卯，太白晝見。

三月丙辰，幸龜山寺，飯僧。

己未，王如興王寺，慶成大藏殿。

辛酉，西女真酋長所隱豆等十三人來獻土物，賜爵。

癸亥，以崔奭權判尚書吏部事。

壬申，日本商重元、親宗等三十二人來獻方物。

甲戌，宋商徐戢等二十人來獻《新注華嚴經》板。

丙子，親醺太一於文德殿，以祈風雨調順。

戊寅，放輕繫。

庚辰，御宣政殿視事，門下侍郎平章事崔奭、金良鑑，中書侍郎平章事柳洪，陳時政得失。

夏四月丙戌，宋商傅高等二十人來獻土物。

戊子，中書侍郎平章事王錫卒，輟朝三日。

庚子，幸歸法寺，慶成《大藏經》。

乙巳，設《金剛經》道場于乾德殿七日，禱雨。

戊申，又禱于普濟寺。

五月丁巳，再雩。

丁卯，王服素襴謁顯陵，上竹冊。

戊辰，設仁王道場於文德殿。

庚午，謁景陵。壬申，謁昌陵。皆上竹冊。冊曰：“饗祖之嚴，義易式崇乎殷薦；感神之理，虞書蓋貴乎至誠。興言孝思，合歲烝祀。伏念臣謬將冲昧，獲襲燕貽，感時軫怵惕之心，撰日舉拜虔之禮。命百辟之執，俾贊盛儀；殫九州之宜，用備馨奠。仰冀亶聰之鑑，曲容克敬之懷。在天競耀於靈威，俯覃純嘏；歷世寢宣於景化，致保昌期。”

甲戌，以崔奭修國史，金良鑑判尚書戶部事，崔思諒參知政事兼西京留守使。

乙亥，以金行瓊爲門下侍郎、同中書平章事。

己卯，親醮于會慶殿，禱雨。

六月壬午，王如奉恩寺。

乙酉，設消災道場于會慶殿七日。

丙申，幸法王寺。

辛丑，放輕繫。

秋七月癸丑，以文晃爲西北路兵馬使兼知中軍兵馬事，李子威爲東北面兵馬使兼知行營兵馬事。

丙辰，醮于內庭。

己巳，王如興王寺。

庚午，東南道都部署奏：“日本國對馬島元平等四十人來獻真珠、水銀、寶刀、牛馬。”

壬申，御宣政殿視事，崔奭、金良鑑、柳洪、崔思諒奏陳時政得失。

八月癸未，御宣政殿，聽斷死刑。

乙酉，幸王輪寺。

己亥，改崇慶宮曰保寧，慶興院曰元禧宮。

丙午，幸西京。

丁未，以御史大夫林概爲西北路兵馬使，司宰卿尹翼商知東北路兵馬事。

九月庚戌朔，王次懷蛟驛。夜，扈衛軍營火。

辛亥，宴侍臣于大同江樓船。

癸丑，御長樂殿視事。

戊午，遼遣高州管內觀察使高惠來賀生辰。

甲子，以崔奭爲檢校太保，崔思諒檢校太子太師，文晃檢校太子太傅，李子威檢校司空。

癸酉，幸興福寺。

丙子，放輕繫。

戊寅，設燃燈道場于興國寺，又點燈于宮城內外街衢。

冬十月己卯朔，幸興國寺。

癸未，幸重興寺。

乙酉，親醮于內殿。

丁亥，王游覽觀風亭及九梯宮，遂幸永明寺行香，

御龍船至大同江，入夜乃還。

壬辰，設八關會，御靈鳳樓浮塔觀樂，遂幸興國寺。

遣告奏使禮賓少卿柳伸如遼。

癸巳，宴親王侍臣于浮塔。

乙未，幸興福、金剛二寺。

丙申，幸弘福、仁王二寺，遂幸梯淵，御樓船置酒，沿流至大同江，觀射。

設百座道場於上京會慶殿，飯僧三萬于毬庭。

戊戌，宴群臣于長樂殿。

十一月乙卯，至自西京。

丙辰，遣衛尉少卿庾皙如遼謝賀生辰。

壬戌，設八關會，幸法王寺。

己巳，遣殿中少監金德均如遼獻方物。

辛未，以維旦爲分司兵部尚書知西京留守事，黃宗慤爲衛尉卿西京副留守。

丁丑，尚書右僕射任禧悅卒，輟朝一日。

十二月己卯朔，遣出推使侍御史崔思諤于全晉羅州道，尚書兵部員外郎李瑋于慶尚州道，閤門祇候尹瓘于廣忠清州道。

己丑，遣刑部侍郎崔翥如遼賀天安節。

庚寅，以崔奭守太尉、判尚書吏部事、監修國史，金良鑑守太尉，柳洪守司空，崔思諒修國史，文晃知中樞院事，李子威同知中樞院事，金忠義爲戶部尚書，朴寅亮爲翰林學士承旨，李預爲翰林學士。

甲午，放輕繫。

（戊辰）五年春正月己酉朔，放朝賀。

戊午，遼遣橫宣使御史大夫耶律延壽來。

二月甲午，以遼議置榷場於鴨江岸。遣中樞院副使李顏托爲藏經燒香使，往龜州密備邊事。

三月己酉，命中書侍郎平章事柳洪、右承宣高景設醺于甌城，修舊禮也。

甲子，賜金富弼等及第。

戊辰，以崔思齊爲中樞院使。

夏四月丙申，以旱甚，王率百寮如南郊再雩。以六事自責，曰：“政不一歟？民失職歟？宮室崇歟？婦謁盛歟？苞苴行歟？讒夫昌歟？”使童男童女各八人且舞而呼雩，避正殿、減常膳，徹樂露坐聽政。壬寅，又禱于宗廟、社稷、山川。

五月辛亥，宋明州歸我羅州飄風人楊福等男女二十三人。

己未，遼東京回禮使檢校右散騎常侍高德信來。

癸酉，詔曰：“朕不明于德，皇天示譴，三月不雨，慄慄危懼。豈中外囹圄有眚哉乎？其輕囚薄罪並原之。”

秋七月，宋明州歸我耽羅飄風人用叶等十人。

九月，遣太僕少卿金先錫如遼乞罷榷場。表曰：“三瀆靡從，雖懼冒煩之非禮；一方所願，豈當緘默以不言。況昔者投匭上書，萬姓悉通於窮告；叫閭槌鼓，四聰勿闕於登聞。幸遭宸鑑之至公，盍寫民情而更達。

臣伏審承天皇太后臨朝稱制，賜履劃封，舞干俾格於舜文，執玉甫參於禹會，獎憐臣節，霑被睿恩。自天皇鶴柱之城，西收彼岸；限日子鼈橋之水，東割我疆。統和十二甲午年，入朝正位，高良齋到天輔皇帝詔書：‘敕高麗國王王治，省東京留守遜寧奏，卿欲取九月初發丁夫修築城砦，至十月上旬已畢。卿才惟天縱，智達時機，樂輸事大之誠，遠奉來庭之禮。適因農隙，遠集丁夫，用防曠野之寇攘，先築要津之城壘。雅符朝旨，深叶時情。況彼女真，早歸皇化，服我威信，不敢非違。但速務於完修，固永期於通泰。’其於眷注，豈捨寐興。于時陪臣徐熙，掌界而管臨；留守遜寧，奉宣而商議。各當兩境，分築諸城。是故遣河拱辰於雁門，爲勾當使於鴨綠。晝則出監於東渚，夜則入宿於內城。遂仗天威，漸祛草竊。後來無備，邊候益閑。聖宗之敕墨未乾，太后之慈言如昨。甲寅年，河梁造舟而通路。乙卯歲，州城入境以置軍。乙未，設弓口而創亭。丙申，允需頭而毀舍。詔曰：‘自餘瑣事，俾守恒規。’又壬寅年，欲設買賣院於義宣軍南，論申則葺修設罷。甲寅歲，始排探守庵於定戎城北，回報曰起蓋年深。當國代代忠勤，年年貢覲，幾遣乎輶車章奏，未蠲乎庵守城橋。矧及茲辰，欲營新市。似負先朝之遺旨，弗矜小國之竭誠。數千里之輪蹄，往來忘倦；九十年之苞篚，輸獻無功。百舌咨嗟，群心怨望。今臣肇承先閥，恪守外蕃，纔寸棕更切於激昂，何片利將興於締構。界連大楚，懽和誓效於灌瓜；

地狹長沙，忤舞尚難於回袖。屢飛縑奏，莫奉綸俞，上跼蓋高，下慙有衆。伏望皇帝陛下排闥臣之橫議，念邊府之殷憂。任耕鑿於田原，復安舊業；禁榷酤之場屋，無使新成。儻免驚騷，永圖報效。”

冬十月丁丑，遼遣太常少卿鄭碩來賀生辰。

十一月癸亥，賜延和宮元子名昱，賜銀器、匹段、布穀、鞍轡、奴婢，王奉太后宴于壽春宮，朝鮮、雞林、常安三公，扶餘、金官二侯侍宴，竟夜而罷。

壬申，金先錫還自遼。回詔曰：“屢抗封章，請停榷易。諒惟細故，詎假繁辭。邇然議於便宜，況未期於創置。務從安帖，以盡傾輸，釋乃深疑，體予至意。”

十二月庚子，以李顏爲刑部尚書、參知政事，李資仁爲殿中監中樞院副使。

是歲，遼遣使賜羊二千口、車二十三兩、馬三匹。（己巳）六年春正月壬申朔，放朝賀。

乙亥，發新興倉粟，施京城諸佛寺，設齋祈福。

戊戌，設消災道場于會慶殿五日。

二月辛酉，親祀天地山川于毬庭以祈福。

三月庚寅，設楞嚴道場于乾德殿七日。

夏四月辛丑朔，隕霜。

六月辛丑，禱雨于宗廟七陵。

庚申，以崔思齊參知政事，朴寅亮同知中樞院事，徐靖爲三司使，金上琦爲右散騎常侍。

秋八月甲辰，東女真歸德將軍西害等十四人來

獻馬。

庚戌，宋明州歸我飄風人李勤甫等二十四人。

癸丑，以修葺國學，備儀仗移安文宣王于順天館。

丙辰，斷死刑。

日本國太宰府商客來獻水銀、真珠、弓箭、刀劍。

九月乙亥，遼遣永州管內觀察使楊璘來賀生辰。

丁丑，以天元節宴遼使于乾德殿。王製賀聖朝詞曰：“露冷風高秋夜清，月華明。披香殿裏欲三更，沸歌聲。擾擾人生都似幻，莫貪榮。好將美醪滿金觥，暢懽情。”

冬十月己亥，宋商楊註等四十人來獻土物。

己酉，宋商徐成等五十九人來獻土物。

辛亥，講《仁王經》于會慶殿三日，飯僧三萬。

戊午，真新鑄十三層黃金塔于會慶殿，設慶讚會。

宋商李珠、楊甫、楊俊等一百二十七人來獻土物。

辛酉，王太后始創國清寺。

十一月丁卯朔，日食。

東女真酋長高舍等二十一人來獻馬。

十二月，守司空柳洪新第成，王命太僕卿李資義齎詔賜銀器、匹段、鞍馬。

（庚午）七年春正月丁卯朔，放朝賀。

己丑，禮賓省據毛羅勾當使申狀奏：“星主游擊將軍加良仍死，母弟陪戎副尉高福令繼之。贈賻之物，宜準舊例支送。”制可。

壬辰，普濟寺水陸堂火。先是，嬖人攝戶部郎中



知太史局事崔士謙入宋求得水陸儀文，請王作此堂，功未畢而火。

二月甲寅，東女真都領也沙等十七人來獻馬，賜物有差。

丙辰，以柳洪爲門下侍郎平章事、判兵部事，崔思齊爲中書侍郎、同中書門下平章事，李子威爲尚書右僕射、參知政事、修國史。

己未，東女真都領裊於乃等二十二人來獻馬。

壬戌，東女真禿達等三十四人來朝。

三月己巳，宋商徐成等一百五十人來獻土物。

戊子，夜大震電，新興倉災，罷弘圓、國清兩寺之役。

夏五月丙寅，御乾德殿覆試，賜李景泌等及第。時以景泌程文不合格，譏謗主司。

六月庚子，御史臺奏：“寧遠兵馬錄事禹汝維，侵擾邊民、聚斂財賄，請付廷尉論斷。”制可。

甲辰，制：“災變屢作，時雨愆期，放內外公徒私杖以下罪，官吏犯法罷職者，理無私曲，量敘本品。”

秋七月癸未，遣戶部尚書李資義、禮部侍郎魏繼廷如宋謝恩兼進奉。

九月辛未，遼遣利州管內觀察使張師說等三十一人來賀生辰。

庚辰，再宴遼使于乾德殿，令三節人坐殿內左右，有司奏：“再宴使者，古無此例。三節就坐殿內，亦所未聞。”王曰：“使者齎御製天慶寺碑文以來，宜加殊

禮。”不從。

戊子，東女真懷化將軍阿於大等十五人來獻馬。

冬十月丙午，王奉太后幸三角山。庚戌，幸僧伽窟，遂幸藏義寺。癸丑，幸仁壽寺行香。甲寅，駕次山路，民年百歲者一人、八十者三人謁于路，各賜物存問。

戊午，幸神穴寺，設五百羅漢齋。

十一月辛酉朔，至自三角山，赦。

十二月壬辰，祈雪。庚子，再祈于諸神廟。壬寅，又祈。

遼遣橫宣使益州管內觀察使耶律利稱來。

宋賜《文苑英華集》。

（辛未）八年春正月丁卯，宴群臣於乾德殿，各賜廐馬。

二月癸丑，遼東京持禮回謝使禮賓副使烏耶呂來。

三月丙子，東女真寧塞將軍皆多漢等四十人來獻橐駝及馬。

夏四月丁未，中樞院副使李資仁卒。

癸丑，門下侍郎平章事鄭惟產卒，謚貞順。

五月己未朔，日食。太白晝見，經天七十日。

乙丑，祈雨于社稷。

王如興王寺。

丁卯，祈雨于太廟、七陵。

六月甲午，再祈于社稷。丁酉，又祈于太廟、七陵。

甲辰，都兵馬使奏：“往年蕃賊寇昌州，兵馬錄事安先俊等領卒出屯德寧戍，遣郎將高猛等追捕奮擊，賊大潰。校尉崇儉、隊正邊鶴等突入賊中，士卒增氣，俘斬有功。乞加職賞，以勸將來。”制可。

丙午，李資義等還自宋，奏云：“帝聞我國書籍多好本，命館伴書所求書目錄授之，乃曰：‘雖有卷第不足者，亦須傳寫附來。’”百篇《尚書》，荀爽《周易》十卷，京房《易》十卷，鄭康成《周易》九卷，陸績注《周易》十四卷，虞翻注《周易》九卷，《東觀漢記》一百二十七卷，謝承《後漢書》一百三十卷，《韓詩》二十二卷，業遵《毛詩》二十卷，呂悅《字林》七卷，《古玉篇》三十卷，《括地志》五百卷，《輿地志》三十卷，《新序》三卷，《說苑》二十卷，劉向《七錄》二十卷，劉歆《七略》<sup>〔1〕</sup>七卷，王方慶《園亭草木疏》二十七卷，《古今錄驗方》五十卷，《張仲景方》十五卷，《元白唱和詩》一卷，《深師方》、《黃帝鍼經》九卷，《九墟經》九卷，《小品方》十二卷，《陶隱居效驗方》六卷，《尸子》二十卷，《淮南子》二十一卷，公孫羅《文選》、《水經》四十卷，羊（祐）〔祐〕《老子》二卷，羅什《老子》二卷，鍾會《老子》二卷，阮孝緒《七錄》、孫盛《晉陽秋》三十三卷，孫盛《魏氏春秋》二十卷，干寶《晉記》二十二卷，《十六國春秋》一百二卷，魏澹

〔1〕 原作“七毗”，誤。

《後魏書》一百卷，魚豢《魏略》、劉璠《梁典》三十卷，吳均《齊春秋》三十卷，元行冲《魏典》六十卷，沈孫《齊紀》二十卷，《楊雄集》五卷，《班固集》十四卷，《崔駰集》十卷，《汲冢紀年》一十四卷，《謝靈運集》二十卷，《顏延年集》四十一卷，《三教珠英》一千卷，孔道《文苑》一百卷，《類文》三百七十卷，《文館詞林》一千卷，仲長統《昌言》、杜恕《體論》、《諸葛亮集》二十四卷，王羲之《小學篇》一卷，周處《風土紀》一卷，張揖《廣雅》四卷，《管絃志》四卷，王詳撰《音樂志》、蔡邕《月令章句》十二卷，信都芳撰《樂書》九卷，《古今樂錄》十三卷，《公羊（黑）〔墨〕守》十五卷，《穀梁廢疾》三卷，《孝經》劉邵注一卷，《孝經》韋昭注一卷，《鄭志》九卷，《爾雅圖贊》二卷，《三蒼》三卷，《埤蒼》三卷，衛宏《官書》一卷，《通俗文》二卷，《凡將篇》一卷，《在昔篇》一卷，《飛龍篇》一卷，《聖皇章》一卷，《勸學篇》一卷，《晉中興書》八十卷，《古史考》二十五卷，伏侯《古今注》八卷，《三輔黃圖》一卷，《漢官解詁》三卷，《三輔決錄》七卷，《益部耆舊傳》十四卷，《襄陽耆舊傳》五卷，稽康《高士傳》三卷，玄晏《春秋》三卷，干寶《搜神記》三十卷，《魏名臣奏》三十一卷，《漢名臣奏》二十九卷，《今書七志》十卷，《世本》四卷，《申子》二卷，《隋巢子》一卷，《胡非子》一卷，何承天《性苑》、高士廉《氏族志》一百卷，《十三州志》十四

卷，《高麗風俗紀》一卷，《高麗志》七卷，《子思子》八卷，《公孫尼子》一卷，《慎子》十卷，《晁氏新書》三卷，《風俗通義》三十卷，《汜勝之書》三卷，《靈憲圖》一卷，《大衍曆》、《兵書接要》七卷，《司馬法》、《漢圖》一卷，《桐君藥錄》二卷，《黃帝大素》三十卷，《名醫別錄》三卷，《曹植集》三十卷，《司馬相如集》二卷，桓譚《新論》十卷，《劉琨集》十五卷，《盧諶集》二十一卷，《山公啓事》三卷，《書集》八十卷，應璩《百一詩》八卷，《古今詩苑英華集》二十卷，《集林》二十卷，《計然子》十五卷。

秋七月壬戌，尚書左僕射致仕盧旦卒，謚匡獻。

丁丑，以金上琦爲戶部尚書政堂文學，柳奭同知中樞院事。

八月丁卯，中書侍郎平章事崔思齊卒。

制曰：“宋人田盛善書札，陳<sup>〔1〕</sup>養有武藝，敦請留止，且加職秩，以勸來者。”

閏月己未，王避正殿、素膳，丹筆定罪。

甲子，設藏經道場于會慶殿，王行香且製詩以示歸崇之意。

九月庚寅，御賞春亭，召雞林公熙、扶餘公遼、門下侍郎平章事柳洪、左僕射邵台輔、兵部尚書徐靖、上將軍王國髦、直門下省高景、翰林學士孫冠等，置酒，從容問以邊事。

〔1〕 原作“東”，卷十二有“陳養”，據改。

癸巳，遼遣永州管內觀察使高崇來賀生辰。

冬十一月丙午，門下侍郎平章事柳洪卒。

庚戌，祈雪于社稷。

十二月癸亥，門下侍郎平章事李顏卒，謚襄愼。

（壬申）九年春正月甲申朔，以雨雪放朝賀。

己丑，中樞院使、刑部尚書致仕朴揚旦卒，輟朝三日。

丁酉，以金上琦爲吏部尚書，林概同知中樞院事。

庚子，東女真阿盧漢等二十人來獻土物。

二月己卯，東女真懷化將軍三彬等來獻馬。

耽羅星主懿仁來獻土物，加定遠將軍，賜衣帶。

壬午，宣麻，以邵台輔參知政事。

三月丙辰，市巷民家六百四十戶火。

是月，王憂勞萬機，頗覺不豫，移御文德殿。命內醫進養性方藥，忽有感，作古風長篇，其末云：“藥效得否何敢慮，浮生有始豈無終，唯應愿切修諸善，淨域超昇禮梵雄。”王春秋鼎盛，而有此作，見者驚怪。

夏四月乙卯，以參知政事邵台輔權判西北面兵馬事兼中軍兵馬使，中樞院使徐靖爲西北面兵馬使兼中軍兵馬使，政堂文學金上琦權判東北面兵馬事兼行營兵馬使，同知中樞院事林概爲東北面兵馬使兼行營兵馬使。

戊午，冊宮人李氏爲王妃。

制：“加金官侯丕守太尉兼中書令。”

丙寅，金官侯杰卒。

戊辰，遼東京持禮使高良慶來。

辛巳，御文德殿覆試，賜金誠等及第。

六月己未，以柳奭知中樞院事，李預同知中樞院事。

庚申，詔曰：“朕嘗聽日者崔士謙之奏修補景陵虛缺，近覽司天少監黃忠現等封事，士謙修補反爲壓襁，將使先靈不安玄寢，其令刑部囚士謙鞠問。”

乙丑，以政堂文學金上琦修國史。

丙寅，王受菩薩戒于乾德殿。

壬申，王太后設天台宗禮懺法于白州見佛寺約一萬日。

乙亥，以徐靖參知政事。

秋七月乙酉，參知政事崔思諒卒。

八月乙丑，以李子威爲尚書右僕射權知門下省事兼西京留守使。初，子威以宰相監校入宋，表奏誤書六年號，宋朝却其表，由是責罷。不數月，干謁內嬖，得拜是職。時人譏之。

戊辰，幸西京。

己巳，放崔士謙于仙山島。

九月壬午，王太后薨于西京。

乙酉，遼遣王鼎來賀生辰。

冬十月丙子，至自西京。

十一月庚子，太白晝見經天。

十二月癸亥，東女真餘羅弗等二十人來獻土物。

壬申，地震。

（癸酉）十年春正月己卯朔，放朝賀。

二月甲寅，宋明州報信使黃仲來。

三月戊寅，命元子昱入居壽春宮，以同知中樞院事柳奭、左諫議大夫孫冠爲太子左右詹事。

壬午，西北路兵馬使奏：“北蕃三人慕化來投。”賜衣及田宅。

夏四月己酉，門下侍中致仕文正卒。

癸丑，設藏經道場于會慶殿六日，王親製《贊三寶詩》。

乙卯，遼遣高州管內觀察使馮行宗來，命王起復。

五月戊戌，以邵台輔爲中書侍郎平章事、判刑兵部事，徐靖爲尚書左僕射、參知政事，金上琦爲吏部尚書、參知政事、修國史，柳奭爲禮部尚書、參知政事，林概爲中樞院使、刑部尚書，李預知中樞院事、翰林學士承旨。

庚子，創弘護寺于城東。

六月甲子，親醮于內殿，以祈農事。

秋七月癸未，西海道按察使奏：“安西都護府轄下延平島巡檢軍捕海船一艘，所載宋人十二、倭人十九，有弓箭、刀劍、甲冑，並水銀、真珠、硫黃、法螺等物，必是兩國海賊共欲侵我邊鄙者也。其兵仗等物請收納官，所捕海賊並配嶺外，賞其巡捕軍士。”從之。

壬辰，遣兵部尚書黃宗慤、工部侍郎柳伸如宋謝恩。



八月壬申，免內外死罪，流海島。

九月丁丑，王詣仁睿太后返魂殿，行小祥祭。

壬午，遼遣永州管內觀察使大歸仁來賀生辰。

十二月甲子，遼遣橫宣使安州管內觀察使耶律括來。

（甲戌）十一年春正月癸酉朔，放朝賀。

壬辰，日傍有彗。

二月丙午，以屢有天變赦。

戊申，王將閱兵。御史臺奏：“兵，金也，克木。方春盛德在木，而閱兵逆生氣也。”不聽。

三月甲戌，王祭仁睿太后於返魂殿。

甲申，國子祭酒韓儉三上表請老，許之。

丙戌，東女真將軍仍于等來獻馬九匹。

丁亥，醺于毬庭。

甲午，賜鄭克恭等及第。

夏閏四月壬辰，王不豫。甲午，宰臣、樞密及宗室詣延英殿北門起居。

五月壬寅，王薨于延英殿內寢。即日遷殯于宣德殿。壽四十六，在位十一年。謚曰思孝，廟號宣宗。葬于城東，陵曰仁陵。仁宗十八年加謚寬仁，高宗四十年加顯順。

李齊賢贊曰：“詩者，志之所之，在心爲志，發言爲詩。觀宣宗文德殿餌藥詩，有類於趙孟視蔭惕日之詩。何哉！趙孟列國之卿，其語偷，君子尚譏之，況王者乎？以宣宗聰明好學，不讀非聖之書，而無苟且

之意，明良賡載之歌則尚矣，大風慷慨之作何遽不若乎？不及三年，遂棄群臣。嗚呼！”

## 獻宗

獻宗恭殤大王，諱昱，宣宗元子，母曰思肅太后李氏。宣宗元年六月乙未生，性聰慧。九歲，好書畫，凡所見聞，未嘗遺忘。十一年五月壬寅，宣宗薨，奉遺命即位於重光殿。

甲寅，葬宣宗于仁陵。

六月庚午朔，尊母爲太后。

甲申，以邵台輔，李子威並爲門下侍郎平章事、上柱國，柳奭爲尚書左僕射、柱國，林概參知政事，李資義知中樞院事，崔思諷同知中樞院事、左散騎常侍。

乙酉，文宗妃崇化宮主金氏卒。

戊子，御神鳳樓，大赦。

宋都綱徐祐等六十九人、毛羅高的等一百九十四人來賀即位，獻土物。

己亥，以朝鮮公燾、（錐）〔雞〕林公熙守太師，常安公琇、扶餘公濠守太保，辰韓侯愉、漢山侯昀、樂浪伯瑛守司徒。

秋七月丁卯，宋都綱徐義等來獻土物。

八月庚午朔，詔曰：“定州宣德鎮境內蝗爲災，其

令群臣各上封事。”

甲戌，宋都綱歐保劉及楊保等六十四人來。

冬十一月壬子，饗年八十以上者于毬庭，賜物有差。

十二月，遼敕祭使蕭遵烈、副使梁祖述、慰問使蕭褱、起復使郭人文等來。

乙酉，敕祭使詣返魂堂祭宣宗。王迎詔助祭。詔曰：“朕言念先臣，保全亮節，將被便蕃之寵，遽從汗漫之遊。靈魄夫遙，渥恩宜及。遣陳祭酹，庸表眷懷。今差永州管內觀察使蕭遵烈、衛尉少卿梁祖述充敕祭使副，祭所諸物，具如別錄。”祭文曰：“惟靈器範淵英，姿神秀邁，慶遇風雲之會，恭依日月之華。承祖業之貽休，繼王藩之嗣理。表海遵修於舊服，朝天奉達於勤誠。寔稟義方，克全忠節，將加寵懋，奄至淪亡。聞訃奏以茲來，痛恩褒之莫及。特遣驂傳，往陳奠觴，凝想貞魂，固諒深意。”祭訖，王還宮，慰問使傳詔於乾德殿。詔曰：“省所奏高麗國王薨逝事具悉。朕以先臣表是東海，方賴匡扶之績，遽聆隕越之災，顧爾幼冲，遭斯凶閔，當永思於繼襲，用少節於哀摧。順以禮文，副予遐念。今差廣州防禦使蕭褱齎詔往彼慰問，兼賜賻贈，具如別錄。”

丙戌，起復使傳詔於乾德殿。詔曰：“王適遭家艱，爰膺世嗣。由苦在制，然孺慕以鍾情；金革從權，固牽復而就政。諒極哀榮之至，勉符眷委之深。今差崇祿卿郭人文往彼，賜卿起復告敕各一道。”官告曰：

“立孝惟親，在苴麻則禮當終感。移忠於國，順金革則義貴從權。故襄子繇發命以即戎，伯禽因有爲而攝事。朕若稽古典，誕撫庶邦，眷青社之名封，迺皇家之鉅屏。上帝不愆，列侯云薨。屬令嗣以有成，宜舊服以與繼。式涓剛吉之旦，載考牽復之文，僉議允諧，寵章攸舉。高麗國王嗣子王昱，慶隆世嫡，才茂人英。龍星騰七宿之精，夙鍾其智；木神冠五行之秀，生富于仁。爰在妙齡，早推俊器。方幹承家之蠱，遽罹陟謁之艱。訃奏云來，靈傷攸至。然痛纏苦塊，三年未忍奪其情；而任重蕃垣，一日不可虛其守。是用特降出綸之命，俾從始墨之經。付駟鈕之崇權，升鳳池之峻秩。檢階優錫，勳邑兼新。與襲國封，用慰人望。於戲！肇爾烈祖，臣於我朝，誓著泰山，表茲東海。尊主庇民而有裕，貽孫翼子以承休。顧惟八世之莫京，皆獲一卣之所賜。汝其祗蹈先訓，永懷令圖，勤儉可以保民，信義可以行政。服是炯戒，往惟欽哉。可起復驃騎大將軍、檢校太尉兼中書令、上柱國、高麗國王，食邑七千戶，食實封七百戶，仍令所司擇日，備禮冊命，主者施行。”

（乙亥）元年春正月戊戌朔，放朝賀。日傍有彗。王幼冲不知修省，只引內醫三四人討問方書或習書畫。

庚戌，以王國髦權尚書兵部事。

二月庚辰，燃燈，王如奉恩寺。

甲申，東女真懷化將軍所羅等二十八人來獻馬。

丁亥，東女真奉國將軍豆門等四十八人來獻馬，

王御宣政殿賜見，命近臣崔弘嗣問邊宜，賜酒食、衣帶、布帛。

辛卯，宋商黃冲等三十一人與慈恩宗僧惠珍來，王命近臣文翼備軒蓋迎珍，置于普濟寺。珍常曰：“爲欲見普陀落山聖窟而來，請往觀之。”朝議竟不許。

三月辛丑，常安公琇卒。

夏四月己卯，賜俞進等及第。

五月丙申，太后如玄化寺，設宣宗小祥齋。

己酉，以柳奭判三司事，李預爲政堂文學刑部尚書，李資義爲中樞院使，孫冠知中樞院事翰林學士承旨。

癸丑，遼東京回禮使高遂來。遂私獻綾羅彩段甚多。王御乾德殿引見，命近臣問留守安否，賜酒食、衣襪。

六月己卯，王受木叉戒于乾德殿。

秋七月戊戌，行遼壽昌年號。

丙午，饗于太廟，王居亮陰、園丘、方澤、宗廟、社稷，及凡載祀典者無不舉。

癸丑，毛羅高勿等八十人來獻土物。

庚申，李資義謀亂伏誅。

癸亥，以邵台輔權判吏部事，王國髦權判兵部事。

八月甲子朔，以黃仲寶爲尚書右僕射。

乙丑，以太叔雞林公熙爲中書令，百官就邸陳賀。

甲戌，宋商陳義、黃宜等六十二人來獻土物。

癸未，以孫冠爲樞密院使，崔思諷爲吏部尚書知

樞密院事。

甲申，命修東京皇龍寺塔。

九月乙未，以邵台輔特進守司徒、判吏部事，金上琦、柳奭並爲中書侍郎、同中書門下平章事，林概守司空、尚書左僕射、判戶部事，王國髦爲右僕射、參知政事、判兵部事、柱國，黃宗懋同知樞密院事。

丙申，放李資義黨兵部員外郎金德忠于遠地。

戊戌，詔曰：“昨者權姦謀亂伏誅，此實將相宣力之效。雖已拔亂，益勤修省。凡諸冤獄，悉令寬宥。內外贖銅小罪，皆許免除。”

庚子，以金先錫爲刑部尚書，王國髦判都兵馬事。

冬十月己巳，制曰：“朕承先考遺業，謬即大位，年當幼冲，體亦病羸，不能撫邦國之權，塞士民之望。陰謀橫議交起於權門，逆賊亂臣屢干于內寢。斯皆涼德所致，常念爲君之難。竊見太叔雞林公曆數在躬，神人假手。咨爾有衆，奉纂丕圖。朕當退居後宮，獲全殘命。”乃命近臣金德鈞等迎雞林公熙于宗邸禪位，遂退居後宮。

肅宗二年閏二月甲辰，薨于興盛宮。壽十四，在位一年。謚曰懷殤，葬于城東，陵曰隱陵。睿宗即位，改謚恭殤，廟號獻宗。高宗四十年，加謚定比。

李齊賢贊曰：“禹之傳子，爲慮後世。植遺腹朝委裘，而天下不動者，分素定也。顯之三子，兄弟相傳，以及於順。順以居喪過哀，夭折無嗣，而傳於宣。宣薨而太子嗣，是爲獻宗。國人習熟見聞，乃謂：‘宣有

五弟，而立孺子。’以是歸非，何不思之甚也。唯不得周公於親、博陸於臣，委任而輔政，其危且亂，可翹足而待也。後世有不幸而遺大投艱于襁褓之中者，可以此爲誠哉。”





# 高麗史十一

## 世家卷第十一

### 肅宗一

肅宗明孝大王，諱顥，字天常，古諱熙。文宗第三子，順宗母弟，文宗八年甲午七月己丑生。幼而聰慧，及長，孝敬勤儉，雄毅果斷。五經子史，無不該覽。文宗愛之，嘗曰：“後之復興王室者，其在爾乎！”十九年二月，冊爲雞林侯。三十一年三月，進封爲公。宣宗三年二月，加守太保。九年，扈駕西京，有紫雲騰幕上，望氣者以爲王者之符。獻宗即位，進守太師兼尚書令。明年八月，爲中書令。十月己巳，獻宗下制禪位，王謙讓再三。庚午，即位于重光殿。是日，流元信宮主李氏及子漢山侯兄弟二人于慶源郡。

辛未，遣左司郎中尹瓘、刑部侍郎任懿如遼。前王表曰：“伏以爲君之道，有事必陳，敢具封章，仰干負宸。伏念臣記齡幼弱，植性戇愚。不違乃父之遺言，

謬承家業；庶效維藩之劇務，永竭忠勤。緣瘠渴之夙嬰，歷歲時而漸極。其奈醫乏十全之妙，莫究診詳；藥虧百品之靈，猶微暝眩。匪朝伊夕，有加無瘳，肺膽焦熬，形骸枯槁。兩膝于以緩懦，雙睛于以暗昏。行之惟艱，何以撰戴經杖履？視之不見，何以辨師冕席階？徒僵卧於衾床，阻監臨於軍國。微軀是揣，殆危尤甚於茲辰；分寄非輕，管守難虛於頃刻。乃於今月八日，以臣父先臣之弟熙，令權守藩務。特馳陪隸，聊達宸庭。”王表曰：“竊以臯鳴所切，天耳可通。敢陳臣子之誠，仰黷君親之鑒。伏念臣侯藩末胤，聖域濱臣，生逢有道之時，坐樂無爲之化。昨國王臣昱，早嬰微瘵，近至沈痾，雖經服餌多方，未見痊瘳一效。於今月八日，令臣權守藩務。臣顧茲付托，擬欲升聞，奈恨邈於闕庭，未即申於懇款。輒將孱劣，假守宗祊，爰啓處以不遑，積戰兢而尤甚。尋馳封奏，上告宸嚴。”

戊寅，以邵台輔守太尉、門下侍中，金上琦守司徒、門下侍郎、同中書門下平章事，柳奭守司空，林概爲中書侍郎平章事、判刑部事，王國髦守司徒，孫冠爲尚書右僕射、參知政事、判戶部事，崔思諷守司空、樞密院使、翰林學士承旨，金先錫知樞密院事。

庚辰，制加朝鮮國公燾，食邑五千戶，食實封五百戶，扶餘公藻守太傅，辰韓侯愉爲尚書令，樂浪伯瑛爲樂浪侯，黃仲寶爲尚書左僕射，尹莘傑爲龍虎軍上將軍、兵部尚書，黃俞顯爲工部尚書，崔迪爲金吾

衛上將軍、攝刑部尚書。其餘躡等遷官者數百人，工商皂隸亦有超授顯職者，有司莫敢言。

丙戌，參知政事王國髦卒。

十一月癸卯，御神鳳樓，赦斬絞以下罪，名山大川皆加德號，民年八十以上及篤癯疾者、義夫節婦、孝子順孫、鰥寡孤獨賜設分物有差，諸色軍人賜米布亦有差。丙午，設八關會，御神鳳門，受中外賀，遂幸法王寺。癸丑，遣崔惟舉如遼進奉。甲寅，遣崔用圭賀正，董彭載賀天安節。

己未，遼遣劉直來賀前王生辰，王代迎於乾德殿。其敕曰：“卿襲封日域，述職天朝，適當授鉞之初，載屬玄弧之旦，宜申慶錫，用示眷懷。今差泰州管內觀察使劉直往彼，賜卿衣襪、匹段、鞍馬、弓箭諸物等，具如別錄。至可領也。”

十二月己巳，劉直還，附表以送。前王表曰：“眷出嚴宸，恩流殘喘，寵靈越分，喜懼交並。臣素以佞姿，謬叨重寄，因非福之所速，致厥疾之漸深，視聽惟難，舉動不遂。推骨親而權守藩務，馳家隸而仰告天聰。豈意今者猥借睿慈，特紆使指。芝綸之旨，慰誨曲敦；寶幣之資，匪頒益厚。奈羸虛而未起，俾代受以彌兢。誓至百生，少酬大賚。”王表曰：“國王臣昱，久處沈痾，無由視立。屬遽霑於寵澤，奈莫遂於躬迎。臣權守維藩，代承丕錫。其所受詔錄諸物，並已傳付。”

丙戌，以崔思諷爲吏部尚書、參知政事，金先錫

爲樞密院使，黃宗慤知樞密院事，黃瑩爲禮部尚書、同知樞密院事。是日，以黃州牧副使李瑋爲尚書右司員外郎。王嘉瑋清勤恤民，秩未滿召還，授是職。

庚寅，任懿還自遼，回詔曰：“眷言青社，祇奉紫宸，世竭忠圖，時修貢品。嚮者，昱已附陳於章表，謂染沈痼，卿復申奏於闕庭，權知重務。勉思勤順，姑用允從。”

（丙子）元年春正月戊戌，東女真阿夫漢、高蘭昆、豆門等一百七十九人來獻土物。

己酉，以工部尚書、三司使庾哲爲西北面兵馬使，尚書左丞崔翥爲東北面兵馬使。

甲寅，教曰：“朕仰法先王，欲行儉德，減省飲食，不（縱）〔縱〕嗜欲。近聞內外時俗，好行奢侈，無有紀極，飲食之際，杯盤過多，傷風敗俗，甚可痛心。自今以後，宜定等級。”仍令御史臺糾<sup>〔1〕</sup>察。

丁巳，以黃俞顯爲鷹揚軍上將軍、戶部尚書，崔迪爲神虎衛上將軍、刑部尚書，王惟烈爲金吾衛上將軍、工部尚書，吳猛爲殿中監。戊午，以生辰爲大元節。

二月甲子，遣謝恩兼告奏使禹元齡如遼。表云：“去年十一月，泰州管內觀察使劉直至，奉傳詔書、別錄各一道，以前王生日，特賜衣襪、銀器、匹段、弓箭、鞍馬等。因前王有疾，令臣代受者，眷出中宸，

〔1〕 原作糾，絲黃色，與糾形近而訛，下文統改，不另注。

澤霑遐域，承傳之次，兢懼並增。伏惟皇帝陛下，道正執中，化包無外，記藩臣之生日，遣使華以頒恩。寵命既臨，理固當於拜受；病身彌弱，終莫遂於親迎。臣權守一方，代承大賚，所受詔書、別錄，已曾傳付。”前王表云：“浩蒼之道，罔阻聽卑。窘迫之誠，必須訴上。爰憑削牘，輒叩嚴闈。臣早染瘵痼，難圖療愈。蕃宣劇任，固不可以暫虛；貢獻常程，或不可以致闕。敢推延於叔父，乃附屬於國權。拋棄世緣，退居別第。尪羸之質，自長卧於漳濱；怵惚之魂，但忞遊於岱嶽。已深危殆，何計痊瘳？近者，聞公牒之俄臨，認帝言之垂下。落起復之特禮，行封冊之盛儀，並悉蠲除，致諧願望。且生日之命，橫賜之恩，欲有頒流，預先諭示。揣殘喘而殊無片效，迄茲辰而曷受厚私。伏乞曲借仁憐，俯詳懇告。旋紆俞旨，寢遣降於使華；遂俾病臣，永免居於重寄。”

乙丑，前王請出居興盛宮，王從之，宣宗潛邸也。

乙亥，燃燈，王如奉恩寺。

庚辰，西女真阿羅火等四十八人來朝。

三月辛丑，西女真下夫奐等來朝。

己酉，遣持禮使高民翼如遼東京。

戊午，御乾德殿覆試，賜金輔臣等及第。

夏四月壬戌朔，霜。

癸亥，又霜雹。

癸酉，御宣政殿聽朝，至日昃。中書省奏：“時當長養萬物，三月以來，時令舛違，水結爲冰，降霜殺

物，夜雹暴至。《洪範·五行傳》曰：‘雹，陰脅陽之象也。’<sup>〔1〕</sup> 《京房易傳》曰：‘誅罰絕理，厥災隕霜。’<sup>〔2〕</sup> 又云：‘上偏聽，下情隔塞，不能謀慮利害，失在嚴急，其罰常寒。’<sup>〔3〕</sup> 又云：‘興兵妄誅，茲謂亡法。厥災降霜，夏殺五穀。’<sup>〔4〕</sup> 頃者，幼君寢疾，聽斷不明，母後攝政，涵惑失度，致使兇人乘間謀亂。由是，大行誅戮，不遺黨類。<sup>〔5〕</sup> 而事不原情，囚繫之中，必有非罪。怨氣塞于天地，和氣變為災沴。伏惟聖上應命繼統，總正萬機。乞令御史臺、尚書刑部，凡疑獄是非未定者，促令決正，使無冤濫。其所告非實，悉令反坐，以答天戒。則人情胥悅，災變為福矣。”王納之。

己卯，謁顯陵。

乙酉，謁景陵。

五月丙申，醮于會慶殿。

〔1〕 此句與今本不同，僅見於《隋書·五行志上》。

〔2〕 此句不見於今本，文字有省略，《漢書·五行志上》作“京房《易傳》曰：顓事有知，誅罰絕理，厥災水，其水也，雨以殺人以隕霜，大風天黃。”另見《後漢書》、《晉書》、《宋書》、《隋書》諸五行志。

〔3〕 此句見於《漢書·五行志中之下》，為解《五行傳》“聽之不聰，是謂不謀”一句，原作“言上偏聽不聰，下情隔塞，則不能謀慮利害，失在嚴急，故其咎急也。盛冬日短，寒以殺物，政促迫，故其罰常寒也。”又見《晉書·五行志下》。

〔4〕 《漢書·五行志中之下》引作“興兵妄誅，茲謂亡法，厥災霜，夏殺五穀，冬殺麥。”又見《晉書》、《宋書》、《隋書》諸五行志及《魏書·靈徵志上》。

〔5〕 原作類，同類。

己亥，太白晝見。

癸卯，又晝見。

甲辰，御乾德殿聽政，至日昃。

丁未，放輕繫。

戊申，設《金剛經》道場于乾德殿，禱雨。

戊午，遼東京持禮使禮賓副使高良定來。

六月辛酉，遷景宗神主於榮陵，祔宣宗于太廟。又迎景成王后金氏主於質陵，祔德宗室。

甲戌，鎮溟都部署使、文州防禦判官李順蹊等，與海賊戰，敗之，斬首十七級。

丁丑，東女真榮孫等十七人來朝。

癸未，王與延德宮主柳氏及元子，泛舟東池置酒，召侍中邵台輔、僕射黃仲寶、知樞密院事黃瑩、刑部尚書崔迪、知奏事殿中監崔弘嗣、直門下省李顥<sup>〔1〕</sup>、右承宣給事中柳伸侍宴，相與賦詩，至夜分雷雨，乃罷。

秋七月庚寅朔，御文德殿，覽歷代秘藏文書。擇部秩完全者，分藏于文德、長齡殿、御書房、祕書閣，餘賜兩府宰臣及誥院、史翰、內侍、文臣有差。

丁未，以文宗忌辰道場，如興王寺行香。

設消災道場于會慶殿七日。

八月庚申朔，饗國老於東閣、庶老於左右同樂亭，王率百官親侑，仍賜衣服、幣帛、絲絛有差。

〔1〕 顥同贊。

丙子，東女真卧突、乙古、馬要等來，引見于重光殿，訪問蕃事，賜酒食錦絹。

壬午，知樞密院事、戶部尚書黃宗慤卒，賜弔慰教及誄書，謚凱肅。

九月己丑朔，右僕射、參知政事朴寅亮卒。

庚寅，王以仁睿太后忌辰道場，如國清寺行香，兼祭真殿，以爲恒式。

庚子，毛羅星主遣人來賀即位。

丁未，御宣政殿，引見宋僧惠珍，賜食於翰林院。

戊申，以宋僧省聰、惠珍各爲明悟、三重大師。

癸丑，講《仁王般若經》于會慶殿三日，親飯僧一萬。

冬十月丁丑，設道場于乾德殿三日，轉仁睿太后願，成《華嚴經》。

戊寅，宋商洪輔等三十人來獻土物。

乙酉，遣吳延寵如遼賀天安節。

十一月辛丑，設八關會，幸法王寺。

丁未，遣蘇忠如遼進奉。

戊申，遣白可臣賀正。

十二月丁巳，遼遣李惟信來，賀前王生辰。

（丁丑）二年春正月壬寅，遼遣橫宣使海州防禦使耶律括來，賜前王敕曰：“卿夙撫藩封，恭修職貢，屬嬰疾恙，請遂調頤。有司爰考於典彝，閒世用頒於恩賚。示優存念，當體眷懷。今賜卿衣襖、匹段、鞍馬、弓箭等物，具如別錄，至可領也。”



二月己巳，燃燈，王如奉恩寺。

壬申，東女真卧突等來朝。國清寺成。

戊寅，親設慶讚道場，召門下侍中致仕李靖恭及兩府宰臣宴，賜對賞賚。宣示御製慶讚詩，令儒臣和進。

閏月甲辰，前王薨。

己巳，東女真卧英等七人來朝。

三月庚申，葬前王于隱陵，移牒遼東京兵馬都部署：“前王自退居別邸以來，病勢日增，於閏月十九日薨逝。今已葬訖。前王遺命云：‘昨乞解機務，幸蒙詔允，退養殘骸。近來疾劇，決無生理，飾終諸事，宜從儉約，不須告奏，煩瀆大朝。’肆遵前王遺命，不敢遣使告哀。”

癸亥，以崔思諷爲中書侍郎平章事、判刑部事兼西京留守使，金先錫爲左僕射、判戶部事，黃瑩參知政事，林幹知樞密院事、判三司事，魏繼廷爲禮部尚書、翰林學士承旨，李顥爲禮賓卿、樞密院副使。

夏四月丙戌，御賞春亭，宣示御製《禁亭賞花詩》，令館閣近侍文臣和進，親第高下，賞絹有差。

甲辰，御文德殿覆試，賜林元通等及第。

五月丁卯，醺于會慶殿。

六月甲申，王如奉恩寺。

戊子，門下侍中李靖恭奉宣撰《進興王寺碑文》。王賜詔獎諭，兼賜匹段、銀器、茶布、鞍馬等物。

宋商慎奐等三十六人來。

甲午，宋歸我漂風人子信等三人。初，耽羅民二十人乘舟漂入髀國，皆被殺，唯此三人得脫，投于宋。至是乃還。

秋七月辛未，王如興王寺。

壬申，東女真賊船十寇鎮溟縣，東北面兵馬使金漢忠遣判官康拯<sup>〔1〕</sup>與戰，克之，獲船三艘，斬首四十八級。

八月丁亥，以金先錫爲中書侍郎平章事，林幹爲樞密院事、尚書左僕射。

庚寅，東女真未應等二十四人來朝。

戊戌，幸弘護寺。

丁未，彗星見氏、房間，光芒射天市垣。

九月甲寅，王如國清寺。

乙卯，東女真沙好羅等二十三人來朝。

乙亥，設百高座於會慶殿，講《仁王經》，飯僧一萬。

冬十月辛巳朔，東女真令波等二十五人來朝。

壬寅，東女真阿夫等二十五人來朝。

甲辰，遣安仁鑑如遼賀天安節。

丁未，遣柳澤謝橫宣。

十一月己未，遣庾惟祐如遼，謝賀前王生辰。

戊辰，遣畢公贊進方物，又遣林有文賀正。

甲子，設八關會，幸法王寺。

---

〔1〕 原作姜拯，下文作康拯，統改。

十二月癸巳，遼遣耶律思齊、李湘來，賜玉冊、圭印、冠冕、車輅、章服、鞍馬、匹段等物。冊曰：“朕以昊蒼眷祐，祖宗貽範，統臨天下，四十有三載矣。外康百姓，內撫諸侯，咸底于道。而海隅立社，北抵龍泉，西極鴨綠，祇稟正朔，奉輸琛賫。乃者先臣告謝，嫡嗣銜哀，既即苦塊，俾襲茅土。疊抗章奏，懇稱疾恙，願歸諸父，庸荷崇構。尋依虔請，適委權蒞，而能竭節事大，瀝誠恭上。矧念一方之位，既崇千乘之名，所宜必正，爰行典禮，特行冊命。咨爾權知高麗國王事熙，肖二儀之間氣，含五行之淳烈。九流藝術通乎默識，七雄勢數斷乎雅論。暨持政柄，專裁時務，楨（幹）〔幹〕立而宗室安，帷幄深而伯圖定。雖兄弟猶芝蘭，叢生于卞圃；子孫如騏驎，競馳乎辰野。主其祀者，非爾而誰？爰從龜策，講求憲物。鐵券丹書，約堅帶勵；金印紫綬，榮配車服。是用遣使臨海軍節度使、檢校太傅兼御史中丞耶律思齊，使副太僕卿、昭文館直學士李湘，持節備禮，冊命爾特進、檢校太尉兼中書令、上柱國、高麗國王，食邑一千戶，食實封七百戶。於戲！肇我太祖，嗣及冲人，積功累德，剖符錫壤。于蕃于宣，家世有遺法；曰朝曰會，歲時有常制。永表東夏，與遼無極。其惟敬哉。”王受冊于南郊。

（戊寅）三年春正月丙寅，詔曰：“寡人纂承祖構，方宅丕圖，大遼遣使，特示封崇，宜頒慶賚，上答休命。其受冊日，接詔以下，升壇執禮，內外諸色

員僚及客使接伴官，賜爵一級，有違犯當坐者免之，指揮軍人賜物有差。”

甲戌，幸外帝釋院，設羅漢齋。

二月甲申，親醮于毬庭。

己丑，幸王輪寺。

甲午，燃燈，王如奉恩寺。

壬寅，東女真昌昆等來朝。

丁未，幸妙通寺。

三月甲寅，謁昌陵。

辛酉，謁戴陵。

癸亥，教曰：“寡人謬以涼德，而有元良，宜升震位。”特命有司立太子，備詹事府、左春坊、延慶宮司等官，皂隸、采邑皆屬焉。以邵台輔爲太師，金上琦爲太傅，崔思諷爲太保，金先錫爲少師，黃瑩爲少傅，林（幹）〔幹〕爲（小）〔少〕保，魏繼廷、李顥、趙藺忠、郭尚並爲賓客，金漢忠、洪起爲左右庶子，柳伸、金景庸爲左右諭德，尹瓘爲東宮侍講學士，崔公詡爲家令，文翼、高令臣爲左右贊善大夫，禹元齡爲中舍人，李瑋爲典內，蔣寧爲洗馬，劉載爲侍讀，康拯爲中允，柳仁茂爲司議郎，張景爲藥藏郎，崔寅弼爲宮門郎，李侯爲率更，黃俞顯爲侍衛，吳孫慶、崔惟正爲左右清道率府率，羅俊、弓濟爲左右監門，崔挺爲右衛，崔現爲旅賁中郎將。

乙丑，百官上表，賀立太子府。

丙寅，東女真要真等來朝。

夏四月，東女真古豆等來朝。

己丑，賜李德允等及第。

丁酉，王如興王寺，飯僧三千。

己亥，祈雨于五海神。

五月壬子，雨雹。

辛酉，醺于會慶殿。

六月戊寅朔，王如奉恩寺。

秋七月戊申，祈晴于松嶽神祠。

己未，遣尹瓘、趙珪如宋，告嗣位，進方物。表曰：“君親之慈洽幽荒，既形汎愛；臣子之心存忠孝，焉可妄陳。敢露款誠，輒干旒冕。臣竊念當國，惟祖惟考，乃子乃孫，咸繼世以襲封，緬嚮風而述職。頃者臣兄運紹居侯服，逮事皇朝。遵累葉之貽謀，益堅志節；管遠方之分寄，誓效傾輸。況自先后之忽謝母儀，亡兄則方深孩慕，尋差使价，欲奉慰章，奈不享於永年，致奄辭於明代。臣兄子先臣昱，嗣權弊邑，續染沈痾，終救療以不痊，漸尪羸而斯極。乃於乙亥年十月八日，懇推藩務，令臣主持。顧其付托之勤，未敢遜辭而避，謬將孤藐，假守宗祊。屬以基構惟新，纂承伊始，一方多故，數載于茲，不獲早遣陪僚，仰申封奏。雖宸聰廣達，曲詳遐外之情；而家難沓臻，遂致因循之咎。禮實有闕，罪何敢逃。今則具緩告之事由，黷至明之鑑炤，霆威匪遠，冰履增深。”

丙寅，王如興王寺。

八月丙申，命有司減刑獄。

九月己酉，王如國清寺。

壬子，設仁王道場于會慶殿七日。

冬十月甲申，王率百官祫享于太廟，還御神鳳門。赦二罪以下，當斬絞者配島，前配島者出陸，出陸者歸鄉，歸鄉者上京，上京者通朝見，已朝見者敘用。加名山大川諸神（祇）〔祇〕號，又加贈配享功臣，賜助祭諸執事、太廟九陵侍衛員將等爵一級，廟庭禮部工人賜物有差，進士、明經落在軍伍者免。

戊子，遣知樞密院事金庸、禮部侍郎曹楊休如遼謝封冊。

辛丑，尚書刑部奏獄空，宰相邵台輔等表賀。王下教答諭曰：“朕謬承先業，思理下民。日覽萬機，但積勤勞之念；時清庶獄，實由挾贊之能。何歸美以盡心，遽刻章而展賀。載惟誠慤，良切歎嘉。”宰輔又表謝。

壬寅，遣金若冲如遼賀天安節。

十一月庚戌，宋商洪保等二十人來。

戊午，設八關會，幸法王寺。

乙丑，遣王嘏、尹繼衡如遼進方物，蔣寧賀正。

十二月丙戌，遼遣左諫議大夫來告符來，賀生辰。

辛卯，封子佖爲檢校太保、守太尉兼尚書令。

癸巳，〔遼遣左諫議大夫〕<sup>〔1〕</sup>來告符還，王附表以謝。

〔1〕 據《高麗史節要》補。

庚子，以金景庸爲尚書禮部侍郎、知御史臺事，李繼膺爲尚書刑部侍郎、右諫議大夫，文翼爲給事中，高令臣爲吏部郎中、樞密院右承宣，吳延寵爲起居郎，王嘏爲兵部員外郎、樞密院右副承宣。

丙申，賜禮部宋朝《開寶正禮》一部。

（己卯）四年春正月丙辰，設天帝釋道場于文德殿七日。

幸神衆院，設羅漢齋。

乙丑，朝鮮公燾卒。

二月丁亥，燃燈，王如奉恩寺。

己亥，以金上錡守太傅，黃瑩爲中書侍郎、同中書門下平章事，趙藺忠守司空、尚書左僕射，魏繼廷爲禮部尚書，李顥爲禮部尚書。

宋帝詔：“許舉子賓貢。”

三月乙巳，冊延德宮主柳氏爲妃。

壬子，幸王輪寺，設羅漢齋。

夏四月辛巳，御紗樓，召集詞臣，賦重光殿玉玫瑰花詩，分第賜絹有差。

丁亥，遼遣橫宣使寧州管內觀察使蕭朗來，兼賜藏經。

庚寅，幸普濟寺，設五百羅漢齋。

壬辰，御延英殿，檢閱御藏文書。

戊戌，幸妙通寺。

以林成概爲工部尚書，董彭載知尚書兵部事。

庚子，以任懿爲左諫議大夫，尹瓘爲右諫議大夫、

翰林侍講學士。中書省奏：“瓘與懿連姻，不宜同在諫院，請解瓘職。”從之。

五月乙巳，禱雨于諸神祠。

乙丑，門下侍中致仕李靖恭卒，賜弔慰教及誄書。

六月癸酉，王如奉恩寺。

辛巳，大雨雹。

癸未，尹瓘等還自宋。帝附敕曰：“省所上表具悉。卿世撫三韓，地雄五部。克念先猷之繼，有虔臣節之修。遣浮海之使航，奉充庭之贊寶。式是守邦之始，載輸拱極之忠。詳披奏封，申味詞意，敘傳嗣之緩告，述奉慰之後時。眷惟勤誠，茲已具亮。方新纘紹，宜厚撫循，善布寬條，以綏雅俗，輔我中國，永爲東藩。”

戊戌，禱雨于諸神祠及朴淵川上。

秋七月辛亥，曲宴于宴親殿。

辛酉，王如興王寺。

宋歸我毛羅失船人趙暹等六人。

八月丙子，祈晴。

九月，令宰臣日官等議建南京于楊州。

癸卯，王如國清寺。

乙巳，持禮使邵師奭如遼東京。

壬子，幸普濟寺，設五百羅漢齋。

丁卯，王率王妃、元子、兩府群僚及祐世僧統，幸三角山。

閏月壬申，次常慈寺。甲戌，幸僧伽窟，設齋，



仍施銀香椀、手爐各一事，金剛子、水精念珠各一貫，金帶一腰，並金花果繡幡、茶、香、衣櫛、金綺。乙亥，次楊州相宅都之地。庚辰，幸仁壽寺。

甲申，王子上黨侯佖卒。

辛卯，遣文冠如遼賀天安節。

壬辰，幸神穴寺。

冬十月庚子，遣李壽如遼謝賀生辰。

癸卯，至自三角山，次藥師院，肆赦。

辛亥，告奏兼密進使文翼如遼請賜元子冊命。

醺于會慶殿。

丙辰，東女真阿老火等二十六人來朝。

遣韓彝如遼進方物，趙臣浚賀正。

十一月辛未，王弟扶餘公燾以罪流于京山府若木郡。

壬申，辰韓侯愉卒。

癸未，設八關會，幸法王寺。

十二月壬寅，遼遣大淑來賀生辰。

辛亥，遼東京持禮回謝使大義來。

癸亥，以庾哲爲尚書右僕射兼太子賓客，吳壽增爲刑部尚書，韓瑩爲兵部尚書，趙公善爲戶部尚書，金沅、庾祿崇爲左右散騎常侍。

（庚辰）五年春正月庚辰，遼使蕭朗還，王附表以謝。

甲申，東女真將軍表於乃等六十人來朝。

癸巳，親醺于毬庭。

乙未，冊長子俔爲王太子。

二月乙巳，御神鳳樓，赦二罪以下，加名山大川神號，兩京文武百官爵一級，詹事府、春坊員二級，散官七品升朝二十年者賜服，東西蕃長加武散階，鰥寡老病、孝子順孫賜物有差。

辛亥，燃燈，王如奉恩寺。

戊午，幸長源亭。

三月乙酉，中書省奏：“見行曆有乖錯處，請削撰曆者職。”從之。

癸巳，以崔思諷爲門下侍郎平章事。

夏四月丁酉朔，日食。

己亥，還宮。

壬子，御乾德殿覆試，賜韓淑旦等及第。

五月辛巳，宋明州牒報哲宗皇帝崩，皇弟端王佖立。王爲哲宗，欲薦福於大安寺，諫官不可，乃止。

壬午，遼遣張臣言來，諭冊命元子。王備儀仗，迎于太初門內。敕曰：“卿宣力侯邦，輸忠王室，因飛章而抗奏，乞延賞以推恩，載驗乃誠，宜從所請。仍圖嚴像，增飭貢儀，特示寵頒，式昭優眷。已令所司擇日，備禮冊命次。今差祕書少監張臣言，往彼報諭，及別賜卿衣著、匹段、銀絹等物，具如別錄。又賜釋經二函。”

庚寅，張臣言還，王附表以謝。

六月丁酉，王如奉恩寺。

乙卯，禱雨于太廟、八陵及松嶽東神祠。

乙丑，遣尚書任懿、侍郎白可臣如宋弔慰。

秋七月丁丑，遣尚書王嘏、侍郎吳延寵如宋賀登極。

乙酉，王如興王寺。

戊子，設仁王道場於會慶殿五日。

八月丁酉，幸福靈寺。

庚子，幸弘護寺。

己未，宮南樓橋東廊及四店館、掌牲、司儀二署火，延燒民戶數百。

九月丁卯，王如國清寺。

丙戌，遣李載如遼謝詔諭。

戊子，宋都綱李琦等三十人來。

冬十月丙申，賜中書門下省玄德倉米一百斛。

壬子，遼遣蕭好古、高士寧來冊王太子。敕曰：“卿嗣膺祖服，遙臨海表之區；將建後昆，虔俟天朝之命。適從汝請，既諭朕言。特申遣於使華，俾寵加於公爵。固昭優異，庸示眷懷。今差高州管內觀察使蕭好古等，持禮往彼，冊命卿長子爲三韓國公。其印綬、簡冊、車輅並別賜衣帶、匹段、鞍馬、弓箭諸物，具如別錄。”冊曰：“朕荷七聖之丕圖，紹百王之正統，眷言日域，夾輔天朝。雖纘乃世封，已臨於舊服，而寵茲國嗣，未備於彝儀。申敕有司，率修故事，藏辰順卜，異數爰頒。咨爾高麗國王熙長子俟，生稟元精，幼成令器。就學克敏，究詩書禮樂之源；率德罔愆，合父子君臣之義。祖先而下，忠烈相承，永惟尊獎之

勞，固有嗣續之慶。矧居嫡胄，載茂嘉聞，四履之間，一心所係。是用遣使高州管內觀察使蕭好古、副使守衛尉卿高士寧等，持節備禮，冊命爾爲順義軍節度、朔武等州觀察處置等使、崇祿大夫、檢校太傅、同中書門下平章事、使持節、朔州諸軍事、行朔州刺史、上柱國、三韓國公，食邑三千戶，食實封五百戶。於戲！誓山河而傳信，汝既同保其休；賜弓鉞以撫征，汝亦共宣其力。惟孝敬可以協天性，惟謙和可以順物情。戒哉欽哉，無替朕之嘉命。”乙卯，王與太子如南郊受冊。

己未，太子宴遼使于門下省。

辛酉，遣朴浩如遼賀天安節。

十一月乙丑，遼使蕭好古等還，王附表以謝。

遣金侯善如遼謝賀生辰。

丙子，設八關會，幸法王寺。

戊寅，宋商毛羅女真等來獻土物。

辛巳，遣金龜年如遼謝恩。

丙戌，遣赫連挺如遼獻方物，崔善緯賀正。

十二月癸巳朔，遼遣太僕卿王執中來，賀生辰。

甲辰，王執中還，王附表以謝。

丙辰，以李瑋爲給事中，李穡爲侍御史，邵台幹爲殿中侍御史，劉誼、李德羽爲左右拾遺。

（辛巳）六年春正月丁卯，制：“以九經子史各一本分置臺省、樞密院。”

以太子生辰爲昌寧節。

己巳，設天帝釋道場于文德殿。

庚午，幸神衆院。

癸酉，東女真余羅弗、沙溫等七十五人來獻土物。

丙子，以禮部尚書崔弘嗣爲西北面兵馬使，尚書左丞金德珍爲東北面兵馬使。

遼東京持禮使禮賓副使高克少來。

庚辰，宋人邵珪、陸廷俊、劉伋來投，王召試于文德殿，並授八品官，賜廷俊名廷傑。

辛巳，遣兵部尚書韓瑩、大將軍張弘占，賜中書侍郎金先錫官誥禮物。

癸未，注簿李景澤妻金氏，欲殺夫之繼母，陰使婢置毒於食以進。母知之，以告御史臺。金不服，御史臺請更鞠問。王曰：“犯狀已白，宜即論決。”以金先朝外戚，減死，流安山縣。景澤死獄中。

乙酉，刑部奏：“注簿同正趙俊明父沒四年，不養其母，不友其弟，使皆失所，請論如法。”王曰：“朕爲政先孝弟，乃有若人耶？”可其奏。

辛卯，設消災道場于乾德殿四日。

二月壬辰朔，貶詔諭回謝使孔目官李復，並免回謝使李載。

癸巳，錄囚。

甲午，遣使望秩于山川。

癸卯，東女真乃巴只村歸德將軍甫馬弓漢、伊忽村都領麻浦、廣灘村將軍骨夫等五十五人請入朝，許之。

乙巳，東女真伊位村都領怪夫等三十人來朝。

丙午，燃燈，王如奉恩寺。

參知政事致仕慎脩卒，遣使弔祭，謚恭獻。脩，宋人也，頗有學識，尤精於醫。

己酉，檢校太師、守司空滋卒。

壬子，詔：“逆臣李資義從坐者，皆量移。”

乙卯，又詔曰：“逆黨罪疑者，已赦之矣。其侍御史王台紹、主簿全寵、判官李滋、衛尉少卿金義英妻李氏等許令還京。”

丙辰，幸洪圓寺，落成大藏堂及九祖堂。

戊午，御重光殿，閱書籍。

三月戊辰，幸王輪寺。

庚午，幸弘護寺，御製詩，命內侍儒臣和進。

壬申，制：“以秘書省文籍板本委積損毀，命置書籍鋪于國子監，移藏之，以廣摹印。”

丙子，設藏經道場于會慶殿，御製慶讚詩。

己卯，王避遼帝嫌名，改名顥，告于太廟、八陵，群臣表賀。

庚辰，設般若道場于乾德殿。

遼遣檢校右散騎常侍耶律轂來，告道宗崩，皇太孫燕國公延禧嗣位。

廣明寺僧光器、主簿孫弼、進士李震光詐造陰陽書，事覺，杖流之。

丙戌，祭五瘟神。

庚寅，詔曰：“己卯年幸三角山，所過名山大川，

神號各加‘仁聖’二字，令所在州縣祭告。”

夏四月辛卯朔，日食。

癸巳，從祀六十一子、二十一賢于文宣王廟。

御史臺奏：“遼告哀使傳命後，以皂衫烏帽赴宴，非禮也，請罪迎送員吏。”王曰：“此使者之失，迎送員吏何與焉？”不聽。又奏：“司天卜正柳綠春誤奏日食分刻，請論如法。”從之。

以旱，禱雨于天地、宗廟、山川。

乙未，以樞密院事吳壽增爲西北面兵馬使、知中軍兵馬使事。

丙申，幸普濟寺。

戊戌，幸妙通寺，設摩利支天道場。

庚子，幸普濟寺。

辛丑，平州妖僧覺真妄言陰陽，眩惑衆人，詔流谷州。

壬寅，以洪器爲工部尚書，充史館修撰官。

癸卯，錄囚。

遣太府少卿王公胤、閤門使魯作公如遼弔慰會葬。

東路州鎮雪深一寸。

甲辰，醺太一祈雨。

幸外帝釋院。

翰林院奏：“御名同韻字，請令祕書省彫板頒示，使人知所避諱。”制可。改雍和殿爲祥和殿。

乙巳，曝巫祈雨。

群臣上言：“松虫蕃殖，壓襁無效。臣等謹按京房

《易飛候》云：‘食祿不益聖化，天示之虫。’臣等無狀，以貽上憂，願進賢退不肖，以答天譴。”不報。

設龍王道場于臨海院，祈雨。

戊申，合祭己卯年行幸所過名山大川神（祇）〔祇〕于開城府及楊州。

幸日月寺，慶成金字《妙法蓮華經》。既畢，與后妃、太子登寺後岡，欲置酒爲樂。御史臺奏：“時方盛農，旱魃爲災，若樂酒於此，百姓孰謂殿下憂民之憂？”王乃止。及還，有感作詩，末句云：“蓮宮觀訪酬前願，兼禱時霖表至心。”

己酉，禱雨于天地、宗廟。

辛亥，放輕繫。

甲寅，詔曰：“方今農時，天久不雨。恐州郡官吏不體予意，逗撓德音，所免租稅，使民不被其澤，或冤獄滯囚，久而不決，餓莩曝骸，棄而不葬。又公私收稅甚重，召民怨，傷和氣而致然也。有司其布德惠，禁非法，平訊具獄，掩骼埋胔，亟答天譴。”

丙辰，大雩。

設仁王道場于文德殿祈雨。

鑄錢都監奏：“國人始知用錢之利以爲便，乞告于宗廟。”從之。

戊午，女真氈工古舍毛等六人來投，賜田廬，以充編戶。

庚申，割平虜鎮關內楸子田與民耕之。

五月壬戌，禱雨，斷扇，徙市。



甲申，任懿、白可臣等還自宋，帝賜神醫補救方。王受詔於宣政殿。

制：“以今秋役夫六千五百人修營弘護寺。”

六月辛卯，王如奉恩寺。

丙申，王嘏、吳延寵還自宋，帝賜王《太平御覽》一千卷。

己亥，以任懿爲御史大夫，尹瓘爲樞密院知奏事。

庚子，以林幹判尚書刑部事，魏繼廷判翰林院事，吳壽增判三司事，王嘏爲樞密院左承宣，趙珪爲右副承宣。

辛丑，定州長今男盜官庫鐵甲四部，賣與東女真，事覺，伏誅。

甲辰，王受菩薩戒于乾德殿。

詔：“除兩京軍卒不急之役。”

分內府文書藏于樞密院。

戊午，以太府卿金漢忠爲西北面兵馬使，御史中丞高令臣爲東北面兵馬使。

秋七月辛酉，制：“以役夫一千九百人修營國清寺。”

己卯，王如興王寺。

八月癸巳，詔曰：“元曉、義相，東方聖人也，無碑記、謚號，厥德不暴，朕甚悼之。其贈元曉大聖和靜國師，義相大聖圓教國師。有司即所住處，立石紀德，以垂無窮。”

乙巳，詔曰：“朕自御神器，居常小心，北交大

遼，南事大宋，又有女真倔強于東。軍國之務，安民爲急，宜罷不急之役，以安斯民。”

都兵馬使奏：“今遼東京兵馬都部署移文，請罷靜州關內軍營。頃在大安中，遼欲於鴨江置亭子及樵場，我朝遣使請罷，遼帝聽之。今亦宜從其請。”制可。

九月壬戌，王如國清寺。

戊寅，遣同知樞密院事郭尚、尚書左丞許慶如遼賀即位。

西女真古時毛來投，賜田宅。

甲申，幸總持寺，問母弟僧煦疾。

設《仁王經》道場于會慶殿、毬庭及外山諸寺，飯僧（王）〔三〕萬。

是月，置南京開創都監，命（問）〔門〕下侍郎平章事崔思諷、御史大夫任懿、知奏事尹瓘、少府監致仕文象、春官正陰德全、秋官正崔資顯相之。

冬十月壬辰，御史臺奏：“京畿捕賊軍士擅掠民戶，爲害反甚，請罷之。”制可。

乙未，以毛羅新星主陪戎副尉具代爲遊擊將軍。

崔思諷等還，奏云：“臣等就盧原驛、海村、龍山等處審視山水，不合建都，唯三角山面嶽之南，山形水勢符合古文。請於主幹中心大脉壬坐丙向，隨形建都。”制可。

丙申，以始創南京，告于宗廟社稷山川。

十（二）〔一〕月戊辰，以羅俊爲左右衛上將軍、攝刑部尚書，崔挺爲金吾衛上將軍、工部尚書。

辛未，設八關會，幸法王寺。

宋商、耽羅、東北蕃酋長等來獻土物。

十二月丙午，遼遣高州管內觀察使高德信來，賀生辰。

以魏繼廷爲中書侍郎、同中書門下平章事、柱國，李顥參知政事、柱國，吳壽增爲尚書左僕射兼太子賓客，柳伸爲禮部尚書、同知樞密院事、翰林學士承旨，金景庸爲兵部尚書、同知樞密院事，韓瑩爲尚書右僕射，崔弘嗣爲吏部尚書，白可臣爲兵部侍郎、左諫議大夫，高令臣爲刑部侍郎、右諫議大夫，康拯爲考功郎中、御史雜端，盧忠謹爲侍御史，金至和爲右補闕，金峻、張起爲左右拾遺。

己酉，遼遣崇祿卿吳佺來，致道宗遺留衣帶匹段等物。

（壬午）七年春正月辛未，以左散騎常侍庾祿崇知西北面兵馬事，少府監李繼膺知東北面兵馬事。

二月丙申，命太子醮三界百神于毬庭。

丁酉，西女真高舍等十八人來獻土物。

庚子，燃燈，王如奉恩寺。

丁未，西女真阿號羅等十五人來獻土物。

庚戌，東女真安旦分那老等十八人來朝。

乙卯，平章事金先錫三上表請老，許之。

三月丁巳，幸神衆院，設齋。

庚申，幸王輪寺。

辛酉，以李顥判尚書戶部事，郭尚爲左僕射、參

知政事兼西京留守使。

乙亥，王欲如興王寺，會天雨，諫官諫止之。

丁丑，放輕繫。

命尹瓘、李宏試進士于順天館，遣殿前副承旨梁信英，賜宋朝細筆一千二百管于進士。

己卯，御史臺奏：“四門進士李齊老，盲僧法宗之子，不合應舉。”王曰：“孔子謂仲弓曰：‘犁牛之子，騂且角，雖欲勿用，山川其舍諸？’科目將以求賢，齊老苟有才學，豈可以父故廢之？可令赴舉。”

庚辰，設佛頂道場于文德殿。

中書門下奏：“新作南京，度地必廣，多奪民田。請據《京緯令》所說，或依山取勢，或約水表形，先以內從山水形勢，東至大峰，南至沙里，西至岐峰，北至面嶽爲界。”制可。

靖宗妃延興宮主金氏卒。

夏四月丁酉，御乾德殿，覆試進士，召太子及宰樞、兩制詞臣置酒，宣題“春風扇微和”，令太子及詞臣各賦六韻詩以進。賜康滌等及第，並召試投化宋進士章忱，賜別頭及第。

甲辰，東女真酋長盈歌遣使來朝。盈歌，即金之穆宗也。

五月丙寅，幸玄化寺，慶讚銀書瑜伽顯揚論。

丁卯，以庾祿崇爲樞密院使兼太子賓客。

戊辰，守司空、尚書右僕射黃仲寶卒。

六月乙酉朔，王如奉恩寺。

丁亥，詔曰：“松虫於泰安二年丙寅，始出西山，延及白州、兎山，而近來尤盛，此必刑政乖戾所致。夙夜祇懼，乃與群臣引咎責己。自五月癸酉至乙亥，醺天告謝，庶以寬刑宥罪，上答天譴。放免今日以前內外公徒私杖以下雜罪，其令樞密院施行。”

戊戌，宋商黃朱等五十二人來。

甲辰，以直門下省文翼爲西北面兵馬使，太僕卿金德珍爲東北面兵馬使，崔翥爲刑部尚書，李繼膺爲左散騎常侍，劉載爲右諫議大夫。

丙午，以選士日侍宴，賜平章事林幹、魏繼廷，參知政事郭尚馬各一匹，授新及第章忱將仕郎、禮賓注簿同正。

閏月甲寅朔，宋商徐脩等三人來。

丙子，宋商朱保等四十餘人來。

秋七月辛卯，設消災道場於會慶殿三日。

庚子，幸外帝釋院。

癸卯，王如興王寺。

庚戌，幸西京。

壬子，禮部奏：“謹按尚書疏，王者所爲巡守者，以諸侯自專一國，威福在己，恐其壅遏上命，澤不下流，故自巡守，爲民除弊。宜命西京留守及先排按察使，先訪民間疾苦，蠲除撫恤，及前降赦恩，未盡奉行者，付有司施行。”制可。

八月癸丑朔，行在臣僚奉表賀朔。

丁巳，至大同江御龍船，宴太子、扈從臣僚及西

京文武兩班，觀水戲雜技，至晡而罷，入御長樂殿。

戊午，謁太祖真殿。

庚申，曲宴于美花亭，改賜額曰“有美”，御製詩一絕，命兩京儒臣和進。

癸亥，移御集祥殿，命直史館洪灌書殿門額。

甲子，幸興福、永明兩寺行香，遂御九梯宮，留題永明寺、浮碧樓、九梯宮詩各一首，命兩京儒臣和進，遂御龍船，宴群臣。

庚辰，王至梯淵岸，命善泅禁軍五人尋舊梯基。五人奏云：“去地十尺有梯基石。”遂幸弘福寺行香，出御寺南江岸閱射，因命置酒，太子及臣僚侍宴。親製“秋日遊鎬京，南河開宴詩”四韻，宣示兩京儒臣和進。至晡，還宮。

乙亥，幸重興寺。

丁丑，新修神護寺。

戊寅，西京留守官、參知政事郭尚等享王于長樂殿，兩京群臣侍宴。

九月丙戌，王以仁睿太后忌辰道場，幸長慶寺行香。

戊子，幸觀風殿，還御會福樓，命牽轡官射。

甲午，制曰：“朕久未省方，今幸西京，庶幾寬刑宥罪。自動駕以來，從行先排使及當京留守所奏犯輕罪者，並令原免。”

丁酉，興福寺十王堂成，命太子行香。

戊戌，王與后妃、太子、諸王幸是寺落成。

辛丑，幸金剛寺，飯僧，遂觀舊塔遺址，仍命太子巡視川上祭所及通漢橋。

癸卯，御會福樓閱射。

宋商林白徇等二十人來。

乙巳，閱射。

丙午，幸長慶寺，閱騎射。

命副留守崔公詡等檢討留守藏內書籍以進。

己酉，幸神護寺，設大藏會以落之，自闕庭至寺，夾路點燈數萬。

庚戌，又幸是寺行香。

冬十月丁巳，幸興福寺。

乙丑，設八關會，御靈鳳門，受百官賀，遂幸興國寺。

庚午，御長樂殿，宴兩京文武顯官臣僚，賜幣有差。

壬申，遣安子恭如遼賀天興節。

甲戌，駕發西京。

庚辰，王次北崇山神護寺，設五百羅漢齋。

十〔一〕月壬午朔，王次牛陁川，野有虎突出，命侍奉軍逐之，牽韉校尉宋宗紹搏殺之，賜宗紹衣一襲。

丁亥，次臨湏驛，下德音，加所歷名山大川神（祇）〔祇〕德號，宥沿途州縣官吏輕罪，加職一級，賜諸司掌固諸衛旗頭初職。

王還京都。

癸巳，東女真霜昆等三十人來獻馬。

甲午，遣楊信孚如遼謝賀生辰。

乙未，設八關會，幸法王寺。

壬寅，遣郭峻穆如遼進方物。

甲辰，以尹瓘爲樞密院副使。

遣金澤先如遼賀正。

丁未，東女真盈歌遣使請銀器匠，許之。

十二月壬子，遼遣橫宣使歸州管內觀察使蕭軻來。

癸丑，又遣中書舍人孟初來賀生辰。

戊辰，祈雪于太廟。

辛未，以柳仲爲禮部尚書，尹瓘爲御史大夫，崔弘嗣爲尚書右僕射兼三司事，林義爲禮部尚書兼史館修撰。

壬申，東女真酋長古羅骨等三十人來獻馬。

乙亥，赤虹貫日。

庚辰，以林幹判西北面兵馬事兼中軍兵馬使，吳壽增判東北面兵馬事兼行營兵馬使，柳仲爲西北面兵馬使。



## 高麗史十二

### 世家卷第十二

#### 肅宗二

（癸未）八年春正月癸未，以王源檢校司徒、守司空、上柱國。

己丑，東女真高羅骨等三十人來朝。

辛卯，西女真芒間等二十四人來朝。

二月丙辰，東女真將軍豆門小等三十人來獻土物。

東女真將軍高夫老等三十人來獻馬。

己未，燃燈，王如奉恩寺。

辛酉，以邵台輔守太傅、判戶部、西京留守事，崔思諷守太尉、判吏部事，林幹守司徒、判兵部事，魏繼廷守司空、判禮部事，李顥檢校司徒、守司空、判刑部事，吳壽增參知政事，金景庸知樞密院事。

壬戌，以郭尚守司空，仍令致仕。

己巳，宋明州教練使張宗閔、許從等與綱首楊炤

等三十八人來朝。

東女真豆門、恢八等九十人來朝。

乙亥，以吳壽增守司空，柳伸檢校司空，庾祿崇爲尚書左僕射、參知政事，尹瓘爲禮部尚書、同知樞密院事，王嘏爲樞密院副使。

三月己丑，命直史館洪灌書《無逸篇》于會慶殿屏風。

夏四月丁巳，赤虹犯日。

庚申，雨雹。

五月辛巳，以金漢忠爲禮部尚書，任懿爲兵部尚書，金景庸爲戶部尚書。

六月己酉，王如奉恩寺。

壬子，宋遣國信使戶部侍郎劉逵、給事中吳拭來，賜王衣帶、匹段、金玉器、弓矢、鞍馬等物。甲寅，王迎詔于會慶殿。詔曰：“卿世紹王封，地分日域。奏函屢達，常懷存闕之心；貢篚荐豐，遠效旅庭之實。載嘉亮節，特致隆恩，輟侍從之近臣，將匪頒之異數。事雖用舊，禮是倍常。宜承眷遇之私，益懋忠勤之報。”並遣醫官牟介、呂昞、陳爾猷、范之才等四人來，從表請也。

丙寅，遼遣報冊使邊唐英來，詔曰：“朕承八聖之鴻休，纂千齡之景祚。永懷統御，莫敢康寧，方星歲之載移，致天區之咸乂。顧茲群辟，繼陳烈於奉章；請以徽名，願推崇於眇德。靡遑牢讓，勉循勤誠，已定今年冬行冊禮。卿慶奠侯蕃，忠扶王室，聞修盛禮，

諒協多歡。”

丁卯，以李顥爲西京留守使，吳壽增判尚書戶部事，柳仲爲左僕射、政堂文學，崔弘嗣爲樞密院使兼太子賓客，尹瓘知樞密院事兼翰林學士承旨，崔翥爲戶部尚書，李繼膺爲左散騎常侍，文翼爲右散騎常侍。

秋七月辛卯，宋國信使劉逵等還，王附表以謝，兼告改名。

宋醫官牟介等館于興盛宮，教訓醫生。

乙未，東女真酋長昆豆遣人獻黃毛一萬條。

丁酉，王如興王寺。

甲辰，東女真太師盈歌遣使來朝。有本國醫者居完顏部，善治疾。時盈歌戚屬有疾，盈歌謂醫曰：“汝能治此人病，則吾當遣人歸汝鄉國。”其人果愈，盈歌如約，遣人送至境上。醫者至，言于王曰：“女真居黑水者，部族日強，兵益精悍。”王乃始通使，自是來往不阻。盈歌既破蕭海里，報捷于我，我復使人賀之。盈歌遣其族弟斜葛報聘，王待之甚厚。

八月庚戌，憲官奏評刑書。

大將軍高文蓋、張洪占、李弓濟，將軍金子珍等潛懷逆謀。庚申，命御史臺捕之，流于南極。

九月庚辰，王如國清寺。

乙未，召內侍及侍從文臣於重光殿，命題賦詩，賜酒。

壬寅，遣李繼膺、朴景綽如遼賀加上尊號。

乙巳，以崔思諷爲門下侍中，林幹爲門下侍郎平

章事，李顥爲中書侍郎平章事。

丙午，飯僧一萬。

冬十月丁未朔，制：“改錄壁上功臣職號。”

甲寅，以崔弘嗣爲西北面兵馬使兼知中軍兵馬使。

丙辰，以宋帝天寧節，命太子設齋于奉恩寺。醫官牟介等往觀之，賜牟介等酒幣。

庚申，遼東京回禮使禮賓副使高維玉等來。

遣宋琳如遼賀天興節。

庚午，詔：“徵無等山處士殷元忠。”

壬申，幸東池，閱射，中鵠者賜物有差。

甲戌，遣金國珍如遼謝橫宣。

十一月乙酉，遣崔繼芳如遼謝賀生辰。

己丑，設八關會，幸法王寺。

京城地震。

丙申，東女真太師盈歌遣古酒、率夫、阿老等來獻土物。

丁酉，遣趙卿如遼進方物，沈侯賀正。

十二月戊申，遼遣烏興慶來賀生辰。

戊午，京城地震。

壬申，北蕃將軍從昆、阿老等四十七人來獻土物。

（甲申）九年春正月辛巳，東女真男女一千七百五十三人來投。

東女真酋長烏雅束與別部夫乃老有隙，遣公兄之助發兵攻之，騎兵來，屯定州關外。

癸未，王以門下侍郎平章事林幹判東北面行營兵

馬事，御宣政殿，授鉞往備之。又以直門下省李瑋爲西北面行營兵馬使，衛尉卿金德珍爲東北面行營兵馬使。

戊子，西女真從昆等三十人來獻土物。

二月戊申，宋醫官牟介等還。

壬子，林幹與女真戰于定州城外，敗績。有司劾奏幹及兵馬使左僕射黃俞顯、副使大將軍宋忠、戶部侍郎王公胤、右承宣趙珪敗績之罪，皆罷之。

乙卯，西女真居羅弗、麻浦等四十九人來獻土物。

庚申，燃燈，王如奉恩寺。

乙丑，以樞密院使尹瓘爲東北面行營兵馬都統，御重光殿，授鉞遣之。

三月丙子，以李顏守司空、尚書右僕射。

丁丑，尹瓘與女真戰，斬三十餘級，我軍死傷陷沒者過半。

己卯，設仁王道場於會慶殿，飯僧一萬于毬庭。

庚辰，召全州牧使吳延寵爲樞密院左承宣、知御史臺事。

命太子覆試進士于乾德殿。

甲申，賜宋瑋等及第。

丙戌，以劉載、文冠爲左右諫議大夫。

己丑，設佛頂道場於文德殿。

夏四月甲子，遼遣耶律嘉謨、夏資睦來。冊王詔曰：“朕以推尊薦號，肆類告成，覲群后以講儀，越庶邦而同慶。卿白茅苴社，玄菟開疆，礪山銘受國之功，

航海納來庭之款。適均霈澤，爰議增封，當體至恩，永符深睠。今差安遠軍節度使耶律嘉謨等備禮往彼冊命，其簡冊、車輅並賜衣襪、匹段、鞍馬、弓箭諸物，具如別錄。”冊曰：“軒立諸侯，肇分于萬國；漢封異姓，始建於八王。朕祇遜先猷，紹隆正統，近從衆欲，勉受洪名。在正朔之所同，覃惠澤而已及。眷言日域，虔奉天朝，封疆廣於七雄，功烈高於五霸。式當均慶，特議疏封，申擇令辰，誕敷休命。咨爾特進、檢校太尉兼中書令、上柱國、高麗國王，食邑七千戶，食實封七百戶王頤，夙鍾閒氣，生稟元精，負文武之長材，知君臣之大體。十枝若木，森森聳奉日之標；九曲洪河，浩浩得朝宗之勢。粵從道廟，慶襲王藩，益恭表海之勤，無喪礪山之誓。一方俾乂，七載于茲，屬成茅絕之儀，當被蓼蕭之澤。是用遣使安遠軍節度使耶律嘉謨、副使利州管內觀察使夏資睦等，持節備禮，冊命爾爲忠勤奉國功臣、開府儀同三司、守太尉兼中書令、上柱國、高麗國王，食邑七千戶，食實封七百戶。於戲！恩隆九錫，在子既廣於榮封；業茂一匡，宜汝愈勤於夾輔。勉服丕訓，永孚于休。”王受冊于郊壇，群臣表賀。

庚午，耶律師傳、張織來冊太子，王與太子如南郊。王先受詔。詔曰：“朕紹開正統，奄宅多方，俯順群情，勉膺顯號。內則百官小大咸被於優恩，外則九服公侯悉加於渥名。卿嗣延祖構，尊獎皇朝，嘉茲奕世之忠勤，寵爾承家之令嫡。特遣輶馭，往將冊儀，

茲諭至懷，式昭殊眷。今差耶律師傅等備禮往彼，冊命卿長子三韓國公。”太子登壇受冊。詔曰：“朕誕承駿命，祇紹鴻圖，膺寶冊以展儀，際藩方而均慶。卿克家毓德，體國疏封，翊成尊獎之勞，深悉忠勤之力。適覃恩渥，申煥彝章，當副至懷，用昭殊眷。今差泰州管內觀察使耶律師傅等，備禮往彼冊命，其簡冊、車輅並別賜衣襪、匹段、鞍馬、弓箭諸物，具如別錄。”冊曰：“朕荷天地之靈休，席祖宗之丕構，勉膺群請，方舉于尊稱；思與庶邦，普均于鉅慶。眷言東表，夾輔皇朝，累葉宣勞，榮分於王爵；一方述職，恪服於帝猷。載惟嫡胄之良，早宅上公之貴，若稽前訓，申煥彝儀。咨爾順義軍節度、朔武等州觀察處置等使、崇祿大夫、檢校太傅、同中書門下平章事、使持節、朔州諸軍事、行朔州刺史、上柱國、三韓國公，食邑三千戶，食實封五百戶王俟，器度淵宏，風猷冲粹。幼昭雅德，資孝敬以奉君親；夙蘊令圖，秉文武而翊軍國。繇克嗣于家範，俾慶襲於國封。領茅壇節制之權，同槐府平章之寄。會束莖以崇禮，宜及蕭而霑恩。是用遣使泰州管內觀察使耶律師傅、副使鴻臚卿張纖等，持節備禮，冊命爾爲順義軍節度、朔武等州觀察處置等使、特進、檢校太尉兼侍中、使持節、朔州諸軍事、行朔州刺史、上柱國、三韓國公，食邑三千戶，食實封五百戶。於戲！鏤竹泥金，示優加於眷矚；若帶如礪，當共保於安榮。爾其忠順以律躬，慈和而撫衆，副朕嘉命，厥惟懋哉。”

五月乙酉，以門下侍中致仕邵台輔守太師。

甲午，雨雹。

南京宮闕成。

六月癸卯，王如奉恩寺。

甲辰，以吳延寵爲尚書左丞、翰林侍講學士，許慶爲給事中、樞密院右副承宣。

甲寅，東北面兵馬都統奏：“女真自毀場寨，公兄之助等六十八人扣關乞和。”

秋七月辛巳，左僕射政堂文學柳伸卒。

辛卯，王如興王寺。

以李顥爲中書侍郎平章事、判三司事、太子少保，尹瓘參知政事、判尚書刑部事兼太子賓客。

遣樞密院使崔弘嗣、秘書監鄭文如宋謝恩進方物。

戊戌，幸南京，平章事李顥、參知政事吳壽增、權知樞密院副使吳延寵、判御史臺事任懿等扈從。

辛丑，駕次峰城縣，出官錢，賜群臣軍士有差。

八月乙巳，村婦野老爭獻瓜果于路，各賜布帛。又出內府茶香、衣襯，施于路傍佛舍。

丙午，駕次常慈院，遣侍御史崔謂齎御衣、茶香，禱雨于三角山僧伽窟。

辛亥，駕至南京，事皆依日官所奏，不合禮制，有司莫有言者。

壬子，王與內中遊覽臺榭、園囿。

甲寅，御延興殿，受中外百官朝賀。

乙卯，設般若道場于延興殿三日。



丁巳，宋都綱周頌等來獻土物。

己未，宴群臣于延興殿，賜幣有差。

辛酉，以崔弘嗣參知政事，任懿同知樞密院事，  
吳延寵爲樞密院副使、翰林學士，陸肇爲尚書右僕射。

癸亥，車駕發南京，與內中幸僧伽窟，設齋納觀。

九月辛未朔，次狻猊驛。甲戌，遂幸國清寺。

乙亥，頒德音，幸長源亭。

己卯，王賦《重九詩》，命儒臣和進。

冬十月辛亥，王還宮。

庚午，遼東京大王耶律淳遣使來聘。

遣智寵延如遼賀天興節，文冠謝賀封冊，崔璿謝  
賀生辰，金漢公進奉，崔德愷賀正。

十一月癸酉，祈雪于宗廟、社稷。

甲申，設八關會，幸法王寺。

甲午，中書侍郎平章事致仕金先錫卒，王弔祭，  
賜謚忠簡。先錫廉毅有吏材，不事產業，然年方乞骸，  
尚顧戀不退，時人譏之。

是月，遣密進使金沽如遼。

十二月壬寅，以魏繼廷爲門下侍郎平章事，崔思  
諷守太保，李顥爲太子少保，王嘏爲三司事，李繼膺  
爲刑部尚書，崔公翊攝工部尚書。

丙辰，遼遣馬直溫來賀生辰。

（乙酉）十年春正月，癸丑，燃燈，王如奉恩寺。

命太子醮三界靈祇于毬庭。

閏月丁丑，中書侍郎平章事吳壽增致仕，以李瑋

爲秘書監、知尚書吏部事，文冠爲少府監、知御史臺事兼太子左庶子，許慶爲吏部侍郎、樞密院左承宣。

三月癸卯，王如國清寺，置仁睿太后願成金塔。

甲辰，以趙藺忠爲尚書右僕射，韓瑩爲刑部尚書。

夏四月己巳，幸外帝釋院。

壬午，幸大內法雲寺，設仁王道場。

六月丁卯，王如奉恩寺。

甲戌，以魏繼廷爲太子太傅，崔弘嗣檢校太尉、守司徒、中書侍郎、同中書門下平章事兼太子太保、判尚書禮部事、修國史，尹瓘爲太子少保、判尚書兵部翰林院事，李顥守司徒、太子少師兼西京留守使，鄭文爲刑部尚書、政堂文學兼太子賓客，任懿爲樞密院使、吏部尚書，王嘏知樞密院使、兵部尚書，吳延寵同知樞密院事、秘書監、翰林學士承旨，金景庸判尚書工部事，李瑋爲御史大夫。

秋七月乙卯，王如興王寺。

八月丁卯，幸龜山寺。

庚午，設佛頂道場于文德殿。

乙亥，幸西京。

壬午，謁太祖真于感真殿，遂謁五星殿，仍御長樂殿，受百官朝賀。

乙酉，制：“以陝州守高旻翼侵漁百姓，下獄鞫問。”

戊子，幸弘福寺設齋，遂御南岸帳殿置酒。太子及宰樞、兩京文武大臣侍宴，王賦詩四韻宣示。

己丑，閱射于昌化門。庚寅，亦如之。太子中的，群臣皆賀。

癸巳，放輕繫。

九月戊戌，以仁睿太后諱辰道場，幸長慶寺。

癸卯，遼霜丘來投。

壬子，御營作院門，閱武士射御。

丙辰，王不豫。

丁巳，發西京。

冬十月乙丑，王疾大漸，次于金郊驛。

丙寅，夜半發金郊，至長平門外，薨于輦中。遲明，到西華門發喪，太子群臣哭踊，奉入迎英殿。即日，移殯于宣德殿。遺詔曰：“朕以涼德，嗣守大業，永惟萬事之統，未遑一日之安，躬覽庶政，至于宵旰者，十有餘載矣。思與中外之人，共躋仁壽之域，乃何憂勞成疾，遂至彌留。天命難諶，任適短長之分；邦基至重，敢忘顧屬之言。王太子仁義孝友，本乎生知，溫慈惠和，副於民望，宜於柩前，便即君位。凡軍國大事，一稟嗣君處分。方鎮州牧，只於本處舉哀，不得擅離理所。喪服之制，以日易月。山陵制度，務從儉約。於戲！知始終之期，逝者以之無憾；講久長之策，存者不可傷生。尚賴股肱大臣，百辟卿士，同輸忠力，夾輔王室，使我國祚垂于無窮，則朕雖瞑目，心則足矣。布告國內，明知朕懷。”王壽五十二，在位十年，謚曰明孝，廟號肅宗，葬于松林縣，陵曰英陵。仁宗十八年，加謚文惠。高宗四十年，加康正。

## 睿宗一

睿宗文孝大王，諱俔，字世民，肅宗長子，母曰明懿太后柳氏。文宗三十三年正月丁丑生，深沈有度量，雅好儒學。宣宗十一年，拜檢校司空、柱國，累陞太尉。肅宗五年，立爲王太子，冊曰：“朕纂服祖宗，司牧黎庶，臨四海之逾廣，顧萬幾之寔繁，冀保元良之扶贊，式延祚業之昌興。咨爾長子，天縱英懷，日躋令聞，德行內敏，威惠外宣，率土以之宅心，群議以之歸美，承祧守器，非汝而誰。是用備霄極之亞儀，席震宮之寵級，時從龜筮，命降龍綸。今遣使持節備禮，冊命爾爲王太子。於戲！視膳問安，奚獨稱於曩世；撫軍監國，足可見於茲辰。善乃始終，眷無怠忽。規矩以晉室六傅，左右以商山四公。斥遠驕奢，勉強學問。勿以極貴而恃己，勿以自賢而傲人。予有所艱，加之以鍼藥；予有不軌，施之以準繩。佩服師訓，儆戒無射。”九年，遼遣使冊爲三韓國公。十年十月丙寅，肅宗薨，奉遺詔即位於重光殿。

乙亥，有司奏：“御諱同韻嘆、慶、個、蜈、唉、喁字，請改避諱。”從之。

甲申，葬肅宗于英陵。

戊子，遣中書舍人金緣如遼告哀。

庚寅，禁士庶與內官交通干謁。

癸巳，遣刑部侍郎崔緯如遼賀天興節。

尊母柳氏爲王太后。

改壽寧宮曰大寧，長慶宮曰崇德，延平宮曰安壽。

甲午，賜長公主大寧宮，二公主崇德宮，三公主安壽宮。

十一月戊戌，以宗室瑛守太尉，源檢校太尉、守司徒，魏繼廷守太尉、門下侍中、上柱國，崔弘嗣、李顥並爲門下侍郎、同平章事，尹瓘爲中書侍郎、同平章事，任懿爲尚書左僕射、參知政事，鄭文檢校司空、禮部尚書，金景庸爲太子太師、守司空，王嘏爲吏部尚書、樞密院使，吳延寵知樞密院事、御史大夫，李緯爲刑部尚書、知制誥，高令臣爲祕書監、直門下省，康拯知御史臺事。

己亥，以崔挺爲尚書右僕射、鷹揚軍上將軍，崔惟正爲兵部尚書，高義和爲龍虎軍上將軍、刑部尚書，黃俞顯爲興威衛上將軍、戶部尚書。

庚子，以畢光贊檢校太子太師、上護軍，赫連挺爲長樂殿學士、判諸學院事。

辛丑，制：“潛邸時及即位日，侍衛將校員吏僧徒有功勞者，特加爵賞。”

壬寅，御神鳳門，赦。

甲辰，詔曰：“朕聞民間買賣，所用穀米及銀品甚惡，故前代以來，嚴法禁之，而至今未見其懲戒者。蓋奸猾之類不畏法禁，惟利是求，乃以沙土和米，銅鐵交銀，以眩惑愚民，甚非天地神明之意，民之

〔貧〕困，實由於此，可懲之以法。然堯舜畫衣冠，民不犯法，刑措不用，比屋可封，朕甚慕焉。庶幾內外軍民、工商雜類，改心革慮，遷善遠罪，則自然刑罰清而德教洽矣。富壽之業、太平之風，豈難致哉？如有不識此意，故有違犯者，必罰無赦。”

丙午，御史臺奏：“刑措不用，帝王盛德，今囹圄空虛，請書‘獄空’二字，揭于法司南街，以示盛朝刑措之美。”宰相表賀。時狴獄近經大赦，罪人皆放，而御史以標枋爲請，宰相以獄空賀，識者譏之。

戊申，設八關會，幸毬庭觀樂。

丁巳，以王嘏爲西北面兵馬使兼知中軍兵馬事，吳延寵爲東北面兵馬使兼知行營兵馬事。

壬戌，遣內侍祗候智祿延、注簿同正殷元忠、司天少監許蓋卿、崔資顥等巡視東界山川。

是月，改懷殤大王謚曰恭殤，廟號獻宗。

十二月丙寅，政堂文學鄭文卒。

戊辰，太白晝見經天。

分賜先代遺物于諸王、宰樞。

壬申，以右散騎常侍柳子維爲東界加發兵馬使，內侍祗候崔弘正爲判官。

乙亥，召宰樞于乾明殿，問東界邊事。

己卯，以吳延寵爲東界行營兵馬使，金奇鑑知兵馬使，任申幸爲兵馬副使，林彥爲別監，金峻爲判官，智祿延、金仁碩爲長州分道，郭景諶爲宣德分道，庾翼、拓俊京、俞瑩若爲兵馬錄事，崔資顥、朴成正爲

軍候。

壬午，大寧宮災。

甲申，教曰：“惟我祖宗，經綸草昧，肇造邦家，累聖持守，以及寡人。今諸道州郡司牧，清廉憂恤者，十無一二，慕利釣名，有傷大體，好賄營私，殘害生民，流亡相繼，十室九空，朕甚痛焉。實由殿最不行，人無勸懲之故也。宜遣名臣巡行郡縣，考守令殿最以聞，朕方將務明賞罰。其樞密大臣悉體朕懷，推檢祖宗典章，戒諭百僚，以爲程式。”

辛卯，以玄化寺僧德昌爲王師。

（丙戌）元年春正月甲午朔，王以亮陰不受賀，宰相請御肉膳，不許。四上表請之，乃許。

丁酉，彗見于西南，月餘乃滅。

戊戌，禮部奏：“兩界三京三都護八牧，每當元正、冬至及至元節表賀坤成殿，以爲恒式。”制可。

以王生辰爲咸寧節。

甲辰，設百日齋于文德殿。

遼遣祭奠使耶律演、左企弓來。

丙午，遼遣弔慰使耶律忠、劉企常來，又遣劉鼎臣，命王起復。

辛亥，東蕃公牙等十人來朝。王引見于宣政殿，賜酒食、例物。初，林幹之出師也，酋長延蓋使之訓等逆擊之，我師敗績。至是，之訓遣公牙來朝，王欲於正殿備禮待之。雜端崔緯等奏：“自古虜人之來，未嘗於正殿引見，請依舊制，待於便殿。”從之。

癸丑，遼祭莫弔慰使祭肅宗虞宮，王服深衣助奠。

戊午，宴遼使于乾德殿。

二月甲子朔，遼橫宣使來。

乙丑，以弟輔檢校太尉、守司徒兼尚書令，倬檢校太保、守司徒兼尚書令，偁、僑並檢校尚書令、守司空。

宰相上表請納妃，王以未終制不允。

辛未，以工部尚書崔公詡爲西北面兵馬使。

乙亥，西女真亡間等來。

日官奏：“松嶽乃京都鎮山，積年雨水，沙土漂流，巖石暴露，草木不茂，宜栽植裨補。”詔可。

丙子，北虜沙八等來朝，都兵馬使奏曰：“昔我所討賊魁高守者，即沙八之父也，必懷宿怨，請處之新興館，令軍校驍勇者守之。”從之。

己卯，北蕃酋長高亂、阿於大等四十二人來朝。

戊子，親醺于闕庭。

辛卯，禮賓省奏：“高亂等請納遼所授官誥，受國爵命。”王從之，授中尹。

壬辰，宰相再上表請納妃，不允。

三月丙申，白虹貫日。

修東京黃龍寺，遣尚書金漢忠落成。

遼歸我軍宗志等十二人。甲申之戰，沒於東蕃，逃入遼者也。

丁酉，命儒臣與太史官會長寧殿，刪定陰陽地理諸家書，編爲一冊以進，賜名《海東秘錄》。正本藏



於御府，副本賜中書省、司天臺、太史局。

東北面兵馬使奏：“東女真之訓率騎二千來屯關外，納款曰：‘往年之戰，非新王所知，公牙之朝，諭以此意，厚賞遣歸，上恩至渥，豈敢忘背？願至子孫，恭勤朝貢。’”

丁未，以東蕃納款，召還東界加發兵馬使金德珍、副使任申幸。

戊申，都兵馬使奏：“北朝奚家軍乃哥以蕃賊霜丘之子阿主及鐵甲一副來納款。”

乙卯，王詣肅宗虞宮。

戊午，以金漢忠爲尚書左僕射、判秘書省事，金德珍爲兵部尚書兼三司使，柳子維爲戶部尚書，高令臣、文冠爲左右散騎常侍，金商祐攝御史大夫，李資謙試御史中丞，林幹守司空致仕。

己未，以金景庸知門下省事。

夏四月戊辰，北蕃酋長阿於大等三十八人來朝。

作大有倉。

己卯，賜皇甫許等及第。

丙戌，幸妙通寺。

庚寅，詔曰：“頃因所司奏以西海道儒州、安岳、長淵等縣人物流亡，始差監務官使之安撫，遂致流民漸還，產業日盛。今牛峰、兔山、積城、坡平、沙川、朔寧、安峽、僧嶺、洞陰，安州、永康、嘉禾、青松、仁義、金城、堤州、保寧、餘尾、唐津、定安、萬頃、富閏、楊口、狼川等郡縣，人物亦有流亡之勢，宜准

儒州例，置監務招撫。”

五月丙申，王賦《端午詩》，宣示左右，令和進。

戊戌，幸山呼亭，作佛事。

庚子，御嘉昌樓，賦詩，令侍臣許慶、柳仁著等十餘人和進，賜帛有差，又於樓前以銀椀爲的，命侍從將相角射，中者賜之。

辛丑，幸法雲寺。

丙辰，以大雨踰旬，祈晴于廟社、八陵。

戊午，設道場于宴親殿，以祈太后福壽。

六月辛酉朔，王如奉恩寺。

壬戌，納延和宮主爲妃。

乙亥，王受菩薩戒于乾德殿。

辛巳，設《金剛經》道場于乾德殿，王逐日聽講。

癸未，幸山呼亭，作佛事。

丙戌，詔曰：“是月以來，亢旱尤甚，蓋由否德所致，日夜焦勞，省躬謝過，禱佛祈神，無不盡心，然未蒙報應。朕嗣位以後，施爲政教，多所乖戾，天其或者譴告朕躬？宜令兩府近臣及臺省諫官諸司知製誥各上封事，直言時弊。”

丁亥，詔曰：“去年十一月，赦前所犯流以下罪，法官有所追論者，皆當除之。況今旱氣滋甚，亦宜寬刑，其內外獄囚流以下罪原免。”

戊子，禱雨于法雲寺。

己丑，御長寧殿，命僧曇真說禪祈雨。時國家盛行街衢經行，五部人民效此，各於所在里行讀，行至

闕西里，適有雨。王賜米帛，更令行讀。

秋七月庚寅朔，設般若道場于會慶殿，召王師德昌講經祈雨。

辛卯，大雩。

癸巳，雨。

乙未，御長齡殿，講《華嚴經》。

丁酉，祈雨于諸神廟。

己亥，王率兩府、臺省、兩制及三品官，親祀昊天上帝於會慶殿，配以太祖，禱雨。

辛丑，詔曰：“朕覽兩府、臺諫、兩制及長齡殿讎校員等封事，其所論‘躬行自省、奉承祖訓’者，既已存心，庶幾踐行矣。其‘四時迎氣，順天行令，及郊社原廟頽而可修者，祭器祭服弊而可改’者，令有司具聞施行。其‘天壽之役’，朕亦知可否。然當聖考經始，無一士敢言，升遐以後，衆論蜂起，爭欲諫止。朕以義思之，地勢吉凶，是拘忌小道，曷若適追先志乎？惟今春之役，是朕過也，宜據赦文，三年而後爲之。其‘服飾之制，上下混淆’者，自先代未有定法，近雖立制，以別尊卑，第緣君臣不能行儉以率衆，上下無等，至於此極。故曰：‘百姓不從其所令，從其所好。’又曰：‘上之所行，下必有甚者。’若君臣躬行節儉，不奪民利，則庶民觀感，尊卑有別矣。其文武官僚無功尸祿，故屢致旱蝗。蓋進賢退不肖爲政之要也。然百職至煩，非朕所能盡知。如有賢良在下，宰相薦之，姦貪竊位，臺諫黜之。”是日小雨。

癸卯，設盂蘭盆齋于長齡殿，以薦肅宗冥祐。

甲辰，又召名僧講《目蓮經》。

丙午，醺太一于乾德殿。

癸丑，御重光殿西樓，召投化宋人郎將陳養、譯語陳高、俞坦試閱兵，手各賜物。

八月丁卯，王詣肅宗虞宮。

庚午，斷中外重罪。

丙子，幸普濟寺。

戊寅，以禮部尚書李緯、兵部尚書崔惟正爲中軍兵馬使，衛尉卿張翼、禮部侍郎金緣爲中軍兵馬副使。

辛巳，王如奉恩寺，謁太祖真殿。

九月壬辰，幸外帝釋院。

甲午，幸佛恩寺。

丁酉，詣肅宗虞宮。

戊戌，設消災道場於乾德殿。是夜，親醺三界神祇于會慶殿。

庚子，親饗年八十以上男女義夫節婦、孝子順孫、鰥寡孤獨、篤癈疾者于闕庭，賜物有差。

丙午，幸妙通寺。

戊申，幸外帝釋院。

癸丑，設百高坐道場於會慶殿，講《仁王經》，飯僧一萬於闕庭，二萬於州府。

乙卯，以平章事尹瓘監督天壽寺役，賜犀帶一腰，諸僚佐束帛有差。

幸妙通寺。

冬十月己未朔，親設慈悲懺道場於文德殿。

庚申，移安肅宗神主于虞宮，辟容于開國寺。

壬戌，王以肅宗小祥，如開國寺，仍幸天壽寺。董其工役，還次路上，回望追慕，涕泣久之。

庚午，設般若道場于乾德殿。

甲戌，遣侍郎金寶威、郎將李璿如遼謝賜祭。

丁丑，遣禮賓少卿崔洙如遼賀天興節。

己卯，王詣肅宗虞宮。

癸未，王夢見先考，覺而有憾，賦詩三篇宣示，宰樞和進，賜馬各一匹。

十一月戊子，以李瑋同知樞密院事。

辛卯，西女真於厚大等來朝。

癸巳，尹瓘、吳延寵閱神騎、神步軍於崇仁門外。

丁酉，遣金義方如遼謝橫宣。

戊戌，參知政事致仕郭尚卒。

辛丑，設八關會，幸法王寺神衆院，還拜百神于闕庭。

乙卯，西女真亡間等三十人來朝。

十二月戊午朔，日食。

庚申，御文德殿，命平章事尹瓘講《無逸》，知樞密院事吳延寵講《禮記》，召平章事崔弘嗣等儒臣二十一人聽講，仍賜酒饌。

癸亥，御重光殿，命上大將軍以下軍士射侯中者，賜馬及絹有差。

戊辰，賜尹瓘、吳延寵衣帶，以褒講經。

己巳，彗星見。

乙亥，以魏繼廷守太保，崔弘嗣爲文德殿大學士、上柱國，李顥爲上柱國，尹瓘爲延英殿大學士，任懿爲開府儀同三司、柱國，金景庸爲左僕射、參知政事，王嘏守司空，吳延寵檢校司徒，李瑋檢校司空，李預檢校太尉、刑部尚書、政堂文學、判御書院事，仍令致仕。

丁亥，大寧宮災。

幸法雲寺。

（丁亥）二年春正月戊子朔，放朝賀。

庚寅，遼遣高存壽來賀生辰，仍賜大藏經。

丙申，宴遼使于乾德殿。

戊戌，幸神衆院。

戊申，設仁王道場於乾德殿。

辛亥，又設天帝釋道場於文德殿，以禳天變。

以金景庸檢校太子太師、守司空。

癸丑，門下侍郎平章事致仕林概卒。

乙卯，御明慶殿，以僧曇真爲王師。

丙辰，命罷太后生日，百官獻馬。

二月庚申，幸外帝釋院。丙子，又幸。

庚辰，幸神衆院。

癸未，幸王輪寺。

丙戌，分遣諸道安撫使，起居郎李汝霖于楊廣、忠清州道，太府少卿崔渭于全羅州道，侍御史智祿延于慶尚、晉州道，問民疾苦，察守令殿最以聞。

三月丁亥朔，詔曰：“當萬物發生之時，不麝不卯者，實禮典之成規，而先王之仁政也。今諸道守令，鮮克循令，或托供膳，以要上賞；或厚饗使客，以悅其意。田獵無時，或農夫火耕，延燒物命，有乖對時育物之義，足傷天地之和。一切禁斷，違者罪之。”

乙未，親祭天地及境內山川神（祇）〔祇〕於闕庭。

丁酉，幸外帝釋院。

己亥，遣戶部侍郎柳台樹于西北道，右副承宣林彥于東北道，巡視諸城。

庚子，設佛頂道場於文德殿。

己酉，幸龜山寺。

乙卯，醮太一于乾德殿。

夏四月丁巳朔，始視朝於乾德殿。百官初以國恤，不帶紅鞵，至是復帶之。

庚申，幸妙通寺。

辛酉，三角山國望峰崩。

戊辰，禱雨于朴淵。

戊寅，幸外帝釋院。

己卯，王詣肅宗虞宮。

辛巳，幸法雲寺。

甲申，禱雨于松嶽東神祠。

五月丙戌朔，設《金剛經》道場于開國寺，以禳天變。

乙未，禱雨于廟社群望。庚子，亦如之，百官禱

于興國寺。壬寅，又禱于法雲寺。

乙巳，醺太一于乾德殿。

乙卯，又醺于乾德殿禱雨。

六月壬戌，如奉恩寺。

遣考功郎中朴景伯如遼賀天興節，刑部員外郎李韶永謝賀生辰，起居舍人朴景中賀正，侍御史河彥碩進方物。

秋七月戊子，祀廟社及群望，以祈風雨調順。

乙未，以門下侍郎平章事崔弘嗣權判尚書吏部事、監修國史，中書侍郎平章事李顥爲文德殿大學士、判尚書禮部事、修國史，參知政事尹瓘爲上柱國、修國史，參知政事任懿判尚書刑部事，參知政事金景庸爲西京留守使，樞密院使王嘏判三司事。

八月辛酉，幸外帝釋院。

辛未，幸王輪寺。

丙午，北面城廊災。

壬子，制：“以門下侍中文忠公李靖恭配順廟，參知政事景烈公王國髦配肅廟。”

冬十月壬戌，幸王輪寺。

癸亥，重修松林縣佛頂寺，改名資薦，以資肅宗冥祐。

甲子，醺于山呼亭。

丙子，設百座仁王道場於會慶殿，親臨聽講，又齋僧一萬於闕庭，二萬於諸州府。

閏月庚子，始置元始天尊像於玉燭亭，令月醺。



壬寅，以將伐女真，御順天館南門閱兵，分賜銀布酒食。以尹瓘爲元帥，吳延寵爲副元帥。

十一月壬子朔，冬至日食。

壬戌，幸普濟寺。

庚午，幸西京。時日官奏：“宜御西京，以遣將帥。”故有是行。

癸酉，駕至慈悲嶺，置酒。

乙亥，至西京。

十二月甲申，宴群臣于長樂殿。

丙戌，御大同江龍船，置酒。

丙申，尹瓘擊女真，大破之，遣諸將定地界，築雄、英、福、吉四州城。

乙巳，東女真裒乙乃等三千二百三十人來附。

丁未，以金商祐爲御史大夫。

戊申，幸龜山寺。

（戊子）三年春正月甲寅，遼遣崇祿卿曹勇義來，賀生辰。

丙辰，宴遼使于乾德殿。

丁卯，納給事中李資謙女爲妃。

戊寅，尊母柳氏爲王太后。翌日，諸王、宰輔、文武常參官以上進賀，賜群臣宴。

二月丙戌，告奏使戶部侍郎王維如宋。

曲宴諸王、宰樞、近臣于壽春宮，文武常參官及封冊執事官亦賜酒食。

辛卯，御神鳳樓，肆赦，曰：“朕以涼德，謬承先

王之遺命，及親闈之慈訓，叨登大寶，日慎一日，寤寐未遑。近者稽于前典，‘凡理國家者，莫先務本，務本莫過於孝也’。故特講冊禮，尊崇親母王妃封爲王太后，庶幾恩澤廣及三韓。內外斬絞二罪，除刑付處，以下皆原之。在流配者量移，乃至敘用。曾蒙恩宥，未得移免者，訪問量移。國內名山大川神（祇）〔祇〕，各加號。民年八十以上及孝子順孫、義夫節婦、鰥寡孤獨、篤疾者，賜設分物。兩京文武兩班及南班正雜路，凡有職者，各加同正職。上冊都監員加職事，人吏超一等同正職。掌固書者、初入仕造冊函儀仗官吏、書冊文員及殿中行禮、安樂道場都監及太廟等告祭享官、道俗員吏，各加師銜。諸執事官吏及雜類，賜物有差。西京押物使及外官持表員等加級。坤成殿及崇明府延德、明福宮員加職事。人吏超一等同正職，南班人吏准職改班。坤成殿侍衛將相、將校，各加職事同正職。給事及宮府掌固書者、算士、醫士、初入仕坤成殿侍婢親侍放良，前放良者入仕。雜類賜物有差。州縣進奉長吏，加一等同正職，職滿者加武散階。承天府進奉戶長以上加武散階，副戶長以下加一等職，無職者許初職，同府長吏許服色。明經、製述兩大業登科人及三韓功臣子孫，四祖內有工商樂名稽留未施行者，仰所司准例疾速奏裁。兩京諸領府庫軍人妻三十年以上，不離同居守護者，賜物有差。凡蒙恩合加職而未加者，不過一等許加。或加職而所司論奏收貼者及逗留未施行者，皆許職貼。或諸犯罪配

流，會赦而合受職貼，未還給而身亡者，許還。或蒙會赦恩，而所司未點職身先亡者，如有子息，告之，點奏給貼。”

壬辰，女真圍雄州，崔弘正開門出擊，大敗之。俘斬八十級，獲車馬兵仗無算。

甲午，以尚書柳澤爲咸州大都督府使，置英、福、雄、吉四州及公嶮鎮防禦使。

乙未，燃燈，王如奉恩寺。

辛丑，遼遣崇祿卿張挾來命王落起復。

癸卯，宴遼使于乾德殿。

丙午，遼遣蕭良、李仁洽等來冊王。詔曰：“卿越自先臣，恪修常職，爰及後嗣，祇受舊封，迨經三載之期，克懋一匡之績。特頒詔冊，益煥寵靈，式靖爾邦，永服予命。今差清安軍節度使蕭良、益州管内觀察使李仁洽充封冊使副，所有冠冕、車輅、衣帶、匹段、鞍馬諸物等，具如別錄。”冊曰：“朕以王者底綏四海，利建於侯封，諸侯各守一邦，會歸於王統。故上必優於爵命，下克貢其忠誠，歷古已來，舊章斯在。乃眷東土，于蕃上國，繫樹嫡之有初，寔纂服之猶賴。然白茅苴土，早裂於封圻；而青蓋駕車，未膺於典冊。爰協龜筮，載考禮文，涓辰孔臧，賦命惟允。咨爾高麗國王侯，乃祖乃父，有邦有家，愛政洽於隅夷，忠烈銘於彝鼎。迪厥攸訓，裕于乃躬。信義仁和，夙成於霸器；詩書禮樂，敦尚於人文。靜以致誠，動斯中道。始疏公爵，分土於三韓；及嗣王封，正名於一字。

而能率政以德政，且又養民以惠民。厥績著聞，朕甚嘉止。盍以馳輶而備物，俾其賜策以申恩。秩乃三階，望隆於樞軸；位之兩省，寄重於腹心。是用遣使持節備禮，冊命爾爲守太尉兼中書令，加食邑。於庠！善其始克有厥終，篤諸中乃施于外。日嚴六德以亮采，永肩一心以事君。咸若厥猷，允孚于吉。承之廟社而無斁，傳之子孫而不窮。欽哉，惟休以服茲命。”王受冊于南郊。

戊申，尹瓘以平定女真，新築六城，奉表稱賀，立碑于公嶮鎮，以爲界至。

癸丑，宴遼使于乾德殿。

三月己卯，女真來，屯英州城外，官軍出戰敗之，斬馘二十級，獲兵仗及馬八匹。

庚辰，尹瓘獻俘三百四十六口，馬九十六匹，牛三百餘頭。

尹瓘又築宜州、通泰、平戎三城，徙南界民以實新築九城。

夏四月壬午，以尹瓘爲門下侍中、判尚書吏部事、知軍國重事，吳延寵爲尚書左僕射、參知政事。遣內侍郎中韓皞如，齎詔書、告身及紫繡鞍具、廐馬二匹，至雄州分賜之。

癸未，禱雨于諸神廟及山川。

丙戌，謁英陵。

戊子，女真設柵圍雄州城。

己丑，尹瓘、吳延寵凱還。王命具鼓吹、軍衛以

迎之，遣帶方侯備、齊安侯偕勞宴於東郊。瓘、延寵詣景靈殿復命，還納鈇鉞。王御文德殿，引瓘、延寵及諸宰樞上殿，親問邊事，入夜乃罷。

辛卯，謁昌陵賦詩，寓平女真之意，宣示扈從儒臣，令和進。

己亥，親禘于太廟，肆赦，詔曰：“國內名山大川神（祇）〔祇〕加號。諸犯公流私徒以下，皆原之。斬絞二罪，除刑流配。諸歸配者量移，乃至敘用。禘禮都監禮司享官、冊文述寫陵直侍衛員吏，加同正職。祭器、禮服、儀仗造成，太廟修營差使、扈從諸道外官持表進賀及向者親謁昌、顯、英陵，肅宗祔廟時執事享官員吏加階。鄉職掌固出役三四年者，內侍給使一二人，諸王府丘史二人，牽龍一人，許初職。太廟十陵侍衛給使等放良，其餘軍人雜類賜物有差。”

癸卯，遣兵馬副元帥吳延寵授鈇鉞，往救雄州。

己酉，以女真入寇，分命近臣納油香、弓劍于京內寺院，以禱之。

五月辛亥，講《藥師經》於文德殿，以禳賊兵。

癸丑，吳延寵至雄州擊女真，破走之。

辛酉，王率宰樞、近侍、文武三品以上，醺昊天五方帝于會慶殿。

六月庚辰，如奉恩寺。

辛巳，御乾德殿，覆試進士。

丙戌，賜盧顯庸等及第，仍命侍坐、宰樞、臺省、侍臣、知制誥各製親試貢士詩以進。

壬辰，幸普濟寺行香，祈却北寇。

甲午，王受菩薩戒于乾德殿。

戊戌，禱雨于諸神廟山川。

庚子，雨。

秋七月乙卯，幸神衆院。

命行營兵馬元帥、門下侍中尹瓘復征女真。

辛酉，置土山等四十一縣監務。

癸亥，以尚書高令臣爲西北面兵馬使，尚書崔衍爲東北面兵馬使。

戊辰，以徐甫爲左右衛上將軍、尚書右僕射，高義和爲兵部尚書，金麗珍攝戶部尚書，朴伸攝工部尚書。

癸酉，行營兵馬判官、御史申顯等，以舟師擊賊于寧仁鎮，斬二十級。

乙亥，遣刑部尚書金商祐、禮部侍郎韓礪如等如宋獻方物。

丙子，遣使東界，設文豆婁道場於鎮靜寺，設四天王道場於毗沙門寺，以禳邊寇。

八月己卯，御重光殿南廊，與宰樞議決重刑。

乙酉，命有司制定登州長吏服色等差，從行營兵馬使之請也。

丁亥，吳延寵還，王引見于文德殿，親問邊事，賜宴以勞之。

戊子，講《藥師經》於文德殿，以禳邊寇。

兵馬判官王字之、拓俊京與女真戰于咸、英二州，

斬三十三級。

庚寅，分遣九道點軍使，以選壯士。

行營兵馬元帥尹瓘獻馘三十一級。

癸巳，兵馬判官庾翼、將軍宋忠、神騎軍朴懷節等與女真戰于吉州，死之。贈翼兵部侍郎、知御史臺事，忠上將軍、兵部尚書。

戊戌，西女真酋長奴好等二十五人來朝。

癸卯，三司奏：“湔江渡女一產三男，據舊例賜穀四十石。”命加賜五十石。

九月戊申朔，賜尹瓘爵鈴平縣開國伯，加吳延寵攘寇鎮國功臣號。

辛亥，閱射于長嶺殿，中的者賜馬及彩段。

癸亥，行營兵馬判官王字之、拓俊京擊女真于沙至嶺，斬二十七級，擒三人。

甲戌，幸南京，王太后率諸王、公主出次興王寺大施院。

冬十月庚辰，遣李德羽如遼賀天興節。

以肅考忌辰，設講經法會於內殿。

壬午，幸僧伽窟。

己丑，讀《般若經》于延興殿。

庚寅，幸梓林寺。

辛卯，幸仁壽寺。

十一月庚戌，遣黃元道如遼謝落起復。

壬子，王還次峰城縣，置酒與侍從宰輔議邊事。語及庾翼等戰死，泣下霑襟，群臣稱壽陳慰。

癸丑，遣崔贊如遼謝賀生辰。

乙卯，駐蹕藥師院南路，頒德音，至晡還京都。

丙辰，幸佛恩寺，還謁太后于大施院。

戊午，遣徐祐如遼獻方物。

庚申，設八關會，幸法王寺。

十二月丁丑，慮囚。

戊子，遼遣橫宣使檢校司徒耶律寧來。

辛卯，宴遼使于乾德殿。



## 高麗史十三

### 世家卷第十三

#### 睿宗二

（己丑）四年春正月丙午朔，放朝賀。

戊申，遼遣大永信來賀生辰。

己酉，東界行營兵馬錄事王思謹、河景澤等與女真戰于咸州，死之。

庚戌，宴遼使于乾德殿。

丙辰，幸神衆院。

戊午，御長齡殿，引見平虜關外蕃長等五十人，賜酒食、例物。

丁卯，冊封弟帶方侯備，曲宴諸王、宰樞、侍從，達曙而罷。御史大夫崔繼芳酒酣起舞，時人非之。

二月，庚辰，御乾德殿南門外，閱將軍金賢、林佐等軍，賜酒及銀瓶。

辛巳，冊封弟大原侯倬，曲宴諸王、宰樞、侍從，

達曙乃罷。

己丑，燃燈，王如奉恩寺。庚寅，大會宴諸王、宰樞、侍從于重光殿。酒酣，命左右舞，平章事金景庸等起舞，承宣林彥佯醉而退，曰：“東邊未寧，可忍舞乎？”

乙未，親設佛頂道場于文德殿。

王引見東界進發將軍王維忠，賜所領將校以上酒及銀瓶二事。追念朴懷節戰死之功，賜妻子銀瓶二事、綾羅紗絹十五匹。

戊戌，右諫議大夫李載上疏曰：“今軍國多故，黎庶未安，上以封兩弟，數與群臣宴樂，命御史大夫崔繼芳舞。又燃燈宴，日高而罷，命平章事金景庸舞，其如禮何？且今東蕃，攻戰未休，屯兵不去，近詐遣史顯來請和好，國家信之，欲遣使告遼，還其九城，甚不可也，請聖鑑裁之。”

己亥，御宣政殿，引見延州關外蕃長守弗首等七人、清塞關外蕃長歸夫等十八人、平虜關外蕃長要弗等二十八人，賜酒食、例物。

辛丑，御神鳳門外，閱神騎軍。

以崔公詡爲右僕射，金緣爲右諫議大夫。

壬寅，御重光殿，引見東蕃酋長果下等六十三人，賜酒食、例物。

癸卯，遣李汝霖如遼奏新築東界九城，賜班犀帶一腰。

錄楊規功，賜其曾孫神騎直長齊寶、銀榼。

甲辰，設百座會於會慶殿，又令中外齋僧三萬。

三月戊申，親醮三清於賞春亭。

庚戌，御重光殿，閱神騎軍。

辛亥，行營兵馬錄事長文緯等與女真戰于崇寧鎮，斬三十八級。

壬子，御神鳳門，閱精弩班軍。

癸丑，東界行營兵馬別監承宣林彥、侍郎王字之、員外郎拓俊京等陞辭，王御重光殿，賜酒食，賜彥鞍馬。

乙卯，行營兵馬判官許載、金義元等與女真戰于吉州關外，斬三十級，獲其鐵甲牛馬。

己未，幸王輪寺。

辛酉，東界錄事河濬陞辭，賜烏犀帶一腰。

丁卯，親醮于闕庭。

辛未，幸王輪寺。

癸酉，慮囚。

夏四月丙子，幸妙通寺。

戊寅，東界兵馬副元帥吳延寵陞辭，王詣景靈殿，親授鉞。

己卯，日色赤而無光動搖。

甲申，宰樞及六尚書以上各出米二石，設齋于神衆院，禱兵捷。

乙酉，遣同知樞密院事許慶，祭平壤木覓東明神祠。又設文豆屢道場于興福、永明、長慶、金剛等寺。又遣門下侍中尹瓘、樞密院副使柳仁著祭昌陵，禱

兵捷。

壬辰，親設齋于奉恩、彌勒兩寺，禱兵捷。

甲午，參知政事致仕孫冠卒。

甲辰，東女真復遣史顯款塞請和。

遣近臣禱雨于朴淵及諸神廟，祭瘟神于五部。仍設般若道場，以禳疾疫。

五月庚戌，行營兵馬奏：“女真寇宣德鎮，殺掠人物。”

壬子，以女真寇邊，幸法王寺行香，分遣近臣禱於諸神廟。

癸丑，王將肆赦，召宰樞議，崔弘嗣以爲不可。王曰：“頃以左右固請，舉兵討賊，然今賊類未殲，數侵我疆，掠我人民，將卒疲於攻戍。國家之急政在今日，欲肆赦，以安衆心。卿獨何心，以爲不可？”宰樞皆慚懼而退。乃下宣旨曰：“朕以涼德，謬御三韓，于今五載。然政不足綏百姓，威不足制多方，故宵旰憂勤，未敢遑安。況此東蕃賊類，自祖宗以來，附托國勢，多被恩賞，今則背恩棄德，招集遠賊，凌犯國境。嚮於甲申年，連兵拒戰，殺我軍民，其或生擒以爲僕隸者，不可勝數。近來每至關城，劫奪戍卒衣糧器械，自恃強暴，侵擾邊鄙，罪合行討，不可安忍。故我聖考憤然誓曰：‘今若掃蕩醜類，即於賊境築設城堡，創寺宇，恢張佛法。’大功未就，倏爾升遐。寡人嗣承先志，舉義發軍，置邑築城，此蓋國內名山大川神祇所助也。然餘賊尚未盡滅，施設場寨，來攻吉州，欲更

勵兵奮擊。或願神明，更加陰助。三韓功臣，英靈尚在，竟相扶援，掃蕩殘賊，邊境平安。則或封崇爵位，酬賽玄恩。其宣旨：前犯流以下咸自除之，二罪以上除刑付處，雜犯流配者量移，乃至敘用。前代以來所犯罪狀不推鞠配入者，如有父母妻子各處分居者，合居一處。”

甲寅，命門下侍中尹瓘詣廟社及九陵，禱兵捷。

丙辰，設藥師道場於文德殿。

庚申，女真圍吉州，吳延寵引兵救之，師大敗。

甲子，御文德殿，召宰樞議邊事。

乙丑，遣東界兵馬元帥尹瓘于西北路。

丙寅，命宰樞及文武常參官議奏東邊事宜。

辛未，將軍良善領兵赴東界，賜銀瓶二事。

癸酉，遣左承宣沈侯，宣諭：東界軍士分賜銀瓶四十事。

六月甲戌朔，王如奉恩寺。

戊寅，金商祐、韓皞如、慎安之等齎詔回自宋，王迎詔於宣政殿。起居表回詔云：“卿撫有東藩，世載令譽。遐致問安之禮，恭陳事大之誠。不替前修，有加忠藎。”告奏表回詔云：“卿尹茲東土，初即乃封，山川阻修，日月徂邁，心在王室，未即以聞。航海奏言，情文備盡，善綏厥服，永孚于休。”祝聖壽回詔云：“卿表海稱藩，使航遐暨，叩真乘之妙果，祝壽考之多样，歸美之誠，不忘鑑寐。”賜國信詔云：“朕遙駿先猷，眷懷蕃服，爲國外屏，繼世撫封。紹嗣之初，

修方惟舊，嘉乃迪德，率茲典常，實筐有頒，用伸厚意。”太后起居表回詔云：“卿初布蕃條，謹茲侯度。使旃凌海，遠修職貢之勤；奏牘在庭，恭致宮闈之問。忠誠備至，嘉尚兼懷。”告奏太后表回詔云：“卿奕世有邦，作我良翰，屬纘承於舊服，爰赴告於宮庭，載亮忠勤，益深嘉尚。”太后祝壽回詔云：“卿遠因使介，恭叩佛乘，祝壽考於宮闈，罄忠誠於藩服。奏封來上，眷獎殊深。”

乙酉，慮囚。

尹瓘、吳延寵引兵救吉州，聞女真請和，還定州。

丙戌，制曰：“近者東陞未靖，軍馬疲斃，此乃地勢衰廢之使然，宜以陰陽祕術禳之。其司天、太史員及散官等各上封事。”

戊子，王受菩薩戒于乾德殿。

制曰：“近日邊患窘迫，軍民勞苦。君臣同發至誠，誓告于天，行祖宗訓誡之事，宜令有司奏議。”且命近臣分禱于進奉、九龍兩山。

丙申，召宰相、臺諫、六部議還九城，平章事崔弘嗣等二十八人皆曰可，禮部郎中朴昇中、戶部郎中韓相曰不可。

己亥，東蕃使裒弗、史顯等來朝。

庚子，御宣政殿南門，引見裒弗、史顯等六人，宣問來由。裒弗等奏曰：“昔我太師盈歌嘗言：‘我祖宗出自大邦，至于子孫，義合歸附。’今太師烏雅束，亦以大邦爲父母之國。在甲申年間，弓漢村人不順太

師指諭者，舉兵懲之，國朝以我爲犯境，出兵征之，復許修好。故我信之，朝貢不絕。不謂去年大舉而入，殺我耄倪，置九城，使流亡靡所止歸。故太師使我來請舊地，若還許九城，使安生業，則我等告天爲誓，至于世世子孫，恪修世貢，亦不敢以瓦礫投於境上。”王慰諭，賜酒食。

秋七月乙巳，會宰樞及臺省、諸司、知制誥、侍臣、都兵馬判官以上文武三品以上于宣政殿，宣問還九城可否，皆奏曰可。

丙午，御宣政殿南門，引見裏弗等，許還九城，裏弗感泣拜謝。王賜物遣還，命內侍金珣護送境上。仍詔元帥等，諭以還九城之意。

丁巳，以中書侍郎平章事任懿權判東北面兵馬事，兼行營兵馬使，右諫議大夫金緣副之。

戊午，設盂蘭盆道場於長齡殿。

辛酉，行營兵馬別監承宣崔弘正、兵馬使吏部尚書文冠，諭女真酋長居熨伊等曰：“汝若請還九城，宜如前約，誓告于天。”酋長等設壇咸州門外，告天誓曰：“而今已後，至于九父之世，無有惡心，連連朝貢，有渝此盟，蕃土滅亡。”盟訖而退。弘正等始自吉州，以次收入九城戰具、資糧于內地。狄人喜，以其牛馬載還吾民遺棄老幼男女，一無殺傷。

壬戌，任懿等辭，王御重光殿，親授鈇鉞，仍賜鞍馬、衣服、彩段。

是日，撤東界崇寧、通泰二鎮城。

甲子，設消災道場于乾德殿五日。

撤英、福二州、真陽鎮城。

乙丑，以金商祐爲戶部尚書翰林學士，劉載爲左散騎常侍。

撤咸、雄二州、宣化鎮城。

壬申，王妃延和宮主李氏薨。

八月甲戌，神騎軍士還自東界，王御重光殿西樓，慰之曰：“東役之敗，將帥之過也，朕何忘汝等之勞。”

乙酉，刑部奏內外重刑，王御宣政殿南廊，與宰樞科斷。

丁亥，王以中秋，率文臣翫月於重光便殿，御製詠月詩。其末聯云：“他日吾民躋富壽，好酬佳節燕公卿。”命文臣和進。

甲午，以戶部尚書柳子維爲西北面兵馬使。

己亥，女真使者史顯等來獻土物。

九月戊申，幸王輪寺。

壬子，幸妙通寺。辛酉，又幸。

乙丑，設百座道場于會慶殿，又親飯僧于闕庭，命中外齋僧三萬。

冬十月乙亥，元子構生。

幸開國寺。

戊寅，百官上表賀生元子。

壬午，幸外帝釋院。

乙酉，設佛頂道場於文德殿。



壬辰，以李瑋參知政事，柳仁著爲殿中監、知樞密院事，李資謙爲禮賓卿、樞密院副使，金沽爲左承宣、知吏部事。

十一月癸卯，視朝于乾德殿，諫議大夫李載、金緣，御史大夫崔繼芳等出班，請治尹瓘、吳延寵、林彥敗軍之罪，不允。

癸丑，設八關會，幸法王寺。

庚申，東女真酋長吳老等來朝。

甲子，御宣政殿，引見平虜、清塞關外蕃長多老、居夫等四十五人，史顯等七人，賜酒食、例物。

戊辰，宰相崔弘嗣、李顥、任懿等與臺諫復請尹瓘等罪。

十二月己卯，宋教練使明州都知兵馬使任郭等來。

壬午，以金駿爲尚書右丞、樞密院右承宣，李壽爲御史中丞。

乙酉，命有司分祭于松嶽及諸神祠，以禳疾疫。

癸巳，以沂檢校司徒、守司空、淮安伯。

戊戌，宴諸王、宰樞于重光殿，至曉而罷。

是歲，遣都官郎中李國瓊如遼奏還女真九城。

（庚寅）五年春正月庚子朔，放朝賀。

昌州關外蕃長亡閒等二十八人來朝。

壬寅，遼遣衛尉卿李逢辰來賀生辰。仍詔曰：“卿蕃衛皇家，鎮撫海表，專征守職，盪寇有勞。因乘勝以納降，遂開疆而置壘，載惟施設，允協便宜。嚮遣使人，遠馳捷奏，永言歸美，良用慰懷。”

己酉，李國瓊還自遼。詔曰：“卿嚮討邊夷，權置城堡。因其防寇，且務於修營，既乃請和，遂從於毀撤。既協宜便，復具奏陳，載念忠虔，良增嘆尚。”

庚戌，設帝釋道場於文德殿。

乙卯，御宣政殿南門，引見北界蕃長三十九人，各賜衣一襲。

丁巳，御宣政殿，引見北界蕃長三十五人，賜物有差。

庚申，御重光殿南樓，閱神騎軍士擊毬，賜物有差。

壬戌，御重光殿南門，引見北界蕃長十九人，賜酒食例物。

甲子，親醺于星宿殿。

二月癸未，燃燈，王如奉恩寺。

女真酋長萬壽等十三人來朝。

庚寅，以禎檢校司徒、守司空、承化伯，詔賜例物。

甲午，王太后移御佛恩寺。

三月己酉，幸王輪寺。

辛亥，幸外帝釋院。

乙卯，日色如血無光。

甲子，幸普濟寺。

以任懿守太尉、門下侍郎平章事致仕，畢光贊爲尚書右僕射，李顥權尚書吏部事。

夏四月辛未，慮囚。

甲戌，司天臺奏：“今年疫厲大興，尸骸載路，請令有司收瘞。”從之。

丙子，賜李正升等及第。

甲申，幸妙通寺。

乙酉，設孔雀明王道場於文德殿。

甲午，幸順天館點檢接賓之事。

五月癸卯，設消災道場於會慶殿五日。

己酉，彗星入紫（薇）〔微〕。

庚戌，王朝王太后于延德宮。

辛亥，御乾德殿視朝。宰相崔弘嗣、金景庸與臺諫上疏，論尹瓘、吳延寵等敗軍之罪。王不聽，便入內。弘嗣等詣重光殿東紫門固請，至晡竟不允。宰相、諫官皆歸第不出，省中一空。王召平章事李顥、中書舍人李德羽等，令直省中。弘嗣等累旬不出，王遣近臣敦諭起之，諫官亦出視事。時人譏之。

乙卯，彗星見凡九日。

丁巳，夜盜二十人入都祭庫，殺庫直郎將同正金可崇，竊取銀物。

甲子，雨雹于永康縣，翌日乃消。

六月戊辰朔，王如奉恩寺。己巳，親祭天祥于是寺。

庚午，以李瑋爲刑部尚書，金商祐爲禮部尚書。

辛未，御乾德殿，召見宋明州所歸女樂二人。

雨雹。

甲戌，宋商李榮等三十八人來。

丙子，詔曰：“朕謬以眇躬，紹御三韓，萬機至廣，不能視聽。刑政不中，節候不調，三四年間，田穀凶荒，人民飢病，宵旰憂勞，未嘗暫已。況又乾文變怪，無日不見，夏月以來，淒風雨雹，此乃涼德所致，恐懼增深。意欲推恩，上答天譴，下慰民心，召集和氣，以報平安。自宣旨前，凡在獄囚犯流以下，並除免之。二罪以上除刑付處。曾坐罪流謫者，皆量移，以至敘用。或有所犯，父母妻子分居各處者，完聚一處。”

辛巳，宋遣王襄、張邦昌來，以參知政事李瑋，殿中少監、左承宣韓暉如爲館伴。

壬午，王受菩薩戒于乾德殿。

癸未，王受詔于會慶殿庭。詔曰：“卿世載令聞，保釐東藩，當襲爵之云初，乃修邦而惟舊。張旃航海，陳貢旅庭，義有可嘉，禮無不報。爰命介使，往暨乃封，用伸厚意之將，示識多儀之享，其恤厥若，永孚于休。今差兵部尚書王襄、中書舍人張邦昌往彼，賜卿衣帶、段匹、金玉器、弓箭、鞍馬。”王受訖上殿。使副就王前，傳密諭曰：“皇帝明見萬里，諒王忠恪之誠，欲加恩數。聞王已受北朝冊命。南北兩朝，通好百年，義同兄弟，故不復冊王，但令賜詔。已去‘權’字，即是寵王以真王之禮。且此詔乃皇帝御筆親製，北朝必無如此禮數。文王、肅王亦不曾有此等恩命。襄等來見，王迎詔甚恭，他日歸奏，帝必嘉悅，恩數有加。請王益篤誠敬，以答聖恩。”

戊子，宴宋使于會慶殿。

秋七月戊戌朔，王襄等還。王附表以謝曰：“記存特異，俯僂益恭。矧底績之蔑如，迺真顏之無所。伏念臣繫蹤遐僻，逢世寢昌。子須肯播於父菑，小固服懷於大國。此先臣所以貽訓，而微臣資以爲忠。藩服叨承，方謹一修之貢；家陪在返，過蒙厚往之私。徒積覲兢，未遑敘謝。豈謂皇帝陛下仁心懷遠，例舉非常，降使輶之光華，將賞典之優渥。自祖先而拜賜，雖曰有年；繫寵數之橫加，莫如今日。況詳敕墨，兼奉諭音，迺於臣銜，直去‘權’字。所謂冊立之命，正朔之頒，已曾稟受於大遼，不欲別行於上國，以示酌中之義，致寬顧北之憂。眷眷稠重，奚克丘山之戴；丹衷戰慄，有同冰谷之臨。唯願傾輸，免孤覆露。”

又答密諭曰：“當國介在東表，祖先已來，樂慕風化，有時入貢，優荷寵恩。崇寧中，國信使劉侍郎、吳給事奉聖旨，咨聞行冊禮事。先考以當國地接大遼，久已稟行爵命正朔，所以未敢遵承上命，以實懇辭。舉國惶恐，未之暫安。今聞國信尚書舍人所傳密諭，‘皇帝聖明如天日，國王雖在萬里之外，忠孝恭順，皇帝無不鑑炤，常欲優加異恩。某等朝辭日，備聞聖訓，以受大遼冊命。南北兩朝通好百有餘年，義同骨肉兄弟，所以不欲更加封冊。’今來詔書，已去‘權’字，即是寵國王以真王之禮。拜命之始，惶駭自失，意欲奉表辭免，更自思惟，皇帝聖恩，委曲存撫，祇去‘權’字，以示正名，永除冊立之命，欲使一方無有

後慮。今已依詔除‘權’。況聞所賜詔書，是御筆親製，此之榮幸，古未曾有，感戴殊甚。更期忠恪，上答生成。所冀尚書舍人，復命歸朝，從容敷奏。”

己亥，宋商池貴等四十二人來。

辛丑，門下侍郎平章事李顥卒。

丙寅，以司宰卿李載爲西北面兵馬使，借戶部侍郎安子恭爲東北面兵馬副使。

八月辛巳，刑部奏內外重刑，王御宣政殿南廊，與宰樞議斷。

乙酉，幸王輪寺。

乙未，祈晴于太廟及諸神廟。

閏月癸卯，王奉太后幸南京。

壬子，設般若道場于延興殿八日。

辛酉，幸三角山藏義寺，遂幸僧伽窟。命通義侯僑詣文殊窟，太后及諸王宮公主各施衣襯。

九月甲戌，宴諸王宰樞于天授殿，達曙乃罷，各賜侑幣。王賦詩，命儒臣和進，賜物有差。有優人因戲稱美先代功臣河拱辰，王追念其功，以其玄孫內侍衛尉注簿濬爲閤門祇候，仍製詩一絕賜之。

己卯，御南明門，閱神騎軍擊毬，賜物有差。

庚辰，講《金剛經》于延興殿。

壬辰，御北寧門，閱文武臣僚射，中的者賜物有差。

冬十月甲辰，太白晝見經天。

西女真古伋、果下等九十八人來，獻駿馬五十

七匹。

戊申，禘于太廟。

壬子，親饗年八十以上及孝順義節、鰥寡孤獨、篤廢疾者于南明門外，賜物有差，中有孝子一人，特加例賜，爲賦詩一首，宣示左右。

乙卯，車駕發南京。

丙辰，幸神穴寺。

十一月乙丑朔，次藥師院南路，頒德音，至晡還京都。

丁丑，東女真史顯等十二人來朝。

戊寅，設八關會，幸法王寺。

辛巳，以文冠守司空。

甲申，大雪，王製《喜雪詩》示左右。

十二月乙未，御宣政殿，引見東女真史顯等，賜物有差。

庚子，御重光殿南樓，引見西女真酋長等四十餘人，賜酒食。

辛丑，以尹瓘守太保門下侍中、判兵部事，崔弘嗣判吏禮部事，金景庸爲門下侍郎平章事、判刑部事，金漢忠判工部事，吳延寵爲中書侍郎平章事、判三司事，李瑋爲中書侍郎、判戶部事兼西京留守使，許慶爲刑部尚書、樞密院使，李資謙爲殿中監、同知樞密院事。

乙巳，醺于乾德殿。

戊申，幸法雲寺。

癸丑，立春，百官朝于乾德殿，賜春幡子，仍賦《迎春詞》二首。

以帶方侯備守太尉帶方公，大原侯倬守太尉，齊安侯偁守司徒，通義侯僑守司徒，史榮攝戶部尚書、西京知留守，朴景綽爲左諫議大夫。備等俱上表讓職，下教不允。

庚申，以金商祐爲御史大夫。

幸普濟寺。

（辛卯）六年春正月丙寅，御乾德殿，頒德音，犯斬絞者，免刑流配，流以下並赦之。中外老人及鰥寡孤獨、節義孝順者賜酒食，並賜物有差。

戊辰，遼遣泰州管內觀察使大仲宣來，賀生辰。

丙子，御宣政殿，引見北鄙女真村長三十人。

癸未，以判閤門事柳澤爲西北面兵馬使，國子司業、御史雜端洪灌爲東北面兵馬副使。

癸巳，盜入上林司，殺守庫婢，竊銀物。

二月乙未，以任申幸攝刑部尚書。

丁未，燃燈，王如奉恩寺。

三月丙寅，封源爲廣平伯。

辛未，以許慶爲吏部尚書、參知政事，柳仁著爲兵部尚書，李資謙爲御史大夫，金緣爲祕書監、樞密院副使，崔繼芳爲戶部尚書兼三司使，柳子維爲刑部尚書，趙仲璋爲吏部侍郎、知御史臺事，金沽爲禮部侍郎、右諫議大夫，朴昇中爲中書舍人。

癸未，饗庶老及節義孝順男女于宮庭，國老尚書



致仕林成概、柳澤等于閤門，王親侑之，觀者多感泣。成概懷諫疏奏之凡五條，皆國家大事。平章事致仕金上琦，年八十一，王欲宴于內殿，以示優禮。上琦辭以老病，特命左承宣韓儼如傳宣，肩輿入內，上殿勿拜。上琦固辭不就。

甲申，日赤無光。

夏四月己亥，享于太廟。

庚戌，再雩。

甲寅，右補闕韓況上疏言時政得失。

五月甲子，禱雨于廟社諸陵山川。

己巳，門下侍中尹瓘卒。

是月，有箭著于都兵馬使及金剛庫屋上，其鏃穿瓦。

六月壬辰朔，王如奉恩寺。

丁酉，以林彥爲翰林侍講學士，崔弘正爲給事中。

庚子，慮囚，放輕繫。

秋七月甲子，親醺三清于純福殿。

己卯，以右散騎常侍康拯爲西北面兵馬使，右諫議大夫朴景綽爲東北面兵馬使。

壬午，遣樞密院副使金緣、少府監林有文如宋。

庚寅，王太后不豫，移御法王寺。

八月甲午，親醺于闕庭。

太史奏：“先朝所創天壽寺，地勢不利，請毀藥師院移之。”庚戌，親幸相地。

甲寅，以金漢忠爲樞密院使。

乙卯，幸長源亭。

九月己巳，設重陽宴，王賦詩，令從臣和進。

戊寅，命侍從官射，中的者賜物有差，仍賜宴。

冬十月甲午，王還宮。

丙午，遣刑部侍郎李資德如遼賀天興節。

兩府會議邊事。

戊申，設百座道場于會慶殿，講《仁王經》，飯僧一萬于闕庭，二萬于州府。

丁巳，王朝太后于奉恩寺。

十一月庚申朔，有司請停創天壽寺，從之。

遣禮部侍郎李珣如遼謝賀生辰。

乙丑，幸藥師院，相天壽寺基。

丙子，遣殿中監金縝如遼獻方物，禮賓少卿文公彥賀正。

十二月丙午，以崔弘嗣守太傅，許慶爲中書侍郎、同平章事，金漢忠爲尚書左僕射，柳仁著守司空，李資謙檢校司空、刑部尚書，金商祐爲吏部尚書，高令臣爲禮部尚書，柳子維爲工部尚書，李載爲殿中監，洪灌爲御史中丞，崔濡、李資誠爲侍御史，閔世倫爲殿中侍御史，胡宗旦爲右拾遺、知制誥。

己酉，遼遣橫賜使檢校司空蕭遵禮來。

辛亥，受詔于乾德殿。

乙卯，宣德鎮卒鄭珍、定州人白巴嘗得罪，亡入女真，與謀寇邊。珍母在元興鎮，夜二鼓，珍、巴與女真人骨夫潛來，將竊其母以去。兵馬使遣卒捕殺之，

並獲器仗，賜爵賞有差。

（壬辰）七年春正月辛酉，遼遣永州管內觀察使劉公允來賀生辰。

庚辰，以御史中丞洪灌爲東北面兵馬使，給事中崔弘正爲西北面兵馬使。

二月辛丑，燃燈，王如奉恩寺。翼日大會，王賦詩，令從臣和進。

庚戌，諫官上疏請停創天壽寺，從之。

甲寅，以金景庸守太保、判尚書吏部事，吳延寵守司徒、判尚書兵部事、監修國史，李瑋守司徒、修國史，許慶檢校司徒、判尚書禮部事，柳仁著、李資謙參知政事，崔繼芳、高令臣同知樞密院事，金峻爲禮賓卿、樞密院知奏事，王字之爲吏部侍郎、樞密院左承宣，金黃元爲翰林侍講學士，韓皞如爲右承宣。

三月戊午朔，幸長源亭。

壬午，賜鄭之元等及第。

夏四月庚寅，王還宮。

丙申，御禁內紗樓，製《牧丹詩》，命儒臣應製，賜段匹有差。顯宗嘗手植牧丹于樓前，自德宗至肅宗皆有詠花詩，又有從臣應製。

丁酉，以金至和知吏部事，朴景綽直門下省，趙仲璋爲左諫議大夫，林彥爲禮部侍郎、右諫議大夫，金沽知御史臺事。

戊戌，宴諸王及平章事金景庸，上、大將軍、承宣等于賞春亭。

雨雹。

五月甲子，太白晝見。

乙丑，禱雨于興國寺。

戊寅，集三品以上於式目都監，問禦邊之策。

六月丁亥，王如奉恩寺。

乙未，移置扶餘公燾于巨濟縣，行至玄風縣卒。

己酉，參知政事文冠卒。

秋七月己巳，王太后柳氏薨于信朴寺。

丁丑，以兵部侍郎李壽爲西北面兵馬副使，刑部侍郎安子恭爲東北面兵馬副使。

八月丙申，葬明懿王太后于崇陵，王祖送于闕庭。

丁酉，遣殿中監李德羽如遼告哀。

丙午，流僧統窺于巨濟縣。

戊申，流尚書右丞金仁碩、全州牧使李汝霖、殿中少監河彥碩、刑部尚書任申幸、大卿李仲平、刑部員外郎李日肅、將軍金澤臣宋英漢、別將金有成、知南原府事李綏、寧朔鎮使李日衍、崇教寺僧資尚，及仁碩、汝霖、申幸、彥碩之子于遠地，誅資尚于中路。

辛亥，樂浪侯瑛卒。

九月丙寅，以金景庸爲門下侍中，吳延寵、李瑋爲門下侍郎、同中書門下平章事，許慶守司徒，柳仁著爲尚書左僕射、判尚書刑部事，李資謙守司空、兵部尚書、判三司事，崔繼芳檢校司空、樞密院使，高令臣爲吏部尚書、知樞密院事，金緣爲左散騎常侍、同知樞密院事、翰林學士承旨，崔挺判尚書工部事，

金商祐爲刑部尚書，劉載爲禮部尚書，林有文爲右散騎常侍，康拯爲御史大夫。

乙亥，遣禮部侍郎金縝如遼賀天興節。

冬十月庚寅，以宋國信龍鳳茶分賜宰臣。

辛卯，遣工部侍郎李寵鱗如遼謝橫賜。

乙巳，遣戶部侍郎康悅如遼謝賀生辰。

壬子，兩府宰臣上表請復常膳，不允。

十一月甲寅朔，宰臣三上表，請復常膳，從之。

庚申，御乾德殿，宣柳仁著、李資謙麻制。

丁丑，王詣明懿太后虞宮。

己卯，遣承宣韓皞如于中書省，問禦邊之策。

庚辰，遣禮賓少卿崔侁如遼獻方物。

辛巳，御乾德殿，宣金景庸、吳延寵、李瑋麻制。

遼東京回謝持禮使禮賓副使謝善來。

壬午，遣刑部侍郎許之奇如遼賀正。

十二月辛丑，以崔思諷守太師中書令致仕，林幹爲門下侍郎同平章事致仕。

（癸巳）八年春正月乙卯，遼遣崇祿卿張如晦來賀生辰。

壬申，遼敕祭使永州管内觀察使耶律固、太常少卿王侁來。

癸酉，以知刑部事李載爲西北面兵馬使，太府少卿智淑延爲東北面兵馬副使。

甲戌，遼敕弔使泰州管内觀察使蕭迺來。

丙子，遼使祭太后于虞宮，王詣虞宮。

戊寅，遼遣崇祿卿楊舉直來，命王起復。詔曰：“嗣豐祖構，恭守王封。頃哀被於茹荼，即毀過於扶杖。爰降釋哀之命，勿辱專閫之權。當體眷懷，所宜祇荷。”告身曰：“鑒綬疏封繼先業者，是謂殊私；墨衰從政奪哀情者，斯爲變禮。舉茲故典，懋乃邦英。其有毓象緯之靈，閒玄黃之氣。踰鴨綠而休聲振厲，保雞林而令德流聞。道善庇民，謀能經國。方恪修於世範，何遽宅於家難。庸卜吉辰，與伸起復。前推誠奉國功臣、開府儀同三司、檢校太師、守太尉兼中書令、上柱國、高麗國王，食邑三千戶，食實封一千五百戶王倣，榮分弓鉞，慶席山河。桓鎮琅琅，素全於重器；梗枏肅肅，生備於長材。仍教稟於義方，復言該於名理。而自嗣興厥域，優纂乃勞。賓王著事大之誠，侯律謹守方之制。洽辰韓之善理，慕齊晉之純忠。歲重貢儀，率勤北面之力；時堅戎翰，實寬東顧之憂。頃者靜樹纏悲，白華違養。尚固匹夫之節，擬成孝子之規。主土分茅，闕一日而不可；毀容銜恤，豈三載以爲期。是用從金革之宜，飾鈿珠之命，駢車載駕，駝紐重輝。於戲！日域全疆，天命重地。位冠於五侯九伯，秩參於四輔三公。矧先臣之縟儀，彝器咸在；今汝躬之異數，備物具彰。必靜鎮於一方，當表章於群嶽。勉服丕訓，永保多祥。”

二月庚寅，耶律固等將還，請《春秋釋例》、《金華瀛洲集》。王各賜一本。

置花園二于宮南西。時宦寺競以奢侈媚王，起臺

樹、峻垣墻，括民家花草移栽其中，以爲不足，又購於宋商，費內帑金幣不貲。且於京外多作寺院，窮極土木，物論喧騰。既而，二園俱廢。

乙未，以許慶檢校太尉、門下侍郎、同中書門下平章事致仕，崔挺檢校司徒、參知政事致仕，宋秀爲神虎衛上將軍、工部尚書，尹惟志爲左右衛上將軍、攝刑部尚書。

戊戌，燃燈，王如奉恩寺。

辛亥，幸王輪寺設齋，還至刑部南街，獄囚望駕，同聲呼萬歲，命近臣就獄賜酒，放輕繫。

三月壬子朔，太史奏：“太陽當虧，密雲不見。”門下侍中金景庸率百僚表賀。

丙寅，王不豫，百官設大醺于會慶殿禱之。

丁卯，慮囚。

戊辰，百官又禱于神衆院。

戊寅，以李資謙爲尚書左僕射，金緣爲兵部尚書、知樞密院事，柳子維爲尚書右僕射，康拯爲刑部尚書，金至和爲工部尚書，李載爲御史大夫、文德殿學士。

夏四月己亥，親饗年八十以上及孝順義節、孤獨疾病者于宮庭，賜物有差。特命禮部尚書致仕林成概肩輿入內，宴于閣門，親侑食賜衣。

戊申，禱雨于九曜堂三日。

閏月辛酉，親醺于闕庭。

戊辰，慮囚。

庚午，女真烏羅骨、實顯等來，謝還九城，獻名

馬、良金。

五月乙酉，王詣太后虞宮。

戊子，宋都綱陳守獻白鷗。

辛丑，參知政事柳仁著卒。

六月庚戌朔，王如奉恩寺。

珍島縣民漢白等八人，因賣買往毛羅島，被風漂到宋明州，奉聖旨各賜絹二十匹、米二石發還。

己未，慮囚。

己巳，祈晴于社稷群望。

甲戌，以趙仲璋爲殿中監。

秋七月己卯朔，以崔繼芳守司空、兵部尚書、參知政事，高令臣檢校司空、參知政事，柳子維守司空，趙仲璋同知樞密院事，金駿爲樞密院副使，康拯爲戶部尚書、三司使，金沽爲左諫議大夫，金叔平爲殿中侍御史。

乙酉，以工部尚書金至和爲西北面兵馬使，御史雜端李舜諧爲東北面兵馬副使。

癸巳，奉安明懿太后真于開國寺肅宗真殿。

八月丁卯，幸長源亭。

九月乙酉，遣西頭供奉官安稷崇如宋，牒宋明州云：“去年入朝，金緣等回稱：‘在闕下時，蒙館伴張內翰等諭，來歲又當禋祀，申覆國王遣使入朝，以觀大禮。’聞此已令有司方始備辦，忽母氏薨逝，迫以難憂，今年未遑遣使入朝，以達情禮，請炤會施行。”

乙巳，自長源亭幸慶天寺落成。



冬十月壬戌，遣禮部侍郎李永如遼，賀天興節。

甲子，王還宮。

庚午，遣禮部尚書洪灌、刑部侍郎金義元如遼謝弔祭。

辛未，設百座會于會慶殿，講《仁王經》三日，齋僧一萬于毬庭、二萬于州府。

十一月庚辰，遣祕書少監韓冲如遼謝起復。

乙酉，王詣太后虞宮。

丙戌，遣工部侍郎李茂榮如遼謝賀生辰。

甲午，遣殿中監崔弘宰獻方物。

丙申，翰林學士承旨金緣、侍講學士朴昇中等，撰進《時政策要》五冊，各賜犀帶，編修官金富轍以下，賜物有差。

遣戶部侍郎李資誠如遼賀正。

十二月戊申朔，慮囚放輕繫。

丙辰，以金景庸守太傅、判尚書吏部事，吳延寵守太尉、判禮兵部事、上柱國，李瑋守太尉、上柱國，崔繼芳爲尚書左僕射、判三司事、柱國，金緣爲禮部尚書、政堂文學、判翰林院事，趙仲璋爲兵部尚書、樞密院使，柳子維爲尚書右僕射、判工部事，李資謙檢校司徒、柱國，劉載爲吏部尚書，康拯知樞密院事，金峻爲左散騎常侍、同知樞密院事，金至和爲刑部尚書，史榮攝工部尚書、三司使，金若溫知尚書都省事，朴景綽爲殿中監、翰林學士，王字之禮賓卿、樞密院知奏事。

甲戌，遣禮賓少卿金景清如遼獻方物。

（甲午）九年春正月戊寅朔，放朝賀。

西女真將軍烏無奐等六十一人來朝。

庚辰，遼遣衛尉卿張如晦來賀生辰。

戊戌，幸文德殿作佛事。

庚子，赦。

癸卯，幸神衆院。

乙巳，以高義和爲右僕射、鷹揚軍上將軍，尹惟志爲兵部尚書、龍虎軍上將軍。

二月癸丑，以三司使安子恭爲西北面兵馬使，三司副使李韶永爲東北面兵馬副使。

己未，親醮本命于乾德殿。

庚申，燃燈，王如奉恩寺。辛酉，以雨停大會。壬戌，乃行。

丙寅，西女真將軍古老等六十六人來朝。

三月丁丑朔，幸妙通寺。

壬午，幸普濟寺。

癸未，以劉載爲尚書左僕射、文德殿學士。

乙酉，王詣太后虞宮。

己丑，以吳延寵判吏部事，金緣爲檢校司空、戶部尚書、參知政事、判禮部事兼西京留守使，趙仲璋檢校司空、兵部尚書、參知政事、判刑部事，康拯爲尚書左僕射、樞密院事、判三司事，金駿爲吏部尚書、知樞密院事，金至和爲禮部尚書，李載爲刑部尚書、延英殿學士，史榮爲工部尚書，崔贊、朴景綽爲左右

散騎，林有文爲御史大夫，王字之爲殿中監，金沽知御史臺事。

癸巳，王如奉恩寺，以僧曇真爲國師，樂真爲王師。

夏四月丙午朔，御乾德殿覆試，賜白晞等及第。

庚戌，有司奏：“西京進士鄭之元，中壬辰年省試第一名，請依舊留王京敘用。”制可。

丁巳，東女真古羅骨、史顯等十二人來獻馬。

乙丑，大雨雹，震文德殿東廊柱。

丙寅，雨雹，御史大夫林有文等以災異引咎辭職，命復視事。

丁卯，親醺闕庭。

庚午，以金緣爲禮部尚書、政堂文學、判翰林院事。

甲戌，幸外帝釋院行香，設佛頂道場于文德殿七日。

五月戊寅，設消災道場于乾德殿。

庚辰，禱雨于群望。

辛丑，王如奉恩寺，遂詣太后虞宮。

六月甲辰朔，安稷崇還自宋，帝賜王樂器。

乙巳，王如奉恩寺。

丁未，遣樞密院知奏事王字之、戶部郎中文公彥如宋謝賜樂。

己酉，禱雨于社稷。

丙辰，慮囚放輕繫。

乙丑，參知政事致仕庾祿崇卒。

秋七月辛巳，以工部尚書史榮爲西北面兵馬使，借戶部侍郎智祿延爲東北面兵馬副使。

癸巳，以李資謙守司空、尚書左僕射、參知政事，金緣爲刑部尚書、判禮部事，趙仲璋權樞密院事、判祕書省事，李載爲戶部尚書，林有文爲左散騎常侍兼御書檢討官，崔贊爲御史大夫。

八月乙卯，王詣國學，酌獻于先聖、先師。

丙辰，宰臣率百官上表賀曰：“黃屋翠華，光臨鬡宇；高冠大帶，盛集橋門。慶溢臣工，樂均寰海。竊以經術所以明道，而非其人則不行；學校所以養賢，而非其時則不舉。發明大典，允屬休辰。伏惟聖上道極高明，政由仁義，若高舜之稽古，體殷周之右文，乃據舊章，以興盛禮，拜聖容而奠酌，命博士以繙經。君子育材，乃見菁莪之雅；虎臣獻馘，必成泮水之功。不惟推美於一時，抑亦播馨於千載。伏念幸逢明時，承乏天工，仰咫尺之德威，侍光明之聖學。秋水時至，固莫測於望洋；春木之芑，實知榮於援手。”

丙寅，御東池龜齡閣，閱武士。

九月庚辰，幸妙通寺。

辛巳，慮囚，出輕繫。

庚寅，設百座仁王道場於會慶殿，齋僧一萬於闕庭、二萬於州府。

冬十月丙午，奉惠宗神主復入于太廟第二室，出遷成宗神主于康陵，祔明懿太后于肅宗室。

己酉，宴于乾德殿，始舉樂。

乙卯，謁英、崇二陵。

丙辰，遣李鸞如遼賀天興節。

丁卯，親祫于太廟，兼用宋新樂。赦。

庚午，遣梁永如遼謝賀生辰。

是月，生女真完顏阿骨打舉兵叛，遼東京兵馬都部署司牒曰：“近有生女真作過，止差官領兵討伐，仰指揮。高麗國亦行就便，於女真邊界道路，深入攻討，應據人口、財產、房舍，收虜蕩除。仍緊切防備，勿令走入彼界險要處所，依據閃避。”

十一月壬申朔，宴諸王、宰樞於含元殿，閱宋新樂。

乙亥，遼遣橫宣使耶律諮、副使李碩來。

戊寅，作佛事于文德殿。

戊子，賜元子名構，仍賜禮物，百官表賀。

十二月壬寅朔，冊延德宮主李氏爲王妃。

甲辰，遣衛尉卿李壽、通事舍人黃君裳如遼謝橫宣。

丁未，御宣政殿，引見北界四關外蕃長。

戊申，閱射于東池。

己酉，御宣政殿南門，引見東蕃使者阿只等。

丁巳，以備守太保，倖爲大原公，僭檢校太保、守太尉，僑檢校太保、守太尉，李資謙守司徒、中書侍郎、同中書門下平章事兼西京留守使，金緣守司徒、戶部尚書，趙仲璋守司空、判尚書刑部事，金至和爲

尚書左僕射兼三司使，史榮爲吏部尚書，李載爲刑部尚書、翰林學士承旨，朴景綽爲左散騎常侍，崔璿判國子監事，金沽知尚書吏部事、延英殿學士，安子恭知御史臺事，朴昇中爲右諫議大夫，洪灌爲文德殿學士。

己巳，遼遣王儆來命王落起復。

## 高麗史十四

### 世家卷第十四

#### 睿宗三

（乙未）十年，春正月壬申朔，放朝賀。

癸酉，宴遼橫宣使于乾德殿。

乙亥，宴落起復，使于乾德殿。

丙子，遼遣觀察使高慶順來賀生辰。

戊寅，宴遼生辰使于乾德殿。

戊子，冊弟僭檢校太保、守太尉。

己丑，遣尚書李壽、侍郎黃君裳如遼謝橫宣。

庚寅，冊弟僭檢校太保、守太尉。

是月，生女真完顏阿骨打稱皇帝，更名旻，國號金。其俗如匈奴，諸部落無城郭，分居山野。無文字，以言語結繩爲約束。土饒豬羊牛馬，馬多駿，或有一日千里者。其人鷙勇，爲兒能引弓射鳥鼠，及壯，無不控弦走馬習戰，爲勁兵。諸部各相雄長，莫能統一。

其地西直契丹，南直我境，故嘗事契丹及我朝。每來朝以麋金、貂皮、良馬爲贄，我朝亦厚遺銀幣，歲常如此。或曰：“昔我平州僧今俊，遁入女真，居阿之古村，是謂金之先。”或曰：“平州僧金幸之子克守，初入女真阿之古村，娶女真女，生子曰古乙太師。古乙生活羅太師，活羅多子，長曰劬里鉢，季曰盈歌。盈歌最雄傑，得衆心。盈歌死，劬里鉢長子烏雅束嗣位。烏雅束卒，弟阿骨打立。”

二月癸卯，冊子構爲王太子，其文曰：“古先哲王，撫有方夏，必立儲貳，以承天序者，非敢私於親愛之間，將以繫人心，而固國本也。肆朕纘服，若昔大猷，眷惟上嗣之良，久協重明之象。考從於龜筮，咨度於臣工，申擇令辰，誕揚休命。咨爾元子構，賦中和之粹，挺歧嶷之姿。仁義孝友之誠發自天性，篤實輝光之德通於神明，雖在妙齡，夙彰全範。出言而合度，舉足而中規，不事盤遊，樂從善道，終始典于學，左右逢其源。究詩書禮樂之文，明父子君臣之義，與夫周昌之事王季、漢盈之奉高皇，無以異也。所宜據前載之言，正東朝之位，主之以匕鬯，對越於祖宗。是用遣使持節，冊命爾爲王太子。於戲！惟敬遜可以能盡心，惟謹慎可以長守貴。爾其嚴師傅之訓，誠宴安之娛，非正人勿親，非正言勿聽，以揚三善之風，以貞萬邦之心，則朕之有子，無愧於古先哲王矣。尚遠乃猷，永膺多福。”

戊午，行別例燃燈，王御重光殿觀樂，聞中書令



致仕崔思諫卒，罷宴。

丁卯，聚僧讀佛經于內殿五日。

三月壬申，以封王太子，御神鳳門赦。

壬午，宴群臣于乾德殿，賦《萬年詞》，宣示左右。

癸未，曲宴于內殿。

戊子，親醺于毬庭。

戊戌，以王妃延德宮主生辰，曲宴于內殿。

夏四月壬寅，幸妙通寺。

李壽等還自遼，回詔曰：“近以邊臣弛備，小寇擾民，方行有罪之誅，是議偏師之舉。以卿地隣賊境，職守候藩，特諭整戎，庶令逐暴。卿遣馳使价，來奉謝章，諒茲從命之臣，盡爾爲忠之節。適當春事，有慮農妨，姑務練修，別期進取。”

癸丑，召諸王、宰樞于賞春亭，置酒極歡，制詞二闕，令左右和進，兩府宰樞表辭，不允。

甲寅，王字之、文公美將如宋，省侍臣、樞密院承制等餞于順天館樂賓亭。王遣內侍林景清宣示御製詩一首，兼賜酒果。

乙卯，幸普濟寺。

五月戊寅，雨雹。

己卯，幸龜山寺。

丁亥，命趙仲璋等取進士，其合格人對策，頗蹈襲前人，落第者訴之。

庚寅，御乾德殿，出詩賦題覆試，詔諸王、宰樞、

侍臣坐殿上，賜詩題“股肱良，庶事康”，命詞臣製進，王亦製之。

六月己亥，王如奉恩寺。

賜金精等及第。

丙辰，慮囚。

辛酉，曲宴于內殿。

丙寅，以中書侍郎平章事李資謙守太尉。

秋七月戊辰朔，日食。

庚辰，王以明懿太后忌辰，如開國寺行香。

戊子，遣吏部尚書王字之、戶部侍郎文公美如宋謝恩兼進奉，仍遣進士金端、甄惟底、趙奭、康就正、權適等五人赴太學。表曰：“化民成俗，由乎《大學》之風；用夏變夷，藉彼先王之教。故呼韓遣子於漢室，吐蕃請書於唐家，事雖不同，義則無異。伏惟大宋之興也，千齡接旦，一統當天，發揚大道之源，掃蕩積年之弊。學分三舍，教本六經。矧又開璧水，蒐講上儀，立明堂，復興盛典。功成理定，新制作於百年；仁洽道豐，一車書於萬國。顧惟弊邑，夙慕華風，在乎開寶之時，及至神宗之世，每馳使价，參遣生徒，俾以觀周，期於變魯。厥後偶因中廢，久闕前修。傳聞承習之已遙，廣記備言之半脫，士無定論，學有多歧，混混末流，寥寥幾歲。況乎法度憲章之際，聲名文物之儀，或歷代之遺經，或諸家之異說，苟非質疑於有識，豈能成法於將來。每及興言，思遵舊貫。今也良辰在遇，素志可伸，謹遣學生五人，令隨入朝赴

闕。惟此諸生，並非秀穎，目不見膠庠之禮，耳不聞雅頌之聲。難可與言，有類互鄉之童；未嘗無誨，蓋存闕里之仁。伏望皇帝陛下愍惻深衷，推明故事，特下國子監，或於璧雍收管，許令就便學業。則容迹於諸生之末，樞衣於博士之前。懷我好音，庶見鶚鳴之變；遷于喬木，免同鳩舌之頑。倘令吾道以東行，永荷大明之下燭。”

丙申，門下侍郎平章事致仕許慶卒。

八月庚子，御宣政殿南廊，聽斷內外重刑。

遼將伐女真，遣使來請兵。

乙巳，召宰樞、侍臣、都兵馬判官、諸衛大將軍以上，問至再三，卒無定議。

壬子，曲宴于長齡殿。

癸丑，太白晝見。

乙卯，幸外帝釋院。

戊午，幸妙通寺作佛事。

庚申，親饗庶老於毬庭，賜物有差，又饗國老致仕平章事吳壽增等於閤門。

西北面兵馬使朴景綽陞辭，改賜名景仁，賜茶藥。

甲子，幸普濟寺。

乙丑，雨雹。

九月丁卯，召集近臣于御院閱射，曲宴于賞春亭。

辛未，王乘月微行，幸處士郭輿所，居純福殿清心臺，置酒與近臣論文，至曉乃罷。

壬申，慮囚。

丙戌，親選武士于東池。丁亥，觀水戲。

冬十月己亥，王以肅宗忌辰，如開國寺行香。

甲辰，設百座仁王道場于會慶殿三日，齋僧一萬于闕庭、二萬于州府。

丁未，親閱六道神騎將士于東池。

庚戌，命中書侍郎平章事金緣等大閱于東郊。

辛亥，親醮下元於純福殿。

癸丑，遣侍御史尹彥純如遼賀天興節。

親選西京將士于東池。

十一月壬申，曲宴于膺乾殿。

遣郎中金仁瑄如遼謝落起復。

庚辰，設八關會，王自毬庭還至閤門前，駐蹕，唱和久之，命倡優歌舞仗內，幾至三鼓。御史大夫崔贇、雜端許載進諫，王嘉納之。

壬午，曲宴于內殿。

甲申，遼遣利州管內觀察使耶律義、大理少卿孫良謀來督發兵。詔云：“昨以女真不恭，王師問罪，自去冬而降詔，俾分路以進攻，雖曰整兵，未能殄寇。今則諸軍並會，叩境前行。況爾兵戎早經點閱，便可即時而先出，毋或相應以後時。仍飭使人就觀進發，勉圖忠效，惟在敬從。”仍賜段匹諸物。

庚寅，北路兵馬使馳報：“遼東京牒，‘昨奉敕旨，高麗所遣生辰、橫宣、落起復三謝使，近緣邊境多故，未得入界，已令還國。’”

辛卯，耶律義等詣閤門欲辭，以出兵之議久不決，

不成禮而退，翼日乃辭。

十二月庚子，慮囚。

壬寅，遼東京留守遣回謝持禮使禮賓副使高孝順來。

（丙申）十一年春正月丙寅朔，放朝賀。

戊辰，遼遣大理卿張言中來賀生辰。

壬午，御便殿，宴諸王，夜分乃罷。

庚寅，幸天壽寺，巡視新創堂殿，賞賜工匠有差。

壬辰，以尚書戶部侍郎李韶永爲西北面兵馬副使，借戶部侍郎李惟寅爲東北面兵馬副使。

閏月庚子，以宋秀爲工部尚書。

壬寅，幸普濟寺，聽國師曇真說禪，賜施優厚。

庚戌，遣祕書校書郎鄭良稷，稱爲安北都護府衙前，持牒如遼東京，訶知節日使尹彥純、進奉使徐昉、賀正使李德允等稽留事。

甲子，醺三界于內殿。

二月丙寅，日本國進柑子。

癸酉，遼東京人高諲來投。

庚辰，燃燈，王如奉恩寺。甲申，行別例燃燈，御重光殿，宴親王、宰樞、侍臣，夜分乃罷。

丙戌，參知政事致仕高令臣卒。

三月乙未朔，王聞遼來遠、把州二城爲女真所攻，城中食盡，遣都兵馬錄事邵億送米一千石，來遠統軍辭不受。

己亥，奉安肅宗及明懿太后睟容于天壽寺。

壬寅，鄭良稷自遼東京還。時東京渤海人作亂，殺留守蕭保先，立供奉官高永昌，僭稱皇帝，國號大元，建元隆基。良稷至，詐稱官銜，上表稱臣，以國家所遺留守土物贈永昌，得厚報。及還，匿不奏，事覺，有司請下獄治之，從之。

癸卯，王如天壽寺，設齋以落之，綵棚伎樂連亘道路者三日。

甲辰，宴群臣于寺門外，至曉乃罷。乙巳，還宮，赦監督官吏、工匠、役徒，賞賚有差。駐駕都市，諸王、宰樞稱觴獻壽，王執金景庸手，語及先王太后，泣下霑襟，左右嗚咽。

壬子，以吳延寵守太尉。

乙卯，幸西京，以李瑋、金緣判行從事，李資謙、趙仲璋判留守事。所歷供給務從省約，鹵簿儀仗，悉令簡便，沿路田地有不墾者，必召守令責之。

己未，禱雨于所過祠宇。

夏四月甲子朔，至西京，置酒大同江船上，扈駕諸王、宰樞、侍臣，西京留守，分司三品以上侍宴。風日清和，王悅，與侍臣唱和。

乙丑，謁太祖真殿。

丙寅，召見處士郭輿，賜坐於常安殿後花壇，親賜酒食。時忽見東南方有白雲數片，其中雙鶴徘徊。因命輿賦詩，王亦和之。

丁卯，命有司禘于太廟，以金上琦配宣廟，崔思諤配肅廟。

幸長慶寺。

禱雨于山川諸祠。

戊辰，召諸王及郭興置酒，王製詩三篇，命興和進。

己巳，禱雨于九月山。

庚午，幸金剛、興福兩寺，還至永明寺，御樓船，宴諸王、宰樞、侍臣，復以御製仙呂調《臨江仙》三闕，宣示臣僚。

金主阿骨打遣阿只來。

辛未，中書門下奏：“遼爲女真所侵，有危亡之勢，所稟正朔，不可行。自今公私文字，宜除去天慶年號，但用甲子。”從之。

壬申，醮三界于長樂殿。

癸酉，宴群臣于長樂殿，仍宣示御製詩一絕。

丙子，幸觀風殿，巡視太祖行在所，遂御九梯宮。及晚，移御永明寺東閣，召諸王及郭興置酒唱和。

戊寅，幸九梯宮。遼來遠、抱州二城流民驅羊馬數百來投。

己卯，移御龍德宮。

遼流民男女二十餘人來投，獻羊二百餘口。

庚辰，御乾元殿受朝賀。下制曰：“朕承祖宗積累之緒，保有三韓，懼無以稱人神之望，宵旰憂勞，不敢遑寧。今以日官所請，徙御西都，以頒新教，將以與物更始，使民知歸，以興先王之舊業。且彼聖賢之訓及諸圖讖之言，謂‘奉順陰陽，尊崇佛釋，明信刑

罰，黜陟幽明，三寶之財，不可妄費，四仙之跡，所宜加榮。’依而行之，不敢失也。況園丘、太廟、社稷、籍田及諸園陵者，國家敬重之所也，其管勾員吏以時修葺，無使弊虧。所謂國仙之事，比來仕路多門，略無求者，宜令大官子孫行之。文武兩學，國家教化之根源，早降指揮，欲令立其兩學，養育諸生，以備將來將相之舉，而有司各執異論，未有定議，宜速奏定施行。且國風欲其儉朴，而今朝廷士庶衣服華侈，尊卑無等。宜令禮儀詳定，所據祖宗代式例沿革，制定以聞。”又改定中外官制。

辛巳，曲宴于乾元殿。

壬午，幸弘福寺，移御唐浦古城門樓，置酒歡，賞名樓曰多景，御製留題，命詞臣和進。

癸未，命知西京留守事、戶部尚書金若溫扈駕，以趙令龜攝分司戶部尚書、知留守事。

甲申，駕發西京，路上有老嫗進壺酒，王憐其誠一嘗，因賦詩一絕。

丁亥，駕至岳嶺驛，宋都綱楊明等謁于道。

辛卯，王還京都，赦。制曰：“巡狩之禮，所以省方設教也。朕叨襲丕基，欲興景業，俯從太史之請，願效先王之遊，移蹕舊都，落成新闕。雖除衆弊，豈無騷擾，宜敷寬大之恩，以慰遐邇之望。其西京及隨駕員將軍卒及沿路州府郡縣長吏，有所犯停囚，應受公徒私杖以下罪。上京留守百官於駕出後，凡有徵贖等雜輕罪，咸赦除之。西京及所歷山川神（祇）〔祇〕



各加號。沿路州府郡縣年八十以上者及孝子順孫、義夫節婦、鰥寡孤獨、篤廢疾者，准西京例賜物。兩京諸處道場、福田及都監道俗員吏，西京及隨駕兩班員、軍人、雜類，諸界官迎駕長吏等職賞及稅租減除等事，准庚寅年南幸、丁亥年西幸兩度恩制施行。內侍給使及諸宦者、隨駕親王宮府員吏，侍衛南班員吏、雜類等，亦准前兩度恩制施行。西京及四道倉督，迎駕諸州府郡縣，凡所有時弊，宜令留守官、按察使臨問奏除。新闕創成都監員吏、諸色匠人、雜類等，並准西京九梯宮、上京長源亭創成後所加恩賞例奏裁。”時留守百官備儀仗樂部，迎駕於馬川亭，大樂、管絃兩部爭務奇侈，以至使婦女馳馬擊毬，王命黜之，其戲遂絕。

是月，得寶玉於西京盤龍山，命玉人先造祭器，以答神貺。宰臣表賀。

五月癸卯，門下侍郎平章事吳延寵卒。

丙辰，御乾德殿覆試。

庚申，賜裴祐等及第。

六月甲子，王如奉恩寺。

乙丑，王字之、文公美齋詔還自宋，王受詔于乾德殿。詔曰：“使人王字之等至，省所上表，起居事具悉。列國稱藩，表茲東海，載臨時序，遐暨乃心，靡忘報上之歸，特貢履和之問。春祺在旦，福履克綏，用加勤誠，不忘晨夕。”又詔曰：“省所差人進奉御衣二對等事具悉。撫封舊履，襲慶東藩，不替前修，有

嘉來享，使旃華隰，方物充庭。惟順與忠，既嘉且旅，永言恭恪，用勸于懷。今回賜衣著、銀器等，具如別錄，至可領也。”又獎諭設齋詔曰：“使人王字之等至，省所奏，於大相國寺、楊州天寧萬壽觀、（抗）〔杭〕州天竺寺、閏州金山寺、泗州普炤王寺，設齋祝壽事具悉。使航遐暨，禮意有加，祇載真乘，用伸報禮，有嚴佛事，虔祝壽祺，緬想遐心，良深注意。”又獎諭賀冊皇太子詔曰：“使人王字之等至，省所上表，賀冊皇太子事具悉。比立儲闈，預崇國本，用繫天下，以御邦家。惟爾東藩，逖聞慶典，需章來賀，欣懌攸均。”又獎諭別進詔曰：“省所差人別進事具悉，踐修厥猷，備物來享，罔墜先君之履，克勸方物之珍，航海造庭，實篚有貢，忠純益懋，獎屬良深。”又回賜國信詔曰：“修方惟舊，底貢既嘉，舟楫言旋，匪頒在笥，禮無不答，其往（祇）〔祇〕承。今回賜國信兼別賜、密賜、特賜物色等，具如別錄，至可領也。”又獎諭遣子弟入學詔曰：“使人王字之等至，省所上表，乞學生金端等五人下國子監或璧雍收管，許令取便學業事具悉。紹述先猷，遙追三代，肇興學校，誕彌萬邦。絃歌之聲，無遠不屆。惟爾雅俗，有古遺風。乃遣諸生觀光上國。盡捐宿習，欲見天地之全；於變華風，亦推禮義之舊。永言向慕，既用嘉歎。”又詔賜大晟樂。

乙亥，慮囚。

壬午，以金景庸守太師、樂浪郡開國侯，李瑋守

太保、門下侍中、判尚書吏部事，李資謙爲門下侍郎、同中書門下平章事、判尚書兵部事，金緣守司徒、中書侍郎、同中書門下平章事、上柱國，趙仲璋守司徒、中書侍郎、同中書門下平章事、判尚書戶部事、上柱國，康拯守司空、參知政事、判尚書刑部事兼太子少傅，金駿爲兵部尚書、樞密院使兼太子賓客，朴景仁爲刑部尚書、翰林學士承旨，韓皞如爲樞密院知奏事兼直學士，朴昇中爲國子祭酒、翰林學士、左諫（義）〔議〕大夫。

庚寅，御會慶殿，召宰樞、侍臣觀大晟新樂。

秋七月辛丑，燕射于賞春亭。

戊申，王如天壽寺，薦明懿太后冥福。

己酉，遣李資諒、李永如宋謝賜大晟樂。

癸丑，以右散騎常侍崔弘宰爲西北面兵馬使，太僕卿智淑延爲東北面兵馬使。

庚申，聽斷內外重刑。

辛酉，御宣政殿，召宰樞、給、舍、中丞以上侍臣親訪邊事。又召臺省諸侍臣及兵馬判官於乾德殿，傳宣訪問。

八月甲戌，東藩使者阿伊等來朝。

丙子，謁景靈殿。

丁丑，幸妙通寺。

庚辰，金將撒喝攻遼來遠、抱州，二城幾陷。其統軍耶律寧欲帥衆而逃，王遣樞密院知奏事韓皞如招諭，寧以無王旨辭。皞如馳奏，王欲令樞密院具劄子

送之，宰臣、諫官奏曰：“彼求王旨，其意難測，請止之。”王乃遣使皦如金，請曰：“抱州，本吾舊地，願以見還。”金主謂使者曰：“爾其自取之。”

甲申，以洪灌爲清讌閣學士，鄭克恭爲直學士，尹諧爲直閣。

九月庚子，慮囚。

冬十月甲子，王如天壽寺。

戊辰，閱大晟樂于乾德殿。

癸酉，親裸太廟，薦大晟樂、西都所得瑞玉祭器，併奏新制九室登歌。

十一月庚子，御清讌閣，命翰林學士承旨朴景仁講《尚書》二典。

以國子司業兼起居注、知制誥金富佺充寶文閣待制。

乙卯，大雪。御清讌閣，召樞密院知奏事韓皦如、寶文閣直學士鄭克恭、右副承宣文公美、直寶文閣尹諧等，置酒詠雪。以前禮部郎中郭俊穆嘗輔導肅宗，殿中內給事金元興潛邸舊學，命召賜坐於諸學士之右。

十二月庚申朔，御清讌閣，命寶文閣校勘高先柔講《書·大禹謨》、《皐陶謨》、《益稷》三篇。

壬午，御清讌閣，命內侍良醞令池昌洽講《禮記·中庸》、《投壺》二篇，謂寶文閣學士等曰：“投壺，古禮也，廢已久矣。宋帝所賜其器，極爲精備，將試之。卿等可纂定《投壺儀》並圖以進。”

甲申，宴清讌閣，謂學士等曰：“朕嘗覽《貞觀政

要》，太宗曰：‘但使天下太平，家給人足，雖無祥瑞，可比德於堯舜。若百姓不足，夷（狄）〔狄〕內侵，縱有芝草鳳凰，何異於桀紂？’斯言至矣。庶幾景行。”遂命金緣、朴景仁及寶文閣學士注解《政要》以進。

己丑，大饑。

是月，契丹三十三人、漢五十二人、奚一百五十五人、熟女真十五人、渤海四十四人來。

（丁酉）十二年春正月庚寅，放朝賀。

壬辰，渤海五十二人、奚八十九人、漢六人、契丹十八人、熟女真八人自遼來投。

壬子，幸法王寺及神衆院，還御明慶殿，以僧德緣爲王師。

癸丑，以給事中拓俊京爲西北面兵馬副使，借尚書兵部侍郎許載爲東北面兵馬副使。

丁巳，御清讌閣，命韓皞如講《周易·乾卦》，使朴昇中、金富侁問難，親賜酒食。

二月甲子，命兩府宰樞會中書，宣問北邊事宜。

乙丑，設消災道場于乾德殿三日。

丙寅，漢三人自遼來投。

丁卯，遣中書侍郎平章事金緣措置北邊兵馬。

壬申，燃燈，王如奉恩寺。

癸酉，北蕃八十一人來朝。

甲戌，命有司行壓兵祭於東西郊。

丁丑，幸普濟寺。

戊寅，以金駿檢校司空、參知政事，金至和守司空，李軌爲樞密院使，王字之爲左散騎常侍、同知樞密院事，韓皞如爲殿中監、樞密院副使，安子恭爲兵部尚書，仍令致仕。

己卯，幸長源亭。

三月庚寅，以康拯爲中書侍郎平章事，仍令致仕。

辛卯，遼來遠城牒曰：“昨爲生女真及東京渤海背亂，致不廣收得田禾。官司雖有見在穀粟，所有正軍外，平閑民戶闕少糧儲。權時掇借米貨五萬石，贍濟民戶。比候來秋，却具元借米貨碩斗還充，必不闕少。”王命兩府、臺省侍臣、知制誥、文武三品、都兵馬判官以上會議中書省，令判兵馬事金緣等傳諭統軍：“若歸我兩城人物，則不須掇借米貨。”再三往復，統軍不肯從。及金兵攻取遼開州，遂襲來遠城及大夫、乞打、柳白三營，盡燒戰艦，擄守船人。統軍尚書、左僕射、開國伯耶律寧與來遠城刺史、檢校尚書、右僕射常孝孫等，率其官民載船一百四十艘，出泊江頭。移牒寧德城曰：“女真背亂，並東京渤海續有背叛，道路不通，統軍部內田禾未收，米穀踊貴，致有貧寒人等。爲高麗國隣近住坐，已曾借糧推進，不行掇借。爲此部內人民赴裏面州城，趨逐米粟去。此至回來爲相和事。在此州并地分交付去訖，仰行交受已後，准宣命施行。”以來遠、抱州二城歸于我，遂泛海而遁，我兵入其城，收兵仗及錢貨寶物甚多。金緣具狀馳奏，王大悅，改抱州爲義州防禦使，以鴨江爲界，置關防。

甲午，百官表賀。略曰：“鴨綠舊墟，雞林故壤，越自祖宗之世，本爲襟帶之防，逮乎中世之陵夷，頗遭大遼之侵蝕，非惟人怒，實作神羞。”又曰：“比因兩敵之有爭，頗慮二城之所屬。靺鞨之請獻，殆從天啓；鮮卑之潛遁，固匪人爲。我泉我池，復爲內地，實藉實畝，拓大中區。”又曰：“慚乏壯猷之助，初聞吉語之傳。刪石紀功，未奏形容之頌；奉觴稱壽，願伸率舞之懷。”

辛丑，慮囚，放輕繫。

癸丑，金主阿骨打遣阿只等五人，寄書曰：“兄大女真金國皇帝致書于弟高麗國王，自我祖考介在一方，謂契丹爲大國，高麗爲父母之邦，小心事之。契丹無道，陵轢我疆域，奴隸我人民，屢加無名之師，我不得已拒之。蒙天之祐，獲殄滅之，惟王許我和親，結爲兄弟，以成世世無窮之好。”仍遺良馬一匹。

夏四月戊辰，漢人六自遼來投。

庚午，王還宮。

乙酉，臺諫上疏請停安和寺工役，從之。

五月戊子朔，慮囚。

庚寅，雨雹。

壬子，門下侍郎平章事任懿卒。

丁巳，李資諒還自宋，進士權適、趙奭、金端等偕資諒還。帝初親策試適等于集英殿，賜適等四人上舍及第，特授適華貫。及還，帝賜御製親札詔，王迎于乾德殿。詔曰：“朕仁不異遼，聲教所暨，靡間內

外，罔敢不祗。惟爾忠孝，克篤事大，制節謹度，恭于時命。惟土是享，遙追前人之光，述其世美，知所畏慕。航海遣使，受學于師，臨御便殿，試藝于庭，縻以官秩，用榮其歸，以爲爾邦之勸。同底于道，朕實汝嘉。”康就正、甄惟底二人死于宋。

六月戊午朔，王如奉恩寺。

癸亥，命置天章閣，于禁中藏宋帝所賜親製詔書及御筆書畫。

丙寅，尚州獻瑞麥兩歧三穗，上表以賀。

戊辰，漢人三來投。

庚午，慮囚。

甲戌，宴親王、兩府于清讌閣，賜犀帶、襲衣。

庚辰，以金緣爲門下侍郎、同中書門下平章事、上柱國，金峻判刑部事，金至和判工部事，李軌判三司事，林有文爲尚書右僕射、判祕書省事，朴景仁爲吏部尚書，金若溫爲戶部尚書，崔贊爲刑部尚書，崔德愷爲工部尚書，崔弘宰爲御史大夫，李壽爲右散騎常侍，金沽爲大司成、寶文閣學士，朴昇中爲翰林學士、知禮部事，許之奇、李永爲左右諫議大夫，拓俊京知御史臺事，李資諒爲刑部侍郎、知奏事兼太子右諭德，金仁揆爲給事中、樞密院左承宣兼太子左贊善，金富佺爲中書舍人，文公美爲殿中少監、右承宣兼太子右贊善。

甲申，慮囚，放輕繫。

秋七月己亥，以禮賓卿智淑延爲西北面兵馬使，



軍器監李惟寅爲東北面兵馬副使。

壬子，斷內外重刑。

八月戊午，幸南京，以李資謙、金緣、趙仲璋留守。

乙丑，簽書樞密院事金黃元卒。

丁卯，王至南京，契丹投化人散居南京圻內者，奏契丹歌舞雜戲以迎駕，王駐蹕觀之。

戊辰，御延興殿受朝賀，製《夜宴詩》一絕，以示群臣。

庚午，宴諸王、兩府侍臣于行宮。

甲戌，作佛事于延興殿七日。

癸未，幸僧伽崛及藏義寺。

九月甲午，設重陽宴於延興殿，諸王、宰樞侍坐，王懽甚賦詩，宣示左右。

丙申，作佛事于延興殿五日。

壬寅，慮囚，放輕繫。

癸卯，王發南京。丁未，次長源亭。

冬十月丁巳，以肅宗忌辰道場，幸敬天寺。

乙丑，御齡昌閣，望月賦詩，宣示左右和進。

丙子，王還宮。

丁丑，慮囚，放輕繫。

庚辰，設百座道場於會慶殿，齋僧一萬於闕庭、二萬於州府。

十一月辛卯，王召兩府宰樞曲宴于清讌閣。

甲午，御清讌閣，命翰林學士朴昇中講《詩·關

睢》。

乙巳，門下侍郎平章事李資謙落成新第，王遣使錫予甚厚。

戊申，御清讌閣，命門下侍郎金緣講《禮記》，起居郎胡宗旦讀《書·無逸》，及第權適、趙奭、金端等讀諸經，夜分乃罷。

十二月乙卯，門下侍郎平章事致仕吳壽增卒，謚康順。嘗以兵馬判官從東界統軍，使文正破賊有功。

庚午，幸龜山寺，遂幸安和寺，執役工匠賜物有差。

流淮安伯沂于天安府。

地震。

癸酉，御清讌閣，命金緣講《書·洪範》，令諸王、宰樞及諸學士聽講，仍賜宴唱和，各賜貂皮、煖扇。

丁丑，以李瑋爲太傅、桂陽郡開國伯，金暎爲尚書右僕射兼太子少傅，李軌爲政堂文學、判翰林院事兼太子少傅，朴景仁爲戶部尚書、知樞密院事、判三司事兼太子賓客，王字之爲兵部尚書、知樞密院事，韓安仁爲右散騎常侍、同知樞密院事、翰林學士承旨。

（戊戌）十三年春正月甲申朔，放朝賀。

庚子，咸寧節，御乾德殿受賀，宴群臣。

癸卯，幸神衆院。

己酉，以太僕卿李韶永爲西北面兵馬使，吏部侍郎智祿延爲東北面兵馬副使。

辛亥，御清讌閣，命寶文閣學士洪瓘講《書·舜典》，宴侍坐諸學士，王賦詩一首，即令和進。

（三）〔二〕月壬戌，御清讌閣，命寶文閣待制金富佺講《詩·魯頌》。

甲子，親醺闕庭。

丙寅，女真四十一人來獻土物。

辛未，御清讌閣，命韓安仁講《易·泰卦》。

丙子，幸長源亭。

三月丁酉，尚書右僕射劉載卒。

辛丑，慮囚。

甲辰，臺官不署事三日。先是，內侍給使歐辱臺吏，臺官不問。又太子府內豎犯禁，著白綾襪袴、皂羅衫、烏犀帶，臺吏脫之，反被囚繫。臺吏徐琰等言於臺官曰：“我輩雖卑賤，皆憲官屬吏，今爲內隸所辱，其如臺綱何？願極論，以正公道。”臺官依違不從，琰等十五人發憤自退，無一人留者。

壬子，以李資謙判吏部事，金緣判兵部事，李軌爲戶部尚書、判禮部事，朴景仁爲禮部尚書。

夏四月甲子，王還宮。

丁卯，重修安和寺成，設齋五日以落之。

庚午，親幸觀之，幄帟連亘，伎樂填咽，士女全集。

壬申，還宮，下制：“董役官吏及工匠賜物有差。”初，監督近臣務極奢侈，勞費不貲，又因使价如宋求妙筆書扁額。帝聞之，御筆書佛殿扁曰“能仁之殿”，

命太師蔡京書門額曰“靖國安和之寺”以賜之，且賜十六羅漢塑像。

五月癸未朔，日食。

戊子，賜金福允等及（第）〔第〕。

以李資謙判西北面兵馬事兼中軍兵馬使，金緣判東北面兵馬事兼行營兵馬使，朴景仁爲西北面兵馬使兼知中軍兵馬事，王字之爲東北面兵馬使兼知行營兵馬事。

乙未，幸外帝釋院。

六月壬子朔，王如奉恩寺。

丁巳，御清讌閣，命寶文閣學士李永講《書·說命》。

丙寅，王受菩薩戒于乾德殿。

己巳，慮囚。

戊寅，御宴親殿置酒，餞入宋使鄭克永、李之美，召諸王、宰樞侍宴。

秋七月辛巳，宋遣閤門（祇）〔祇〕候曹誼、醫官楊宗立等七人來。

甲申，迎詔于乾德殿門。詔曰：“省知明州樓异奏，高麗國王世子王子王某書，乞借差大方脉瘡癰〔1〕科等，共三四許人，使存心醫療，式廣教習事。朕丕冒海邦，咸躋壽域，乃眷撫封之舊，每殫修貢之勤。載諒忠誠，務隆恩意，比閱使人之請，遠須方術之工。

---

〔1〕 原作癰，同瘡。

爰命國醫，仍齎藥品，俾往資於教習，用悉保於康寧。其体至懷，克承殊遇。今差秉義郎、閤門祇候曹誼，管押翰林醫官、太醫局教授、賜紫楊宗立，翰林醫諭、太醫局教授、賜紫杜舜舉，翰林醫候、太醫局教學成湘，迪功郎、試太醫學錄陳宗仁、藍茁前去。”

丁酉，王如天壽寺。

八月甲寅，以李壽爲西北面兵馬使，許載爲東北面兵馬副使。

戊午，遣鄭克永、李之美如宋謝賜權適等制科還國御筆詔書。王親製表文手書，其辭曰：“九重帝所，頒異渥以荐來；一幅天書，諭至懷而特厚。拜承之際，感涕無從。竊惟東海之梯航，世冒中天之雨露。臣祖文王之述職，戴元豐之大恩；臣父肅王之撫封，及崇寧之慈澤。念臣庸昧之質，傳家忠孝之風，享上滋恭，修方且舊。伏惟皇帝陛下，虞舜聰明而稽古，商湯勇智以濟時。鑄寶鼎以奠九州，作大晟而繼六代。講明堂配帝之禮，嚴辟雍養士之儀。顧曠世以遭逢，益馳誠於嚮慕。遂遣子弟，請入序庠，通言雖托於象胥，出谷企遷於喬木。豈意包容之德，加樂育於學黌；又令敷道之歸，稍知方於儒術。召宮庭而試藝，縻官秩以榮歸。曲煩款密之辭，仍作褒嘉之旨。龍蛇落筆，揮神翰之縱橫；雲漢回天，敷睿文之高妙。此蓋伏遇皇帝陛下，畢舉聖人之能事，丕承列考之遺風。至仁均覆於萬邦，殊眷獨深於小國。每見使者，示宴勞於內中；或策諸生，賜親臨於便殿。因以手詔優加寵靈，

臣敢不祇服訓辭，對揚休命。緘藏十襲，不惟傳子以及孫；勸勉一方，期致移風而易俗。以茲薄效，永答殊私。”

辛未，御宣政殿決重刑。

癸酉，幸安和寺。

九月庚辰朔，慮囚。

甲申，王妃延德宮主李氏薨。丁酉，葬綏陵。

全羅道按察使高進明，劾南原府使池俊、判官蔡克誠、文安慶等侵漁之罪，罷之。

癸卯，慮囚。

己酉，設藏經道場於會慶殿，王親行香。

閏月甲寅，宰樞詣內殿門，三表請復常膳，從之。

癸酉，親設消災道場于文德殿。

丙子，御清讌閣，命韓安仁講《老子》。

戊寅，王太子釋喪服。

守司空、左僕射、判尚書兵部事崔挺卒，謚貞毅。文宗嘗選武士，挺以善射中選，伐東女真有功。

庚辰，命給事中崔滋盛等分道選軍。

壬午，王如天壽寺。

乙未，幸順德王后魂堂。

十一月己酉朔，御清讌閣，命韓安仁講《易·復卦》。

十二月戊寅朔，慮囚。

（己亥）十四年，春正月戊申朔，放朝賀。

戊辰，尚書左僕射致仕高義和卒。

丙子，以李惟寅爲西北面兵馬使，拓俊京爲東北面兵馬使。

二月乙未，女真來朝。

丙申，宋曹誼等還，王出乾德殿，附表以謝。

丁酉，幸順德王后魂堂。

金主遣使來聘，致書曰：“詔諭高麗國王：朕興師伐遼，賴皇天助順，屢敗敵兵，北自上京，南至于海，部族人民悉皆撫定。今遣孛堇朮報諭，仍賜馬一匹，至可領也。”

壬寅，幸長源亭。

三月丁未朔，以金至和爲左僕射、參知政事，崔贊爲右僕射、判御書院事。

丙寅，慮囚。

夏四月壬午，王還宮。

甲午，王弟通義侯僑卒。

五月壬戌，幸安和寺。

六月丙子朔，王如奉恩寺。

甲申，親醺闕庭。

庚寅，王受菩薩戒于乾德殿。

甲午，以金緣檢校太尉兼太子太保，趙仲璋爲太子太保，金峻守司空，金至和爲太子少師，李軌修國史，朴景仁判翰林院事，王字之爲樞密院使、判三司事，韓安仁爲刑部尚書兼太子賓客，崔德玠爲吏部尚書，金沾爲御史大夫，鄭克永爲國子祭酒、左諫議大夫。

秋七月辛酉，王如天壽寺。

己亥，以尚書右丞李韶永爲西北面兵馬使，戶部侍郎金縝爲東北面兵馬副使。

八月乙亥朔，御清讌閣，命翰林學士朴昇中講《書·洪範》。

丁丑，遣中書主事曹舜舉聘于金，其書有“況彼源發乎吾土”之語，金主拒不受。

乙酉，幸順德王后魂堂。

丁亥，幸安和寺。

丁酉，幸長源亭。

癸卯，門下侍郎平章事趙仲璋卒，謚康懷。

契丹遣蕭公聽、耶律遵慶來，東路兵馬使都部署牒云：“准樞密院奉聖旨割字，高麗近因道途阻，難通貢賀，頒賜恩禮，亦且六年曠隔，仰差小使因便傳詔，並致所賜衣著。”

冬十月丁丑，王如天壽寺。

癸未，設百座會於內殿，齋僧于闕庭三日。

十一月辛亥，御清讌閣，命朴昇中講《中庸》。

戊辰，王閱射于清讌閣。

壬申，王閱射于重光殿，中者賞之。

十二月癸未，幸安和寺。

是歲，增築長城三尺，金邊吏發兵止之，不從，報曰“修補舊城”。葛懶甸<sup>[1]</sup>字董胡刺古習顯以聞，

---

[1] 《金史·外國傳下·高麗傳》作“曷懶甸”。



金主詔曰：“毋得侵軼生事，但慎固營壘，廣布耳目而已。”

（庚子）十五年春二月丙申，幸南京。

夏四月癸酉，至自南京。

五月辛亥，御乾德殿覆試。

丁巳，賜李之氏等及第。

甲子，禱雨于山川、社稷。

乙丑，召王師德緣講《金剛經》，飯僧。

戊辰，迎入佛骨于禁中。初，王字之使還，宋帝以金函盛佛牙頭骨以賜，置外帝釋院。至是，置于山呼亭。

六月庚午朔，王如奉恩寺。

辛未，雩。

甲戌，御清讌閣，命朴昇中講《書·洪範》。

丙子，以金昫爲中書侍郎平章事，李軌守司空、左僕射、參知政事，林有文爲右僕射、知門下省事，朴景仁知樞密院事，韓安仁爲禮部尚書，崔弘宰爲刑部尚書，尹惟贊爲尚書右僕射，宋秀爲兵部尚書。

己卯，御清讌閣，命國子祭酒鄭克永講《禮·月令》。

甲申，王受菩薩戒于乾德殿。

丙戌，慮囚。

丁亥，親醮于福源宮，遂幸安和寺順德王后真堂，薦酌流涕。

辛卯，宋商林清等獻花木。

丁酉，御清讌閣，命金緣講《書·太甲》。

秋七月甲辰，遼遣樂院副使蕭遵禮來。詔曰：“省所上表具悉，卿東陞立社，北闕稱藩，自二孽之戎生，致一方之路阻。嚮祈立嗣，未始行封；近稔勤王，又嘗敵愾。每念至此，已多慙然，更待乘宜，輒圖蕩寇。頃頒密詔，俾諭茲懷，道會多艱，人難偕往，或旋泝楫，莫達封函。賜幣微通，僅能將意；謝章遽拜，益驗輸誠。而又言出由衷，心期報上，既增慷慨，須事澄清，固在同仇，是爲大順。佇觀實效，續俟來音，更示頒宣，第思遵領。”

庚戌，禱雨于圜丘、廟社、群望。

乙卯，幸天和寺。

以智祿延爲西北面兵馬使，李鸞爲東北面兵馬使。

壬戌，宋遣承信郎許立進、武校尉林大容等來。

乙丑，中書侍郎平章事致仕康拯卒。

八月，自夏不雨，至于是月，五穀不登，疫癘大興。

辛未，幸外帝釋院，命五部讀《般若經》三日，以禳疫癘。

甲戌，慮囚。

設佛頂道場於文德殿七日。

戊寅，御宣政殿，決重刑。

庚辰，幸安和寺順德王后真堂，感傷久之，左右有流涕者。

辛巳，左正言洪若伊上疏論時政得失，嘉納之。

乙酉，幸西京。

戊子，壽星見。

丁酉，幸興福、永明寺觀潮。

戊戌，幸大東江登舟觀魚。

九月己亥朔，幸永明寺觀潮。

癸卯，以順德王后大祥，飯僧于常安殿。

乙巳，設消災道場于長樂殿。

戊申，制曰：“朕即位以來，再巡陪京，昔旋至而即歸，今久安而無患，庶推小惠，以慰輿情。八月乙酉以後，誤有所犯，爲所司論劾及贖銅徵瓦，咸除之。”

癸丑，宴群臣於長樂殿，親製《壽星明詞》，使樂工歌之。

乙卯，慮囚。

癸亥，樞密院使致仕金漢忠卒。

冬十月戊辰朔，日食。

辛巳，設八關會，王觀雜戲，有國初功臣金樂、申崇謙偶像，王感歎賦詩。

十一月壬寅，王至自西京，赦。

甲辰，慮囚。

癸亥，御清讌閣，命金富佺講《詩·泂水》。

十二月丁卯朔，王以順德王后喪畢，召太子及平章事李資謙、知奏事李資諒等，置酒極歡，恩賚甚渥。

甲申，親醺于福源宮，遂幸安和寺。

辛卯，以演檢校司徒、守司空、晉康伯，提檢校

司徒、守司空，朴景仁守司空、尚書左僕射、參知政事，仍令致仕。

（辛丑）十六年春正月丁酉朔，放朝賀。

己亥，制曰：“男女之制，尤重大倫，帝王之興，亦資內輔，欲家人之正位，須《關雎》之好仇。今將以辰韓公長女、大卿崔湧季女備之內職，有司宜據禮典定名以聞。”禮司請以王氏爲貴妃，崔氏爲淑妃，詔可。

辛亥，王太子加元服于壽春宮，百官表賀。

癸丑，以咸寧節，御乾德殿受賀，賜群臣宴。

乙卯，納貴妃。甲子，納淑妃。

二月壬辰，左遷中書舍人韓冲爲西京副留守，左正言任元濬爲殿中內給事。

三月戊戌，幸彰信寺，微行至綏陵。王之將行，諫官奏曰：“前古君王未有親詣后妃陵寢，考之禮典，亦無其文。玄宮久掩，宿草荒翳，至尊俯臨，能無悲感？臣子之心，不勝恐懼。伏望以禮自抑，俯循人望。”不從。

乙巳，宋遣姚喜來。

壬子，幸外帝釋院。

甲寅，御清讌閣，命翰林學士朴昇中講《禮·月令》，起居注金富軾講《書·說命》。

夏四月乙丑朔，幸普濟寺。

戊辰，慮囚。

乙亥，幸妙通寺。

戊子，幸安和寺，還次李資謙山齋，置酒。

己丑，以李資謙爲邵城郡開國伯。

五月丁酉，慮囚。

甲寅，設消災道場於賞春亭及日月、王輪、高峰、極樂寺三（七）〔十〕日。

乙卯，慮囚。

癸亥，百官禱雨于興國寺五日。

閏月甲子朔，王如奉恩寺。

丙寅，慮囚。

丁卯，召王師德緣禱雨於乾德殿五日，又禱于佛宇、神祠。

辛未，聚巫禱雨。

壬申，復召德緣禱于山呼亭。

乙亥，制曰：“天時失順，旱暵爲災，顧寡人否德以降殃，憫庶民無辜而殞命。祈禳無應，恐懼未遑，庶幾推恩，以召和氣。凡在獄囚，除斬絞二罪外，皆原之。其或官吏因緣公法，苛刻作弊，或以腐朽之穀，強給取息，或徵荒田之租，或興不急之役者，令中外攸司，一切禁治。”

丙子，親醮于純福殿禱雨，聚僧又禱于山呼亭及佛宇。

庚辰，御清讌閣，命朴昇中講《書·洪範》。

壬午，禱雨于法雲寺。

辛卯，御清讌閣，命起居舍人林存講《詩·雲漢》。

六月癸巳朔，御長齡殿，命朴昇中講《禮·月令》。

乙未，設道場于文德殿三日。

己亥，再雩。

庚子，命百官設羅漢齋禱雨。

丙午，大雨。

辛酉，左僕射、參知政事致仕朴景仁卒。

秋七月己卯，幸天和寺。

辛巳，以李壽爲西北面兵馬使，崔滋盛爲東北面兵馬使。

壬午，王如興王寺。

八月戊戌，御宣政殿，決重刑。

壬寅，幸普濟寺。

丁未，謁英、崇二陵，還次因孝院，製五言詩一首，令侍從文臣和進。

乙卯，幸長源亭。

九月丁亥，還宮。

辛卯，慮囚。

冬十月乙未，王如天壽寺。

丙申，設百座道場于會慶殿，令中外齋僧三萬。

壬子，幸洪圓寺。

太白晝見經天三十餘日。

十二月壬辰，御清讌閣，以宋帝所賜書畫等物宣示宰樞、侍臣。

辛丑，幸福源宮，遂幸龜山、安和二寺，御玉岑

亭宴從官。

庚申，慮囚。

（壬寅）十七年，春正月辛酉朔，放朝賀。

癸亥，以大原公倬爲太保，齊安侯偕進爵爲公。

辛未，幸神衆院。

丁丑，咸寧節，御乾德殿受賀，賜群臣宴。

己卯，以許載爲西北面兵馬使，李資德爲東北面兵馬副使。

丙戌，御清讌閣，命中書舍人金富軾講《易·乾卦》。

二月庚寅朔，日食。

己亥，門下侍郎平章事致仕崔弘嗣卒。

三月庚午，以金暉守司徒、判禮部事，林有文守司空、參知政事、判刑部事，王字之爲吏部尚書、參知政事、判戶部事，韓安仁參知政事、判工部事，崔弘宰爲樞密院使、判三司事，金若溫知樞密院事，李資諒爲樞密院副使，朴昇中爲翰林學士承旨，鄭克永爲翰林學士，李永知御史臺事、寶文閣學士，文公美爲禮賓少卿、樞密院知奏事，拓俊京爲衛尉卿、直門下省，金仁揆爲左諫議大夫。

丙子，慮囚。

丁丑，御紗樓，召文臣五十六人刻燭，命賦牧丹詩六韻。詹事府注（薄）〔簿〕安寶麟爲（第）〔第〕一，賜絹有差。時康日用以能詩鳴，王跂觀其作，燭將盡，日用得纔一聯，云：“頭白醉翁看殿後，眼明儒

老倚欄邊。”袖其藁伏御溝中。王命小黃門取視，嗟賞不已，曰：“此古人所謂：‘白頭花鈿滿面，不如西施半粧。’”慰諭而遣之。

己卯，親醺闕庭。

壬午，幸順天館，點檢接賓之事，宴宰樞于香林亭，忽覺背有微瘡，促駕還宮。癸未，王不豫，分遣人禱于山川神（祇）〔祇〕。

參知政事王字之卒。

乙酉，飯僧一萬于諸寺。

丙戌，慮囚。

丁亥，設消災道場于乾德殿五日。

戊子，齋僧一萬。

夏四月己丑朔，設道場於文德、宴親殿各五日。

制曰：“寡人（祇）〔祇〕承天命，叨纘丕緒，御于家邦，多歷年所。然臨事制宜，莫知其方，以致陰陽失序，穹壤挺祲。加疾病以彌留，愈憂懼而自勵，冀推渙汗，以謝幽明。凡名山大川秩在祀典者，各加名號。諸有罪者除斬絞外，皆原之，流配者量移。”

庚寅，設道場于宣政殿五日。

癸巳，門下侍郎平章事李資謙等詣純福殿，告天禱曰：“昔周武王有疾，周公以至誠請命于天，厥疾乃瘳。今臣等皆以愚不肖，承乏備員，無政術以安于民庶，無德行以媚于神（祇）〔祇〕。但以貪鄙不道，爲國巨蠹，天作之孽，上延君父。惟天聰明，宜降疾咎于臣等之身，無令元首久困沈痾。”



乙未，王疾革，扶坐見宰樞，曰：“朕以不德，天降之孽，疾疹不瘳，將何以處臣民之上，總軍國之事？太子雖在幼少，德行宿成，諸公同心協輔，無墜祖構。”群臣俯伏流涕，不知所言。王召太子曰：“予疾大漸，勢不復痊，爰釋重任，傳歸於汝。予追思平生所行，得少失多，慎勿效焉。但當稽古聖賢之道，奉我太祖之訓，不懈于位，永綏庶民。”太子俛首，泣不能起。

王命韓安仁取國璽以授之，遺詔曰：“朕荷天地之景命，奉祖宗之遺基，奄有三韓，十有八載。扶衰救弊，思與萬民而同休；宵衣旰食，未嘗一日而暫逸。憂勞積慮，疾恙踰時，有加無瘳，遂至大漸。權國事樞，睿哲之性，稟自天成，元良之資，蔚於人望，宜承末命，以即王位。凡軍國重事，並取嗣君處分。喪服以日易月，山陵制度，務從儉約。方鎮州牧，止於本處舉哀，不得擅離理所，成服三日而除。於戲！死生常道，人所難逃，始終得宜，朕亦何憾。尚賴廟社儲祉，臣隣協心，同輔嗣君，永康王室，使我國祚，垂于無窮。咨爾多方，當體予意。”

丙申，薨，殯于宣政殿，壽四十五，在位十七年。謚曰文孝，廟號睿宗，葬于城南，陵曰裕陵。仁宗十八年，加謚明烈。高宗四十年，加齊順。

史臣贊曰：“睿宗天資明哲，嘗在東宮，禮接賢士，敦行孝弟。及乎即位，旰宵憂勤，勵精求治。但志存拓境，僥倖邊功，仇隙未已。歆慕華風，信用胡

宗旦，頗惑其言，未免有所失矣。然知用兵之難，棄怨修好，使隣境感慕來服，恤鰥寡，養耆老。開設學校，教養生員。置清讌、寶文兩閣，日與文臣講論六經。偃武修文，欲以禮樂成俗。故韓安仁曰：‘十七年事業，可以貽厥後世。’信哉！”

[ G e n e r a l   I n f o r m a t i o n ]

书名 = 高丽史      1      世家      1

作者 = 孙晓主编

丛书名 = 域外汉籍珍本文库      标点校勘本

页数 = 4 3 2

S S 号 = 1 3 7 4 2 4 9 8

出版日期 = 2 0 1 4 . 1 1

出版社 = 北京：人民出版社；重庆：西南师范大学出版社

I S B N 号 = 9 7 8 - 7 - 5 6 2 1 - 6 5 9 5 - 8

中图法分类号 = K 3 1 2 . 3 3

原书定价 = 7 8 0 . 0 0 ( 全 1 0 册 )

主题词 = 高丽 ( 9 1 8 - 1 3 9 2 ) - 史料

参考文献格式 = 孙晓主编 . 高丽史      1      世家      1 . 北  
京：人民出版社；重庆：西南师范大学出版社，2 0 1 4 . 1  
1 .